

ებონ ბერი



ეს მან უნდებ მოჰყვე
მოგონებები ვისტა ბრენდზე

ერთმანეთი თომოვფაბათიანი წლების
ბოლოს გაიცემეს. ბერლინის შძარველმა
მერიმა RIAS-ს გვარნალისტი ბარი სენატის
სპიკერად დაინიშნა. ბერლინის კუთლის
აღმართვის შემთხვევაზე მეიმურავეს
აღმოსავლეთის პოლიტიკა, რაც ფლემფე
ბრანდტის კანცლერობის ფიქ მილნევად
ითვლება. ბარი ვილი ბრანდტის საგარეო
საქმეთა სამინისტროში და კანცლერის
ადარიატმიც გამყვაც როგორც ყველაზე
ახლო ფასანზო მეგობარი. მან
ბრანდტის ფავორიტიათ ანარქია
მოლაპარაკებები აღმოსავლეთის
ხელმძღვანელებრივ ფა გვერდიდან არ
მოსცილებია მას არც წილის ფარების
ტრანსფერის მოსალიდან გათავტომის
მრავალ ნეტებში. ისინი პოლიტიკის
მიზანც ერთგული მეგობრები იყვნენ, ამ
მეგობრობამ 1992 წელს ბრანდტის
გარდაცვალებიმდე გასტარი. ბარი
ბრანდტივალებ მყვება აქამდე უცნობ
ისტორიებს და მკითხველს აცნობს ვილი
ბრანდტის ათამიანურ მხარეს. იგი
მოვალეობრივს, როგორ დაინიჭ
ყველაზეური ბერლინში, მყვება
ერთობლივი მოგზაურობების, მძიმე და
სახალისო მომენტების შესახებ და
გასტიფებს ბრანდტის, ვენერისა და
შმიდტის როგორ ერთიერთობებშიც.
აეტორი გვაჩვენებს ბრანდტის სიდიადეს
და მის მერძოობიარე ბუნებას.
განსაკუთრებით კი მის ფასდაბლაც
შრომის უკეთესი, მშვიდობიანი და
ადამიანური სამოქადოებისთვის.

ეგონ ბარი

„ეს შენ უდია მოჰყვა“

მოგონებები ვიღი პრანდტზე

გერმანულიდან თარგმნა მარა ფანჯიკიძემ

თბილისი

2018

Egon Bahr

„DAS MUSST DU ERZÄHLEN“

ERINNERUNGEN AN WILLY BRANDT

Übersetzt ins Georgische von Maia Panjikidze

Ullstein Buchverlage GmbH, Berlin 2013

Friedrich-Ebert-Stiftung, Tbilissi 2018

რედაქტორი

ნინო ლეპანოვიძე

დამუშავდონებელი

ვიოლა ჭულუშვი

გარეკანის დიზაინერი

ილია ხელაია

ქართული გამოცემა მომზადდა ფრიდრიხ ებერტის ფონდის
ფინანსური მსარდაჭერით.

დაუშვებელია ფრიდრიხ ებერტის ფონდის მიერ გამოცემული
მასალების გამოყენება ფონდის თანხმობის გარეშე.



© ფრიდრიხ ებერტის ფონდი

სარჩევი

ეგონ ბარის „ეს შენ უნდა მოჰყვე“ – მოგონებები ვილი ბრანდტზე. ქართული გამოცემის წინასიტყვაობა (კურტ ბეკი)	5
წინასიტყვაობა (გიუნტერ ბეხლერი)	9
წინათქმა	13
დასაწყისი	15
პირველი ნაწილი – პერლინი	
შესავალი	17
შესასვლელი ბილეთი	23
ჯერ ერთმანეთის გვერდით, შემდეგ ერთმანეთთან ერთად 1961 წლის 13 აგვისტო	29
1961 წლის 13 აგვისტო	39
ჩაკირული გაყოფა	45
ახალი მიზნები	52
გამოუქვეყნებელი წიგნი	54
მეორე ნაწილი – ბონი	
დიდი კოალიცია – არაპოპულარული და გარდაუვალი	57
საგარეო უწყებაში	60
დაგეგმვის შტაბში	67

სინამდვილე	71
ნახტომი მწვერვალზე	77
დასაწყისი ვაშინგტონში	81
 მესამე ნაწილი – ტრიუმფი და ტრაგედია	
მოსკოვში	85
შევეგუოთ ან გადავლახოთ საზღვრები	94
მაში, იმოქმედე	103
უპასუხოდ დარჩენილი მონდომება: პოლონეთი	106
ბერლინის ხელშეკრულება – ხელოვნების ნიმუში	112
გერმანელების გარეშე არაფერი გამოვა (სატრანზიტო შეთანხმება)	121
ყველაფერი ან არაფერი	127
მეგობრის განსაცდელი	133
დასავლეთსა და აღმოსავლეთს შორის ნდობის ზრდა	136
ფინიშის სწორს	142
გაჭიანურებული სტარტი	147
ვენერი	152
დაცემა	161
შმიდტი და ბრანდტი	168
 მეოთხე ნაწილი – რწმენა	
ახალი დასაწყისი	177
უსაფრთხოება ვისთვის?	180
პარტნიორი – ამერიკა	188
სატრანზიტო, რომელსაც სასოწარკვეთამდე	
მიჰყავხარ (ევროპა)	192
შეიცან თავი შენი	197
„რაც უფრო ვძერდები, მით უფრო მემარცხენე ვხდები“ ის, რაც რჩება	212
	223

ეგონ ბარის „ეს შენ უნდა მოჰყვე“ –
მოგონებები ვიღი ბრანდტზე

ქართული გამოცემის წინასიტყვაობა

ეგონ ბარი ომის შემდგომი პერიოდის გერმანიის ყველაზე მნიშვნელოვან სოციალ-დემოკრატია რიგს განეკუთვნებოდა. ვიღი ბრანდტმა და მისმა ერთგულმა თანამოაზრემ 1963 წელს ერთად ჩამოაყალიბეს და განამტკიცეს ფორმულა „გარდაქმნა დაახლოების გზით“, რომელიც სოციალ-ლიბერალური კოალიციის დროს აღმოსავლეთის ახალი პოლიტიკის საფუძველი გახდა. ამდენად, ბარმა გადამწყვეტი წვლილი შეიტანა გერმანიის გაყიფვისა და ევროპის გახლეჩის გადალახვაში. საერთაშორისო დონეზე აღიარებული ექსპერტი ხანდაზმულ ასაკშიც იღვნოდა მშვიდობისა და ხალხთა შორის მეგობრობისათვის.

ბარი 1922 წელს დაიბადა ტიურინგიაში და ჯარისკაცი იყო მეორე მსოფლიო ომში. 1945 წლის შემდეგ ჯერ უურნალისტად მუშაობდა. 1956 წელს გახდა სოციალ-დემოკრატიული პარტიის წევრი. 1960-დან 1966 წლამდე ბერლინის მიწის პრესისა და ინფორმაციის სამსახურს ხელმძღვანელობდა, შესაბამისად, ის გახლდათ ვიღი ბრანდტის, როგორც სენატის ხელმძღვანელი მმართველი მერის სპიკერი. შემდეგ საგარეო უწყებაში გადავიდა, სადაც 1967-დან 1969 წლამდე დაგეგმვის შტაბზე იყო პასუხისმგებელი. 1969 წელს ფედერალური კანცლერის აპარატში

ასრულებდა სახელმწიფო მდივნისა და ბერლინის საკითხებში ფედერალურ საქმეთა რწმუნებულის ფუნქციას. 1972-დან 1974 წლამდე კი საგანგებო დავალებათა ფედერალურ მინისტრად მსახურებდა.

ამ წლებში ფედერალურ კანცლერ ვილი ბრანდტთან ერთად პრაქტიკულ პოლიტიკაში გაატარა გერმანიისა და აღმოსავლეთის ახალი პოლიტიკა. „აღმოსავლეთის ხელშეკრულებების არქიტექტორმა“ დაუღალავად იღვანა საბჭოთა კავშირთან, პოლონეთთან, ჩეხოსლოვაკიასთან, და, რასაკვირველია, გდრ-თან თანამშრომლობაზე დამყარებული ურთიერთობების ჩამოყალიბებისთვის. ბარის ზრუნვის მუდმივი ამოცანა იყო გერმანიის ორივე ნაწილის მოსახლეობის კეთილდღეობა და დასავლეთსა და აღმოსავლეთს შორის თანაარსებობის გაიოლება. ამ საქმეში იგი ეყრდნობოდა ვარშავის ხელშეკრულების წევრ სახელმწიფოებთან მოლაპარაკებების მონაწილეებთან თანდათანობით დამყარებულ ნდობასა და პარტნიორობას. ბარის განმუხტვის პოლიტიკა პატარა ნაბიჯების პოლიტიკა იყო, რომელმაც საბოლოოდ წარმატებამდე მიგვიყვანა – 1990 წელს გერმანიის გაერთიანება ეგონ ბარის გარეშე წარმოუდგენელი იქნებოდა.

ბარი 1972 წლიდან იყო ბუნდესტაგის წევრი, 1974-დან 1976 წლამდე კი ეკონომიკური თანამშრომლობის ფედერალური მინისტრი; იგი გახლდათ სოციალ-დემოკრატიული პარტიის ერთ-ერთი ყველაზე გამოკვეთილი მოაზროვნე. 1976-დან 1981 წლამდე საქმეთა მნარმოებლის რანგში სერიოზული კვალი დააჩნია პარტიას. ბარი მუდამ თავისი განმუხტვის პოლიტიკის ერთგული დარჩა. 1980-დან 1982 წლამდე გახლდათ წევრი ოლოფ პალმეს მიერ დაარსებული „განიარაღებისა და საერთო უსაფრთხოების დამოუკიდებელი საერთაშორისო კომისიისა“. 1984 წლიდან 1994 წლამდე კი სამეცნიერო დირექტორის რანგში ხლმძღვანელობდა მშვიდობისა და უსაფრთხოების პოლიტიკის სამეცნიერო ინსტიტუტს ჰამბურგში.

ეგონ ბარი და ფრიდრიჰ ებერტის ფონდი ერთმანეთთან
მრავალმხრივ იყვნენ დაკავშირებული. 1979-დან 2000 წლამდე
ბარი ფონდის გამგეობის წევრი გახლდათ და მის საერთა-
შორისო მიმართულებას მნიშვნელოვანწილად განსაზღვრავ-
და. 2015 წლის 20 აგვისტოს გარდაცვალებამდე ცოტა სწით
ადრე იგი ფრიდრიჰ ებერტს ფონდთან ერთად გეგმავდა მო-
გზაურობას საქართველოში: მოსკოვის მიერ საქართველოს
გახლეჩია, განსხვავებების მიუხედავად, 1950-იანი და 60-იანი
წლების გერმანიის სიტუაციას აგონებდა. საქართველოშიც ხე-
დავდა ბარი პატარა ნაბიჯების პოლიტიკის შანსს გახლეჩის
დასაძლევად – და მზად იყო რჩევები გაეცა. ეგონ ბარმა ეს
გეგმა ვეღარ შეასრულა. სწორედ ამიტომ, მის „მოგონებებს
ვილი ბრანდტზე“, რომელიც ბარისა და ბრანდტის პოლიტიკურ
ნააზრევს შთამბეჭდავად და სახალისოდ გადმოსცემთ, მრავალ
მკითხველს ვუსურვებთ საქართველოში.

კურტ ბეკი

ყოფილი პრემიერ-მინისტრი
ფრიდრიჰ ებერტის ფონდის გამგეობის თავმჯდომარე

წინასიტყვაობა

„მოგონებები ეგონ ბარზე“ უნდა ერქვას ამ წიგნს, რომელიც არა მხოლოდ ვილი ბრანდტის მემკვიდრეობაზე მოგვითხრობდა, არამედ წინამდებარე თხზულების ან გარდაცვლილი ავტორის უზარმაზარ დამსახურებაზე. ვილი ბრანდტს და ეგონ ბარს – განმუხტვის პოლიტიკის არქიტექტორებს – მჭიდრო მეგობრობა აკავშირებდათ, ორივე მათგანი იმსახურებს პატივის-ცემასა და მადლიერებას გასული საუკუნის 60-ანი და 70-იანი წლების აღმოსავლეთსა და დასავლეთს შორის დაპირისპირების დაძლევის გაძედული პოლიტიკისთვის. დღესაც არანაკლები ინტენსივობით ვმსჯელობთ ევროპის შემაშფოთებელი განვითარებაზე, „დასავლეთსა“ და რუსეთს შორის დაძაბულ და მწვავე ურთიერთობაზე, ვიდრე მაშინ. ალბათ ბევრს ახსენდება ჰელსინკის ფინალური აქტის ხელმოწერამდე არსებული დამუხტული ურთიერთობა აღმოსავლეთსა და დასავლეთს შორის. არადა, ბევრი რამ შეიცვალა 1975 წლის შემდეგ: სისტემებს შორის გლობალური კონფლიქტი ჩაანაცვლა რეგიონული გავლენის ზონებისა და მათზე ბატონობის კონფლიქტმა; ბლოკების სწორხაზოვანი დაპირისპირება – მულტიპოლარულმა და ბუნდოვანმა სტრუქტურამ; ტრანსატლანგურმა ალიანსმა მკაფიოობა დაკარგა და ა. შ. და მაინც: შესადარებლად და ევროპის დღევანდელი განვითარების გასააზრებლად, „მოგონებებს ვილი ბრანდტზე“ ფასდაუდებელი მნიშვნელობა აქვს.

რატომ ითარგმნა „მოგონებები“ ქართულად? ორი მნიშვნელოვანი ფაქტორი შეერწყა ერთმანეთს, რამაც საქართველოში ამ წიგნის მიმართ ინტერესი გამოიწვია. ერთი მხრივ, მე, როგორც შვეიცარიის ელჩი საქართველოში, ფაქტობრივად ყოველდღე ვესაუბრებოდი ამ წიგნის მთარგმნელსა და საქართველოს ყოფილ საგარეო საქმეთა მინისტრს მაია ფანჯიკიძეს საქართველოში არსებული კონფლიქტებისა და ქართულ-რუსული ურთიერთობების შესახებ. მეორე მხრივ კი თავად გახლდით 80-იანი წლების მეორე ნახევარში ჰამბურგის უნივერსიტეტის „მშვიდობის კვლევისა და უსაფრთხოების პოლიტიკის ინსტიტუტის“ მეცნიერ-თანამშრომელი; ამ ინსტიტუტს მაშინ ეგონ ბარი ხელმძღვანელობდა. ამგვარად, 2014 წლის ივნისში, როდესაც შვეიცარია ეუთოს თავმჯდომარეობდა, ეგონ ბარისა და მცირერიცხვანი ქართული დელეგაციის შეკრება მოვახერხე შტაინ ამ რაინში. ქართულ დელეგაციას საგარეო საქმეთა მინისტრი ხელმძღვანელობდა. ორდღიანი არაფორმალური შეხვედრა ორ ერთმანეთთან მტრულად განწყობილ სახელმწიფოს – საქართველოსა და რუსეთს შორის დაძაბულობის მოხსნის კონცეფციებისა და იდეების განხილვას ემსახურებოდა. ოთხმოცდათორმეტი წლის ეგონ ბარი, მიუხედავად ასაკისა, ენერგიით სავსე გახლდათ; მან ქართველ მეგობრებს თავისი უსაზღვროდ დიდი გამოცდილება გაუზიარა და ბევრი მნიშვნელოვანი რჩევა მისცა გერმანულ-გერმანული ურთიერთობების წარმატების თუ ტრანსატლანგურ-საბჭოთა ურთიერთობების შესახებ დიპლომატიური მოლაპარაკებების მაგალითებზე დაყრდნობით.

„მოგონებები ვილი ბრანდტზე“ უაღრესად შთამბეჭდავად აჯამებს ყველა იმ ფაქტორს, რამაც საბოლოოდ მიგვიყვანა ცივი ომის დაძლევამდე და გერმანიის გაერთიანებამდე – დაპირისპირებულ ინტერესთა დასაცხრობად შექმნილი დიპლომატიური ფორმულები, შეთანხმებების „შემოქმედებითი ორაზროვნება“,

ორივე გერმანული სახელმწიფოს აქტიური როლი განმუხტვის პოლიტიკაში, მოსკოვსა და ვაშინგტონს მიმართ ტრანსპარენტულობა, კონკრეტულ აქტორებს შორის ნდობის ატმოსფეროს შექმნა თვით შეიარაღების კონტროლისა და სამხედრო სფეროშიც კი, ამავე დროს კი საკუთარი დემოკრატიული ინტერესების, პრინციპებისა და ღირებულებების დაცვა.

ამ წიგნის მნიშვნელობა უკანასკნელი ორი წლის განმავლობაში კიდევ უფრო გაიზარდა, რადგან გლობალური პოლარიზების ფონზე უფრო მეტად გამწვავდა კონფლიქტი საქართველოსა და რუსეთს შორის. იმედს გამოვთქვამ, რომ „მოგონებები“ საქართველოში ბევრ მკითხველს დააინტერესებს და ქვეყანაში არსებული დაპირისპირების გადალახვაში შეიტანს წვლილს. კონფლიქტით დაზარალებული, რთულ პირობებში მცხოვრები ქართველები, აფხაზები და ოსები უთუოდ მადლიერები დარჩებიან.

გიუნტერ ბეხლერი ელჩი

ეუთოს თავმჯდომარის სპეციალური წარმომადგენელი საქართველოსა და რუსეთს შორის ჟენევის მოლაპარაკებებში

წინათქმა

ვილი ბრანდტმა შეგნებულად დატოვა თავის „მოგონებებში“ თეთრი ლაქები: „ეს შენ უნდა მოჰყვე“. მისი ნდობა აღმოსავლეთისა და განმუხტვის პოლიტიკას ეფუძნებოდა. ამ მოწოდებას წიგნით – „ჩემს დროს“ ვუპასუხე. ახლა კი ვსარგებლობ შემთხვევით და მოგითხრობთ ისტორიასა და ისტორიებზე, აღვწერ, თუ როგორ იქცა თანამშრომლობა მეგობრობად, რომელიც მისი გარდაცვალების შემდეგაც თან მდევს.

ცხოვრება დროთა განმავლობაში აქრობს წვრილმანებს, რომლებიც ამ ამბის ნაწილია. მეორე მხრივ კი, მეხსიერებამ შეჩერებული კადრებივით შემოინახა საკვანძო მოვლენები და გამონათქვამები, რომლებიც არსად გამქრალა.

სიახლოვე ყველაზე პირად სივრცეში ჩახედვის საშუალებას იძლევა, თუმცა, მხოლოდ იმდენად, რომ მეგობრობა აღწერო. ამას მოითხოვს პატივისცემა ცოცხლებსა და გარდაცვლილთა მიმართ.

დასაწყისი

ორივემ ვიცოდით: უკანასკნელად ვხვდებოდით და ვსაუბრობდით. ამქვეყნიური ვნებები უკვე უკან მოეტოვებინა, ტრიუმფი და წყენა ველარ სწვდებოდა. მის უკანასკნელ, ძალზე პირადულ სიტყვებს გულში ვინახავ. ეს მისგან მონიჭებული განსაცვიფრებელი საჩუქარია, როგორი ღირსებით შეხვდა აღსასრულს. კართან კიდევ ერთხელ მივტრიალდი. ერთმანეთს ხელი დავუქნიეთ.

მას შემდეგ თავს მარტო და დაცარიელებულად ვგრძნობ.

ალბათ ერთი კვირა თუ იქნებოდა გასული მისი გარდაცვალებიდან, როცა ლარს ბრანდტისგან ხელნაწერი ბარათი მივიღე. – მამაჩემს რომ დავემშვიდობე, წესისამებრ, და უკვე გამოვდიოდი, ვკითხე: „ვინ იყვნენ შენი მეგობრები?“ ვილის უპასუხია: „ეგონი“.

ამ ამბიდან ოცი წლის შემდეგ ეს მმატებს გამბედაობას, ვცადო ჩემი მოგონებები მოვყვე.

პირველი ნაწილი – პერსიტი

შესავალი

აღარ მახსოვეს, როდის გავიგე პირველად ვილი ბრანდტის სახე-ლი. მეხსიერებამ ვერ აღიდგინა, როდის შევხვდი და ვესაუბრე პირველად. ეტყობა, განსაკუთრებული შეხვედრა არ ყოფილა. უშუალოდ ომის შემდგომ პერიოდში ბრანდტი, როგორც ნორ-ვეგიის სამხედრო მისიის წევრი, თვალში არ უნდა მომხვედროდა.

1945 წლის ზაფხულში ჩემზე შთაბეჭდილება მოახდინა საბჭოთა კავშირის მიერ ოკუპირებული ზონისა და ბერლინის ქრისტიან-დემოკრატიული პარტიის თავმჯდომარის, იაკობ კაიზერის თავდაჯერებულობამ, როგორ გეგმავდა ჩრდილო-რაინი-ვესტფალიის წარმომადგენელ კარლ არნოლდთან და მიუნხენელ იოზეფ (ოქსენზეპ) მიულერთან ერთად ადენაუერი ძალაუფლებისგან ჩამოეშორებინა. იგი ამბობდა, „ადენაუერს, ამ სეპარატისტს არ უნდა ჩაუვარდეს ხელში მთელი ქრისტიან-დემოკრატიული პარტია“. 1949 წელს კი იჯდა ბონში ადენაუერის პირველ კაბინეტში საერთო გერმანული საკითხების ფედერალურ მინისტრად, მათ შორის, არ დაგვავიწყდეს, გერმანიის გაყოფის საკითხიც მას ეხებოდა და ცდილობდა საკუთარი პარტიის დასაქმებულთა ფლანგთან ერთად პატარა სამფლობელო შეექმნა.

1949 წლიდან ვიმყოფებოდი ბონში როგორც RIAS-ის (ამერიკული სექტორის რადიო) კორესპონდენტი და სხვა უურნალისტებივით, პროფესიული საჭიროებისამებრ, ბუნდესტაგის

პარტიების წამყვან პოლიტიკოსებს ვეეონტაქტებოდი. ორშაბათის შეხვედრებზე, რომელიც კოლეგებთან ერთად დავაწესე, ძალზე გულღიად ვსაუბრობდით (შეპირებულ დისკრეციას არავინ არღვევდა) ყველა პარტიის წარმომადგენელ მნიშვნელოვან ბატონებთან – ქალები პოლიტიკაში თითქმის არ ჩანდნენ. კანცლერი ადენაუერი ჩაიზე გვეპატიუჟებოდა ხოლმე პალე შაუმბურგში. ჩვენს წრეში იაკობ კაიზერს „კაიზერს სამფლობელოს გარეშე“ ვეძახდით, სანამ 1955 წელს პატივისცემამ არ შეცვალა ასევე პატივისცემით განმსჭვალული ქილიკი. მინისტრი დაუპირისპირდა თავის კანცლერს, რომელმაც პარიზთან შეათანხმა ზარის მხარის ევროპული სტატუსი, საკმაოდ ღიად მოქმედებდა და საარჩევნო კამპანიას ამ სტატუსის საწინააღმდეგოდ აფინანსებდა. მან „გაიმარჯვა“: ზაარლანდელებმა ხმათა თითქმის 68 პროცენტით ფედერალურ რესპუბლიკასთან მიერთება გადაწყვიტეს.

ბონი უაღრესად მყუდრო პატარა ქალაქი აღმოჩნდა. ჩემმა დიასახლისმა, როდესაც მისგან ავეჯით განცემული ითახი ვიქირავე და ვკითხე, ხომ გიხარიათ, რომ ახლა ბონი დროებითი დედაქალაქია-მეთქი, გაცოფებულმა მიპასუხა: „რა თქმა უნდა, არა! ქუჩაზეც კი ვეღარ გადახვალ, უკან თუ არ მიიხედე, მანქანა ხომ არ მოდისო“.

ბერლინიდან ვიცნობდი ფრანგული ლიცენზიის „კურიერის“ მთავარ რედაქტორს, პოლ ბურდინს. მას მოსწონდა კანცლერის კეთილგანწყობა საფრანგეთის მიმართ და ფედერალური მთავრობის ბრწყინვალე სპიკერი იყო. ერთ მშვენიერ დილას დამირეკა და გაოგნებულმა შემატყობინა, გუშინ საღამოს ადენაუერს ვახლდი რიონდორფში და უეჭველია, „მოხუცს გაერთიანება საერთოდ არ უნდა“. გადადგომის მეტი აღარაფერი დარჩენია, რადგან ყოველდღიურად უწევს საპირისპიროს მტკიცებაო. კიდევ სამი კვირა თამაშობდა, ჩახლართულად ლაპარაკობდა და შემდეგ მართლაც გადადგა. ეს ფაქტი იქცა

ადენაურის მიმართ ჩემი დაპირისპირების საკვანძო მოვლენად. სულ უფრო და უფრო ცხადად ვაცნობიერებდი, რომ ის და ვალტერ ულბრიხტი, სინამდვილეში, კონგენიალური პოლიტიკური ფიგურები იყვნენ. ორივე მათგანს ეწადა ქვეყნის თავისი ნაწილის შემომტკიცება და საკუთარი წონის გაზრდა, როგორც აღმოსავლეთში, ისე დასავლეთში. თითეული მათგანი, ქვეყნის თავის ნაწილში აღმოჩნდა უძლიერესი პიროვნება და ისინი ფლობდნენ პოლიტიკურ ასპარეზზ. ადენაუერზე, შუმახერთან მიმართებითაც იგივე ითქმის.

სოციალ-დემოკრატიული პარტიის თავმჯდომარე კურტ შუმახერი ძალიან მომწონდა; მან, ზედმეტი ალიაქოთის გარეშე, ჯერ კიდევ კონსტიტუციის ძალაში შესვლამდე, შეუნარჩუნა ფედერაციას ფინანსურ საკითხებში უზენაესობა, გამარჯვებულ ძალებთან მიმართებაში და ამით მეტი წონა შემატა გერმანიას. ადენაუერს უკვე ჩაქნეული ჰქონდა ხელი. წარმოდგენაც კი შეუძლებელია, როგორ განვითარდებოდა ფედერალური ჯარის აღმშენებლობა, დაფინანსების საკითხი მიწების თანხმობაზე რომ ყოფილიყო დამოკიდებული. მიწების ფედერაცია ფედერალური სახელმწიფოს ნაცვლად: შუმახერის მიერ ფინანსების საკითხში მოპოვებული უზაენაესობის გარეშე, ფედერაციული რესუბლიკა სხვანაირი იქნებოდა.

შუმახერმა კიდევ ერთ ისტორიულ გადაწყვეტილებას მიაღწია ჯერ კიდევ 1945 წელს. დასავლეთის ზონებშიც, აღმოსავლეთის მსგავსად, შეიმჩნეოდა მონდომება, ესწავლათ ვაიმარის რესპუბლიკის შეცდომებზე. ოტო გროტევოლმა, როგორც გერმანის სოციალ-დემოკრატიული პარტიის ცენტრალური კომიტეტის თავმჯდომარემ, მოუწოდა გერმანიის მუშათა კლასს ებრძოლათ ორგანიზაციული ერთობისთვის და იმედი ჰქონდა, თავად გახდებოდა პირველი, ვინც აღმოსავლეთსა და დასავლეთში მცხოვრები ყველა გერმანელის სახელით ილაპარაკებდა. ეს იმ დროს ხდებოდა, როცა დასავლეთის სამ ზონაში სო-

ციალ-დემოკრატიული პარტიის ერთიანი ორგანიზაციაც კი არ იყო ნებადართული. აქ ორი კაცი აცხადებდა ლიდერობაზე პრე-ტენზიას. პირად შუღლსაც არ უთამაშია მცირე როლი, რომ შუ-მახერმა „რაიხში“ აღკვეთა ერთიანი პარტიული ორგანიზაცია, რომელიც ყველას პირზე ეკერა, როცა პოტსდამის კონფერენ-ციამ გერმანია არ გაყო. ფედერალურმა პრეზიდენტმა თეოდორ ჰინსმა შუმახერის დაუკინყარი ლვანლი უწოდა იმ ფაქტს, რომ მოხერხდა ტოტალიტარული იდეოლოგიის შეკავება. შუმახერი მიხვდა, რომ ტყუილად არ ეპარებოდა ეჭვი, „შეინარჩუნებდა თუ არა ბერლინი მოქმედების თავისუფლებას“ მას შემდეგ, რაც მოსკოვმა კომუნისტური პარტიების და სოციალ-დემოკრატიუ-ლი პარტიის გერმანიის ერთიან სოციალისტურ პარტიასთან შერწყმა გადაწყვიტა. ერნსტ ლემერი, იაკობ კაიზერის მოად-გილე, ამბობდა ოდნავ მოგვიანებით, ქრისტიან-დემოკრატიულ პარტიასაც იგივე ბედი ენია თავისი ანტიპოდების, კაიზერისა და ადენაუერის წყალობითო. ბერლინის მიმართ უნდობლობით განმსჭვალულები შეხვდნენ ერთმანეთს – გერმანიის გაყოფა-ში, რომელზეც მათზე ძლიერები აგებდნენ პასუხს, მათაც შეი-ტანეს პატარა წვლილი.

შუმახერი თავდაჯერებული გერმანელი გახლდათ. ფა-შისტების ნინაალმდეგ მებრძოლი კაცის სიამაყე აძლევდა უფლებას, ოთხ გამარჯვებულ ძალასთან, გერმანიის ინტერე-სების დაცვისას პრინციპულად, ლამის უხეშად ელაპარაკა, თითქოს თანასწორთა შორის თანასწორი ყოფილიყო; სუვერე-ნული სახელმწიფოს წარმომადგენელი გეგონებოდა, რაც ჩვენს ქვეყანას მაშინ ნამდვილად არ ეთქმოდა. ბევრი უცხოელის ყურს მისი სიტყვები ნაციონალისტურ რიტორიკად ხვდებოდა, ყოველ შემთხვევაში, ადენაუერის ენას ვერ შეადარებდი, იგი შუმახერს აგდებულად უწოდებდა „მორგებულს“. სულ უფრო პატივისცემით ვიმსჭვალებოდი ამ კაცის მიმართ, ვინმეს დაუხ-მარებლად თითქმის რომ ველარ მოძრაობდა და მიუხედავად

იმისა, რომ გრძნობდა, ბევრი დრო აღარ დამრჩენიაო, თავს არ ინდობდა და მთელი შემართებით იბრძოდა თავისი მიზნებისთვის.

გარდა ამისა, ბონში გატარებულმა სამმა წელიწადმა და-მარწმუნა, რომ სოციალ-დემოკრატიული პარტია იყო ერთადერთი, რომელმაც გულწრფელად დაისახა ჩვენი ქვეყნის გაერთიანება თავისი პოლიტიკის პრიორიტეტად. ამიტომ მისი წევრობა მომინდა, მაგრამ შუმახერმა მირჩია, ნუ იზამო: მირჩევნია, რა-დიოში სოციალ-დემოკრატების კვიფას არ მიგათვალონო.

ბერლინში ვილი ბრანდტის საარჩევნო კამპანია პარტიის თავმჯდომარეობისთვის, ფრანც ნოიმანის წინააღმდეგ, ბორ-ძიკით მიმდინარეობდა, მე მას ბონიდან ვაკვირდებოდი, მაშინ გავიცანი ბრანდტი შორიდან. იგი „დიდი მერის“ ერნსტ როიტერის ახალგაზრდა მეგობრად ითვლებოდა. ორივე ემიგრაციიდან აკვირდებოდა „რაიხის“ დაცემას. ორივე უფრო მეტ სიმპატიას გამოხატავდა ამერიკის მიმართ, ვიდრე სოციალ-დემოკრატიული პარტიის ხელმძღვანელობა ბონში. ორივე უფრო გახსნილი, ღია იყო, ვიდრე შუმახერი. 1953 წლის დასაწყისში როდესაც RIAS-ის მთავარი რედაქტორი გავხდი, როიტერს ხშირად ვეცდებოდი. ვმსჯელობდით ხოლმე მას და ბონში სოციალ-დემოკრატიული პარტიის ხელმძღვანელობას შორის საგარეო პოლიტიკის საკითხებში არსებულ დაძაბულობაზე. შთაბეჭდილება მრჩებოდა, რომ იზიარებდა ჩემს რჩევას, პარტიის თავმჯდომარეობისთვის ებრძოლა. შევთანხმდით, საუბარი კვლავ გაგვეგრძელებინა. სამწუხაროდ, შეთანხმება ფუჭი აღმოჩნდა, რადგან 1953 წლის შემოდგომაზე უცწრად გარდაიცვალა.

როიტერის გარდაცვალების შემდეგ ბრანდტი ჩემთვის „მის-ტერ ბერლინი“ გახდა, არა ბუნდესტაგში მისი გამოსვლების შინაარსის, არამედ მისი უშუალო საუბრის გამო, რომელსაც ბუნდოვანი პარტიული რიტორიკის არაფერი ეცხო. ეს გახლდათ კაცი, რომელსაც მზერა აღმოსავლეთისკენაც მიეპყრო, მაშინ,

როცა ბონელები სულ უფრო და უფრო დასავლეთისკენ იყურე-ბოდნენ და მოქმედებდნენ. ისევ მოვინდომე მისი პარტიის წევრი გავმხდარიყავი. ბუნდესტაგის რესტორანში შევხვდი, რომ მისი აზრი მომესმინა. „ბონში მიღებული მთელი გამოცდილების გათვალისწინებით მივხვდი, რომ ეს არის ერთადერთი პარტია, რომელსაც მართლაც სწადია ქვეყნის გაერთიანება“, ასე დავასაბუთე ჩემი სურვილი. მაშინვე ჩამიხშო ვნება: „გადაჭარბებული წარმოდგენა გაქვთ პარტიის წევრობით გავლენის მოხდენის შესაძლებლობაზე“. ხანდახან გარედან გამოხატული პოზიციით მეტს მიაღწევ, ვიდრე შიგნით ყოფნითო. ასე რომ მეორედ გამომისტუმრეს უარით.

შესასვლელი ბილეთი

შუმახერის გარდაცვალების შემდეგ, 1952 წელს, მემკვიდრედ მისი მოადგილის -ერის ოლენჰაუერის არჩევა დროებით მოვლენად აღიქმებოდა. ლონდონის ემიგრაციიდან დაბრუნებული ეს ალალი დემოკრატი ადენაუერისთვის ნამდვილად არ წარმოადგენდა საფრთხეს. ქრისტიან-დემოკრატიული და ქრისტიან-სოციალური პარტიების გაერთიანებამ პლაკატებს დააწერა: „მთავარი კანცლერია“. სოციალ-დემოკრატებმა ამ ლოზუნგს დაუპირისპირეს: „ოლენჰაუერი ადენაუერის ნაცვლად“ და, სინამდვილეში, ადენაუერს უწევდნენ რეკლამას. ორმოცდაათიანი წლების შუაში მისი ეპოქის დასასრული ჯერ არ ჩანდა. ქდე/ქსკ გაერთიანებაში ჯერ არ გამოკვეთილიყო მისი მემკვიდრე, ხოლო ეკონომიკური სასწაულის მამას, ლუდვიგ ერჰარდს ადენაუერმა ასეთი განაჩენი გამოუტანა: „აბა სცადეთ და პუდინგი მიაჭედეთ კედელზე“.

ოლენჰაუერის შემდეგ სოციალ-დემოკრატიულ პარტიაში ოთხ სახელზე მსჯელობდნენ. ესენი იყვნენ: კარლო შმიდტი, რომელმაც კონსტიტუციას დააჩნია დიდი კვალი, ფრაქციის თავმჯდომარე ფრითც ერლერი და შემდეგ მოდიოდა ორი სახელი – ასაკობრივი იერარქიით ბონელ უურნალისტებს მანამდე ნაკლებად რომ მოხვედროდათ თვალში – ბრანდტი და შმიდტი. ერლერმა კარლო შმიდტს, ბუნდესტაგის გამორჩეულ, ბრწყინვალე ორატორს, უნოდა კაცი, რომელსაც დიდი მომავალი უკვე

უკან მოეტოვებინა. ასახელებდნენ კიდევ ერთს – ჰერბერტ ვენერს; მას ზურგს უმაგრებდა ხელშეუხებელი ანტიკომუნისტის, შუმახერის რეკომენდაცია, ყოფილი კომუნისტი ვენერი, მიუხედავად მოსკოვური წარსულისა, ჭეშმარიტ სოციალ-დე-მოკრატად გადაიქცაო, თუმცა სწორედ მისი წარსული ხდიდა პარტიის თავმჯდომარეობას შეუძლებელს.

ოლენპაუერის მიერ უნგრეთის 1956 წლის აჯანყებაზე გაკეთებული სულელური კომენტარის შემდეგ ბრანდტს მომავალი წლის არჩევნებზე მისი პარტიის საშინელი დამარცხება ვუნინასწარმეტყველე და კიდევ ერთხელ დავიუინე, ამჟამად ბუნდესტაგის რესტორნის ტერასაზე, პარტიაში უნდა შემოვიდე-მეთქი. „ვისაც რჩევა არ ესმის, არაფერი ეშველება“, გაიცინა მან თანხმობის ნიშნად. ასე გავხდი 1956 წელს პარტიის წევრი. ბრანდტისთვის ეს დიდ რისკს არ წარმოადგენდა. ჩემი კომენტარები რადიოში, რამდენადაც მისთვის ცნობილი იყო, კარგად ესადაგებოდა მის ამბიციურ წარმოდგენას თავდაჯერებულ საგარეო პოლიტიკაზე. ეს „მზითვად“ მივიტანე. ბრანდტმა დამისახელა მისამართი ბერლინში, რომელიც პარტიული წიგნაკისთვის დამჭირდებოდა როგორც ბონელ კორესპონდენტს. მოგვიანებით აღმოვაჩინე, რომ ჰაინრიხ ალბერტ-ცის მისამართი მოუცია.

ჩემი, როგორც სოციალ-დემოკრატიული პარტიის ახალგა-მომცვარი წევრის სავიზიტო ბარათად იქცა სიტყვა, რომელიც ბერლინის ცელენდორფის ოლქში 1957 წლის იანვარში წარმოვთქვი, ოლქის დელეგატების შეკრებაზე. როგორც „არა დაბადებით სოციალ-დემოკრატმა, არამედ მოგვიანებით ჩამოყალიბებულმა“, ვალიარე, რომ მიჭირდა მიმართვა „ამხანაგოთი“, რადგან ვფიქრობდი, ეს სიტყვა უაზრო ტრადიციონალიზმად არ უნდა ქცეულიყო, არამედ უნდა გაეთავისებინა პოლიტიკური ოჯახის კუთვნილების განცდას.

შიდა პოლიტიკური სიტუაციის დახასიათების შემდეგ ვთქვი: „პარტიაში შევედი არა საზოგადოების შესაცვლელად, არამედ იმისთვის, რომ პარტიის საგარეო პოლიტიკა შევცვალო“. „სოციალ-დემოკრატიულმა პარტიამ უნდა შეიტანოს წვლილი ერის ცნების მიმართ გერმანელთა შებოჭილი დამოკიდებულების დაძლევაში“. „ყველა იმ დანაშაულის გათვალისწინებით, რომლებიც ერის სახელით სხვა ხალხებისა და საკუთარი ხალხის მიმართ განხორციელდა, არ უნდა დავუშვათ ერის ცნების უარყოფა“. „დამწვარ ბავშვს ეშინია ცეცხლის, მაგრამ ცხელ საჭმელზე მთელი ცხოვრება ხომ ვერ იტყვის უარს. სანამ გერმანია გაყოფილია, ჩვენ ერი არა ვართ. ერზე უარის თქმა გაერთიანებაზე უარის თქმას ნიშნავს. ეს იქნებოდა ჩვენი ხალხის თვითმკვლელობა და დემოკრატიის ღალატი; რადგან დემოკრატია დასრულდება, თუკი გაერთიანების იდეას ვერ გაუმკვლავდება“.

შემდეგ პირველად წარვადგინე თანმიმდევრულად საგარეო პოლიტიკის ძირითადი მიმართულებები. ჩემი მაშინდელი გამოსვლიდან ქვემოთ მოყვანილი აზრები წარმოაჩენს განმუხტვის გრძელვადიანი პოლიტიკის მიმართ სრულ თანმიმდევრულობას და შინაგან სიმტკიცეს: „აღმოსავლეთსა და დასავლეთს შორის არ უნდა მივდიოთ აინონა-დაინონას პოლიტიკას... ჩვენი დასავლელი მეზობლების მხარდაჭერის გარეშე საერთოდ შეუძლებელია გერმანიის საგარეო პოლიტიკის განხორციელება ... კომუნიზმმა, როგორც იდეოლოგიამ, თავისი დრო მოქამა ... რუსეთის სახელმწიფო ონტერესებმა, როცა საქმე საქმეზე მიდგა, რუსეთის იდეოლოგიურ ინტერესებს გადაასწრო ... ჩვენი უსაფრთხოება ძევს ამერიკის მიერ მოცემულ გარანტიაში ... ნატო უნდა მოქმედებდეს, სანამ მას ისეთივე უსაფრთხოების უკეთესი მექანიზმი შეცვლიდეს ... გაერთიანების ფასად უნდა განვიხილოთ ალიანსის წევრების ატომურ შეიარაღებაზე და-თანხმება და მხოლოდ გაერთიანებული გერმანიის სახელით

ავიღოთ ატომურ იარაღზე უარის თქმის ვალდებულება... უსაფრთხოების ნებისმიერი ხელშეკრულება, რომელიც მოიცავს აღმოსავლეთ ევროპის ქვეყნებს და ამერიკის ყოფნას კონტინენტზე, დასაშვებია ... გერმანიის ომის შემდგომი პოლიტიკის ახალ ფაზას ეწოდება აღმოსავლეთის პოლიტიკა“.

ბრანდტს არასოდეს უკამათია ჩემთან ამ გამოსვლაზე. მან იცოდა ტექსტი, რომელიც, სიმწვავის გამო, მხოლოდ ორგანიზატორებისთვის მქონდა გაგზავნილი. შესაბამისად, იცოდა, რა ვთქვი და რას ვფიქრობდი. შემდგომი ათწლეულების მანძილზე, პრაქტიკულ საქმიანობაში, ჩვენ შორის პოლიტიკის მიმართულებაზე კამათი არ ყოფილა. თუ შემეკითხებით, როგორ ვაახლოებდით განსხვავებულ პოზიციებსა და გადაწყვეტილების ალტერნატიულ შესაძლებლობებს და ხანდახან მაინც თუ ვენინააღმდეგებოდით ერთმანეთს, შემიძლია გიპასუხოთ: ასეთი რამ არ მომხდარა. გვისაუბრია ტაქტიკურ მიზანშეწონილობაზე, სასარგებლო თუ ზედმეტ არგუმენტებზე გამოსვლის ან დოკუმენტის წერისას. უმეტესად, ვენდობოდი მის შეუდარებლად დიდ გამოცდილებას, მაგრამ მასაც შეეძლო სხვების არგუმენტი გაეზიარებინა. დიდი ხანი დამჭირდა, სანამ სრულად გავიცნობიერე ჩვენი საერთო თვალთახედვა. წლების განმავლობაში ეს ისე დაიხვენა, რომ, სხვების თანდასწრებით, მისი თავის მოძრაობაზე თუ წარბის აწევაზე ვხვდებოდი, რას ფიქრობდა. პოლიტიკური მიმართულება იყო სწორი. მოულოდნელი სიურპრიზები არ მეღოდა.

1957 წლის ოქტომბერში, ჩემი გამოსვლიდან ნახევარი წლის შემდეგ, ვიღი ბრანდტის ბერლინის მმართველ მერად არჩევას, ბონიდან ზერელად ვადევნებდი თვალს. თუმცა, მისი საგარეო პოლიტიკური მნიშვნელობის ზრდა ჩემზე შთაბეჭდილებას ახდენდა. ვალიარებდი, რასაც მიაღწია ბერლინისთვის. გულწრფელი აღფრთოვანებით შევცქეროდი, მაგრამ წამით არ გამივლია თავში, რომ როდესმე მასთან ვიმუშავებდი. არც ფე-

დერალურ მთავრობაში უფიქრია ვინმეს განსაკუთრებულად, რომ გამოჩენდა კაცი, რომლისთვისაც ანგარიში უნდა გაეწიათ. ადენაუერსაც კი.

1959 წელს ფედერალურმა მთავრობამ გადაწყვიტა, განვითარებად ქვეყნებში განთავსებულ ჩვენს საელჩოებში რამდენიმე ჟურნალისტი მიევლინა. 1958 წელს ხრუშჩოვის ულტიმატუმის შემდეგ, რომლითაც მან დასავლეთ ბელინის „თავისუფალ ქალაქად“ აღიარება და დასავლელი მექანიკირების ჯარების გაყვანა მოითხოვა, დასავლეთს გდრ-ის არაღიარებისთვის უნდა ემუშავა ამ სახელმწიფოებში. მე დამნიშნეს განაში დასავლეთ აფრიკის რეგიონალურ რწმუნებლად. დაბრუნებისას საგარეო საქმეთა მინისტრმა პაინრის ფონ ბრენტანომ (ქდკ) საგარეო საქმეთა უწყებაში დარჩენა შემომთავაზა. თითქმის იმავე დროს შემომთავაზა ჰენრი ნანენმა უაღრესად მომხიბვლელი რამ – მისი მოადგილის რანგში მემუშავა ჟურნალ „შტერნის“ პოლიტიკურ გამოცემად გარდაქმნაზე (მეცამეტე ხელფასი საშობაოდ, მეთოთხმეტე ხელფასი შვებულებისთვის, სამსახურის მანქანა და სახლი). სანამ ჩემთვის ვბჭობდი, ბერლინის ფედერალურმა სენატორმა გიუნტერ კლაინმა დამირეკა: მმართველ მერს სურს გაგესაუბროთო.

ბრანდტს ბუნდესტაგის ფონები შევხვდი დილის ათ საათზე – მისთვის, როგორც მოგვიანებით გავიგე, ეს დრო თითქმის შუალამეს უდრიდა. არც დავმსხდარვართ, მოკლედ მკითხა, ჩემი პრესის განყოფილების უფროსი ხომ არ გახდებოდიო. ერთი წამიც არ მიყოყმანია, ისე დავეთანხმე. დანაჩენი CdS-სთან გაარკვიეთ. „ვინ არის და რა არის CdS?“ „სენატის კანცელარიის შეფი. მთავარია, მას მოურიგდეთ“. ვკითხე, ახლა ვინ არის ამ პოსტზე-მეთქი. „პენსიაზე გადის“. „როდის დავიწყო მუშაობა ბერლინში?“ „რაც შეიძლება, მალე“. საუბარი სამი წუთიც არ გაგრძელებულა. ხანდახან რა სწრაფად მიიღება მთელი მომავალი ცხოვრების განმსაზღვრელი გადაწყვეტილე-

ბები. კანცელარიის შეფი ჰაინრიხ ალბერტცი აღმოჩნდა. მასთან შევათანხმე დეტალები და ბერლინის სენატის პრესისა და ინფორმაციის სამსახურის უფროსად დაწყების თარიღი – 1960 წლის პირველი თებერვალი.

ჯერ ერთმანეთის გვერდით, შემდეგ ერთმანეთთან ერთად

სამსახურის დაწყებიდან ორიოდე დღეში შედგა ჩვენი პირველი კერძო საუბარი. გვიან საღამოს მარტო აღმოვჩნდი უზარმაზარ საწერ მაგიდასთან მჯდომი ბრანდტის პირისპირ. „კაცმა რომ თქვას, ერთმანეთს წესიერად არც კი ვიცნობთ“, იყო ჩემი პირველი წინადადება. ამ უწყინარმა ფრაზამ სახე გაუხევა. ფხუკიანი უნდა ყოფილიყო, რომ ჩემი ნათქვამი დაახლოების უტიფარ მცდელობად აღექვა. მისი მნიშვნელოვანი მიმიკა ჩემთვის ადგილის მიჩენის ტოლფასი იყო. მხოლოდ მაშინ მოლბა, როცა დავამატე: „მე თქვენ ყოველთვის გეტყვით, რასაც გავიფიქრებ, გინდაც არ მოგეწონოთ“. შემაწყვეტინა: „ძალიან ცუდი სათქმელი თუ გექნებათ, გთხოვთ, მხოლოდ მაშინ მითხრათ, როცა მარტონი ვიქნებით“. ჩემი პასუხი: „თქვენი გადაწყვეტილებები შეუვალი იქნება, მთავარია, სინდის არ ეწინააღმდეგებოდეს“. საკითხი ასე არასდროს დასმულა.

მას მაშინ მიუჟახლოვდებოდი, ძალიან მიახლოვებას თუ არ შეეცდებოდი. პატივისცემა იმ საზღვრის მიმართ, რომლითაც თავის ყველაზე პირადულს იცავდა, დროთა განმავლობაში ჩემთვის თავისთავად ცხადი გახდა, მისთვის კი გარანტია, რომ ყოველთვის თავად გადაწყვეტდა, რამდენად გამეხსნებოდა. არასოდეს მიკითხავს რამე პირადული, თუ თავად არ წამოიწყებდა საუბარს, თუმცა, რაღაც-რაღაცები მაინტერესებდა.

პრესაში მოარული ჭორებიც ტაბუდ დარჩა. ჩვენ შორის მზარდი ნდობის საიდუმლოება იმაში მდგომარეობდა, რომ არცერთ ჩვენგანს არ გვიცდია როდესმე, ყველაზე დაფარული „მე“-ს მესაიდუმლე გავმხდარიყავით.

იმ კაცის ავტორიტეტს, რომელმაც ბრწყინვალედ მოიგო არჩევნები ბერლინში და წარმატებით მოიარა მსოფლიო, ხომ შეიძლებოდა დაეთრგუნე. იგი იაპონის იმპერატორმა ჰიროჰი-ტომ, ინდოეთის პრემიერ-მინისტრმა ნერუმ, გაეროს გენერალურმა მდივანმა ჰამარსკიოლდმა და პრეზიდენტმა აიზენ-ჰაუერმა მიიღეს; ნიუ იორქში ნამდვილი აღლუმი მოუწყვეს. ამას ემატებოდა ჩემი, როგორც უურნალისტის წუხილიც, უცებ რომ აღარ მქონდა საკუთარი სათქმელის გამოხატვის უფლება, თანაც პასუხისმგებელი ვიყავი იმაზე, რასაც ბერლინის სენატის სახელით ვაცხადებდი. თავში ეს აზრი მიტრიალებდა – ხომ არ აღმოვჩნდებოდი მისი გავლენის ქვეშ და დავკარგავდი საკუთარ სტილს – თანამშრომლობის განმავლობაში თანდა-თანობით მივხვდი, რომ ჩემი წუხილი უსაფუძვლო იყო.

დოკუმენტის შინაარს შეფი განსაზღვრავდა. როდესაც ფრაზებს ვხვეწდით და ჩემს რთულ წინადადებებს უმონყ-ალოდ ანაწევრებდა, მივხვდი, რომ მმართველი მერი კარგი რედაქტორი იქნებოდა. ჩემდა სამარცხვინოდ, უაზრო წინა-დადება თუ გამეპარებოდა, უბრალოდ იტყოდა ხოლმე „ასევე დარჩეს“. სწორედ ამ გამოთქმებს მოჰყვებოდა ხოლმე ყველაზე მქუხარე ტაში. ჩვენს საწერ მაგიდებს შორის აქეთ-იქით მო-სიარულე ხელნაწერებზე მუშაობისას, ისე ხვეწდა სტილს და თანაც, თავისი მწვანე მელნით სიტყვებს კი არ ცვლიდა, არა-მედ გახაზავდა ხოლმე ან კითხვის ნიშანს დაუსვამდა. შემდეგ ვმსჯელობდით და ვაყალიბებდით საბოლოო ვერსიას. უთვა-ლავჯერ გვისაუბრია და ორივე გავუშინაურდით ერთმანეთს აზროვნების თვალსაზრისით, უკეთ გვესმოდა ერთმანეთის, ვცდილობდით საერთო ძალისხმევით დაგვემარცხებინა შიშე-

ბი, დაგვესახა იმედები, გეგმები, მოკლე და გრძელვადიანი მიზნები გაგვეხორციელებინა. ბრანდტი დარწმუნდა, რომ მე მხოლოდ მასთან და მისთვის ვმუშაობდი. ვერავინ ვერ ჩაწვდა ამ პარტნიორობას რიჰარდ ფონ ვაიცჰეკერზე უკეთ, რომელ-მაც ერთხელ თქვა: „ვილი ბრანდტი და ეგონ ბარი – ეს გახლ-დათ სანიმუშო თანამშრომლობა ორი სრულიად განსხვავებული პიროვნებისა. ურთიერთდახმარებით მათ მიაღწიეს საკუთარი ნიჭის სრულ გაფურჩქვნას“.

ბრანდტი სახელმწიფოს უმაღლესი თანამდებობის კანდი-დატობაზე კი ფიქრობდა, მაგრამ, არავითარ შემთხვევაში არ სურდა ამისთვის ბრძოლა. ალბერტცი და მე სკეპტიკურად ვუყურებდით ამ ამბავს, ვფიქრობდით, რომ ნაადრევი იყო და ძეგლად ქცეული ადენაუერის წინააღმდეგ ნაკლები იყო წარ-მატების შანსი. თუმცა როდესაც შესთავაზეს – და რახან ამ შეთავაზებას ელოდა – თითქოს ტვირთი მოეხსნაო, ისე დაე-თანხმა. ბერლინში მისი „მაფია“ მხოლოდ იმაზელა ფიქრობდა, რა იქნებოდა მოქმედების საუკეთესო გეგმა.

ჰანოვერში 1960 წლის პარტიულმა ყრილობამ ბევრი პოლი-ტიკური და პირადული სიახლის მოწმე გავიხადა. პირველად აირჩია პარტიამ „კანცლერობის კანდიდატი“, მაშინ, როცა პარ-ტიის არჩეულმა თავმჯდომარემ, ერის ოლენჰაუერმა თანამდე-ბობა შეინარჩუნა. კლაუს შუტცმა უბრალოდ მოიპარა ეს იდეა აშშ-სგან, სადაც პრეზიდენტობის კანდიდატ კენედის საარჩევ-ნო კამპანიას აკვირდებოდა.

ბრანდტმა თავის საკანდიდატო გამოსვლაში პარტიის ეროვნულ ტრადიციაზე გაამახვილა ყურადღება და ერთმა-ნეთის გვერდით დაასახელა ისეთი მოღვაწენი, როგორებიცაა ოტო ფონ ბისმარკი და აუგუსტ ბებელი, ფრიდრიხ ებერტი და გუსტავ შტრეზემანი, იულიუს ლებერი და კლაუს გრაფი ფონ შტაუფენბერგი, ერნსტ როიტერი და თეოდორ ჰოისი, რაც მა-შინ გამბედაობას მოითხოვდა. სამი წლის შემდეგ, ტუტცინგის

ცნობილ შეკრებაზე, იდეას, სახელების საშუალებით ჩავწვდო-
მოდით ჩვენს რთულ სამშობლოს, თურმე გვარიანი შესწორება
ელოდა. მაშინ ასე ითქვა: „ბისმარკი და ბებელი ნამდვილად
უნდა ვახსენოთ, ჰინდენბურგი და ებერტიც, გიორდელერი და
ლებერიც, ადენაუერი და შუმახერიც, მაგრამ, ასევე, ჰიტლერი
და ულბრიხტიც“.

ბრანდტმა ჰაინც ვერში განაცხადა, რომ არ აპირებდა პარტიის
ყრილობის გადაწყვეტილებების უსიტყვოდ განმხორციელებელი
გამხდარიყო და ყველა ვალდებულება შეესრულებინა გერმანიას,
რასაც ნატო წევრებს ავალდებულებდა. მანამდე ოლენჰაუერმა
უარი განაცხადა ბუნდესვერის ატომურ შეიარაღებაზე. კანდი-
დატს კი სწორედ ეს არ გამოურიცხავს. როდესაც ერთად ვამ-
ზადებდით მის გამოსვლას, ბრანდტმა თვალი ჩამიკრა: „ადრე
ხომ შესაძლებლად მიგაჩნდათ“. არ დავიწყებოდა ოთხი წლის
წინათ ცელენდორფში ნათქვამი ჩემი სიტყვები. საღამოს კი პარ-
ტიის ყრილობის დარბაზიდან რომ გამოვდიოდით, მხარზე ხელი
დამადო და მითხრა: „მგონი, შეიძლება შენობით ვილაპარაკოთ“.
მესიამოვნა. ოფიციალურად ისევ თქვენობით მიემართავდით
ერთმანეთს, მერც, პალე შაუმბურგშიც კი. პატივისცემა მისი
პოზიციის მიმართ კრძალავდა შინაურულ ფორმას და ბრანდტს
ჩამოუყალიბა თვალსაზრისი, რომ არცერთ პარტიას არ უნდა
ეგონოს, რომ სახელმწიფო მას ეკუთვნის.

კლაუს შუტცის მიერ ახლადარჩეული კანდიდატისთვის მომ-
ზადებულ საარჩევნო კამპანიაში ბრანდტმა ძალა, ენერგია და
ბრწყინვალე გამძლეობა გამოავლინა. საარჩევნო ორომტრიალი
კანდიდატს სინდისის ქენჯნისგან ათავისუფლებდა, საწერ მა-
გიდასთან რომ არ იჯდა და ქალალდებში ქექვას ვერ ახერხებ-
და. ამომრჩევლისთვის განკუთვნილ გზავნილებს ლაპარაკის
დროსაც კი ხვეწდა. „მენტალური ჰიგიენა მიკრძალავს, სულ
ერთი და იგივე სიტყვა მოვიშველიო“, გვეუბნებოდა იგი. ამის
მომსწრე შემდეგ ათწლეულებშიც ბევრჯერ გავმხდარვარ.

იგი არგუმენტების თანმიმდევრობას გადააწყობდა ხოლმე, სისხარტეს სძენდა, აუმჯობესებდა და დარწმუნებული იყო, რომ ესესაა თავისი საუკეთესო საარჩევნო სიტყვა წარმოთქვა. მისი ერთ-ერთი, მაშინ ძალიან აქტუალური სლოგანი, გახლდათ „რურის აუზის თავზე ცა ისევ ლურჯი უნდა გახდეს!“ სიტყვა „გარემო“ მაშინ ჯერ მოდაში არ შემოსულიყო.

*

ყველა ადამიანი პატივმოყვარეა. ხელოვნებისა და პოლიტიკის სამყაროში, სადაც საჯარო გავლენაზე მოთხოვნაა და იგი განისაზღვრება კიდეც, ეს თვისება უფრო მეტად ჩანს, ვიდრე ეკონომიკაში, სადაც ზოგიერთი სიმპატიური მოღვაწე გავლენას მალავს კიდეც. მოკლედ, მე ვაღიარებ ჩემს პატივმოყვარეობას: მსიამოვნებდა შეფთან უშუალო ურთიერთობა. მსიამოვნებდა, რომ ბრანდტს, ჰაინრიხს ალბერტცს, ფედერალურ სენატორ კლაუს შუტცს და მე უკვე „წმინდა ოჯახს“ გვეძახდნენ. გარდა ამისა, ვამჩნევდი, რომ იმ სენატორებზე, რომლებთანაც უურნალისტებს მეტად რთულად ეხერხებოდათ შეხვედრა, მე მირეკავდნენ და მთავარი რედაქტორებიც აზრს მეკითხებოდნენ და ჩემი შეფასებების საიდუმლოდ შენახვას მპირდებოდნენ. ძალიან მსიამოვნებდა, როცა „ჩემს“ მძღოლს, რომელიც მალე ოჯახის წევრი გახდა, საღამოს მივყავდი და-ლაქთან. სამსახურის გამო, სამუშაო საათებში მასთან მისვლას ვერ ვახერხებდი. და შემეძლო მემუშავა მშვიდად გვიანობამდე, ვიცოდი, რომ ჩემს მეუღლეს მიაკითხავდნენ. მოსახერხებელია, როცა მანქანის გასაჩერებელ ადგილს არ ეძებ და ღონისძიების დამთავრებისთანავე შეგიძლია შინ წახვიდე. საჯარო სამსახურში კარგ ხელფასს არ გიხდიან, მაგრამ მაღალი თანამდებობა არაჩვეულებრივ მომსახურებას გთავაზობს.

ყოველივე ეს მაღლე წესად დამკვიდრდა და 35 წელი ვსარგებლობდი ამ სიკეთით. უკან რომ ვიხედები, ვალიარებ ძალაუფლებით გამოწვეულ მიამიტურად პატივმოყვარულ გრძნობებს და ფულის განკარგვის უფლებით განცდილ კმაყოფილებას. პარლამენტი მანდობდა სახსრებს. შემეძლო განაცხადებისთვის გამომეყო თანხა ან უარი მეთქვა და მნიშვნელოვანი პროექტები წამომეწყო. ფულის ძალაუფლებას გავლენის მოხდენა შეუძლია. რამდენად განუსაზღვრელია პოლიტიკური ძალაუფლება, რომელსაც ხალხთა თანაცხოვრების შეცვლა შეუძლია, მხოლოდ მოგვიანებით გავიგე.

ძალაუფლება და პატივმოყვარეობა ტყუპისცალები არიან. ბრანდტს სიამოვნებდა, როცა ნიუ იორკში პოლიციელი „მაიორს“ პოლიციური სალმით ეგბებოდა, თუმცა ჩაიბურტყუნებდა ხოლმე: „აქაც ვერ მივაღწიე ანონიმურობას“. ბერლინში კი სირცხვილით ვალიარებდი, რომ მმართველმა მერმა ისე შეისისხლხორცა თავისი მდგომარეობა, რომ პატივმოყვარეობის ნიშან-წყალსაც კი აღარ ავლენდა. ეს სტადია უკვე უკან მოეტოვებინა.

ფულის მიმართ, როგორც კერძო პირს, ბრანდტს უცნაურად დისტანცირებული და სუვერენული დამოკიდებულება ჰქონდა. არასოდეს მინახავს მის ხელში საფულე. თავის საყვარელ რესტორანში რომ მიდიოდა, ანგარიშს მერიაში აგზავნინებდა. ერთხელ, ამერიკაში წასვლის წინ ვკითხე, ხომ არ გინდა პონორარიანი გამოსვლა მოგიწყო, ბარემ რუთსაც წამოიყვან-მეთქი. შეხსენება, რომ ბრიტანეთის მთავრობა საკუთარ მაღალი თანამდებობის პირებსაც უხდის მეუღლეების მგზავრობის ფულს-მეთქი, მისთვის დამარნმუნებელი ვერ აღმოჩნდა. მისი სურვილი მხოლოდ საზოგადოებასთან ურთიერთობის ჩვენი ფირმის მეშვეობით შეიძლებოდა შესრულებულიყო, რომელიც პატარა ბიუჯეტით და დიდი ამბიციით წარადგენდა ბერლინს ამერიკაში.

ამ ფირმის შეფი როი ბლუმენთალი მანამდე ფედერალური მთავრობისთვის მუშაობდა და ნიუ იორკში, „ვალდორფ-ასტორიაში“ ადენაუერის შეხვედრა დავიდ ბენ-გურიონთან მისი მოწყობილი გახლდათ. ბრანდტი და მე წინასწარ დავრწმუნდით, იქნებოდა თუ არა ამ სააგენტოსთვის 500 000 დოლარის გადახდა გამართლებული. არ გვინანია. როი ლიბერალი იყო, მაგრამ მიხვდა, რომ გერმანიის ფედერაციული რესპუბლიკის ბედს მომავალში ორი უნიჭიერესი ადამიანი – ბრანდტი და შტრაუსი გადაწყვეტდნენ. ამერიკის ინტერესებში იყო ბერლინის მერს დახმარებოდა. ამიტომაც მოახერხა და ბრანდტი 1962 წლის შემოდგომაზე ორი ლექციის წასაკითხად მიიპატიუეს ჰარვარდის უნივერსიტეტში; შემდეგ კი თეთრ სახლში ჰქონდა შეხვედრა, სადაც ბრანდტმა გაიმეორა ჰარვარდში გამოსვლისას წარდგენილი მოსაზრებები „თანაცხოვრების შესახებ, რომელიც გაბედულებას გაიძულებს“, რაც იმას გულისხმობდა, რომ მშვიდობის ცნება აღმოსავლეთისთვის არ უნდა გადაგვებარებინა. კენედიმ იცოდა ბრანდტის წაკითხული ლექციების შესახებ და იგი შეაგულიანა. ვაშინგტონს ყელში ამოსვლოდა ბონის მიერ ყველაფრის დაბლოკვა და, ამავე დროს, საკუთარი წინადადებების არარსებობა.

„მმართველის“ რანგში თავმდაბალ ბრანდტს ფინანსების საკითხის საკუთარ ხელში აღებაც უწევდა. კედლის აშენების შემდეგ კიდევ უფრო ზუსტი ანგარიში მოეთხოვებოდა. რადგან დიდმა ფირმებმა, შიშის გამო, თავიანთი ცენტრალური ოფისები ფედერაციული რესპუბლიკის სამხრეთსა და დასავლეთში გადაიტანეს, ბერლინის საგადასახადო შემოსავალი ძლივსღა სწვდებოდა მოხელეების და მოსამსახურეების ხელფასებს. ყველაფერი დანარჩენი, რითიც საზრდოობს ქალაქის ცხოვრება, მშენებლობა იქნებოდა ეს თუ კულტურის კერები, ბონს უნდა უზრუნველეყო. და ბონიც იხდიდა, სპეციალური გადასახადების დაწესებითა და საგადასახადო შეღავათების გზით.

გაგვეხარდა, რომ აქსელ შპრინგერმა ისარგებლა საგადა-სახადო შეღავათით და კედელთან ახლოს აღმართა თავისი ბეჭდვითი კონცერნის იმპოზანტური შენობა. იმ ახალგაზრდების ბერლინში დაფუძნება, სავალდებულო სამხედრო სამსახურებს რომ გაურბოდნენ, საკმარისი არ იყო დასავლეთისკენ გადასულების დასაბალანსებლად. სენატს სტატისტიკის გაყალბება უწევდა (სტატისტიკისთვის ეს უცხო ხილი არ არის), რომ ბერლინის მოსახლეობის მაგიური ორმილიონიანი რიცხვი შეენარჩუნებინა. გაბერილი საჯარო სამსახური ამით არ შემსუბუქებულა, ძალიან ზუსტად უნდა დაგვეთვალა ფული და ჰელმუტ შმიდტის თავხედური ნათქვამი, ბერლინელებმა მილიონს და მილიარდს შორის განსხვავება არ იციანო, გვწყინდა, რადგან სიმართლეს არ შეესაბამებოდა.

სენატი ბონიდან იღებდა ფულს, რომ ბერლინი კულტურულად მიმზიდველი გაეხადა მთელი მსოფლიოდან ჩამოსული სტუმრებისთვის. ყოფილმა დიპლომატმა შეპარდ სტოუნმა, ფორდის ფონდის საშუალებით, თავისუფალი უნივერსიტეტისთვის, გერმანული ოპერისთვის და სხვა კულტურული და სამეცნიერო დაწესებულებებისთვის შემოწირულობები შეაგროვა. კომპოზიტორმა ნიკოლას ნაბოკოვმა, ფესტივალის ხელმძღვანელის რანგში, შპრენს ნაპირზე საინტერესო ხელოვანები მოიზიდა. საერთაშორისო რანგის ვარსკვლავებს ენთუზიაზმით ვეგებებოდით.

კინოფესტივალის ფარგლებში გამართულ ვახშამზე ამერიკელი მსახიობის, ჯეინ რასელის გვერდით ვიჯექი და საინტერესოდ ვისაუბრეთ. ბევრად დიდი შთაბედილება მოახდინა ჩემზე მარლენე დიტრიხმა, რომელზეც ვგიუდებოდი. იგი 1960 წელს ომის შემდეგ პირველად ჩამოვიდა თავის მშობლიურ ქალაქში. ბრანდტის სურვილი გახლდათ, რომ ქალაქის ოქროს წიგნში გაეკეთებინა ჩანაწერი. ბრანდტი იმ ადამიანებთან, ვინც მის მსგავსად გაიარეს წინააღმდეგობის გზა, დიდ სიახლოვეს

გრძნობდა. მე წილად მხვდა ბედნიერება, თხუთმეტი წუთი პირისპირ მესაუბრა მარლენესთან, რადგან ბრანდტი ვიღა-ცამ ჩაიგდო ხელში და დაკავებული იყო. მისი მშვენიერება არ ჩამქრალიყო, თუმცა შევამჩნიე, ხელები დაბერებოდა. „Sag mir, wo die Blumen sind“ ჩემთვის უკვდავი სიმღერაა. ალბათ სასიამოვნო მოგონებად დარჩებოდა მას ტიტანია-პალასტში კონცერტის შემდევ გამართული ოვაციები, როცა ეს სიმღერა გერმანულად შეასრულა. „პატივცემულ ვილი ბრანდტს“ წერი-ლით გადაუხადა მადლობა: „თქვენი მარლენე დიტრიხი“.

*

1961 წლის 10 მაისს ბრანდტის თანამშრომლის პოზიციიდან მის მრჩევლად დავნინაურდი. ოსლოში ნატოს საგაზაფხულო სხდომის კომუნიკეში შედიოდა ფორმულირებები, რომლებიც მანამდე არსებულ დაუსაბუთებელ პირად შიშს დასავლეთის ოფიციალურ პოზიციად აცხადებდა. მასში ალარ იხსენიებოდა ქალაქის ოთხი გამარჯვებული ძალის სტატუსი, არამედ – თა-ვისუფალი მიმოსვლის გვერდით – გამოთქმული იყო გარან-ტია „დასავლეთის სამი სექტორის სიცოცხლისუნარიანობის შესახებ“. შეშფოთებულმა მივირბინე ბრანდტთან, ტექსტი წინ დავუდე და ვუთხარი: „ფაქტიურად, ეს არის მოსაწვევი საბჭო-თა კავშირისთვის, რომ რაც უნდათ, ის გააკეთონ თავიანთ სექტორში“. კომუნიკე მაგონებდა სამი დასავლური ძალის და ბონის მემორანდუმს, რომელიც ავსტრიის ფედერალურმა კან-ცლერმა, ბრუნო კრაიცკიმ მიიღო 1960 წელს საბჭოთა კავში-რის საგარეო საქმეთა მინისტრის ანდრეი გრომიკოსგან და ვენაში ყოფნისას წამაკითხა. ეს დოკუმენტი საფუძველშივე გა-მოხატავდა საბჭოთა კავშირის ინტერესს, „ამ სივრცეში“ დაე-მყარებინა სტაბილურობა და უკიდურეს შემთხვევაში, დაედო

სამშვიდობო ხელშეკრულება გდრ-თან. ბრანდტმა გადაწყვიტა საგარეო საქმეთა მინისტრ ბრენტანოსთვის ოთხი გამარჯვებული ძალის კონფერენცია შეეთავაზებინა. იგი ხელმძღვანელობდა მოსაზრებით, რომ სანამ მოლაპარაკებები მიმდინარეობდა, აღმოსავლეთი ცალმხრივ ღონისძიებებს არ გაატარებდა. სამწუხაროდ, ბრენტანომ უარი განუცხადა. ჩვენ ვეთანხმებოდით ერთმანეთს, რომ ქალაქის მხოლოდ დასავლეთ ნაწილის შესახებ არსებული ნებისმიერი ხელშეკრულება გდრ-ის დეფაქტო აღიარებას მხოლოდ დროის საკითხად აქცევდა.

შიონებერგის რატუშაში 1961 წლის ივნისში 20 000 ლტოლვილი აღვრიცხეთ, ხოლო ივლისში 30 000. კედლის აშენების წინა საღამოს ვილი ბრანდტმა ნიურნბერგში, ფედერალური საარჩევნო კამპანიის დაწყებისას გაახმაურა მდგომარეობის ჩვენებული შეფასება: „ამ საღამოს, 12 აგვისტოს, ბერლინში ამ თვის 17000-ე ლტოლვილი შემოვა. პირველად მოგვიწევს 24 საათის განმავლობაში 2500 ლტოლვილის მიღება. რატომ მოიწევენ ეს ადამიანები? რომელმა შიშმა დაძრა ეს ტალღა? პასუხი ამ კითხვაზე შემდეგია: რადგან საბჭოთა კავშირი ჩვენი ხალხის წინააღმდეგ შეტევისთვის ემზადება და მცირედნი თუ აცნობიერებენ მის სერიოზულობას. რადგან ზონაში ადამიანებს ეშინინათ, რომ რვინის ფარდის მარნუხები ჩაპეტონდება. რადგან შიშით ძრნიან, რომ გიგანტურ საპურობილები გამოემწყდევიან. რადგან საშინლად ტანჯავთ განცდა, რომ მათ დაივიწყებენ, ჩამოწერენ და მსხვერპლად შესწირავენ გულგრილობისა და ხელიდან გაშვებული შანსების საკურთხეველზე“. მისი გამოსვლა განონასწორებული უნდა ყოფილიყო. არც უნდა გაებიაბრუებინა მდგომარეობა და არც გაქცევისკენ მოეწოდებინა.

1961 წლის 13 აგვისტო

როდესაც კრიზისი დადგა, ბრანდტი მოწოდების სიმაღლეზე აღმოჩნდა. ნიურნბერგში მისი გამოსვლის შემდეგ დაიწყო მოსალოდნელი, მაგრამ, ამავე დროს, ნარმოუდგენელი „ცალმხრივი ღონისძიება“ ბრანდტს ეს ამბავი ნიურნბერგიდან კილისკენ მიმავალ ღამის მატარებელში დაეწია. მატარებლიდან ჩამოვიდა, ჰანოვერიდან ბერლინში ჩაფრინდა და მაშინვე ბრანდენბურგის კარიბჭისკენ გაემართა. იქ იგი გახდა ბერლინელების უსაშველო აღშფოთებისა და ბრაზის მოწმე. შემდეგ თავის სიცოცხლეში პირველად (და უკანასკნელად) მივიდა მეკავშირეების კომენდანტურაში, სადაც დახვდნენ მოხელეები, რომელთაც არანაირი მითითება არ ჰქონდათ მიღებული. მათ უფროსებს თავიანთი დედაქალაქები შაბათ-კვირის გასატარებლად დაეტოვებინათ. უკანასკნელი საბჭოთა კომენდანტის ფოტოსურათი ჯერ კიდევ კედელზე ეკიდა. ბრანდტმა, თითქოს ის ყოფილიყოს მითითებებზე უფლებამოსილი, ქალაქის სამიცე კომენდანტს, რომლებიც, ხალხთაშორისი სამართლის მიხედვით, ქალაქის მესვეურებს ნარმოადგენდნენ, საკმაოდ მკაცრად მოსთხოვა, ჯიპები მაინც გაატარეთ ქუჩებში, რომ ბერლინელებს არ ეგონოთ, უკვე მიგვატოვესო. რატუშაში უშვერი სიტყვებით აგინებდა „იმ დამპლებს“, რომელთაც ბოლოს და ბოლოს შეისმინეს და ჯიპები მაინც გაუშვეს ქალაქში.

ბრანდტმა ყველანაირი პროტოკოლის დარღვევით, პირ-დაპირ პრეზიდენტ კენედის მისწერა მკვახე, შემანჯლრეველი წერილი, სადაც სთავაზობდა გაეძლიერებინა ამერიკული გარნიზონი, რაც მომავალ სამ დღეში მართლაც განხორციელდა. ჯერ კენედის პასუხი არ იცოდა, ისე დანიშნა მიტინგი შიონებერგის რატუშის წინ, რათა გამნარებული და აღშფოთებული მოქალაქეებისთვის მიემართა, სხვა არაფერი შეეძლო, თან, არც ის იცოდა, რა უნდა ეთქეა. ერთად ვმსჯელობდით, როგორ გამოსულიყო სიტყვით ამ უაღრესად ფეთქებად მდგომარეობაში; მოედანზე მოზღვავებული ხალხის შემაშფოთებელი ხმაური ჩვენამდე უკვე აღწევდა. ბოლოს და ბოლოს რაღაც მოვიფიქრე დასაწყისისთვის და მერე ნაწილ-ნაწილ ვაწოდებდი გამოსვლის ტექსტს. ბოლო გვერდები საწერ მაგიდაზე დავუდე. აჩქარებით დასწვდა, რედაქტირების დროც აღარ ჰქონდა. მე მის კაბინეტში დავრჩი, პასუხისმგებლობისგან მაკანკალებდა, თანაც მისმა ნდობამ გამაოგნა. მოსამაგრებლად კონიაკი დავისხი და მხოლოდ მაშინ დავწყნარდი, როცა პირველი ტაში მომესმა. მსგავსი ემოციები ადამიანებს ერთმანეთთან აკავშირებს. ბრანდტი დაბრუნდა. არაფერი უთქვამს. მხოლოდ მას არ მოეხსნა ლოდი გულიდან. მე შევიცანი მისი ძლევამოსილება, მისი თავდადება. რაც უფრო კუთხეში აღმოჩნდებოდა მიმწყვდეული, მით მეტად ემატებოდა გამბედაობა.

მისმა გამბედაობამ კიდევ ერთხელ აღმაფრთოვანა, როდესაც 1969 წელს, არჩევნების ღამეს გადაწყვიტა ვალტერ შეელისთვის დაერეკა და სოციალ-ლიბერალურ კოალიციაზე მოლაპარაკებოდა. იგივე განმეორდა, როდესაც მისი პირველი სამთავრობო განცხადების საგარეო პოლიტიკის ნაწილზე ვმსჯელობდით. „დიდ თემებს რომ შეეჭიდები, გულისთქმას არ უნდა აჟყვე, საკუთარ თავს უნდა აჯობო“, თქვა მან და მიუხედავად ჩემი ჭოჭმანისა, მხარი დაუჭირა შეელის იდეას, დაემსხვრია ტაბუ და გდრ-ისთვის ენოდებინა სახელმწიფო,

რომელიც ჩვენთვის ვერაფრით იქნებოდა საზღვარგარეთი. ამ ფორმულამ, როგორც მოგვიანებით შევიტყვეთ, მოსკოვს სერიოზული მოლაპარაკებებისკენ უბიძგა. ან თუნდაც 1972 წელს, როდესაც საპარლამენტო უმრავლესობის დაკარგვის შემდეგ ახალი არჩევნების ჩატარება გადაწყვიტა და პარტიის წევრების უმრავლესობის რჩევის საწინააღმდეგოდ, გდრ-ის მიმართ ჩვენი პოლიტიკის არც ტემპი და არც ინტენსივობა არ დაუგდია. „როდესაც დარწმუნებული ხარ, რომ სამართლიანსა და საჭიროს აკეთებ, ჯობს აფრიალებული დროშებით ჩაიძირო, ვიდრე წაბორძიკდე“. ასეთი იყო მისი სიტყვები.

პიროვნული სხვა თვისებაც ახასიათებდა – იოლად წყინდა. ძალიან იმოქმედა მასზე, რომ ადენაუერმა ისე გააგრძელა საარჩევნო კამპანია, თითქოს არაფერი მომხდარიყოს, არადა კედელი დღითი-დღე იზრდებოდა. ადენაუერის მიერ 14 აგვისტოს რეგენსბურგში საარჩევნო ღონისძიებაზე ურცხვად ნათქვამი სამი სიტყვა „ბრანდტი, იგივე ფრამი“, მის უკანონო შვილობაზე და ემიგრანტების მიმართ ზოგადად თავშეკავებულ დამოკიდებულებაზე ქარაგმულად იყო ნათქვამი, თან ისეთი ფორმით, თითქოს ვინმე დამნაშავეს გულისხმობდა. ამ სამმა სიტყვამ გულში დაჭრა კაცი, რომელიც ომის დროს სხვანაირი, უკეთესი გერმანიისთვის იბრძოდა და საკუთარი ნებით დაპრუნდა სამშობლოში.

კედლის აშენების წინა პერიოდში ბრანდტის წარსული დიდად სალაპარაკო თემა არ გამხდარა. მსმენოდა, რომ მძიმე ბავშვობა ჰქონდა ლიუბეკში. მისი ემიგრაციაში ცხოვრების პერიოდი მხოლოდ ზოგადად ვიცოდდე: თუნდაც არცთუ უსაფრთხო გაქცევა ბალტიის ზღვის გავლით, დანიაში, შემდეგ ნორვეგიაში გატარებული წლები, შვედეთში თავის შეფარება ომის დროს და არაჩვეულებრივ რუთთან, მის მეუღლესთან შეხვედრა. გერმანიაში ნორვეგიული სამხედრო უნიფორმით დაპრუნდა, თუმცა, ეს მაშინ არც უცნაურობა იყო და არც

დასაძრახი. სხვების წინაშე ამაყობდა, რომ ნაციონალ-სოციალიზმის მოწინააღმდეგე იყო. მხოლოდ მარტო ყოფნისას გადააქნევდა ხოლმე თავს, უკვირდა, გერმანიის ფედერაციულმა რესპუბლიკამ რად არ იხმო უკან ემიგრანტები. უფრო მეტიც, ეს დასავლეთ გერმანიის შეცდომად მიაჩნდა, აღმოსავლეთ ბერლინს მსგავსი შეცდომა არ დაუშვია. როდესაც ფაშისტებმა სამარცხვინოდ ჩამოართვეს მას მოქალაქეობა და ნაართვეს სამშობლო, მოქალაქეობის აღსადგენად შეიტანა განცხადება. ბიუროკრატიული პროცედურა საოცარ წინააღმდეგობაში მოდიოდა ბუნებრივ მოლოდინთან, რომ კარგად მიიღებდნენ. რა უნდა ექნა, რომ მიეღოთ და ეს ერწმუნა?

რა არ ვიცოდით ჩვენ: სანამ ბრანდტი ბერლინში უკონტროლო დაპირისპირების და სისხლისღვრის აღსაკვეთად იბრძოდა, ადენაუერმა საბჭოთა ელჩი დაიბარა და დაარწმუნა, ბონი სულაც არ აპირებს, მდგომარეობა გაამწვავოსო. არადიპლომატიურ ენაზე ეს ნიშნავს, მოსკოვს შეუძლია ბერლინის ხმაურიანი მერი სერიოზულად არც მიიღოსო.

გაცოფებული ბრანდტი შიშს მოგგვრიდა. კატეგორიულად უგულებელჰყო, როცა ურჩიეს, ამ სამარცხვინო საქციელს ნუ აჰყვებიო. მაგრამ ხელჩასაჭიდად ვერაფერს დაუპირისპირებდა, მხოლოდ თავდაცვა კი ღირსებას შეულახავდა. ფრანც იოზეფ შტრაუსმა, ასევე საარჩევნო კამპანიისას, მზაკვრულად და ფარისევლურად განაცხადა, ვიცი, ომის დროს რასაც აკეთებდაო (ნეტა მართლა იცოდა?); ყოველი დღე შხამად გვექცა, როცა საათები იფლანგებოდა დისკუსიებში, როგორ დავპირისპირებიდით ასეთ ცილისწამებას და ეჭვებს სამართლებრივი გზით. ასობით მოგებული პროცესიც კი არაფერს მოიტანდა. მხდალი ნაძირლები ზურგში დანას გვირტყამდნენ და ლათინური გამოთქმის უტყუარობაში გვარწმუნებდნენ: *Semper aliquid haeret*. მაგრამ საწყენია, როცა რაღაც ნალექი რჩება. 1965 წლის წარმატებული, მაგრამ მოლოდინთან შედარებით მაინც წაგებული

არჩევნების შემდეგ, ბრანდტი და მისი მეუღლე რუთი სერიო-ზულად ფიქრობდნენ ნორვეგიაში დაბრუნებულიყვნენ.

ვისაც სურს შეიცნოს ბრანდტის პიროვნება, არ უნდა გა-მორჩეს მუდმივი ჭრილობა, თუნდაც იგი შეხორცებული ჩანდეს, რაც მას ადენაუერის სიტყვებმა და შემდეგ, ათწლეულების გან-მავლობაში, მისი წარსულის წინააღმდეგ წარმართულმა კამპა-ნიებმა მიაყენეს. გულქვა სულაც არ იყო, რომ ყოველდღიური პოლიტიკური შემოტევებისთვის და სიძულვილით საგსე კამპა-ნიებისთვის იოლად გაეძლო. ასევე მწვავედ განიცდიდა, როცა მისი ვაჟების ტოლერანტულ აღზრდაზე ქილიკობდნენ. საკუ-თარ სუსტ მხარეებს არ მალავდა. სწორედ ამაში მდგომარეობ-და მისი ღირსება. და სწორედ ამით იზიდავდა ადამიანებს და ამით მოიპოვა პოპულარობა. ბრანდტის მგრძნობიარე ბუნება მის ძლიერ მხარედ იქცა.

ჭრილობის ნაწიბურები აღარ სტკიოდა, როცა უკანასკნე-ლად შევხვდით. ბრძოლა უკვე დასრულებულიყო. გარდაცვლილ ფედერალურ კანცლერს, საუკეთესო გაგებით ცივილურ ადა-მიანს, უმაღლესი სამხედრო პატივი მიაგეს ბერლინის რაიხს-ტაგში – ეს იყო იმის სიმბოლო, რომ იგი საკუთარმა ქვეყანამ მიიღო, ზუსტად ისე, რასაც თვითონ დიდხანს ამაოდ ელტვო-და: შინ დაბრუნდა.

ჩაკირული გაყოფა

1945 წლის აგვისტოში, ის-ის იყო შევისწავლე ახალი ამბების გავრცელების ამერიკული წესი – ვინ, როდის, როგორ, სად და რა – შეძლებისდაგვარად უნდა წარმოჩნდეს პირველივე წინა-დადებაში. მაშინ წავიკითხე, რომ გამარჯვებულებმა პოტსდამში საიდუმლო შეხვედრა გამართეს და გერმანის შესახებ ხელშეკრულება დადეს. არ გამკვირვებია, რომ რადიოში არც ჩვენმა ამერიკელმა კოლეგებმა იცოდნენ რამე და არც და-მარცხებულმა გერმანელებმა. საოცარი შვება ვიგრძენი: გერმა-ნია გაუყოფელი დატოვეს. წარმოების აღმშენებლობის უფლე-ბაც კი მოგვცეს, რა თქმა უნდა, არა იარაღის წარმოების, რაც ისედაც არავის სურდა, და დავკარგეთ მიწები ოდერის იქითა მხარეს – მტკივნეული იყო, მაგრამ გასაგები. მმართველობა ოთხ ზონად დაიყო ქვეყანაშიც და ბერლინშიც, რომელიც წარ-მოადგენდა ოთხი გამარჯვებული ძალის პასუხისმგებლობის ერთადერთ საერთო რეგიონს. მათ ჯერ კიდევ არ იცოდნენ, რამხელა ტვირთი წამოიკიდეს.

ვერავინ იფიქრებდა, რომ რაიხის წინააღმდეგ ომის დროს გაერთიანებული მეკავშირეები, შემდგომ ოთხ წელიწადში, ცივი ომის მოწინააღმდეგენი გახდებოდნენ და ორ გერმა-ნულ სახელმწიფოს დააარსებდნენ. ვერავინ განჭვრეტდა, რომ დროის იმავე მოკლე მონაკვეთში დედაქალაქი გაიყოფოდა და ურთიერთმუქარის და შანტაჟის ობიექტად იქცეოდა, და რომ

საშიში დაპირისპირება კულმინაციას 1961 წლის ოქტომბრის ბოლოს მიაღწევდა, სროლის სურვილით შეპყრობილი ამერიკელების და საბჭოელების ბერლინის ფრიდრიხშტრასეზე განლაგებული ტანკების წყალობით. ოთხი ძალის სტატუსმა, რომელიც გერმანიაზე ერთობლივი კონტროლის ინსტრუმენტად იყო ჩაფიქრებული, სექტორების დემარკაციის ხაზებისგან ორ სისტემას შორის საზღვარი შექმნა. პოლიტიკური და სამხედრო თვალსაზრისით იქ ნატო და ვარშავის ხელსეკრულება იდგა ერთმანეთის პირისპირ. მათი კანონები ამოქმედდა და გამარჯვებულები საკუთარი ინტერესების მძევლებად აქცია. ბერლინი ორივე მხარისათვის ზედმეტი ტვირთი აღმოჩნდა. ვერცერთი მისცემდა თავს უფლებას, ეს ტვირთი ჩამოეხსნა, თუმცა ორივეს შეეძლო მისი განეიტრალება ეცადა. პრესტიჟი აიძულებდა ორივე მხარეს, მოენდომებინათ, რომ ბერლინი სანდო, ერთობლივად გარანტირებული სტაბილურობის კერად ექციათ.

კედლის აღმართვა ცივი ომის კულმინაციად და მისი დასასრულის დასაწყისად იქცა, რაც მაშინ არ შეიმჩნეოდა. როგორ უნდა გაგევო, რომ 1961 წლის 14 აგვისტოს ბერლინის დასავლეთიდან აღმოსავლეთისკენ მიმართული ყველა ქუჩა მავთულხლართებით გადაკეტეს და, ამავე დროს, გამოიცა გდრ-ის შინაგან საქმეთა მინისტრის ბრძანება, რომ დასავლეთის სამი გამარჯვებული ძალის წარმომადგენლებს მხოლოდ სამი გასასვლელით შეეძლოთ ესარგებლათ და ბოლოს ამ სამიდან მხოლოდ ერთი – ჩარლის გამშვები პუნქტი დარჩა ფრიდრიხშტრასეზე? უპირველეს ყოვლისა: დასავლეთის სამი გამარჯვებული ძალა ემორჩილებოდა მინისტრის მითითებას, რომელსაც ამის უფლება არ გააჩნდა და სახელმწიფოსას, რომელიც, მათი გაგებით, საერთოდ არ არსებობდა.

ოსლოში ნატოს სხდომის მოგონება და საბჭოთა მემორანდუმი, რომელიც ბრუნო კრაისკიმ წამაკითხა, მეხსიერებაში

ისევ ამომიტივტივდა და უსიამოვნო ეჭვი გამიჩინა, რომ ეს ყოველივე ჩუმად ხომ არ მომზადდა დასავლეთისა და აღმო-სავლეთის ერთობლივი შეთანხმებით. მას შემდეგ, რაც ხრუშ-ჩივმა და კენედიმ უშედეგოდ მოუსინჯეს ერთმანეთს კბილი ვენაში, ჯონ მაკლორი, გერმანიის ფედერაციულ რესპუბლი-კაში აშშ-ს ყოფილი უმაღლესი კომისარი, ყირიმში გაფრინდა და ხრუშჩივს ჩიგბურთი ეთამაშა. ნეტავ ერთმანეთს იმაზეც ხომ არ ესაუბრნენ, რომ მოესინჯათ, როგორ შეიძლებოდა მშვიდობიანად მოეგვარებინათ ბერლინის სადავო საკითხი? სავალდებულო შეთანხმებებს ვერ დადებდნენ. მაგრამ აღმო-სავლეთი 13 აგვისტოს შემდეგ სამი დღე ელოდებოდა დასა-ვლეთის რეაქციას, სანამ მავთულხლართებს ქვითა და ბეტო-ნით ჩაანაცვლებდა და კედლის მშენებლობას დაიწყებდა. რისკი აღარ არსებობდა.

როდის მიხვდა კენედი, რომ ბერლინის, სამხედრო თვალ-საზრისით დასავლეთის ყველაზე სუსტი წერტილის დაცვა წარ-მოუდგენელი იყო, მაგრამ არც მუდმივი პოლიტიკური ზეწო-ლა შეიძლებოდა მისადგომ გზებზე? უნდა მიმხვდარიყვნენ, რომ განმუხტვის პოლიტიკაზე მოსკოვი არ წამოვიდოდა, სა-ნამ არსებობდა აქილევსის ქუსლი – ბერლინი. საპირისპიროდ აღნერა სიტუაცია ამერიკელმა ისტორიკოსმა, ჰოუპ ჰარისონ-მა 2003 წელს, მას შემდეგ, რაც მოსკოვის არქივები შეისწავლა – რომ ხრუშჩივმა მოატყუა ულბრიხტი. იგი მზაკვრულად შეჰქირდა ულბრიხტს ცალკე სამშვიდობო ხელშეკრულებას და ამავე დროს მისი მთავარი მიზანი იყო სტაბილურობის მიღწევა მეორე სუპერ-სახელმწიფოსთან. კენედიმ კი თავისი წარმატება – ბერლინის უსაფრთხოების ხელშეუხებლობა – მხოლოდ 1963 წელს გამოხატა შეძახილით „Ich bin ein Berliner“.

მას შემდეგ ბერლინში კრიზისი აღარ დამდგარა, სანამ კე-დელი არ დაინგრა. აღარც გერმანიაში. ვაშინგტონსა და მოს-კოვს აღარ უცდიათ გერმანიის გაყოფის შემსუბუქება ან სუ-

ლაც გადალახვა. ევროპაში სტატუს კვო კარგად მუშაობდა და კუბის კრიზისსაც კი გაუძლო; იგი მხოლოდ მაშინ შეირყა, როცა გერმანია გაერთიანდა და საბჭოთა კავშირი დაიშალა. არ მახსენდება ისტორიის არცერთი დაუწერელი შეთანხმება, რომელსაც ასე შეუმცდარად ემუშაოს ოცდაათი წლის განმავლობაში. ამ განზომილებას ვერცერთ დედაქალაქში ვერ განჭვრეტდნენ.

*

პრეზიდენტი კენედი თავდაპირველად გაოგნდა, რომ არა ვთქვათ, გაბრაზდაო, ვილი ბრანდტის წერილზე, თუმცა სწრაფად მიიღო გადაწყვეტილება და 1500 კაციანი საბრძოლო დანაყოფით გააძლიერა ბერლინის გარნიზონი. ჯარისკაცების გასამხნევებლად ვიცე-პრეზიდენტი ლინდონ ბ. ჯონსონი და საპაერო ხიდის გმირი გენერალი ლუციუს დ. კლეი მოავლინა ბერლინში; ბერლინელები კი ისეთი ოვაციებით შეხვდნენ ამერიკელებს, თითქოს საკუთარი ჯარისკაცები გამარჯვებულნი დაბრუნებოდეთ ომიდან.

ჯონსონი გრძნობდა, როგორ უმჯობესდებოდა განწყობა და გახალისდა. შიონებერგის რატუშაში შეხვედრისას ბრანდტის ფეხსაცმელი მოეწონა. ვინც სხვისგან ელის მოქმედებას, თვითონაც უნდა გაისარჯოს. ჰოდა, პროტოკოლმა შაბათ დღეს უკვე დაკეტილი მაღაზია გააღებინა და ფეხსაცმელი უშოვნა. გასინჯვისას აღმოჩნდა, რომ განსხვავებული ზომის ტერფები ჰქონია – ესეც მოგვარდა.

კენედის საპასუხო წერილი, რომელიც ჯონსონმა გადმოგვცა, მხოლოდ მისი გაფრენის შემდეგ წავიკითხეთ. პრეზიდენტის გზავნილმა ცივი წყალი გადაგვასხა: კედლის მოშლა მხოლოდ ომითაა შესაძლებელი, მაგრამ „ვერც თქვენ და ვერც ვერავინ

მეკავშირეთაგან ვერასოდეს იფიქრებს აქ ომი წამოიწყოთ“. ის, რომ კედელი ხრუშჩივის დამარცხებას ნიშნავდა, რადგან იგი მას არ ააშენებდა, მიზნად მთელი ბერლინის დაკავება რომ განეზრახა, თავის მოტყუებად აღვიქვით და კენედის შორსმჭვრეტელობას ვერ მივუხვდით.

ახლა უკვე ვიცოდით: გაყოფა ხანგრძლივი ამბავი იქნებოდა. ამის ხმამაღლა თქმა არ შეიძლებოდა, რომ ხალხს იმედი არ დაჰკარგვოდა. უპირველეს ყოვლისა, მწარე შეგრძნება დაგვეუფლა. ჩვენს სტუდენტებს უნდოდათ ალუირელი თანატოლების-თვის მიებაძათ და პლასტიკური ასაფეთქებელი ნივთიერებით დაენგრიათ კედელი. სენატი იძულებული გახდა პოლიცია გამოეყო კედლის დასაცავად. ჩვენს პოლიციელებს არ ჰქონდათ უფლება იარაღით დაეცვათ ლტოლვილები, მიუხედავად იმისა, რომ ჩვენი აზრით, მათ სამართლიანად უნდოდათ გაქცეულიყვნენ; პოლიციას არც გდრ-ის ჯარისკაცებზე სროლის უფლება ჰქონდა, ჩვენი გაგებით ისინი უკანონო ატარებდნენ სამხედრო ფორმას და იარაღს. ჩვენს პროკურატურას არ შეეძლო საქმე აღეძრა დახმარების განევაზე უარი თქმის ბრალდებით, რადგან მშვიდობა ჩვენსავე ინტერესებში იყო. სტატუს კვოს არაფერი უნდა დამუქრებოდა.

ის, რასაც სენატი მიხვდა, მაგრამ ვერ გამოთქვამდა, ერთი წლის შემდეგ გაცხადდა, როდესაც ლტოლვილ პეტერ ფეხტერს ესროლეს. ფეხტერი აღმოსავლეთ სექტორში წაიქცა და ორმოცდათი წუთი არ ეპუებოდა სიკვდილს, სანამ სული არ დალია. დასაცლეთ ბერლინელებმა იქვე მდგარ ამერიკელ ოფიცერს მიმართეს, მისთვის დახმარება გაეწია, შეაგულიანეს, შენ ხომ სამხედრო ფორმა გიცავსო. უგრძნობელმა და კორექტულმა პასუხმა არ დააყოვნა: „ჩემი კომპეტენცია სექტორის საზღვართან მთავრდება“. ასე გაშიშვლდა ნამდვილი რეალობა, რამაც ომის შემდეგ პირველი ანტიამერიკული მიტინგები გამოიწვია. როდესაც ჩარლის გამშვებ პუნქტთან ამერიკული

და საბჭოთა ტანკები ერთმანეთისგან 200 მეტრის დაშორებით განლაგდნენ, ბრანდტმა რატუშაში თქვა – როცა სპილოები ცეკვავენ, ჯობია თაგუნები სადმე შეიყუუონო.

1963 წლის 23 ივნისს კენედის ვიზიტი ბერლინში მისმა პრეს-სპიკერმა პიერ სელინჯერმა მოამზადა. მაშინ შევითვისე: სიტყვით გამომსვლელის მიმართ ტელეკამერის დახრის კუთხე და დაშორება უფრო მნიშვნელოვანია, ვიდრე იქვე მსმენელებისადმი, რადგან ტელევიზია მეტ მაყურებელს სწვდება.

ოვაციების ფონზე, ქალაქში გასეირნების შემდეგ პრეზიდენტმა ჯერ მმართველი მერის საპირფარეშო „დაათვალიერა“, სანამ მის კაბინეტში, თარჯიმანთან ერთად ბოლთის ცემას და ჩურჩულით თავისი გამოსვლის მეცადინეობას მოჰყვებოდა. ჩვენგან არავინ იცოდა, რის თქმას აპირებდა პრეზიდენტი. ბრანდტის საწერ მაგიდასთან ადენაუერი იჯდა და გაზეთ „ნოიეს დოიჩლანდს“ კითხულობდა. რატუშის წინ მოედანი არასოდეს ყოფილა ასე გადასესებული. როდესაც კენედიმ თავისი ცნობილი ფრაზა წარმოთქვა, რომელიც ბერლინის ხელშეუხებლობას ნიშნავდა, ადენაუერს გაეხარდა, ბრანდტს კი სახე მოეჭმუხნა. „Ich bin ein Berliner“ ზუსტად შეესატყვისებოდა საერთო განწყობას. ნაშუადლევს, თავისუფალ უნივერსიტეტში პრეზიდენტმა საბჭოთა კავშირთან ურთიერთობის გამუხტვაზე და თანამშრომლობაზე ისაუბრა. ახლა ბრანდტს უსაროდა, ადენაუერს კი სახე გაუშეშდა.

კენედით აღტაცების მიუხედავად, ცხადი გახდა: ამ ურჩეულის – კედლის დანგრევაში არავინ დაგვეხმარებოდა. სწორედ ასეთ გამოუვალ მდგომარეობაში იშვა მოსაზრება, ერთეული ადამიანებისთვის მაინც გამხდარიყო შესაძლებელი „გაღმა“ მყოფი ოჯახის წევრების მონახულება, თუნდაც რამდენიმე საათით. ადამიანური ყოფის შემსუბუქების საწინააღმდეგო ოთხიდან არც ერთ ძალას არ გამოუთქვამს. არც მერე, როცა დაადგინეს, რომ ამისათვის მანამდე სენატსა და აღმოსავლეთ

ბერლინს შორის პირდაპირი მოლაპარაკებების ტაბუ უნდა დარღვეულიყო. გამარჯვებულმა ძალებმა ხომ სტატუს კვოს გამყარება დაუწერელ კანონად მიიღეს და განახორციელეს კიდეც. ახლა ისღა ანუხებდათ, ხელშეუხებელი დარჩენილიყო მათი, როგორც გამარჯვებულების მუდმივი უფლებები. გამარჯვებულების მიმართ პატივისცემა გახლდათ საკუთარი ინტერესების გატარების ერთადერთი გზა. ასე უწყინრად დაიწყო გასვლის ნებართვების გაცემა, რომლითაც 1963 წელს, საშობაოდ, პირველად მოინახულეს დასავლეთ ბერლინელებმა თავიანთი ნათესავები ქალაქის აღმოსავლეთ ნაწილში.

1963 წლის 18 დეკემბერს ვილი ბრანდტი ორმოცდაათი წლის შესრულდა. ეს იყო პირველი დღე, როცა გაიცა აღმოსავლეთში გადასასვლელი ნებართვები. როცა დაბადების დღე მიულოცეს, თქვა: „ეს არის ჩემი ცხოვრების ერთ-ერთი საუკეთესო დღე. შობის ეს კვირები დაგვანახებს, რომ ჩვენ ერთი ქვეყნის შვილები და ერთი ერი ვართ“.

ის, რომ რვა წლის შემდეგ, 1971 წელს, ეგრეთ წოდებული ოთხი გამარჯვებული ძალის ხელშეკრულება მთელი გერმანიის საკითხზე მოლაპარაკებებს ორივე გერმანული მთავრობის მონაწილეობის გარეშე ვეღარ განახორციელებდა, ჯერ პორიზონტზე არ ჩანდა. ხოლო ცხრამეტი წლის შემდეგ, 1990 წელს, ოთხი გამარჯვებული ძალა ნოტარიუსად იქცა, რომელთაც სხვა აღარაფერი დარჩენიდათ, გარდა რეალობის აღიარებისა, რომელიც კედელზე მიტანილმა იერიშმა გამოიწვია.

უკან მიხედვისას დასტურდება, რომ კედლის აღმართვა გერმანიის ომისშემდგომი ისტორიის გარდატეხის მომენტია. მან გამოიწვია გერმანიის განმუხტვის პოლიტიკა, რომელმაც ოთხი გამარჯვებული ძალის მიერ გაყოფილი ორი გერმანული ობიექტი ევროპის შუაგულში ერთ სუვერენულ სუბიექტად აქცია. ამ პოლიტიკის გარეშე, ასეთი სახით გაერთიანებას ვერასოდეს მივაღწევდით.

ახალი მიზნები

მნიშვნელოვან პროგრამულ ნიშნულად იქცა 1963 წლის ივლისში ტუტცინგის ყრილობა. იმის გათვალისწინებით, ორ წელიწადში კანცლერი შეიძლებოდა გამხდარიყო, ტუტცინგის ევანგელისტური აკადემიის პოლიტიკურმა კლუბმა ბრანდტს სთხოვა საგარეო და უსაფრთხოების პოლიტიკის მისეული ხედვა წარედგინა. დიდი მონდომებით ვიმუშავეთ ხელნაწერზე, ბევრჯერ შევასწორეთ. ამასობაში აკადემიის დირექტორმა როლანდ-ფრიდრიხ მესნერმა დამირეკა და მთხოვა სადისკუსიო გამოსვლა მომემზადებინა. ვჭომანობდი, თავი სრულიად დაცარიელებული მქონდა. ხანგრძლივი ხვეწნის მერე გადავწყვიტე ბრანდტის სიტყვიდან ერთი პუნქტი გამომეყო და მის მაგალითზე მეჩვენებინა, თუ რას ნიშნავდა ჩვენი საგარეო პოლიტიკური კონცეფცია ორ გერმანულ სახელმწიფოს შორის ურთიერთობისთვის. ამ იდეის გაჩენის შემდეგ საათ-ნახევარში ჩემს მოადგილეს ვუკარნახე ტექსტი, მან კი იქიდან აირჩია ფრაზა „გარდაქმნა დაახლოების გზით“ და სათაურად წარუმძღვარა ჩემს გამოსვლას. მიუნხენისკენ გზაში ხელნაწერი ბრანდტსაც ვაჩვენე. მან წაიკითხა, კუშტად დამიბრუნა და მითხრა „კარგი“.

ორივე ჩვენგანისთვის მოულოდნელად, ჩემი ხალმოკლე სიტყვა დისკუსიაზე პოლიტიკური ბომბივით აფეთქდა და

ბრანდტს არ დაუფარავს უკმაყოფილება, რომ მის გრძელ გა-
მოსვლას საკადრისი ყურადღება არ მოჰყოლია. დისკუსიაში
ჩემს წვლილზე, რომელსაც ჩვენსავე პარტიაში გააფთრებული
წინააღმდეგობა შეხვდა, პერბერტ ვენერმა თქვა „ბარ-აქალა ამ
უაზრობასო“, თუმცა, რამდენიმე წლის შემდეგ, ჩემი თეზისი
ბონის განმუხტვის პოლიტიკად იქცა.

*

სოციალ-დემოკრატიული პარტიის თავმჯდომარეობის კანდი-
დატის გამოცდილებას ჩვენს მეზობელ კონტინენტთან – აფრი-
კასთან შეხვედრა აკლდა. მე ნამყოფი გახლდით საფრანგეთის
ყოფილ კოლონიებში – დასავლეთ და ცენტრალურ აფრიკაში
და შემდეგ, 1959 წელს, განაში ვიმუშავე ფედერალური მთა-
ვრობის წარმომადგენლის რანგში. დიდი ძალისხმევა დამჭირდა
შეფი დამერნმუნებინა, რომ ასეთი მოგზაურობა აუცილებე-
ლი იყო და როგორც იქნა, 1963 წლის შემოდგომაზე აფრი-
კაში გავემგზავრეთ. პირველი გაჩერება კაიროში შთამბეჭდავ
შეხვედრას გვიმზადებდა გამალ აბდელ ნასერთან, რომელმაც
მშვიდად და დაუინებით გაგვაცნო თავისი პესიმისტური ხედ-
ვა: როცა ასუანის კაშხალი დასრულდება და ათი წლის შემდეგ
ტბა დაგუბდება, ბამბის მოსაშენებელი ფართობი კი გაორმაგ-
დება, მაგრამ მოსახლეობა კიდევ უფრო სწრაფად გაიზრდება
და სიღარიბე მოიმატებსო.

მისმა აღმატებულებამ, ეთიოპიის მეფე ჰაილე სელა-
სიმ აგვიხსნა, რომ იმაზე მეტ ახალგაზრდას არ მიეცემოდა
ევროპაში სწავლის უფლება, რამდენიც ქვეყანას სჭირდებო-
და. უნივერსიტეტი მხოლოდ ახალგაზრდობის მოუსვენარ,
დაუსაქმებელ მასას ქმნისო. იულიუს ნიერერე დარესალამში
გვარნმუნებდა, ჩემს ქვეყანას სოფლის მეურნეობაში დახმარე-

ბა კი არ სჭირდება გერმანიის ფედერაციული რესპუბლიკიდან, არამედ საჭირო ტექნიკა, რომ ტანზანიაზე სრული ენერგოდა-მოკიდებულება შევამციროთო. ცოტა ხნის წინ დამოუკიდე-ბლობა მოპოვებულმა, მაგრამ საერთაშორისო კონცერნებზე დამოკიდებულმა სახელმწიფოებმა, როგორიცაა ნიგერია და ალჟირი კი ჩემს მეგობარს ბევრი სიახლე შესძინეს.

როდესაც ბერლინში დავპრუნდით, ბრანდტის სახლში შე-ვიკრიბეთ შლახთერზეებზე, იქ იყო მისი მოადგილე ჰაინრიხ ალბერტციც, რომელმაც გვიამბო, რა მომხდარიყო ამასობაში ჩვენს „პატარა ქალაქში“. ტელეფონთან მიხმეს და შემატყო-ბინეს, რომ კენედიზე თავდასხმა განეხორციელებინათ. ცოტა ხანში წამოგვეწია მისი სიკვდილის თავზარდამცემი ამბავი. მძიმე რეალობა გლოვის დროს არ გვიტოვებდა. განცხადე-ბები, დროშების დაშვება, ინტერვიუები და დაკრძალვის ცე-რემონიალში მონაწილეობა იყო უპირველესი გადასაწყვეტი საკითხები. ამასობაში ბერლინელებმა ფანჯრებში სანთლები აანთეს, როგორც ერნსტ როიტერის გარდაცვალებისას. ისინი გლოვობდნენ კაცს, რომელმაც უსაფრთხოების გარანტია მის-ცათ. 1963 წლის 22 ნოემბერი მსოფლიოში ბევრ ადამიანს არ დაავიწყდება.

1964 წლის დასაწყისში ბრანდტმა სოციალ-დემოკრატიუ-ლი პარტიის სათავეში ან გარდაცვლილი ერის ოლენპაუერი შეცვალა. მომდევნო წელს მეორედ განაცხადა პრეტენზია ფე-დერალური კანცლერის პოსტზე. ისევ რეკორდული მაჩვენე-ბელი მოუტანა თავის პარტიას, მაგრამ ლუდვიგ ერჰარდთან დამარცხდა.

გამოუქვეყნებელი წიგნი

1965 წელს არჩევნებში კიდევ ერთი დამარცხებისა და კედლის აშენების შედეგად გერმანიის საკითხის დაბლოკვის გამო, ვიფიქრე, რომ აღმოსავლეთისა და გერმანიის შესახებ მომავლის პოლიტიკის კონცეფციის შემუშავება სასარგებლო იქნებოდა, სათაურით „ახლა რას ვშვრებით?“ 180 გვერდიანი ხელნაწერი 1966 წლის მარტის ბოლოს მზად იყო. ვილი ბრანდტს გადავეცი, მან კი სულ მალე, 6 აპრილს დაწვრილებით მიპასუხა.

კონცეფცია ცელენდორფში ჩემი გამოსვლის გაგრძელებას წარმოადგენდა და ბონის მიერ მანამდე გატარებული პოლიტიკის მკაფიო შემობრუნებას განიხილავდა, მაშასადამე, ჯერ დაძაბულობის განმუხტვა და შემდეგ გაერთიანება. გერმანიის საკითხის გადაჭრის გზად დავამუშავე ევროპული უსაფრთხოების სისტემის საკითხი, რომელიც გერმანიის უსაფრთხოებას გერმანიისგან უსაფრთხოებას უკავშირებდა და ორივე სუპერ-სახელმწიფოს მიერ სტაბილურად განხორციელებულ დაშინების პოლიტიკას ეფუძნებოდა. პროცესი უნდა დაწყებულიყო ორივე გერმანულ სახელმწიფოს შორის მონესრიგებული თანაარსებობის შესახებ შეთანხმებით და მოსკოვი უნდა ყოფილიყო მასში მუდმივად ჩართული. მიზნად დასახული სტაბილურობა არ უნდა გადაზრდილიყო ძალადობრივ დაპირისპირებაში – როგორც ეს მოხდა 1953 წელს გდრ-ში და 1956 წელს პოლონეთსა და უნგრეთში. 1989 წელს, კედელ-

ზე იერიშის შემდეგ, ოთხივე ძალა აფრთხილებდა გერმანელ პოლიტიკოსებს: „პროცესი უკონტროლო არ უნდა გახდეს“. 1966 წელს ვერცერთი მთავრობა ვერ იწინასწარმეტყველებდა საბჭოთა კავშირის დაშლას. გარკვეული სახის ლიბერალიზაცია შესაძლებლად მიიჩნეოდა, მაგრამ არა იმპერიის დასასრული.

ვილი ბრანდტის რეაქცია მოულოდნელ ხელნაწერს სწრაფად მოჰყვა, იგი ავტორის სულისკვეთებას სრულად იზიარებდა. „ბერლინის პრესის სამსახურის უფროსი და სოციალ-დემოკრატიული პარტიის თავმჯდომარის უშუალო თანამშრომელი ამ ნაწერს ამ სახით ვერ გამოაქვეყნებს“. მან მთხოვა, ხელნაწერი „პარტიის ხელმძღვანელობის შიდა მსჯელობის დოკუმენტად მექცია“. ტუტციინგში ჩემს გამოსვლაზე რეაქცია ჯერ კიდევ კარგად მახსოვდა. შეფის ინტერესში ვერ იქნებოდა ისეთი შინაარსის წიგნი, რომელიც მძაფრ დაპირისპირებას გამოიწვევდა. მისი შემოთავაზება იყო „პატარა სამუშაო ჯგუფის“ შექმნა და სავარაუდოდ, შემოდგომისთვის „ჯეროვნად გადამუშავებული ვერსიის“ გამოქვეყნება, გარდა ამისა, შემოგვთავაზა, ევროპის უსაფრთხოების და გაერთიანებული გერმანიის უსაფრთხოების ღონისძიებების საკითხი ჰელმუტ შმიდტთანაც განვიხილოთ. მისი თავშეკავება აღვიქვი როგორც უარყოფის დახვეწილი ფორმა. იგი ეხებოდა საფეხურებრივ მოდელს, რომელზედაც მითხრა, „პრაქტიკული პოლიტიკის თვალთახედვიდან შეუძლებელი მგონიაო“.

ტექსტში ვაყალიბებდი აზრს, რომ „ბერლინის მმართველი მერი ვილი ბრანდტი ამ წიგნით მხოლოდ უფლებას აძლევს თავის თანამშრომლებს, ჰქონდათ საკუთარი აზრები და გამოხატონ კიდეც ისინი“. მან დაუნდობლად მკაფიო ხელნაწერი კომენტარით მიმითოთა ერთ ეპიზოდზე, რომელიც სამართლებრივ საკითხებში პრეზიდენტ კენედის მრჩევლის, ტედ სორენსენის მიერ დაწერილ კენედის ბიოგრაფიაში გვხვდება: „1960 წლის დეკემბერში კენედისთან ერთად მოსაწვევები განვიხილეთ, რო-

მელიც ჩემთვის გამოეგზავნათ. მოხსენებების წასაკითხად მე-პატიუებოდნენ; გარდა ამისა, რამდენიმე უურნალს სურდა ჩემ შესახებ სტატია გამოექვეყნებინა. „ყველა უკან დაბრუნეთ“, მითხრა მან და მე მის რჩევას ვენდე... „თუ გინდა დავიდარაბას თავი აარიდო, უკანა პლანზე უნდა დარჩე“.

რა ხშირად კითხულობდა შეფი მნიშვნელოვან, საინტერესო, გინდაც პიკანტურ რაღაცებს ჩემზე ადრე (ნეტავ როდის ასწრებდა?). ხშირად მირჩევდა ხოლმე: „ეს შეგიძლია არც წაიკითხო“. ახალი ლიტერატურული გამოცემების შესახებ კარგად იყო ინფორმირებული. ჰოდა, მასთან მივედი, რათა კითხვაზე „ახლა რას ვშვრებით“ მეპასუხა, რომ წიგნს არ გამოვცემდი. დიდად არ გაუმახვილებია ყურადღება, სრულიად ახალი თემა გამაცნო. მოსალოდნელია, რომ შემოდგომაზე დიდი კოალიცია შეიქმნას, რაც მაინცდამაინც არ აღმაფრთოვანებსო. ჩემი ფანტაზია საკმარისი აღმოჩნდა იმის წარმოსადგენად, რომ ამ ვითარებაში წიგნი ბომბივით გასკდებოდა.

მაინც არ მინანია, რომ ვიშრომე. უპირველეს ყოვლისა: ბრანდტმა წაიკითხა ხელნაწერი და შემიფასა. ამ თემაზე საუბარი საჭირო აღარ იყო. წიგნი ჩვენი მომავალი წლების პოლიტიკის უმთავრეს თემებს ეძღვნებოდა. ჩემთვის მნიშვნელოვანი ტექსტი საწერი მაგიდის უჯრაში ჩავკეტე და ბრანდტს უსიამოვნება ავაცილე. იგი ჩემს მეგობრულ ლოიალობას ტყუილად არ ენდობოდა. მისი მრჩევლიდან მეგობრად ვიქეცი.

მეორე ნაწილი – პონი

დიდი კოალიცია – არაპოპულარული და გარდაუვალი

ბრანდტი ჯერ კიდევ 1965 წლის საარჩევნო კამპანიაში მიღებულ შეურაცხყოფას და ბუნდესტაგის წაგებულ არჩევნებს განიცდიდა, მაგრამ 1966 წლის ივნისში პარტიის ყრილობამ ბრნენვალე შედეგით ისევ აირჩია პარტიის თავმჯდომარედ. 326 დელეგატიდან 324-მა დაუჭირა მხარი.

როდესაც კანცლერ ერჰარდის ფედერალური მთავრობა ვერ შეთანხმდა ქრისტიან-დემოკრატიული და ქრისტიან-სოციალური პარტიების გაერთიანების მიერ დაგეგმილ გადასახადების გაზრდაზე, თავისუფალი დემოკრატიების პარტიის მინისტრები 1966 წლის 27 ოქტომბერს გადადგნენ. იმავე დღეს ჩამოვუწერე ბრანდტს ჩვენი შესაძლებლობების დაწვრილებითი ანალიზი. „ქდე/ქსკ გაერთიანებასთან“ ერთად ყოფნა „გარყვნილების“ შთაბეჭდილებას დატოვებდა, თავისუფალი დემოკრატიებისთვის, როგორც პარტნიორებისთვის, უეჭველად უნდა მიგვენიჭებინა უპირატესობა. მაგრამ: „თუკი თავისუფალ დემოკრატებთან მათვე მიზეზით არ გამოგვივა, მაშინ კიდევ ერთხელ სერიოზულად უნდა განვიხილოთ დიდი კოალიციის საკითხი ... შეიძლება ეს აღმოჩნდეს ერთადერთი შანსი ამ ქვეყანაში ხალხის მხარდაჭერის მოსაპოვებლად“. ყველა რისკის გათვალისწინებით: „სოციალ-დემოკრატიული პარტია არავითარ შემთხვევაში არ უნდა დარჩეს გარეთ“.

სანამ სოციალ-დემოკრატების სახელით ჰერბერტ ვენერი და ჰელმუტ შმიდტი და „გაერთიანების“ სახელით კურტ გეორგ კიზინგერი და რაინერ ბარცელი რიგში დგებოდნენ, კულისებში მომავლის განმსაზღვრელი შეხვედრა შედგა. ბრანდტმა ბონში მიმავლინა, რომ პანს-დიტრიხ გენშერთან, მაშინ ბუნდესტაგში თავისუფალი დემოკრატების ფრაქციის თავმჯდომარესთან, შესაძლო კოალიციის საკითხი განმეხილა. საუბარი მის კაბინეტში შედგა. იგი ერთმნიშვნელოვნად ემხრობოდა ასეთი კოალიციის შექმნას, მიუხედავად მინიმალური უმრავლესობისა. მაგრამ გენშერს პარტიული მეგობრები ვალტერ შეელი და ვილიამ ბორმი აფრთხილებდნენ, ლიბერალური ფრაქციის ერთიანობა გარანტირებული არ არისო. ამიტომ ეს მცდელობა დასამარდა, მე კი წერილი დავწერე შეელის სახელზე, რომელშიც შეფი მწუხარებას გამოთქვამდა, რომ კავშირი ვერ შედგა: „ამან არ უნდა შეგვიშალოს ხელი ურთიერთობის გაგრძელებაში ... იმედს გამოვთქვამ, რომ ყოველივეს შევინარჩუნებთ“. მთავრობის დამტკიცება 1966 წლის დეკემბრამდე გაჭიანურდა. ჰერბერტ ვენერმა თავის მიზანს მიაღწია.

დიდი კოალიცია ბრანდტს ეჯავრებოდა. ერჩივნა, პარტიის თავმჯდომარედ დარჩენილიყო. მაგრამ პარტიის თავმჯდომარე, რომელიც კაბინეტის წევრი არ არის ან ვიცე-კანცლერი, რომელსაც უმნიშვნელო სფერო აპარია, არა მხოლოდ მის სიამაყეს ეწინააღმდეგებოდა, არამედ ძალაუფლების მიმართ მის დამოკიდებულებას და საგარეო უწყების ხიბლსაც.

წინა წლების ცილისმწამებლურ და შეურაცხმყოფელ კამპანიას ღრმა კვალი დაემჩნია მისი სულისთვის. მალე შეგუება მოუწევდა გავრცელებულ სახელწოდებასთან – „შერიგების ფედერალურ მთავრობა“. იგი მთავრობის წევრების ბიოგრაფიებს იცნობდა: ემიგრანტის და ყოფილი მემარცხენე-სოციალისტის – ბრანდტის გვერდით იჯდა კიზინგერი, რომელიც, ეკონომიკის მინისტრის – სოციალ-დემოკრატ კარლ შილერის მსგავსად,

ადრე ნაციონალ-სოციალისტური პარტიის წევრი იყო. მაშინ, როცა ყოფილი კომუნისტი ვენერი – ამჯერად საერთო გერმანული საკითხის მინისტრი – მოსკოვის სასტუმრო ლუქსს გადაურჩა, ფინანსთა მინისტრი ფრანც იოზეფ შტრაუსი კი ვერ-მახტის ოფიცერი გახლდათ.

შტრაუსს ბრანდტი პატივს სცემდა. მას მიაჩნდა, რომ ბავარიელი თავისი უნარებითა და ენერგიით კანცლერადაც იგარებდა, მიუხედავად იმისა, რომ თავშეუკავებელი ხასიათი ბევრ რამეში ხელს უშლიდა. ქრისტიან-სოციალისტ შტრაუსს დიდ ელექტროსადგურს ადარებდა, რომელსაც პატარა ბოსლის დამცავები აქვს.

კიზინგერი კი, რომელსაც შინაურულად „კიონიგ ზილ-ბერცუნგეს“ ეძახდნენ, ბრანდტს მსუბუქ წონით კატეგორიად მიაჩნდა. მის საზოგადოებაში თავს კარგად ვერ გრძნობდა და მთავრობის მეთაურთან კომუნიკაცია ვენერს გადაულოცა. ფრაქციის თავმჯდომარეები – ჰელმუტ შმიდტი და რაინერ ბარცელი, ჩინებული მენეჯერები, პარლამენტის უპრობლემო მუშაობას უზრუნველყოფდნენ.

საგარეო უწყებაში

შიონებერგის რატუშის სენატის კანცელარია, ათობით მაღალი რანგის მოხელითა და ალიანსის წევრებთან დამაკავშირებული სამი ოფიცირით, ისე განსხვავდებოდა საგარეო უწყების აპარატისგან, როგორც კარგად გამართული მცირე სანარმო ვერ გაუტოლდება საერთაშორისო კონცერნს, ანდა, ბერლინის პოლიციის პრეზიდენტის უფლებები და ბონის თავდაცვის მინისტრის ძალმოსილება. ფედერალური დონე სხვა თვისებებს მოითხოვდა და ყოველდღიური ინფორმაციისა და მოქმედებების მოცულობა თვით ბერლინის მმართველი მერისთვისაც სხვა განზომილება აღმოჩნდა. ნახტომი შიონებერგის რატუშიდან პირდაპირ კანცლერის აპარატში ბრანდგს არ გამოუვიდოდა.

საგარეო საქმეთა ახალი მინისტრის – ბრანდგისთვის გაკეთებულ ჩანაწერში, ბერლინში შეთვისებული სტილით, ზედმეტად მკაფიოდ გამოვხატე აზრი: რომ უმნიშვნელოვანესი იყო გაგვებათილებინა ადენაუერის მტკიცება, თითქოსდა მთავრობაში სოციალ-დემოკრატთა ყოფნა გერმანიის დასასრულს მოასწავებდა. „დიდი კოალიციის ფსიქოლოგიური სიმტკიცე, მაშასადამე, მრავალი ტაბუ ჯერ კიდევ დასამსხვრევი იყო“. „ტაბუს დამსხვრევას“ ბრანდგმა ხაზი გაუსვა და იქვე მიაწერა: „არა ორიენტაცია, საერთო ნიშნული!“ მაშასადამე, შერიგება ურთიერთთანამშრომლობით, საკოალიციო მშვიდობის ხარჯზე საგარეო პოლიტიკური ტაბუირების დამსხვრევის მაგივრად.

ჩემს ჩანაწერში დასახული ყველა სხვა მიზანი გაითვალისწინა: დიპლომატიური ურთიერთობების დამყარება აღმოსავლეთ ევროპისა და არაბულ ქვეყნებთან, ნატოს რეფორმა, დიპლომატიური ურთიერთობების დამყარება ჩინეთთანაც კი. მე ვწერდი: „ეს ფსიქოლოგიური თვალსაზრისით ყველაზე უკეთ და თან მატერიალური დანახარჯის გარეშე გამოკვეთს ფედერაციული რესპუბლიკის სიმწიფეს“. უკან რომ ვიხედები, დიდი კოალიციის საგარეო პოლიტიკური მონაპოვარი საკმაოდ ჭრელია: ნაკლები, ვიდრე გვსურდა და მეტი, ვიდრე ველიფით.

ახალ მინისტრს საგარეო უწყებაში პატივს სცემდნენ. ორი კაცი გადაგვიყვანა ბერლინიდან: კლაუს შიუტცი – სახელმწიფო მდივნის რანგში, რომელიც პრატიკულ ტვინად მოიაზრებოდა, და მე, როგორც დაგეგმვის შტაბის უფროსი – თეორიული ტვინი. ჩვენ მხოლოდ პარტიულ ჯარისკაცებად არ გვთვლიდნენ. ანი გამოჩენდებოდა, როგორ მოერგებოდა ჩვენი სამეული უწყების გუნდურ სულისკვეთებას. ქრისტიან-დემოკრატიული პარტიის ჩვიდმეტწლიანი სისტემური საკადრო პოლიტიკის შემდეგ, დაუშვებელი იქნებოდა „სოციალისტური გარდაქმნა“, რომლისაც ყველას ეშინოდა. ამ უწყებისთვის სათანადოდ მომზადებული სოციალ-დემოკრატებიც არ ჩანდნენ. ლოიალობასა და შედეგზე ორიენტირებული ჩვენებული პრინციპი თანდათანობით ცვლილებებს ითვალისწინებდა. გარდა ამისა, წმინდის ჩატარება და მაღალი რანგის მოხელეთა გადამოწმება, ხომ არ იყვნენ მათ შორის ნაციონალ-სოციალისტური პარტიის წევრები, არ შეეფერებოდა შერიგებაზე ორიენტირებულ მთავრობას. ერთა-დერთ გამონაკლისს წარმოადგენდა ახალი ფედერალური კანცლერი.

უპირველესი ფიქრი, „თაფლობისთვეში“ ჩამერჭო საკუთარი სოლები, მაშინვე უკუვაგდე, რეალობას არ შეესაბამებოდა. საგარეო უწყებამაც ვერ აიცილა თავიდან მესამე რაიხის დროს რეჟიმის მორჩილება. კარგად თუ დააკვირდებოდი, მიხვდებო-

დი, რომ მოხელეები არსებითად არ განსახვავდებოდნენ სხვა უწყებებში დასაქმებულთაგან, თუმცა, თვალში გხვდებოდა დიპლომატიური სამსახურის განსაკუთრებული დამღა, რომელსაც საზღვარგარეთ მსახურება განაპირობებდა: ხასიათი, ნიჭი, ოპორტუნიზმი, მოკრძალებულობა და წარმომავლობა უნიკალურად შეთვისებოდა ერთმანეთს. ომის შემდეგ საგარეო სამსახურის აღმშენებლობა ითვალისწინებდა შერიგებას და ეს პროცესი გლობურს სახელს ატარებდა. „ყოფილების“ – ძირითადად წაცისტური პარტიის წევრების ქსელი – კვლავ სიმტკიცით გამოირჩეოდა.

ერთ-ერთ შეფასებაში, რომელიც 1966 წლის შობის წინ დავუწერე ბრანდტს, გამოვყავი სამი ფენა: „ძველი“ საგარეო უწყების რეაქტივირებული პერსონალი, „ახლები“ – ძირითადად შპაიერის დიპლომატიური სკოლის კურსდამთავრებული და „გარეშენი“. მეორე ჯგუფი მზად იყო თანამშრომლობისთვის და დიდი მოლოდინითაც გამოირჩეოდა“. „გარეშეთა“ ჯგუფი უაღრესად ჰეტეროგენული – ხალხი, რომელიც ისეთი უუნარო აღმოჩნდა, ვერც კი მიხვდნენ, რატომ არ უნდა დაეჯილდოვებინათ „ქრისტიან-დემოკრატიული პარტიისთვის განეული კარგი მუშაობისთვის“ და სხვადასხვა მიზეზთა გამო რატომ „დაიჩაგრნენ“.

სწრაფვა, მთელი უწყება სამუშაო რეჟიმში და ინტეგრირებული გყოლოდა, სელექციურ საკადრო პოლიტიკას ვერ აიტანდა: „პარტიული პოლიტიკის ნიშნით ჩატარებული მკაცრი საკადრო წმენდა ქრისტიან-დემოკრატთა პოლიტიკის იერშეცვლილი გაგრძელება იქნებოდა“, ვნერდი ბრანდტს. დასკვნის სახით შეიძლებოდა თქმულიყო, „უმთავრეს განმსაზღვრელ ფაქტორად გვექცია გულმოდგინედ მუშაობა“. ზოგიერთ „ყოფილთან“ თანამშრომლობას გვერდს ვერ ავუვლიდით. ჩვენს „მეგობრებს“, ცხადია, იმედი გაუცრუვდათ. სოციალ-დემოკრატიული პარტიიდან გვაკრიტიკებდნენ და მოითხოვდნენ, განსაკუთრებით

წაგვეხალისებინა ქრისტიან-დემოკრატთა პოლიტიკით დაჩაგრულნი და დაგვეწინაურებინა უნარიანი სოციალ-დემოკრატები. მაგრამ ბრანდტს დასახული მიზნიდან არ გადაუხვევია: ინტეგრაცია კვლავ გამოწვევად რჩებოდა. ბრანდტი მხოლოდ ახალი კაბინეტის შემრიგებლურ ხასიათს კი არ უწევდა ანგარიშს, არამედ მისი ქმედება გამოცდილების და შორსმჭვრეტელობის გამოხატულება აღმოჩნდა.

საგარეო საქმეთა მინისტრს, პოსტზე სამწლიანი ყოფნისას, ბევრი საჩივრის თუ წინადადების განხილვა უხდებოდა. ამ საქმეში კადრების განყოფილების უფროსი გეორგ ფედერერი მისი ყველაზე მნიშვნელოვანი მრჩეველი და დამსმარე იყო, არა მხოლოდ იმიტომ, რომ ძველი უწყებიდან „ჩვენი პარტიელი“ გახლდათ, არამედ იგი ყველას იცნობდა, ბუზის სპილოსგან გარჩევა იცოდა და ერთგულებდა მინისტრსაც და უწყებასაც.

ჩვენმა პრინციპებმა გაამართლა. მაგალითად, ისევ შევხვდი ფრანც კრაპფი. ჩვენი შემთხვევითი ნაცნობობა მატარებელში დაიწყო, როცა პარიზში გავემგზავრეთ 1950 წელს, შუმანის გეგმაზე მოსალაპარაკებლად. მისთვის მიუღებელი აღმოჩნდა, რომ ჩვენს დელეგაციას ხელმძღვანელობდა „სრულიად უცნობი პროფესორი, გვარად ჰალშტაინი“. იმ კრიტერიუმების მიხედვით, რომლებიც იოშკა ფიშერმა შემოიღო საგარეო საქმეთა მინისტრის რანგში, ნაციონალ-სოციალისტური პარტიის წევრები უწყების უურნალში ოფიციალურ ნეკროლოგებს აღარ იმსახურებდნენ. ფრანც კრაპფი ერთ-ერთი პირველი აღმოჩნდა, ვისაც ეს შეეხო. ოცდაშვიდი წლისამ დაიწყო 1938 წელს საგარეო უწყებაში მუშაობა და 1940 წლიდან 1945 წლამდე ტოკიოში მსახურობდა საელჩოში. 1947 წელს, როდესაც გატარდა ნაციიზმისგან განთავისუფლების პროცედურა, მას „ნაციიზმისგან თავისუფალი“ პირის სტატუსი მიენიჭა, 1951 წელს ახალშექმნილ საგარეო უწყებაში დაპრუნდა და დაუბრკოლებლად მიავლინეს ჯერ პარიზში და მერე ვაშინგტონში, 1966

წელს ტოკიოში დაინიშნა ელჩიად, 1971 წელს კი ბრიუსელში, ნატოში ჩვენი მისიის ხელმძღვანელობა დაეკისრა.

როდესაც ჰაინრიხ ალბერტცი ბენო ონეზორგზე განხორციელებული სასიკვდილო გასროლის შემდეგ მმართველი მერის თანამდებობიდან გადადგა, ბრანდტი იძულებული გახდა კლაუს შიუტცი მიევლინებინა ბერლინში. ახალ სახელმწიფო მდივნად წარადგინეს გეორგ ფერდინანდ დუკვიტცი. ამ ძველი სამინისტროს კაცმა, 1932 წლიდან წაციონალ-სოციალისტური პარტიის წევრმა, 1943 წელს კოპენჰაგენში ჩვენს წარმომადგენლობაში მუშაობისას გაიგო, რომ ებრაელებს დეპორტაციას უპირებდნენ და ჰანს ჰედტოფტს შეატყობინა; ეს უკანასკნელი, ომის შემდეგ, დანიის პრემიერ-მინისტრი გახდა. თითქმის ყველა ებრაელის გაყვანა და გადარჩენა მოხერხდა ნავებით შევედეთში. დუკვიტცი 1950 წელს დიპლომატიურ სამსახურში დააბრუნეს. რა გასაკვირია, რომ ომის შემდეგ, იგი კოპენჰაგენში ფედერაციული რესპუბლიკის სასურველი და პატივცემული ელჩი გახდა.

ძველ უწყებაში მსახურობდა ჰანს ფონ ჰერვართიც. იგი 1939 წლამდე მოსკოვში, გერმანიის საელჩოში მუშაობდა და ებრაელმა ბებიამ გადაარჩინა წაციონალ-სოციალისტური პარტიის წევრობას. ახალი სამინისტროს ჩამოყალიბებისას პროტოკოლის შეფი გახდა, შემდეგ ელჩი ლონდონში და შემდეგ ფედერალური პრეზიდენტის აპარატის უფროსი. ბრანდტმა იგი უკვე პენსიონერი დააბრუნა და საგარეო უწყების რეფორმის შემუშავება დაავალა. ამ გეგმამ ბევრი უწყების პროტესტი გამოიწვია, განსაკუთრებით მათი, ვინც საგარეო პოლიტიკას გემო ბრიუსელში ევროპული უწყების დაარსების წყალობით გაუგო და ახლა საგარეო საქმეებში არათუ მონაწილეობა ეწადათ, არამედ გავლენა. კიზინგერი ამართლებდა მეტსახელს „მოხეტიალე უწყებათაშორისი კომიტეტი“, მაგრამ საგარეო საქმეთა მინისტრს დაუთმო და თავისი კომისია შეაქმნევინა

რეფორმის გასატარებლად. კომისიის საბოლოო ანგარიში 1971 წელს დაიდო, ხოლო შესაბამის კანონს 1990 წელს ეყარა კენჭი ყველა ფრაქციის მონაწილეობით. ბრანდტი, გარდაცვალებამდე ორი წლით ადრე მოესწრო „ჩასახული შვილის“ დაბადებას.

მმართველ მერს მსოფლიოში მოგზაურობისას ჩვენს წარმომადგენლობებში ნამდვილად უზადოდ ხვდებოდნენ და მხარში ედგნენ, თუმცა, სოციალ-დემოკრატებს უცხოეთში არასოდეს გადავყრივართ. ეს გამოცდილება მის მიღებობას ესადაგებოდა: ვინც გადასახლებაში უკეთესი გერმანიისთვის იბრძოდა, უკან დაბრუნებული შურისძიებას და ანგარიშსწორებას ვერ იქადაგებდა. ამიტომაც იზრუნა, რომ როდესაც ალბერტ შპერი 1966 წელს შპანდაუს ციხიდან გამოუშვეს, გამარჯვებული ძალების უწყების პროცედურა მასზე არ განხორციელებულიყო. ჟურნალისტმა ინგე დოიჩკორნმა ამის გამო სოციალ-დემოკრატიული პარტიის წიგნაკი ჩააბარა და ისრაელის მოქალაქეობაზე შეიტანა განცხადება.

მოკლედ: ბრანდტი იქცა ინტეგრაციის მამად, არა წარსულის შესალამაზებლად ან დასავინყებლად, არამედ ჩვენი საზოგადოებისთვის უკეთესი მომავლის შესაქმნელად. იგი იყო პირველი სოციალ-დემოკრატი, რომელიც 36 წლის შემდეგ შევიდა გერმანიის მთავრობაში; თანამშრომლებთან პირველი შეხვედრისთანავე მოითხოვა გერმანული წარსული ხაზით გაემიჯნათ; წინა ფედერალური მთავრობის მოწადინებაც, გერმანია აღდგენილიყო 1937 წლამდე არსებულ საზღვრებში, შეუძლებლად მიიჩნია. ომი რომ დამთავრდება, მერე მას იურიდიული ფორმულებით ვეღარ მოიგებ. მან მშვიდობისა და ხალხთა შორის თანხმობის სურვილი თავისი მოღვაწეობის მიზნად დაისახა. ბრანდტს არ დავინყებია უწყების ტრადიცია, რათენაუს და შტრეზემანს ეყრდნობოდა და ხშირად იმოწმებდა ბისმარკს, რომელიც გმობდა პოლიტიკას – „ყველაფერი ან არაფერი“.

მის უპირველეს სამოღვაწეო ხმას შემდგომმა მინისტრებმა შეელმა, გენშერმა, კინკელმა და ფიშერმა ვარიაციები მოუძებნეს. ფიშერის პოზიცია გამორჩეულია, იგი გაბეჭდულად მიუდგა წარსულის გადამუშავების თემას და სპეციალური კომისია შექმნა, რომელმაც თავისი ხუთწლიანი მუშაობის შემდეგ დაადგინა, რომ შეუძლებელი იქნებოდა 1966 წელს საგარეო უწყების ხლართებში ადამიანების სათითაოდ გამოკვლევა. სირცხვილია, რომ სამოცი წლის განმავლობაში არ გაჩენილა საჯარო ინტერესი ჩვენი სახელმწიფო უწყებების წარსული გამოკვლეულიყო. მხოლოდ 2010 წლის შემდეგ შებედეს ფედერალურმა საინფორმაციო სამსახურმა და ზოგიერთმა სამინისტრომ ამ ამოცანას, რომელიც დღესაც მწვავედ აღიქმება.

დაგეგმვის შტაბში

უპირველესი, რაც განსაკუთრებით მძენდა თავდაჯერებულობას: პრაქტიკულად, მე გავხდი სამინისტროში ყველაზე ინფორმირებული პირი. შტაბში იგზავნებოდა ჩვენი წარმომადგენლობის ყველა დეპეშა, ზუსტად ისევე, როგორც მინისტრთან და სახელმწიფო მდივნებთან, მაგრამ მათ ყველაფრის წაკითხვის დრო არ ჰქონდათ. ჩემი თანამშრომლები არჩევდნენ იმ ინფორმაციებს, რომლებიც მე უნდა მცოდნოდა. ბრანდტი კი დაიმედებული იყო – ჩემი ცოდნა მის ცოდნას უდრიდა. მეამაყებოდა, რომ ჩვენს ქვეყანას ასეთი აპარატი ჰყავდა და იმის ფუფუნებაც, რომ განსჯაში ფულიც გადაეხადა.

ჩემი წინამორბედი გიუნტერ დილი კანცლერის აპარატში გადავიდა და შტაბის საუკეთესო თანამშრომლებიც თან გაიყოლა. შეფარა მათი შემცვლელების შერჩევა მთლიანად მე მანდო. ყველა მათგანი სათანადო კადრი აღმოჩნდა. და დადგა დროც, ტუტცინგის მონახაზი „გარდაქმნა დაახლოების გზით“ დასრულებულ კონცეფციად მექცია. დილისგან ვისწავლე, საგანგებო დავალებათა ელჩს საგარეო პოლიტიკაში აქტიურობის უფლებაც აქვსო.

რაც არ უნდა დაუჯერებლად გაისმოდეს დღეს: გერმანიის გაერთიანების კონცეფცია არ არსებობდა. ჩემმა კეთილმოსურნე და განსწავლულმა წინამორბედმა ჯერ კიდევ

1966 წლის მარტში მირჩია, შემოიფარგლე განმტკიცებული პოზიციების შენარჩუნებით; იგი ვერ ხედავდა „ჰალშტაინის დოქტრინაზე“ უარის თქმის აუცილებლობას. როდესაც დაგეგმვის შტაბს დავავალე, გერმანიის გაერთიანების კონცეფციაზე იმუშავეთ-მეთქი, სტანდარტული პასუხი მივიღე, ეს ოთხი გამარჯვებული ძალის კონცეტრინციაა. ამოცანა, გამარჯვებული ძალების მუდმივი მოქმედების უფლებების მიუხედავად, გაგვეანალიზებინა გერმანიის ინტერესები და გვეფიქრა წარმოუდგენელზე, კოლეგებს, ალბათ, ილუზიადაც მოეჩვენათ და მომხიბვლელადაც. ბრანდტისთვის ცნობილი იყო ახალი ორიენტაციის ამბავი და იზიარებოდა მას. შესათანხმებელი აღარაფერი რჩებოდა.

ჩვენ მიერ შემუშავებული პირველი კვლევა „ევროპის უსაფრთხოების კონცეფციები“ ეხებოდა „გერმანიის უსაფრთხოების და გერმანიისგან უსაფრთხოების“ საგარეო პოლიტიკურ წინაპირობებს. გამოწვლილვით შევისწავლეთ ყველა ქვეყნის ინტერესი და ალტერნატივები შევაფასეთ. ვაღიარეთ, რომ გდრ-ის, როგორც სახელმწიფოს თანამონაწილეობა ევროპის ნებისმიერი სახის უსაფრთხოების სისტემაში და ოდერისა და ნაისეს საზღვრის აღიარება გარდაუვალი იქნებოდა. დოკუმენტი 1968 წელს წარვუდგინეთ ბრანდტს.

უფრო მნიშვნელოვანი გახლდათ მეორე კვლევა – „მოსაზრებები მომავალი ფედერალური მთავრობის საგარეო პოლიტიკის შესახებ“, რომელიც უკავშირდებოდა გდრ-თან ჩარჩო-ხელშეკრულების დადების კონცეფციის. ბრანდტმა იგი 1969 წლის 18 სექტემბერს ნახა, მაშასადამე, ბუნდესტაგის არჩევნებამდე ათი დღით ადრე და ვაშინგტონისკენ მიმავალმა თვითმფრინავში წაიკითხა. მან აღნიშნა: „არც ისე ცუდია. იმედია, მალე დაგვჭირდება“. არჩევნებს იმედიანად ვუყურებდით, მაგრამ შედეგში დარწმუნებულნი არ ვიყავით. ორივე დოკუმენტი განამტკიცებდა მოსაზრებებს, რომელიც მოგვიანებით მოსკოვ-

თან, პრაღასთან და აღმოსავლეთ ბერლინთან დადებულ ორ-მხრივ ხელშეკრულებებში შევიდა. ორივე მათგანი გვიყარნახა ჩვენი ქვეყნის ინტერესებმა და ვარაუდმა, რომ დიდი კოალიცია გაგრძელდებოდა. ბრანდტისგან, რომელსაც სძულდა აღმატებით ხარისხში ლაპარაკი, შენიშვნა „არც ისე ცუდია“, დიდ ქებას ნიშნავდა. სამართლიანადაც შეგვაქო, რადგან საფუძვლიანი და სისტემური შრომის ნაყოფი 1970 წელს მოვიმკე მოსკოვში: საგარეო საქმეთა მინისტრ გრომიკოს არცერთი ისეთი კითხვა არ დაუსვამს, რომელზეც დაგეგმვის შტაბს ნაფიქრი არ ჰქონდა, ასე რომ, ყველაფერს მყისიერად ვუპასუხე.

ორივე დოკუმენტი შეიცავდა მოლოდინს, „რომ გდრ მომავალ ოთხ წელიწადში ხალხთაშორის სამართალში გარღვევას მიაღწევდა. ჯერ კიდევ 1962 წლის ზაფხულში მივწერე ბრანდტს წერილი, რომელშიც წუხილს გამოვთქვამდი იმის თაობაზე, რომ „დაინყო უკანასკნელი თვეები, რომელშიც ზონის დე ფაქტო აღიარება რაღაცის მომტანია“. ეს ტუტციინგამდე ერთი წლით ადრე მოხდა! მაშინ მან მიპასუხა: „მართალი ხარ, მაგრამ რა შეგვიძლია გავაკეთოთ?“ 1969 წლის შემოდგომაზე უკვე ცხადი გახდა, რომ მესამე სამყაროს ბევრი ქვეყანა, მათ შორის, ინდოეთიც, ბონის მიერ დიპლომატიური ურთიერთობების გაწყვეტის მუქარის მიუხედავად, მზად იყვნენ გდრ ხალხთაშორისი სამართლის შესაბამისად ელიარებინათ. არაღიარების პოლიტიკა ფედერაციულ რესპუბლიკას თვითიზოლაციის საშიშროებას უქმნიდა, მითუმეტეს, რომ მეკავშირეებმაც დაიწყეს დაძაბულობის განმუხტვის საკუთარი ღონისძიებების გადახედვა.

ჩვენ მიერ დაგეგმილი „ჩარჩო-ხელშეკრულება გდრ-თან“ ბევრ უწინდელ ტაბუს ამსხვრევდა და მკაფიოდ აყალიბებდა: გდრ შეძლებს ხალხთაშორისი სამართლის სრულფასოვანი სუბიექტი გახდეს; უნდა შენარჩუნდეს ორ გერმანულ სახელმწიფოს შორის განსაკუთრებული დამოკიდებულება, კერძოდ ის, რომ ერთმანეთისთვის ისინი საზღვარგარეთს კი არ წარმოადგენენ,

არამედ ერთი ერის ორ ნაწილს. მათ შორის, ისევე, როგორც ყველა დანარჩენ ევროპულ სახელმწიფოს შორის საზღვარი უნდა ექვემდებარებოდეს ძალის არგამოყენების ვალდებულებას. აქამდე მოუწესრიგებელი სამოქალაქო მიმოსვლა დასავლეთ ბერლინსა და ფედერაციულ რესპუბლიკას შორის უნდა შეთანხმდეს ხელშეკრულებით. ამით უნდა დაიწყოს საბჭოთა კავშირთან ურთიერთობების გაუმჯობესება.

ჩარჩო-ხელშეკრულებას მოგვიანებით საბაზისო ხელშეკრულება ეწოდა. სოციალ-ლიბერალური მთავრობა 1969 წელს ხელისუფლებაში მოსვლისთანავე, ასე მარტივად რომ შეთანხმდა ამ ხელშეკრულებაზე, იმის დამსახურება გახლდათ, რომ, როგორც დაგეგმვის შტაბში ერთმა ჩემმა თანამშრომელმა გამანდო, იგი, როგორც თავისუფალი-ლიბერალების წევრი, თურმე მონაწილეობდა გდრ-თან შესაძლო ხელშეკრულების შესახებ კვლევაში, სადაც გდრ-ის ხალხთაშორისი სამართლის შესაბამისად აღიარებაც კი განიხილებოდა. ჩვენი მოსაზრებით, ეს შეუძლებელი იყო და თავისუფალ-ლიბერალებს ეს პუნქტი ამოვალებინეთ. ბრანდტმა მაშინ ეშმაკურად ჩამიკრა თვალი და მითხრა, „ხაზს მიჰყევიო“. საბოლოო ჯამში, ფედერალური კანცლერის, ბრანდტის სამთავრობო პროგრამის საგარეო პოლიტიკური ნაწილი ისე დავწერე, რომ შეელმა მხოლოდ გადაიკითხა და შენიშვნების გარეშე მოაწერა ხელი. ამდენად, დიდი კოალიციის წყალობით, მის მემკვიდრეებს იმაზე თავის მტვრევა, რასაც სხვები აღმოსავლეთის პოლიტიკას უწოდებდნენ, აღარ დასჭირვებიათ და შეეძლოთ საქმეს შესდგომოდნენ.

სინამდვილე

ახლადა ვხვდები, როგორ ღრმად ჩავყვინთე დაგეგმვის შტაბის უზარმაზარი სამუშაოს მორევში. „სამოცდარვანლიანების“ მოძრაობა და მათ მიერ გამოწვეული მღელვარება წესიერად არც აღმიქვამს. კალიფორნიაში ახალგაზრდობის გამოღვიძებამ ევროპაში გადმოინაცვლა და ჩვენამდეც მოაღწია. გამოღვიძების საერთაშორისო ტალღაში გერმანელი ახალგაზრდობის მონაწილეობით გამოწვეული სიხარული იყო ერთადერთი განცდა, რომელიც დიდხანს შემოგვრჩა.

ნატოს სახელმწიფოების დაგეგმვის შტაბების ხელმძღვანელები „დაგეგმვის ატლანტიკურ ჯგუფში“ (APAG) ვიკრიბებოდით. ამ ინსტიტუციაში გადაწყვეტილებები არ მიიღებოდა, მხოლოდ აზრთა გაცვლა-გამოცვლა ხდებოდა არაფორმალურ და მეგობრულ ვითარებაში. ადრე, ნორვეგიაშივე განვიხილეთ ნატოს რეფორმების საკითხი აშშ-სა და ევროპის საბჭოთა კავშირთან ურთიერთობების ჭრილში, დღემდე აქტუალური თემაა რუსეთთან ერთიერთობა. ვაშინგტონში განვამტკიცეთ თავის-თავად ცხადი მოსაზრება, რომ სტრატეგიული ატომური იარაღი მხოლოდ ორი სუპერ-სახელმწიფოს საქმედ უნდა დარჩეს და რომ სუბსტრატეგიული საბჭოთა საშუალო მანძილის რაკეტები მხედველობაში არ უნდა მიგვეღო. ევროპელი პარტნიორების აზრი, განსაკუთრებით ლონდონსა და პარიზში, ამ შემთხვევაში გადამწყვეტი არ იყო, გინდაც მათ როდესმე მოეხერხებინათ ერთიანი პოზიციის შემუშავება. ეს კარგად მახსოვდა, როდე-

საც რამდენიმე წლის შემდეგ ნატოს ორმაგი გადაწყვეტილების საკითხზე ვმსჯელობდით.

სადაც არ ჩავიდოდა საგარეო საქმეთა მინისტრი ბრანდტი, ყველგან იაპონიას, ჩინეთსა და ამერიკას შორის, ძალაუფლების, გავლენისა და ინტერესების კატეგორიებით აზროვნებდენენ. საუდის არაბეთს დასავლეთს მიაკუთვნებდნენ, თუმცა იქ დემოკრატია არ იყო. მთავრობებს უყვართ დემოკრატიაზე და ადამიანის უფლებებზე საუბარი, მაგრამ მათ აზროვნებას ძალაუფლების პოლიტიკა და გეოსტრატეგია განსაზღვრავს. თავის მოტყუებას აზრი არ აქვს.

ჩვენი „გეოსტრატეგიული როლის“ შესახებ 1968 წლის ოქტომბერში ნიუ იორკში უფასო გაკვეთილი ჩაგვიტარეს. გერმანიის პრესის სააგენტოს კორესპონდენტმა ბარათი მომაწოდა: საბჭოთა კავშირის პრესის ოფიცერმა მითხრა: „If Mr. Brandt wants to talk to Mr. Gromyko, the answer will be positive“.¹ რასაკვირველია, ბრანდტს სურდა. საგარეო საქმეთა მინისტრების პირველი მეგობრული შეხვედრა სიტყვიერ საჩუქარს გვიმზადებდა: – საბჭოთა მთავრობა ატომური იარაღის გაუვრცელებლობის ხელშეკრულებას მხოლოდ მაშინ გაუკეთებს რატიფიცირებას, როდესაც მას ფედერალური მთავრობაც მოაწერს ხელსო. ამ ინფორმაციამ ბრანდტი ისე გაახალისა, რომ იხუმრა: „ძალიან მაინტერესებს“, ჩემი მთავრობა ამ ამბავს არჩევნებამდე თუ შემატყობინებს“. ქდყ/ქსკ გაერთიანება ხელმოწერაზე ჯერ კიდევ დავობდა.

საგანგებო დავალებათა ელჩის რანგში პირველი დავალება ჯერ კიდევ 1967 წელს შევასრულე. ალბანეთის გარდა, ჩეხოსლოვაკია იყო ერთადერთი ევროპული ქვეყანა, სადაც დიპლომატიური წარმომადგენლობა არ გვქონდა. შევთანხმდით

¹ (ინგლ.) თუ ბატონ ბრანდტს სურს ბატონ გრომიკოსთან საუბარი, პასუხი დადებითი იქნება.

გენერალური საკონსულოების გახსნაზე, რომელთაც დიპლომა-ტიური უფლებამოსილება ექნებოდათ და პრაქტიკულად ბერ-ლინიც ჩაერთვებოდა. საკონსულოები უნდა „მიგვება“ საგარეო ვაჭრობის სამინისტროებზე და არა საგარეო საქმეთა სამინის-ტროზე, სადაც ვიზის საკითხი პრაქტიკულად უნდა გადაწყვეტილიყო. შვეიცავი ამ საქმეს უკეთესად ვერ მოაგვარებდა. შემდეგ ბუქარესტში გავფრინდი და იქ ბრანდტს შევხვდი, რომელმაც, ჩაუშესკუსთან ერთად, ბეჭედი დაუსვა დიპლომატიური ურ-თიერთობების დამყარებას. შემდეგ კი შავი ზღვის სანაპიროზე პომპეზურ სასახლეში აღმოვჩნდით, ასეთივე პომპეზური იყო მისი მბრძანებელიც, რომელიც თავის საგარეო საქმეთა მი-ნისტრს ხელზე მოსამსახურესავით დაარბენინებდა აქეთ-იქით.

1968 წლის აპრილში წინა წლის პარტნიორმა პრაღის გა-ზაფხულის და ალექსანდერ დუბჩეკის გასაოცარი ავტორიტე-ტის შესახებ მამცნო. შევთანხმდით, რომ სასურველ გარემოში შევხვედროდით და მიუწენის 1938 წლის ხელშეკრულებაზე გვემსჯელა. ახალი ხელშეკრულება ისე უნდა ჩამოგვეყალი-ბებინა, რომ ჩეხები და გერმანელები, აგრეთვე, სამშობლო-დან გაძევებული სუდეტის გერმანელებიც კმაყოფილი დარ-ჩენილიყვნენ და პრეტენზია არ გამოეთქვათ. ჩემმა მართლაც საპატივცემულო პარტნიორმა დამშვიდობებისას შვეიცავით ჩა-მილაპარაკა: „მგელს სახრავი უნდა გადაუგდო, მაგრამ თხა არ უნდა შეაჭმევინოო“.

აგვისტოს შუა რიცხვებში ბონში ჩეხოსლოვაკიიდან პატა-რა დელეგაცია ჩამოვიდა. პრაღიდან მოსული ამბები ისე შე-მაშფოთებული იყო, რომ წუხილი გამოვხატე, დუბჩეკი ხომ ნამდვილად ფლობს სიტუაციას-მეთქი. პასუხი, ჩვენ რუსების უკეთ გვესმის, ვიდრე თქვენო, ჩვენი მოლაპარაკებების სწრაფ პროგრესს შეესაბამებოდა, მეორე დღეს უკვე საოცარ შედეგს ველოდით. ეს იყო იმ ღამეს, როდესაც ვარშავის ხელშეკრულე-ბის სახელმწიფოები ჩეხოსლოვაკიაში შეიჭრენ. მეორე დილას,

21 აგვისტოს, დელეგაცია აცრემლებული დაგვემშვიდობა და ბრანდტს იმისთვის გადაუხადა მადლობა, რის გაკეთებასაც ჩვენ ვაპირებდით.

ფედერალურმა კანცლერმა კიზინგერმა თქვა: „გაგვიმართა, რომ პრაღის ამბავი ერთი წლის წინ დავასრულეთ. ახლა ამას კიდევ დიდხანს ვერ შევძლებდით“. გარდა ამისა, გადაწყვიტა, რომ ფედერალურ მთავრობას უცვლელად გაეგრძელებინა დაძაბულობის განმუხტვის კურსი. უძნელესი ამოცანა, არც მწვადი დაგვეწვა და არც შამფური, მხოლოდ ხუთი წლის თავზე გადაიჭრა, მოსკოვთან, ვარშავასთან და გდრ-თან საბაზისო ხელშეკრულებები გაფორმდა. მიუნხენის ხელშეკრულება ბათილად გამოცხადდა და მას ჩეხოსლოვაკიის მხრიდან სამართლებრივი ხასიათის მოთხოვნები არ გამოუწვევია.

შემდეგ გაფირინდი ბუდაპეშტში; პრესას ამის შესახებ არ შეუტყვია. იქ იმ კომუნისტური პარტიის საგარეო პოლიტიკურ მდივანს შევხვდი, რომელმაც 1956 წელს საბჭოთა ჯარების მხარდამხარ ჩაახშო წინააღმდეგობა. მისი სახელია გილა პორნი. დავარწმუნე, რომ უნგრეთი, როგორც „სოციალისტური ბანაკის“ ყველაზე პატარა ქვეყანა, სხვებზე უფრო გაძედული უნდა ყოფილიყო. დღეს ჩვენ მეგობრები ვართ. საგარეო საქმეთა მინისტრი რომ გახდა, თავის ავსტრიელ კოლეგასთან, ალოიზ მოკთან ერთად 1989 წლის ზაფხულში გადაჭრა „რკინის ფარდის“ მავთულხლართები, შემდეგ მე შემცვალა შვედეთის მშვიდობის კვლევის ინსტიტუტის (SIPRI) გამგეობაში, სტოკჰოლმში, ხოლო ბოლოს, 1990 წელს აახენის კარლოს დიდის პრიზით დააჯილდოვეს.

1968 წლის შემოდგომაზე უენევაში ბირთვული იარაღის არმქონე სახელმწიფოების დიდი კონფერენცია ჩატარდა. ბრანდტს სურდა, ფედერალური რეპუბლიკისთვის სტრატეგიული პოზიცია განემტკიცებინა ატომური ტექნიკის მშვიდობიანი გამოყენების მნიშვნელოვანი პოტენციის გამო. ფასი, რომლის

გადახდასაც ამ მაკონრდინერებელი როლისთვის ვაპირებ-დით უნდა ყოფილიყო ანონსი, რომ ბონი გაუვრცელებლობის ხელშეკრულებას ხელს მოაწერდა, რაც შიგნით უკვე გადაწყვეტილი გახლდათ. ბრანდტის რეაქციის მოწმე გავხდი, როდესაც კიზინგერმა ფაქსი გამოუგზავნა მითითებით, ჩემი გამოსვლი-დან შესაბამისი ადგილი ამოიღეო. ბრანდტი აფეთქდა: „როგორ ვკადრებ საკუთარ თავს, ამ ნაცისტისგან მივიღო მითითებები“. ყველას დიდი ძალისხმევა დაგვჭირდა, რომ შეგვეეავებინა, მა-შინვე აპირებდა გადადგომას. ბოლოს დაეთანხმა არგუმენტს, რომელიც მე მოვიშველიე: მოსახლეობა ამ მიზეზით გადადგო-მას ვერ გაიგებს ბუნდესტაგის არჩევნებამდე ოორმეტი თვით ადრე-მეთქი. ამ შემთხვევამ განუმტკიცა აზრი: „ერთი ხმით მეტიც რომ მქონდეს, ვეცდები გავხდე კანცლერი“. მისი თა-ვდაპირველი განწყობა, რომ დიდი კოალიცია პოლიტიკურად არაბუნებრივი წარმონაქმნი იყო, არ განელებულა.

ბრანდტს ერთი სული ჰქონდა, როდის დასრულდებოდა დიდი კოალიცია. ვენერი და შმიდტი დიდ კოალიციაში თავს მასზე ბევრად უკეთ გრძნობდნენ. ორმოცი წლის შემდეგაც კი ამტკიცებდა ზოგიერთი, მაშინ დიდი კოალიციის გაგრძელება, როგორც ალტერნატივა, არსებობდაო. მე მიმაჩნია, რომ: ამ შემთხვევაში არ იარსებებდა განმუხტვის პოლიტიკა და, შე-საძლოა, არც გერმანია გაერთიანებულიყო.

1969 წლის მარტში გუსტავ ჰაინემანი მესამე ტურში აირ-ჩიეს ფედერალურ პრეზიდენტად თავისუფალი დემოკრატების ხმებით. ეს ფაქტი, ზოგადად, ხელისუფლების ცვლილების უვერტიურად აღიქმებოდა, მაგრამ მთლად დარწმუნებულიც ვერ ვიქნებოდით. ერთი ხელი ბანქო რომ ვითამაშეთ, „ჩემმა“ სახელმწიფოს მეთაურმა გამაფრთხილა, შენი ვისკი სტუმართა წიგნში შეიტანეო, ამ წიგნს „ფედერალური საგადასახედო ინსპე-ქციისთვის წარსადგენ გამასპინძლების საბუთს“ უწოდებდა. „რა ცუდია, რომ ვილი ბანქოს არ თამაშობს. გადაეცი, ყველაზე დიდი

ფრაქციის წევრს კი არ წარვადგენ ფედერალურ კანცლერად, არამედ იმას, ვინც უმრავლესობას მოიპოვებს. ფედერალური პრეზიდენტი იმისთვის კი არ ვარ, პარლამენტში უარი მივიღო“.

საგარეო უწყებაში მუშაობამ მნიშვნლოვანი ცოდნა შემძინა. საგარეო უწყება არ ქმნის საგარეო პოლიტიკას, იგი მხოლოდ ახორციელებს მას. და ეს საქმე კარგიდან ჩინებულამდე აჰყავს ხელმძღვანელობის მითითებების მიხედვით, გინდაც ეს მითითებები არასწორი იყოს საკუთარი ინტერპრეტაციით, თუკი ახალი მითითებები არ არსებობს.

როგორც წესი, სხვადასხვა ხარისხის დაძაბულობა საგარეო საქმეთა სამინისტროსა და ფედერალური კანცლერის აპარატს შორის სულ არის. ერთნი თავს გრძნობენ გერმანიის საგარეო ინტერესების კარგად ინფორმირებულ მცველებად, მეორენი კი შეჰყურებენ შიდა პოლიტიკური ძალაუფლების წყაროს და ფუნდამენტს – არჩევნებს. „დირექტორთა წრეში“, როგორც ხელმძღვანელი თანამშრომლების ყოველდღიურ შეკრებას უწოდებდნენ, ხშირად მესმოდა მოურიდებელი გინება კანცლერის აპარატის წვრილფეხობის მიმართ, რომლებიც თავს უფლებას აძლევდნენ, მითითებები გაეცათ. საგარეო უწყების მაღალი რანგის მოხელეები, რომლებიც კანცლერის აპარატში გადაიყვანეს სამუშაოდ, მიყვებოდნენ, მხოლოდ იქ მივხვდით, რომ მთავრობის სათავეში მდგარ ერთ ადამიანში იყრის თავს საშინაო, პარტიული და პირადი ინტერესებიც კიო. ეს არის დემოკრატიის ფასი. მაგრამ თუკი კანცლერი ძალაუფლების შენარჩუნებას გამოაცხადებს პრიორიტეტად, მისი მიზანი ლეგიტიმური კი იქნება, მაგრამ ქვეყნისთვის საზიანო აღმოჩნდება.

სახელმწიფო მდივანმა დუკვიტცმა, რომელიც „დილის წირვას“ უძლვებოდა, როგორც დირექტორების შეკრებას ვეძახდით, (ბონში!) გადმომცა ფერადი ლითოგრაფია ბერლინის ხედით და ასე დამემშვიდობა: „თქვენ, როგორც ჩვენი უწყების სანდო წევრი, გადახვალთ მტრული ხაზის იქით სამუშაოდ“.

ნახტომი მწვერვალზე

კვირას, 1969 წლის 28 სექტემბერს წინა დღეების ფაციფუცი ჩაცხრა. რისი გაკეთებაც შეიძლებოდა, დავასრულეთ. მშვიდად ვარ და ვილის ვენუსბერგზე ვხვდები – იქ მდებარეობდა საგარეო საქმეთა მინისტრის სამსახურეობრივი ვილა – მარტო სეირნობს, შემართულია, სერიოზული, ხალისიანი, იმედალსა-ვსე, უკეთესის მომლოდინე. მართალია, საუბრისას პათეტიკას ვერიდებით, მაგრამ საკუთარი ხმა მესმის: „თუ საქმე საქმეზე მიღება, ისტორიის ერთ-ერთი ფიგურა კი აღარ იქნები, არა-მედ ისტორიის შემქმნელი. ამას ვეღარ შეცვლი, ყოველი დღე მნიშვნელოვანი იქნება. გადაწყვეტილებების მიღება მოგინევს და იმის დაცვა, რაც სწორად მიგაჩნია და შესაბამისად, ისე-თი ძლიერი პოზიცია გექნება პარტიაში, როგორც არასდროს“. უსიტყვოდ გადიოდა წუთები. ხანგძლივი დუმილი სიარულისას უფრო შეუმჩნეველია, ვიდრე ჯდომისას. შემდეგ ჩამოაყალიბა კაბინეტისა და ფრაქციის პერსონალური შემადგენლობის შე-სახებ ხედვა და მკითხა, შენ რას ისურვებდიო. ვუპასუხე, დი-დად არც ახლა მაინტერესებს ტიტული, მხოლოდ ისეთი პოსტი მინდა, რომლის საშუალებითაც ჩვენს საგარეო პოლიტიკაში მოღვაწეობას შევძლებ-მეთქი. მთხოვა, შეელის ტელეფონის ნომერი გამიგეო. საუბარისას თავისუფალი დემოკრატების

ლიდერი ისე აღარ ომახიანობდა, როგორც, რამდენიმე დღის წინათ, ტელევიზიით გამოსვლისას.

პარტიის ოფისში შემოსული პირველივე შედეგი თავზარდამ-ცემი აღმოჩნდა. 47 პროცენტი – ქრისტიან-დემოკრატიულ პარტიას, 40 პროცენტი – სოციალ-დემოკრატიულ პარტიას. დილას ნათქვამი მახსენდება: თავი გავიმასხარავეთ. ვილი განმარტოებას ამჯობინებს და არავის ნახვა არ სურს. არც კი ვიცი, რა ვუთხრა. დამბლადაცემულივით ვარ. ყველაზე ერთ-გული მეგობარიც კი უძლურია ასეთ მომენტში. არა მხოლოდ ობიექტურად, სუბიექტურადაც ვილი თუ შეძლებდა ასეთ ეგზისტენციალურ მომენტში საკუთარი პოლიტიკური ცხოვრების ბედი გადაეწყვიტა. დასაბუთებული, საქმიანი პოზიციის ჩამოსაყალიბებლად მეტი დრო მჭირდება, ვიდრე ვილის რჩებოდა. თავისი სიძლიერე და გამჭრიახობა ახლა უნდა გამოეჩინა. მე ამდენს ვერ გავუძლებდი. ის განცდები არასოდეს დამავიწყდება. მსგავსი მომენტი აღარასდროს დაგვდგომია.

იმდამინდელი თავყრილობა დღევანდელივით მახსოვს. სოციალ-დემოკრატიული პარტიის ელიტა შეკრებილიყო – დარბაისელი, გამოცდილი, ძალაუფლების ფასის მცოდნე, ჭკვიანი ადამიანები. ზოგიერთი მათგანი დარწმუნებული იყო, რომ კანცლერობას შეძლებდა, ბევრს დიდი კოალიციის გაგრძელება ეწადა კანცლერ კიზინგერის ხელმძღვანელობით. შემაშფოთა იმის წარმოდგენამ, რომ განმუხტვისა და აღმოსავლეთის ჩვენეული პოლიტიკა თამაშად შეიძლებოდა დარჩენილიყო.

და შემდეგ, როდესაც ტელევიზიით გამარჯვებაში დარწმუნებული კიზინგერი და აღტაცებული ბარცელი აჩვენეს და ნიქ-სონის მილოცვაც გაახმაურეს, გამოვიდა ბრანდტი, გადამწყვეტი სატელეფონო საუბარი უკვე დასრულებულიყო შეელთან, და განაცხადა, რომ ძალაუფლებაზე ჰქონდა პრეტენზია და ყველა დაემორჩილა ქარიზმატულ ლიდერს. ციებ-ცხელების შემდეგ

სიხარულმა დაისადგურა, ყველა ერთმანეთს ისე ეხვეოდა, თითქოს სხვანაირი შედეგი არც შეიძლებოდა დამდგარიყო.

ფედერალური კანცლერის კაბინეტში მასთან მარტო დარჩენილმა მორიდებულად მივულოცე: „ათწლიანი თანამშრომლობის შემდეგ გავიცანი ისეთი ვილი ბრანდტი, როგორის ნახვაც ბევრჯერ მინატრია“. არაფერი უპასუხია. ისე ჩვეულებრივად განახლდა თანამშრომლობა, თითქოს არაფერი მომხდარიყოს. მე მას ვაწვდი სიტუაციის ანალიზს, როგორსაც ამერიკაში „President elect“-ს უმზადებენ. ფედერალურ რესპუბლიკაში ამის გამოცდილება რახან არ გაგვაჩნდა, შევახსენე: „მომავალ ორ კვირაში მოგიწევს გაუკვალავ თოვლზე სიარული. ამერიკის მთელი გამოცდილება ერთმნიშვნელოვნად მიუთითებს, რომ ამ პერიოდში მომავალი მეთაურის ნებისმიერი საჯარო გამოსვლა ნებისმიერ საკითხზე რაღაც მნიშვნელოვანს შეიცავდეს“. გარდა ამისა, ვურჩიე, – კიზინგერს მისწერე და შეუთვალე, „თავი შვებულებაში გასულად იგრძენი-თქი!“.

შემდეგ სხვა მთავრობების მეთაურებისთვის უნდა მოგვემზადებინა წერილები, მათთვის, ვინც უკვე მოგვილოცა, მათ შორის, სსრკს-ს მინისტრთა საბჭოს თავმჯდომარისთვის, „კოლეგა კოსიგინისთვის“, როგორც წაიხუმრებდა ხოლმე ბრანდტი. მას უთვლიდა „ჩვენს ქვეყნებს შორის ურთიერთობების გაუმჯობესების მიზნით შეხვედრისა და აზრთა გაცვლა-გამცვლის მზაობას“.

მეორე დღეს ვურეკავ ნიქსონის მრჩეველს უსაფრთხოების საკითხებში, ჰენრი კისინჯერს. რამდენჯერმე მოიბოდიშა, საინფორმაციო ცნობებს დავეყყრდენით და გვეგონა, კიზინგერი ისევ აირჩიესო. არც პრეზიდენტს და არც ადმინისტრაციას პრეფერენცია არ გააჩნია. ბრანდტის მთავრობასთან მუშაობას მივესალმებითო. მე ვუიოლებ, რაც იყო, დავივიწყოთ-მეთქი. კისინჯერი მამცნობს, ოფიციალურად დაგპატი-ჟებ საგარეო საქმეთა სამინისტროს მეშვეობით ვაშინგტონში.

ბრანდტი ხალისობს. არაფერი უჭირს სუპერ-სახელმწიფოს, ცოტა შეფუცხუნდესო.

ახალ ფედერალურ კანცლერსაც ფედერალური სასაზღვრო დაცვის სამსახური იცავს და არა ჯარი. მისი ორკესტრი მისალმების პრუსიული მარშის შემდეგ ბერლინურ სიმღერას ასრულებს. სანამ ბრანდტი სამხედრო ფორმირებას ჩაუვლის, წელგამართული და გაქვავებული სახით, ვგრძნობ, არ ვცდებოდი, როცა ვფიქრობდი, რომ საგარეო საქმეთა სამინისტროს გარეშე პირდაპირ შიონებერგის რატუშიდან პალე შაუმბურგში ნახტომი არ გამოვიდოდა.

ვერაფერს დაუწუნებ ადენაუერის აპარატის უფროსის, ჰანს გლობკეს კაბინეტს, სადაც ანი მომიწევს მუშაობა. მისაღებისთვის ცალკე შესასვლელი, სამდივნოს გვერდის ავლით; საკუთარი საპირფარეშო, სატელეფონო ხაზი კანცლერთან, რომლითაც მომავალში ის უფრო ხშირად ისარგებლებს, ვიდრე – მე, ცალკე სატელეფონო სისტემა მინისტრებთან და ერთიც ჩვეულებრივი აპარატი. მოლტკეს ლენბახის მიერ შესრულებული ნახატი მთელ სივრცეს იკავებს. პერსონალი ანგარიშს მიწევს და მეკითხება, სხვას ხომ არ ამჯობინებთო? მტკიცედ ვპასუხობ: „რასაკვირველია, არა“. ზედმეტად ხმაურიანი მითქმა-მოთქმა „დიდ მდუმარეს“ საზიანოდ მიაჩნდა, დემოკრატიაში, მითუმეტეს. არც ბრანდტმა ისურვა რაიმე შეეცვალა კანცლერის კაბინეტში. იგი დაჯდა ადენაუერის საწერ მაგიდასთან, და ყველაფერი ხელუხლებლად დაატოვებინა, ნახატების ჩათვლით. ურჩევნია ტრადიციის განმგრძობად აღიქვან.

დასაწყისი ვაშინგტონში

სწრაფი მიპატიუების წყალობით, სამთავრობო პროგრამის წარდგენამდე კისინჯერმა მიიღო ახალი კოალიციის აღმოსავლეთის პოლიტიკის ღია და ვრცელი დახასიათება. უალრესად საინტერესო საცდელი გარბენი იყო, რადგან მხარდაჭერის გარეშე, ამერიკელების ჩუმი თანხმობის გარეშე მაინც, პოლიტიკური კურსის შეცვლა სათურ იყო და დიდ რისკს გვიქადდა. ვერ წარმომედგინა, ნიქსონის მრჩეველი უსაფრთხოების საკითხებში თეთრი სახლის სარდაფის ერთ პატარა ოთახში თუ დამხვდებოდა. ჰენრიმ უნდობლად შეხედა ჩვენს გამოწვევას და ბევრი კითხვა დამისვა. განსაკუთრებით დაინტერესდა, სწრად აფასებდნენ თუ არა ახალი ხელისუფლების წარმომადგენლები დასახული გეგმების განზომილებას. ასეა თუ ისე, ყოველდღე არ ხდებოდა, რომ გერმანელებს, რუსებთან ერთად, მათ შორის მდებარე ქვეყნების გვერდის ავლით დაწყოთ მოლაპარაკებები. როდესაც კითხვებს ბოლო აღარ უჩანდა, შევაგებე, კონსულტაციისთვის კი არ მოვსულვარ, ამბის მოსაყოლად მოვედი, ჩვენ ამ გეგმებს უპირობოდ განვახორციელებთ-მეთქი. ეს ახლებურად ლაპარაკს ნიშნავდა.

ბრანდტს რომ ბერლინის კრიზისის დროს ნდობა არ მოეპოვებინა, საბჭოთა კავშირს რომ არ სცოდნოდა, რომ აშშ ჩვენზე თვალყურის დევნას არ მოიშლიდა, კისინჯერი არ გამანდობდა, რომ მას კრემლთან, საგარეო საქმეთა სამინისტროს გვერდით

ავლით, ჰქონდა საიდუმლო საკომუნიკაციო არხი და არც იმას შემომთავაზებდა, მზად ვარ, პალე შაუმბურგთანაც გავჭრა ასე-თივე პირდაპირი არხიო. მის წინადადებას მაშინვე დავეთანხმე. უკეთესს ვერაფერს ვინატრებდი. ერთმანეთს გავაკონტროლებ-დით და უნდობლობას აღმოვფქრავდით. მე მას ბრანდტის მიერ კოსიგინისთვის მიწერილი წერილის შესახებ ვუამბე, აღვნიშნე ისიც, პასუხი წერილზე ჯერ რომ არ გვჭონდა. გამომშვიდობი-სას კი მითხრა: „თქვენი წარმატება ჩვენი წარმატება იქნება“. ბრანდტს აღტაცებულმა ვუამბე, მან შვებით ამოისუნთქა და მანამდე გაუმეტებელი ფრაზით შემაქო: „ძალიან კარგი“. კი-სინჯერს დღემდე ვემადლიერები. მის გარეშე განმუხტვის პო-ლიტიკა არ განხორციელდებოდა.

ფედერაციის ახალი რწმუნებულის რანგში გავფრინდი ბერლინში, სადაც ყველა სამინისტროს ჰქონდა წარმომად-გენლობა, აღმოვაჩინე, რომ ბერლინში მეტი თანამშრომელი გვყავდა, ვიდრე ბონში, დავათვალიერე ჩემი „რეზიდენცია“ პიუკლერშტრასეზე, სადაც, ადენაუერის მსგავსად, ახლა ბრანდტსაც შეეძლო ღამის გათევა. თანაც, ეს შენობა არასაჯა-რო საუბრებისთვისაც ხელსაყრელი იქნებოდა, განსაკუთრე-ბით, ამერიკის ელჩთან და მის საბჭოთა კოლეგასთან შესახვე-დრად გამოდგებოდა, მიუხედავად იმისა, რომ ამ უკანასკნელს ბერლინში რწმუნებები არ გააჩნდა. გერმანიის გაერთიანების შემდეგ ეს ვილა ფედერალური პრეზიდენტის რეზიდენციად იქცა.

ბონში მივიღე ისრაელის ელჩი აზჰერ ბენ-ნათანი, კურდ იურგენსის უმცროს ძმას ჰგავდა აღნაგობით, თვალისა და თმის ფერით. არჩევნებში გამარჯვება მოგვილოცა და აღნიშნა, ანი ყველაფერი უფრო იოლად მოგვარდებაო. შევენინააღმდე-გე: უფრო ძნელი იქნება-მეთქი, რადგან ახლა აქ სხედან ადა-მიანები, რომელთაც მათი წარსულის გამო ვერ დააშანტაჟებ, ისინი თავს გათავისუფლებულად გრძნობენ და არა დამარცხე-

ბულად-მეთქი. ამ მკვეთრი სიტყვების ბაზაზე კარგი თანამშრომლობა განმტკიცდა.

ამასობაში საგარეო საქმეთა ახალმა მინისტრმა შეეღმა თანხმობა განაცხადა, გვემსჯელა ჯერ კიდევ დიდი კოალიციის მიმართ საბჭოთა კავშირის შეთავაზებულ წინადადებაზე ძალის არგამოყენების შესახებ. პაულ ფრანკისგან, საგარეო საქმეთა სამინისტროს მომავალი სახელმწიფო მდივნისგან ვიცოდი, რომ მნიშვნელოვანი მისიების წინ ჯობს თავად ჩამონერო მიმართულებები, რათა თავიდან აირიდო შეუსრულებელი მოთხოვნები. მე ეს საგულისხმო რჩევა აღარ დამჭირვებია; შეელს მიმართულებების განსაზღვრა ზედმეტად მიაჩნდა, მაიც ყველაფერი ზეპირად იციო. ასე რომ, ბრანდტმა და შეელმა დამავალეს, ინსტრუქციების გარეშე მოსინჯე გრომიკოსთან, განხორციელების როგორი შანსი აქვს ახალი ფედერალური მთავრობის კონცეფციასო.

მოსკოვში ჩემს გამგზავრებას უვერტიურა უძლოდა. არ მინდოდა, მაგრამ მთავრობის სპიკერის კონრად ალერსის დაუინებული თხოვნის გამო დავთანხმდი საბჭოთა უურნალისტთან შეხვედრაზე. შობის წინა ლამეს, საწერი მაგიდა რომ მივალაგე, მაშინ შედგა ის შეხვედრა. გავიცანი ვალერი ლედნევი, წარმოსადეგი, მელოტი კაცი, თავიდან უბრალო კითხვები დამისვა, მერე კი ერთ წამში მომწუსხა, რადგან ბრანდტის მიერ კოსიგინისთვის მიწერილი წერილის ფრაზები მოიხმო. მთავარი, რაც მითხრა: საბჭოთა მხარე მზად არის დახურულ კარს მიღმა აზრთა გაცვლა-გამოცვლისთვის. პოლიტბიუროს მხოლოდ ხუთმა წევრმა იცის ჩემი დავალების შესახებო. ბონში საბჭოთა საელჩო საქმის კურსში არ არისო. მადლობა გადავუხადე და ვამცნე, იანვრის ბოლოს მოსკოვში ჩამოვალ-მეთქი. აღმითქვა, შევხვდეთ ასეთივე ვითარებაშიო.

საშობაო ნაძვისხის მორთვის დრო სადღა რჩებოდა. ბრანდტს დავურეკე. მადლობა გადამიხადა (რაც იშვიათად ხდებოდა) ამ

მშვენიერი საშობაო საჩუქრისთვის და ჩვენი არხის საშუალებით კისინჯერსაც შეატყობინა. აწი აღარ გვადარდებდა, რას უპასუხებდა ჰაინემანი ულბრიხტის. ამ უკანასკნალმა ფედერალურ პრეზიდენტს, იმისათვის, რომ ბრანდტის სამთავრობო განცხადებაზე მიეტანა იერიში, ხელშეკრულების ისეთი შეთავაზება გაუგზავნა, რომელზე საუბარიც წარმოუდგენელი იყო და ამიტომ უპასუხოდ დარჩა. ულბრიხტი მოსკოვთან ჩვენს კონტაქტს ვეღარ ჩაშლიდა.

1970 წლის 14 იანვარს, მოსკოვში ჩემს გამგზავრებამდე ორი კვირით ადრე, ბრანდტმა წარადგინა თავისი პირველი მოხსენება ქვეყანაში არსებული მდგომარეობის შესახებ. მასში მან ძალის არგამოყენების ვალდებულება გამოაცხადა „აღმოსავლეთ ევროპის ქვეყნებთან დღეს არსებული პოლიტიკური საკითხების მოგვარების ფუნდამენტად“, რადგან „იმედი არ არსებობს, რომ გერმანელი ერი, როგორც ერთი მთლიანი, უახლოეს ხანში შეძლებს სამშვიდობო ხელშეკრულების დადებას“. სხვა სიტყვებით: ჩვენს კონცეფციას განუსაზღვრელი ვადით და ყოვლის-მომცველად უნდა მოეგვარებინა ურთიერთობები აღმოსავლეთ ევროპასთან, სანამ ეს სამშვიდობო ხელშეკრულებით იქნებოდა შესაძლებელი. მაშინ ფედერაციულ რესპუბლიკაში ეს დიდად სალაპარაკო არ გამხდარა, განსხვავებით საბჭოთა კავშირის-გან, სადაც, დარწმუნებული ვარ, ეს საკითხი საფუძვლიანად შეისწავლეს. გარდა ამისა, ამასობაში ფედერალურმა მთავრობამ გაუკრცელებლობის ხელშეკრულებას მოაწერა ხელი, რამაც, ალბათ, გრომიკოს, ნიუ იორკში ბრანდტთან შეხვედრა გაახსენა.

მესამე ნაწილი – ტრიუმფი და ტრაგედია

მოსკოვში

ელჩი ჰელმუტ ალარდტი აღფრთოვანებით არ შემხვედრია, გასაგებია, თავზე დაასვეს კაცი, რომელიც პირველად იყო მოსკოვში. საუბარი უსიამოვნოდ დაიწყო. მან შეურაცხყოფად მიიღო, რომ საგარეო საქმეთა სამინისტროს პროტოკოლის ერთი დაბალი რანგის თანამშრომელი გამოუშვეს ჩვენთან შესახვედრად. მაგრამ მე თავად ვწყვეტდი, როდის მეგრძნო თავი არა-სათანადოდ დაფასებულად.

ალარდტმა იუკადრისა ჩემი ჩატანილი ჩელოს ყუთისთვის მოეკიდა ხელი, ეგონა, ასეთი თვალში მოსახვედრი საჩუქარი მხოლოდ დელეგაციის ხელმძღვანელს მოუვიდოდა თავშიო. ამ დროს, ჩელოს ყუთი, ჩემი სასტუმროს ნომერში რომ მივიტანეთ, აღმოჩნდა საგარეო უწყების სამართლებრივი განყოფილების უფროსის, ბატონი ფონ ტრესკოვის საჩუქარი: ვისკითა და შესაბამისი ჭიქებით აღჭურვილი ნამდვილი ბარი.

სანამ გერმანიის ტელევიზიისთვის მცირე კომენტარს ვაკეთებდი, ზურგსუკან გადაჭდობილ ხელებში პატარა ბარათი ჩამიდეს, ლედნევი მწერდა, სასტუმროში დაგირეკავო. ჩვენი დელეგაცია სასტუმრო „უკრაინის“ ოცდამერვე სართულზე ცხოვრობდა. აციმციმებული ქალაქის შთამბეჭდავი ხედი კრემლის ოქროს გუმბათებამდე სწვდებოდა. ამ ქვეყნის რამდენი მკვდარი და ცოცხალი მოქალაქის ბედი გადაუწყვეტიათ ამ ქალაქში! როგორი გრძნობით დავტოვებდი მას, ეს აზრი

ნამდვილად მთრგუნავდა. მხოლოდ მოგვიანებით მივხვდი, რას გულისხმობდა ჰაინრიხ აბერტცი თავის მემუარებში ამ ჩემს ვიზიტზე: „ბრანდტის ხელდასმით, მაგრამ მაინც მარტო გაეშურა ოფიციალური პოლიტიკის ფრონტზე“.

ლედნევი გამოჩნდა. სასტუმროს რესტორნის ცენტრში პატარა მაგიდისკენ წამიძღვა და მითხრა: „არასოდეს აირჩიო მაგიდა კუთეში ან სვეტებთან. ისმინება“. ეს მხოლოდ ერთ რამეს ცხადყოფდა: იგი კგბ-დან არ იყო. ლეომ, როგორც მალე გავუშინაურდით, მითხრა, საელჩის ხვალ შევატყობინებთ, რომ ზეგ გრომიკო შეგხვდებაო. თურმე, ლეოს აღაფრთოვანებდა გერმანული ლიტერატურა, სჯეროდა, რომ ჩვენს ქვეყნებს შორის ახალი ურთიერთობის ჩამოყალიბებაში შეიტანდა წვლილს – სანდო, ნათელი და ერთგული ადამიანი აღმოჩნდა.

მინისტრი, როგორც ვაშინგტონში, ასევე მოსკოვშიც საგარეო საქმეთა სამინისტროს მეშვიდე სართულზე იჯდა. მაგიდას ორთავე მხარეს რვანი შემოსხდომოდნენ. გრომიკო ბოლოს შემოვიდა და ისე მომესალმა, როგორც წაცნობს ნიუიორკიდან. სიტყვა მე დამითმო, ეს თავაზიანობა მასაც უქმნიდა ხელსაყრელ მდგომარეობას. მხოლოდ რამდენიმე ჩანაწერზე დაყრდნობით, ზეპირად ვილაპარაკე ჩვენ მიერ დაგეგმილი აღმოსავლეთის პოლიტიკის ზოგად კონცეფციაზე. საერთო უნდა გამოგვეძება, თუ ნდობის ჩამოყალიბება გვინდოდა. ჩვენი საელჩოს წარმომადგენლები, რუსების მსგავსად, გამალებით იწერდნენ საუბარს, მათაც პირველად ესმოდათ ეს სიტყვები. ნახევარი საათის შემდეგ გრომიკომაც იმავე ხანგრძლივობით ილაპარაკა და გაუკვირდა, მყისიერად რომ ვუპასუხე კრიტიკულ კითხვებზე. დისკუსიამ სამ საათს გასტანა.

ლეოს კომენტარი: გრომიკო ბრეუნევს ექვსი საათის განმავლობაში აბარებდა ანგარიშს. ანი რა მოხდებოდა, ჯერ გადაწყვეტილი არ ჰქონდათ. პერსპექტივები ჯერ კიდევ ბუნდოვანი ჩანდა. მკითხა, ხომ არ ისურვებ პროფესორი გიორგი

არბატოვი გაგაცნო, ამერიკა-კანადის ინსტიტუტის დირექტორი. რასაკვირველია, თანხმობა განვუცხადე. მხოლოდ ოცი წლის მერე გამიმხილა არბატოვმა, კგბ-ს მაშინდელმა შეფა იური ანდროპოვმა დამავალა, კბილი მოუსინჯეო. იგივე ითქმოდა ოფიციალური შეხვედრების დონეზეც. მეორე შეხვედროსას გრომიკოს გვერდზე ვლადიმირ სემიონოვი იჯდა, ყოფილი უმაღლესი კომისარი გერმანიაში. მან ბონის სახელმწიფო მდივნის შეფასებისას ვალენტინ ფალინის მოსაზრებები განავრცო, ფალინი კერკეტი კაკალი გახლდათ, გერმანიის საკითხი მას ებარა, თუმცა გერმანიაში ნამყოფიც არ იყო. ისევ სამი საათი ვისაუბრეთ; ეს დრო იქცა კვირაში ორჯერ ჩვენი შეხვედრების ფორმატად. უცებ ლაფსუსი აღმოვუჩინე: გრომიკომ არაფერი იცოდა გაეროს ქარტის 53-ე და 107-ე მუხლების გერმანიაზე გავლენის შესახებ. არ მინდოდა შემერცხვინა და ტაქტიანად შევუსწორე, თან საყოველთაოდ ცნობილი მეხსიერება შევუქე. სემიონოვმა და ფალინმა კმაყოფილებით ჩაიცინეს, გრომიკომ კი, როგორც ჭეშმარიტ პროფესიონალებს სჩვევიათ, კორექტურა მაშინვე გაითავისა. მივხვდი, რას ნიშნავს შინაგანი სიმშვიდე.

ლეომ „სლავა“ გამაცნო. მხარბეჭიანი, ტანსრული, დიდმუქ-თვალება კაცი, ხელს მოგატეხდა, ისეთი მისალმება იცოდა. რა გვარი იყო, დღემდე არ ვიცი. ის უძლვებოდა შეხვედრას, მაშასადამე, უფროსი იყო, მერე ბრანდტათან გამოვთქვი ვარაუდი, ალბათ ორივე გენერალური მდივნის აპარატიდანაა, ყოველ შემთხვევაში, გრომიკოზე ზემდგომნი არიან-მეთქი. ვისადილეთ უურნალისტთა კლუბში, სადაც ადრე გორკი ქეიფობდა ხოლმე; სლავამ აღნიშნა, ვალერის ნათქვამი ისე გავიგე, თითქოს კოსიგინთან საუბრის სურვილი გამოგეთქვათ. ნიუ იორქში მიღებული გამოცდილების წყალობით მაშინვე მივუგე: სწორად გაიგეთ-თქო. „მაშინ ვეცდებით შეგახვედროთ“, შემაგება პასუხად.

სადამოს, სეირნობისას, სლავამ და ლეომ კომპლიმენტებით ამავსეს: – სამი საათი ბჭობდა პოლიტბიურო, უნდა მიეღე თუ არა კოსიგინსო. ათწლეულების შემდეგ პირველად ითათბირეს სერიოზულად გერმანიის საკითხზეო. მეორე დილას საელჩოში არავის გასჩენია კითხვა, რას ნიშნავდა კოსიგინის მინვევა. ნაშუადლევს ლეომ მოულოდნელი დაბრკოლების შესახებ შემატყობინა: „წვერიანმა კაცმა დარეკაო“. ისტერიული რეაქცია ჰქონია ულბრიხტს, როცა გაუგია, კოსიგინს ჩემი ნახვა რომ უნდოდა. „წკიპზე იდგა ეს ამბავი, მაგრამ შეხვედრა შედგებაო“.

შეიძლება საბჭოთა მხარე შეშფოთდა, რადგან ბონიდან ჩემთვის მოცემული ვერანაირი მითითება ვერ მოისმინეს, ვერ გაშიფრეს და ვერ აღმოაჩინეს, ამ დროს მე მართლა ვნერვიულობდი: არანაირი გამოხმაურება არ მოჰყოლია ჩვენს მრავალრიცხვან მოხსენებებს, არც შეკითხვა, არც მინიშნება, არც რჩევა. ამიტომაც მეტად დამაინტერესა ამბავმა, რომ ინდოეთში მიმავალი შეელის თვითმფრინავი მოსკოვში დაჯდებოდა. საბჭოთა დიპლომატების ერთი ჯვეფი, სემიონოვის ხელმძღვანელობით, გერმანიის საგარეო საქმეთა მინისტრს უხვი საუზმით გაუმასპინძლდა. სემიონოვმა განკარგულება გასცა, – „აირინდიას“ თვითმფრინავი მანამ დაყოვნდება, სანამ სტუმარი საუზმობსო. ძალაუფლების საინტერესო დემონსტრაცია იყო. ჩემს შეწუხებულ კითხვაზე შეელმა მშვიდად მიპასუხა: „სანამ ჩვენგან დუმილია, ყველაფერი წესრიგშია. გააგრძელეთ, რასაც აკეთებთ“. ლამე თვალი ვერ მოვხუჭე, კოსიგინთან შესახვედრად ვემზადებოდი. ეს შეხვედრა დაადასტურებდა მოსკოვში ჩემი მისიის წარმატებას თუ წარუმატებლობას.

მეორე დილას კრემლს უნდა ვწვეოდი. მერსედესი უბრალო სათადარიგო კართან გაჩერდა. პროტოკოლის წარმომადგენელი გერმანულად მოგვესალმა; დაცვის ოფიცერი სამხედრო წესით, უსიტყვოდ და ლიფტისკენ მიგვანიშნა. ზევით მედიდური ნაბიჯით მიგვიძლოდა გრძელ დერეფანში. ჩამიჩუმი არ

ისმოდა, კაციშვილი არ ჭაჭანებდა. ოფიცერმა კარი გამოაღო; პროტოკოლის წარმომადგენელმა ორიოდე სიტყვით გვიჩურჩულა, სტალინის სამუშაო ოთახია. მაღალი ორფრთიანი კარი გააღეს. კოსიგინმა რამდენიმე ნაბიჯი გადმოდგა ჩემკენ, ხელი გამომინოდა და გამიძლვა გრძელი მაგიდისკენ, რომლის ბოლოს საწერი მაგიდა იდგა, ჩემ წინ დაჯდა, ზურგით ფანჯრისკენ. თარჯიმანმა მისი მისალმება რომ მითარგმნა, გაისმა: „გისმენთ“.

ჩემი ცხოვრების ურთულესი და უსიამოვნო მონოლოგი წავიკითხე. სანამ საუბრის მაგვარი რამ შედგებოდა, სახეზე ნერვი არ ასტოკებია, გაყინული ლურჯი თვალები მომაპყრო. ფედერალური კანცლერის მოკითხვა გადავეცი და ძალის არგამოყენების გერმანული კონცეფცია გავაცანი. მისი თხუთმეტწუთიანი უემოციობის შემდეგ სიტყვა გავამძაფრე, ჩემ წინ მჯომი კაცი მაინც არ შერყეულა, ბოლოს, პროვოკაციაზე გადავედი და წარმოვთქვი: „დუმილი არ კმარა“. შეეძლო თავის თავზე მიეღო ან საკუთარ საგარეო საქმეთა მინისტრზე. გრომიკოსთან საუბრებში დიდ წინააღმდეგობად გამოიკვეთა ჩვენი პოზიცია, რომ გერმანელ ხალხს გრძელვადიან პერსპექტივაში სახელმწიფოს გამთლიანების შესაძლებლობა არ უნდა ჩაჰკეტვოდა. რეალისტები ვართ და ვიცით, რომ თქვენთვის ულბრიტი უფრო ახლობელია, ვიდრე ბრანდტი-მეთქი, დავძინე. მოკავშირეთა არცერთ მხარეს შორის არ უნდა გაჩნდეს უნდობლობა.

როგორც იქნა, ხმა ამოიღო და მიპასუხა, გრძელვადიან მიზნებზე საუბარს ახლა აზრი არ აქვსო. „ჩეენ იარაღს არ ვაუღარუნებთ“, მაგრამ ბონში თავდაცვის ახალ მინისტრს ბუნდესვერის გაძლიერება სურსო. სხვა ძალები დაინტერესებული არიან, რომ ფედერალური რესპუბლიკა საბჭოთა კავშირის წინააღმდეგ ფარად მოიშველიოთო. ვუპასუხე, გვენდეთ, ჩვენ არ გადავაჭარბებთ ალიანსისთვის შეპირებულ ზედა ზღვარს, რომელიც 495 000 კაცს გულისხმობს-მეთქი, მაგრამ მზად

ვართ, შევამციროთ ხიდების სამშენებლო მძიმე ტექნიკა-მეთქი. რადგან ევროპის ჩვენს ნაწილში მდინარეები სამხრეთიდან ჩრდილოეთისკენ მიეღინებიან, ეს იქნება ჩვენი თავდაცვითი პოზიცის გამოვლინება-მეთქი. ასე მოილაპარაკეს ბრანდტმა და თავდაცვის მინისტრმა, გეორგ ლებერმა-მეთქი. ასევე გავაუქმებთ საველე ლაზარეთებს, რომელთა დანიშნულება თავდასხმითი ხასიათის არის-მეთქი. ეს შემდეგ საბჭოთა სამხედრო ექსპერტებმაც დაადასტურეს. მართლაც, ჩვენი განმუხტვის პოლიტიკის საწყის ეტაპზე, ბუნდესვერმა პირადი შემადგენლობის უმაღლეს ნიშნულს მიაღწია, თუმცა ამას არაფერი მოჰყოლია.

კოსიგინმა მისაყვედურა, ფედერალურ რესპუბლიკაში ისევ ითხოვენ გერმანიის გაერთიანებას 1937 წლის საზღვრებში; ვინც ასე აზროვნებს, ის ომს არ გამორიცხავსო. მე მას შევახსენე ბრანდტის სამთავრობო განცხადება, რომელიც ეს-ნრაფვოდა ძალის არგამოყენებას ყველა სახელმწიფოს მიერ დღეს არსებულ საზღვრებში, მაგრამ თავი ვერ შევიკავე და ვურჩიე: „ნუ ენდობით მათ, ვინც გეტყვით, რომ გერმანია გაყოფას შეეგუა; ის ან სულელია, ან მატყუარა“.

კოსიგინმა შემდეგ დასძინა, თანახმა ვარ ფედერალურ კანცლერს დახურულ კარს მიღმა შევხვდე საუბრის გასაგრძელებლადო და მკითხა, პარტიულ კონტაქტებზე რას ფიქრობთ, თუ გამოგვადებაო. რადგან მის ქვეყანაში პარტია მართავდა სახელმწიფოს, ორივე მხარეს წაადგება-მეთქი – მიუუგე. ეს იქცა იდეოლოგიურ საკითხებზე გადასასვლელ ფრაზად, გრომიკოსთან ამას არავითარი როლი არ უთამაშია. შევძელი დამეწყნარებინა: მხოლოდ მშვიდობიან თანაარსებობაზე ვსაუბრობთ-მეთქი; იდეოლოგიური თანაარსებობა ორივე ქვეყანას მოუტანს ზიანს და პარტიებს გაანადგურებს-მეთქი. საბჭოთა კავშირს არ უჭირდა ბიურგერულ პარტიებთან თა-

ნამშრომლობა. ახლა ვარკვევდით, როგორ შეეგუებოდა ახალ რეალობას – სოციალ-დემოკრატიულ ფედერალურ მთავრობას.

როგორც იქნა, ჩემი თანამოსაუბრე მოდუნდა და თავისი ქვეყნის ეკონომიკურ პრობლემებზე დაიწყო საუბარი. ჩვენი თანამშრომლობა, შეუსაბამობის გამო, ნაკლებმნიშვნელოვანია. კოსიგინი, სინამდვილეში, მსოფლიოს ყველაზე დიდი სანარმოს გენერალური დირექტორი გალდათ, რომელსაც საბჭოთა კავშირი ენოდებოდა, მაგრამ ვიღი ბრანდტთან პოლიტიკური მოლაპარაკებების პარტნიორად არ გამოდგებოდა. ბოლოს მკითხა, კიდევ რაიმეს თქმა ხომ არ გსურთო. ვთხოვე, კეთილგანწყობით განიხილეთ განსაკუთრებით მძიმე შემთხვევებში ქვეყნიდან გასვლის ნებართვის გაცემა-მეთქი. იკითხა: „რამდენი არიან“. ჰაერიდან დავაბრეხვე ციფრი: „სამოცდაორი“. „ფალინს გადაეცით სია“. სამოცდაორი „საქმე“ 196 პირის სიად იქცა – მოხუცი, ახალგაზრდა, ომის დავინუბული ტყვეები, აღმოსავლეთ პრუსიელები, ბევრ მათგანს მრავალჯერ ჰქონდა გასვლაზე უარი მიღებული. საელჩის არ სჯეროდა წარმატების, მაგრამ მაინც გულდასმით იმუშავეს სიის შედგენაზე. ფალინმა ჩემს გამგზავრებამდე ჩაიბარა სია, ერთი თვის შემდეგ კი საელჩის ბალში 196 ბედნიერი ადამიანი ვიხილე. საჯარო ტრიუმფისგან სრულიად შევიკავეთ თავი. ნდობა უნდა შეგვენარჩუნებინა.

შემდეგ ულბრიხტი თავად ჩავიდა მოსკოვში. გართულებების თავიდან ასაცილებლად გრომიკომ მე და ჩემი ყველაზე მნიშვნელოვანი თანამშრომელი კარლ-ვერნერ ზანე ლენინგრადში მიგვიპატიუა. ჩქარი მატარებელი საქმაოდ ნელა მიდიოდა, რომ გათენებამდე არ ჩასულიყო ლენინგრადში, გზაში ჩვენმა თანმხლებმა ლეომ გვიამბო, კოსიგინი კეთილგანწყობით გამოეხმაურა თქვენთან საუბარსო, იმის მიუხედავად, რომ ბევრი ისეთი რამ მითქვამს, რაც მას სრულიად არ მოსწონებია. „წარმოდგენა არ გაქვთ, რა ხდება ხელმძღვანელ ჯგუფში. უნდა გვაცალოთ. ჩვენ უფრო გვიჭირს, ვიდრე – თქვენ. ჩვენ

ჩვენი მეკავშირეები გვყავს. გერმანიის საკითხი რთულია“. ეს არბატოვისგან უკვე მსმენოდა. კაცმა რომ თქვას, ჩვენი პოზიცია საბჭოთა პოლიტიკის ახლებურ ორიენტაციას მოითხოვდა. მოსკოვი ამისთვის უფრო ნაკლებად იყო მზად, ვიდრე მეგონა. თავდაპირველი ვარაუდი, რომ ორ კვირაში გავარკვევდით ჩვენი კონცეფციის ვარგისიანობას, სრულიად არარეალური აღმოჩნდა. რამდენ ხანს გასტანდა ამ უზარმაზარი ტანკერის – საბჭოთა კავშირის შემობრუნება, დროის არანაირ პროგნოზს არ ექვემდებარებოდა.

სლავას და ლეოს ვუმადლოდი, რომ ჩავწვდი, საბჭოთა სისტემა სულაც არ იყო დახურული, იგი ჩაკეტილი იყო. დასავლეთში საზოგადოებრივი აზრი, როგორც წესი, ამზადებდა გადაწყვეტილებებს, რომელთაც, გაცხადებისას, მოულოდნელობის ეფექტი თითქმის ალარ გააჩნდათ. ამგვარი პროცესი შენებული გვეჩვენებოდა. მოსკოვში კი კიდევ უფრო გაჭიანურებული აღმოჩნდა. იქაც არსებობდა პლურალიზმი: განსხვავებული მოსაზრებები და ინტერესები პოლიტიკის, სამხედროების, საიდუმლო სამსახურების, აპარატებისა, ადმინისტრაციასა და მოქალაქეებს შორის. არ მუშაობდა ბრძანებისა და მორჩილების პრინციპი. მხოლოდ ჩანდა ასე, რადგან გადაწყვეტილების მიღების შიდა პროცესი საიდუმლოდ რჩებოდა და მნიშვნელოვანი გადაწყვეტილებები ძირითადად, შაბათ-კვირას ცხადდებოდა ხოლმე. უპირატესობა – მოულოდნელობის ეფექტი; ნაკლი – შიშისა და განუჭვრეტელობის გაღვივება. საბჭოთა მენტალობის რელიქტებს დღესაც ვაწყდებით.

სლავამ და ლეომ თავიანთ სისტემაში ჩაგვახედეს. შიდა პროცესებს ვცნობდით, ნაწილობრივ ვაფასებდით კიდეც და გავლენის საშუალებაც კი გაგვანდეს. ისინი იქცეოდნენ როგორც პატრიოტები, რომელთაც სწამდათ, რომ ამერიკა, როგორც საბჭოთა საგარეო პოლიტიკის ერთადერთი ორიენტირი, საკმარისი არ იყო; რომ ევროპა და გერმანია აუცილებელი

ფაქტორები გახდებოდნენ. მომავალი ათწლეულების განმავლობაში მათ არასდროს მოუწოდებიათ ჩვენთვის ყალბი ინფორმაცია. ხდებოდა, რომ რაღაც არ იცოდნენ ან თქმის უფლება არ ჰქონდათ, მაგრამ მათ სიტყვას წყალი არ გაუვიდოდა. ასე განმტკიცდა ნდობა, რომელიც ბრანდტიდან შმიდტზე გადავიდა და და შემდეგ კოლზე.

ლენინგრადის ერმიტაჟის გამაოგნებელი შთაბეჭდილები ვერ გაანელებდა ომში თუ შიმშილით დახოცილთა, სწეულთა და გაყინულთა ბედზე წუხილს. დაუვიწყარია მილიონი ადამიანის სასაფლაო... მათ ვერც სმოლნის უზარმაზარი შენობა და ვერც სხვა რევოლუციონერთა დაბადების ქალაქები შეედრებოდა. ოცი მილიონი მსხვერპლი საბჭოთა ხელმძღვანელობის-თვის, გერმანელებთან ახალი პოლიტიკის სარწმუნო დამაჯერებლ დასაბუთებას საჭიროებდა. ვალენტინ ფალინმა მთელი ოჯახი ლენინგრადის ბლოკადისას დაკარგა და ჩვენი ისტორია და ენა შეისწავლა, რომ მიმხდარიყო, როგორ შეეძლო ასეთი კულტურის ერს უსასტიკესი ბარბაროსობა. იგი ჩემი პარტნიორი გახდა, რომელთანაც უფრო ხანგრძლივად და ხშირად ვსაუბრობდი ხოლმე, ვიდრე გრომიკოსთან.

შევეგუოთ ან გადავლახოთ საზღვრები

გრომიკო თავიდანვე ისე მკაფიოდ გამოხატავდა სათქმელს, უკეთესს ვერ ინატრებდი. „სანამ საზღვრებზე არ შევთანხმებულვართ, არაფერზეც არ შევთანხმებულვართ“. შეთანხმებაში იგი თავის მოკავშირეთა საზღვრებსაც გულისხმობდა. ბევრ ევროპულ მეზობელ ქვეყანას ეშინოდა, რომ მათი გვერდის ავლით შედგებოდა გერმანიასა და რუსეთს შორის მოლაპარაკებები, მაგრამ სხვანაირად წარმოუდგენელი იყო, მხოლოდ მოსკოვს შეეძლო გადაწყვეტილების მიღება და მზად იყო საუბრისთვის. მე არაფერი მქონდა სანინააღმდეგო, თუნდაც იმიტომ, რომ ამგვარი საუბრისთვის განკუთვნილი დრო მოკლდებოდა, თანაც, აღმოსავლეთის ბლოკის ყველას მიერ აღიარებული წინამძღოლის ძალაუფლებას ჩვენი პოლიტიკის სასიკეთოდ ჩავრთავდით და პასუხისმგებლობასაც დავაკისრებდით.

„საზღვრების“ ძირითადი კომპლექსის გათვალისწინებით განიხილებოდა მოსკოვთან ყოველი მოლაპარაკების შედეგები. მე და ფალინი პირისპირ შეხვედრებისას საათობით, დღეების და კვირების განმავლობაში ვათანხმებდით სიტყვებს. კერძოდ, საბჭოთა კავშირის ინტერესი, რომ შეუცვლელი და დაცული უნდა ყოფილიყო საზღვრები, ეჭვს არ იწვევდა. მაგრამ სწორედ ხელშეუვალი სტატუს კვო გახლდათ ჩვენთვის მიუღებელი. ძირითადი კანონისა და ჩვენი რწმენის თანახმად, გერმანიას

გაერთიანების შანსი არ უნდა დაჰკარგვოდა და სახელმწიფოებრივი თვითგამორკვევის, მაშასადამე, გერმანიის საკითხი ღიად უნდა დაგვეტოვებინა. ამგვარად, მოლაპარაკებების პირველივე წრის მიმდინარეობისას გაჩნდა იდეა მომზადებულიყო წერილი, რომელზეც ზანესთან ერთად ვიმუშავე და რომელიც საბჭოთა მხარეს დაუბრკოლებლად უნდა მიეღო, რადგან ყველა გერმანელის მშვიდობიანი თვითგამორკვევა ჩვენს ხელშეკრულებას არ ენინააღმდეგებოდა. როგორც იქნა, მივაგენით საჭირო სიტყვას – „შეულახავი“, იგი ურთიერთშეთანხმების საფუძველზე ცვლილებას ექვემდებარებოდა, მითუმეტეს, რომ მერე მას დაემატა „წერილი გერმანიის გაერთიანების შესახებ“.

ტერმინი „შეულახავი“ ხუთი წლის შემდეგ ეუთკ-ს ჰელსინკის საბოლოო აქტის მიღებამდე შენარჩუნდა. იგი ყველამ აღიარა. ნატოს ქვეყნებმა (აშშ-მაც), ვარშავის ხელშეკრულების ქვეყნებმა და ნეიტრალურმა სახელმწიფოებმაც. ამგვარად გერმანიის თემაზე კამათი დამთავრდა. ვერავინ წარმოიდგენდა ორ გერმანულ სახელმწიფოს შორის საზღვრის ურთიერთშეთანხმებულ, მშვიდობიან გაუქმებას. მხოლოდ ფედერალური მთავრობა განიხილავდა ჰელსინკის, როგორც პროცესს, რომელიც გერმანიის გაერთიანებით უნდა დასრულებულიყო.

მეორე კომპლექსი ჩვენი კომპეტენციის საზღვრებს უკავშირდებოდა. არცერთი გერმანული სახელმწიფო არ იყო სუვერენული. გერმანიის, როგორც მთლიანის განკარგვის ხელშეუვალი უფლება ოთხ გამარჯვებულ ძალას ეპყრა. ჩემი საფუძვლიანი არგუმენტი, საბჭოთა კავშირის ინტერესში ვერ იქნებოდა საკუთარი ძალაუფლების ულბრიხტისთვის გადაცემა, მითუმეტეს, გდრ-თან დადებული ცალკე სამშვიდობო ხელშეკრულებით, გრომიკომ მიიღო, თუმცა არაფერი უთქვამს. ამგვარად, საბჭოთა კავშირსა და გდრ-ს შორის სამშვიდობო ხელშეკრულება, რომელიც 1958 წელს ხრუშჩოვის მიერ წაყენე-

ბული ულტიმატუმის შემდეგ დღის წესრიგიდან არ მოხსნილა, ახლა დასამარდა.

ბერლინის საქმე უფრო რთულად რჩებოდა. იქ ბონს საერთოდ არ გააჩნდა კომპეტენცია, მაგრამ, სამაგიეროდ, სასიცოცხლო ინტერესები ჰქონდა. ბერლინის შესახებ საუბარი მსურდა, მაგრამ რაიმეზე შეთანხმება – არა. როდესაც გრომიკო ამას მიმიხვდა, პოზიცია შეცვალა, მხოლოდ დასავლეთის ძალებთან მოინდომა ბერლინზე ლაპარაკი და დამაყენა ამოცანის წინაშე, უზრუნველმყოფ ფედერაციული რესპუბლიკის გავლენა ბერლინის შესახებ მოლაპარაკებებზე, რომლის მაგიდასთანაც ჯდომის უფლება არ ჰქონდა.

არაფორმალურ დონეზე შეგვატყობინეს, რომ გდრ-ის პრე-მიერ-მინისტრი ვილი შტოფი ფედერალურ კანცლერს მოსკოვის გვერდის ავლით შეხვედრას სთავაზობდა. ამბავი, რომ ბრანდტი ამ შეხვედრას ამზადებდა, მოსკოვში ჩემგან უფრო მაღალ გაიგეს, ვიდრე აღმოსავლეთ ბერლინისგან. მე იქ დავრჩი, რადგან მოსკოვის მიმართ გულწრფელობის დადასტურება უფრო მნიშვნელოვანი იყო, ვიდრე ერთურტის შეხვედრაში მონაწილეობა. მოსკოვმა დახურული სატელეფონო ხაზის მეშვეობით ბონიდან უფრო სწრაფად, კორექტულად და დაწვრილებით მიიღო ინფორმაცია ერთურტში გდრ-ისთვის არასასიამოვნო მოვლენების შესახებ, როგორიც იყო ხალხის მიერ ბარიერების გარღვევა შეხვედრის მიმდინარეობისას, ვიდრე აღმოსავლეთ ბერლინიდან. ყურადღებიდან არ გამოჰპარვიათ, რომ ბრანდტი ცდილობდა ერთურტის სასტუმროს ფანჯრიდან დაეშოშმინებინა ხალხი, რომელიც „ვილის“ გაჰყვირდა. ლეომ აღნიშნა: „რაც გინდა თქვი გდრ-ზე, რაიმეს ჩაკეტვა თუ გადაწყვიტეს, აკეთებენ კიდეც“.

გერმანიის ორივე მთავრობის მეთაურის პირველი შეხვედრა მედიისთვის სიახლე იყო. მაგრამ ერთურტის კადრები თავად ლაპარაკობდნენ, რაც აღმოსავლეთშიც და დასავლეთშიც, ბე-

ვრის გასაკვირად, მოულოდნელები აღმოჩნდა: გერმანელები თუ მიუშვი, გაერთიანებას მოინდომებენო. ერფურტში ძირეული ვერაფერი გადაწყდებოდა, სანამ მოსკოვში არ მივაღწევდით რამეს.

იქ კი ჩვენი მუშაობის შედეგი ათ პუნქტად ჩამოვაყალიბეთ. მრავლობით ფორმას ვხმარობ, რადგან ეს ერთობლივი ნამუშევარი გახლდათ. ავტორები – გრომიკო, ფალინი და მე ვიყავით. ხოლო მოგვიანებით „ბარის დოკუმენტი“ რომ დაერქვა, მცდარი და არასამართლიანი გახლდათ. რადგან ფალინს ფასდაუდებელი წვლილი მიუძღვოდა მარტივი და დახვენილი სტილის გამო. სანამ დოკუმენტს ჩვენს მთავრობებს წარვუდგენდით და მოლაპარაკების დაწყებას ვურჩევდით, გრომიკომ დამტანჯა. მიუხედავად იმისა, რომ ტექსტი უკვე შეთანხმებული გვქონდა, მაგრმნობინა, გერმანის გაერთიანების შესახებ წერილს დავეთანხმები, თუკი საზღვრის შესახებ ფორმულირებას – „შეულახავი“ – უფრო მძაფრი სიტყვით შეცვლითო. ვფიქრობ, ზედმეტი მოუვიდა. პირად წერილში დავუსაბუთე, რომ ტექსტი ასე უნდა დარჩენილიყო, რადგან შეესაბამებოდა ჩვენი მთავრობების მიზნებსა და ინტერესებს. „მე ვერ და არ შევიცვლი პოზიციას ჩემი მთავრობის წინაშე, განსაკუთრებით იმ გამოცდილების გათვალისწინებით, რაც მივიღე ხანგრძლივი დისკუსიების განმავლობაში“. წერილი რომ გავაგზავნე, მხოლოდ მერე შევატყობინე შეელს ჩემი სოლო-გამოსვლის შესახებ.

მეორე დღეს ფალინი მომადგა და მკითხა, შენი წერილი ფე-დერალური მთავრობის აზრსაც თუ გამოხატავსო. კაკალ-გულ-ში გაარტყა. მე მოვიტყუე, „დიახ!“. ცოტა ხნის შემდეგ გრომიკო შემოგვიერთდა: ბოლო სხდომის წინ დრო არ მქონდა, თქვენი და ფალინის შემუშავებულ ტექსტს გავცნობოდიო. ამასობაში წავიკითხე და ვეთანხმებიო. არ შევიმჩნიე, როგორ მომეშვა გულზე და ვუთხარი, ბონში პოზიტიურ მოხსენებას გავაგზავნი-მეთქი. საელჩოში ალარდტმა შამპანურით მომილოცა. მერე

კი საგარეო საქმეთა მინისტრის დეპეშამაც არ დაახანა: გრო-
მიკოსადმი მიწერილ წერილზე დასტურს მაძლევდა და ჩემს
პოზიციას იწონებდა. ასე აღმოიფხვრა ტყუილი. არასოდეს და-
ვუვინყებ შეელს ამ დეპეშას.

ბონში მოკავშირეები წარმატებულ გარღვევას გვიღოცავდ-
ნენ. ათი პუნქტი ყველას მივაწოდეთ. მაგრამ ჯერ თავი ქუდში
არ გვქონდა; სანამ ეს პუნქტები მხოლოდ ქაღალდზე ეწერა,
მოსკოვს არაფერს ავალდებულებდა. ვარშავაში დუკვიტცის
ხელმძღვანელობით მოლაპარაკებები დუნედ მიედინებოდა.
ახლა ალერდტიც კი გვაჩარებდა: „მანამ დაჰკარ, სანამ რკინა
ცხელია“. შეელს უკვე დაჯავშნილი ჰქონდა მოსკოვის ბილეთი,
როცა კონსტიტუციის მინისტრმა, გენშერმა დაადგინა, დოკუ-
მენტს გადამომება სჭირდებაო. ბრანდტი ბრდლვინავდა, რომ
კონსტიტუციის საკითხებს მისი კომპეტენცია არ სწვდებოდა
და უკმეხად ჩაილაპარაკა: „სერ ვალტერმა თავის პარტიულ
მეგობართან გაარკვიოსო“.

უხერხული იყო, რომ ბონი შეთავაზებულ და მოსკოვისგან
დადასტურებულ შეხვედრას აუქმებდა. შეელმა თავისი ვერ
გაიტანა და არც იმან უშველა, კაბინეტის სხდომაზე ფედერა-
ლურმა კანცლერმა რომ განმარტა, საგარეო საქმეთა მინის-
ტრის მოსკოვში გამგზავრება ჩემი ნებართვით ხდებაო. გენ-
შერს უნდოდა ქულა ჩაეწერა და ბრანდტს ვუთხარი, შეიძლება
მოახერხოს კიდეც-მეთქი. ივნისის შუა რიცხვებში ათი პუნქ-
ტი სიტყვა-სიტყვით გამოაქვეყნა უურნალმა „ქვიქმა“. დღემდე
უცნობია, ვინ მიაწოდა მათ ეს დოკუმენტი. ამით მდგომარეო-
ბა შეიცვალა. ივლისის ბოლოს შეელი მოსკოვში რომ ჩავიდა,
გრომიკომ განუცხადა: რადგან ათი პუნქტი, მიუხედავად ჩვენი
შეთანხმებისა, საჯარო გახდა, ტექსტზე საბჭოთა კავშირი ვე-
ლარ მოილაპარაკებსო. ორი კვირის განმავლობაში ორ საგარეო
საქმეთა მინისტრს შორის მოლაპარაკებები ჩიხში შევიდა.

მოულოდნელად ლეო გამოჩნდა. შეელმა მყისვე თქვა: „ყველაფერი კარგად იქნება“. ფალინთან და სლავასთან მოთათბირების შემდეგ ყინული დავძარით. მეორე და მესამე მუხლები გადავაბით და დავაკავშირეთ „საზღვრის პატივისცემა“ და „ძალის არგამოყენება“. ბრანდტს პირადი წერილით შევატყობინე, რომ „პოლიტბიურო წინა ლამეს ტექსტს დაეთანხმა“. ალარ მახსოვს, ერთად სეირნობისას რომელმა მოიფიქრა ეს ფორმულირება, გრომიკომ თუ შეელმა. ასეა თუ ისე, საგარეო საქმეთა ორივე მინისტრმა მოიწონა. სამი გამარჯვებული ძალა ცდილობდა ჩვენი მეშვეობით მიეღწია იმისთვის, რაც თავად ვერ შეძლეს და პირიქით, საქმე გაართულეს, მაგრამ შეელმა მტკიცედ გადაწყვიტა, რომ ვერ შეგვაჩერებდნენ და პარაფირება შეათანხმა. წინა სალამოს სახე და მე ლეომ დაგვპატიჟა თავის ოროთახიან ბინაში, მისი მეუღლე ლიდია ბლინებით გაგვიმასპინძლდა. ლეომ გვითხრა: „ნამდვილად არ ვიცი, შეძლებთ თუ არა როდესმე გაერთიანებას, მაგრამ თუ ეს უნდა მოხდეს, იცოდეთ, ხვალ დგამთ ამ გზაზე პირველ ნაბიჯსო“.

*

ფედერალური კანცლერის პირველი ვიზიტი ვაშინგტონში თავბრუდამხვევად წარმატებული იყო. ვერტმფრენით გამგზავრება კემპ დევიდში, CIA-ს შეფის მოხსენება კოსმოსიდან ფოტოს გადაღების შესაძლებლობაზე – ლენინის მავზოლეუმის წინ რიგში „პრავდას“ სათაური იკითხებოდა. ფეოდალებივით მიგვიღეს „ბლეარ ჰაუსში“, პრეზიდენტის ოფიციალური სტუმრების რეზიდენციაში. როგორც იქნა, მარტო დავრჩით, ბრანდტმა ნიქსონზე ქილიკი დაიწყო, რა უსიმპათიო კაციაო. გავაფრთხილე: არ გვისმენდნენ-მეთქი. დამამშვიდა: მოსკოვში კი არ ვართო.

საღამოს, თეთრ სახლში დიდი მიღების დროს, თავს მეგობრების წრეში ვგრძნობდით, არა იმიტომ, რომ ნიქსონი ბრანდტის კისინჯერს მეძახდა, არამედ იმიტომ, რომ არც კი მიუნიშნებიათ, თქვენს აღმოსავლეთის პოლიტიკას გავაკრიტიკებთ ან შევაფერხებთო. წარმატების მაუნყებელი იყო ასეთი გულითადი ურთიერთგაგება.

კარგა მოგვიანებით შევიტყვე კისინჯერისგან: რასაკვირველია, გვისმენდნენ. ნიქსონს უთქვამს, ბრანდტი არ მესიმპატიურება, თანაც ლოთიაო. კიდევ უარესი: ჰენრიც დასთანხმებია! მერე მთხოვა, ნუ გენყინებაო და გამომიტყდა, ბევრ რამეზე მივდიოდი, ნიქსონზე, ამ რთულ კაცზე გავლენა რომ მქონოდაო. მე მსგავსი არაფერი გამომიცდია.

*

ფედერალური კანცლერის დასახვედრად კოსიგინი და გრომიკო მოვიდნენ აეროპორტში. მოსკოვში ეროვნული ჰიმნის მოსმენისას ტანში ჟრუანტელმა დამიარა. კრემლისკენ გამგზავრებამ დიდი შთაპეჭდილება მოახდინა. მოძრაობა გაეჩერებინათ. შუქნიშნები მწვანეზე ჩაერთოთ, რომ სვლა არ შეფერხებულიყო. მეგობარმა ხელი ჩამავლო და დიდხანს მაგრად მიჭერდა, ვიდრე ფიქრებს ჩაღრმავებოდა, თითქოს უინტერესო მზერა გარე სამყაროსკენ მიესყრო.

კრემლის პროტოკოლმა დარბაზის ორივე მხარეს კარი ერთდროულად გააღო, რომ ბრანდტი და ბრეჟნევი ერთდროულად შესულიყვნენ და ერთანეთს მისალმებოდნენ. გრომიკომ ბრეჟნევთან წარმადგინა, იგი უყურებდა, როგორ აწერდნენ ხელს მთავრობის მეთაურები და მათი საგარეო საქმეთა მინისტრები ხელშეკრულებას.

გენერალურ მდივანსა და კანცლერს შორის პირისპირ საუბარი ოთხ საათს გაგრძელდა. სინამდვილეში, ეს იყო ოთხი გრძელი მონოლოგი, ერთადერთი შედეგი – ორივე მიხვდა, რომ მეტი დრო სჭირდებოდათ და ერთმანეთით დაინტერესდნენ. კომუნისტური პარტიის თავმჯდომარემ გაუგო ბრანდტს, რომ ბერლინის ორგანიზაციას ვერ გარდაქმნიდა დამოუკიდებელ პარტიად. ამით ამოინურა საბჭოთა პოლიტიკის იდეა „დასავლეთ ბერლინის დამოუკიდებელი პოლიტიკური ერთეულის“ შესახებ. საბოლოოდ ორივენი შეთანხმდნენ, რომ ყოველწლიურად შეხვდებოდნენ და გადაწყვიტეს სანდო „არხი“ შეექმნათ, ვაშინგტონთან არსებული „საიდუმლო არხის“ მსგავსად. მომცეს ტელეფონის ნომერი და შემეძლო ლეო ბონში გამომეძახა. შეელმა და გენერამა უსიტყვოდ მისცეს ერთნლიანი ვიზა. სლავას მხოლოდ დასავლეთ ბერლინამდე შეეძლო ჩამოსვლა, დასავლეთ ბერლინში უვიზო მიმოსვლა იყო მთელი მსოფლიოსთვის. არა მხოლოდ ბერლინის საკითხის შემდგომი მოგვარებისას, საერთოდ, ორივე მათგანი შეუცვლელი აღმოჩნდა.

ბრეჟნევისთვის ბრანდტი იყო პირველი დასავლელი სახელმწიფო ლიდერი, რომელსაც იგი შეხვდა. ჭუუში დაუჯდა სანდო ინფორმაციის მიღება საგარეო საქმეთა მინისტრის გვერდის ავლით. მათ შორის „ქიმია“ აშკარად მუშაობდა. ორივეს უყვარდა ლვინო, ქალები და სიმღერა. ხოლო ექიმის რჩევას, თავს მოუფრთხილდითო, ორივემ შეთანხმებულებივით უპასუხა, სიმღერას შევეშვებითო.

წლების განმავლობაში ორივე არხმა – როგორც ვაშინგტონის, ასევე მოსკოვისამ, ინსტიტუციური ხასიათი შეიძინა. მხოლოდ უმაღლეს დონეზე კი არ იცვლებოდა წერილები, არამედ თანამშრომლების დონეზეც. ვაშინგტონიდანაც და მოსკოვიდანაც გვაფრთხილებდნენ ტერორისტულ აქტებზე, ამ არხების საშუალებით ვითხოვდი პასუხს ისრაელის არაფორმალურ შეკითხვაზე მოსკოვთან დიპლომატიური ურთიერთობების

დამყარების თაობაზე, თუმცა, ეს უფლება ბრეუნევის კომპეტენციაში სულაც არ შედიოდა.

ბრანდტი ისეთი სიმპათიით განიმსჭვალა ბრეუნევის მიმართ, ნიქსონისადმი მსგავსი გრძნობა არ გასჩენია. ბრეუნევსაც რომ არ ჰქონოდა ბრანდტის მიმართ იგივე დამოკიდებულება, ულ-ბრიხტს და შემდეგ ჰონეკერს არ გააცურებდა. საბჭოთა მეთაური ისეთ ინფორმაციებს იღებდა, მისი ვერცერთი სამსახური ვერ მიაწვდიდა. ორივე დედაქალაქი დარწმუნებული იყო, რომ იცოდნენ, რას ფიქრობდა ბონი. ბრანდტის პიროვნული ნდობის წყალობით ორივე არხი გუგუნებდა. ვაშინგტონთან ისეთი ინტენსივობის ურთიერთობა ჩამოყალიბდა, როგორიც მომავალში აღარ განმეორებულა. მოსკოვთან ურთიერთობაც სასიამოვნო იყო, სანამ ბრანდტი და ბრეუნევი აგებდნენ ამაზე პასუხს.

ამის წინაპირობა: არხებიდან ინფორმაციას არ უნდა გაეუონა. ასეც მოხდა. ბრანდტის გადადგომის შემდეგ ჰელმუტ შმიდტს კრემლთან არსებული არხის და მისი თავისებურების შესახებ შევატყობინე, მან კი მთხოვა, პასუხისმგებლობა ჩამს თავზე ამეღო და შემდეგ ბერლინში ფედერალური რწმუნებულის რანგში გამეგრძელებინა. მისი გადადგომის შემდეგ, არც მისთვის მიკითხავს და არც ბრანდტისთვის, საქმის კურსში ჩავაყენ ჰელმუტ კოლი, რომელმაც ერთი ლამე იფიქრა, მერე და-მირეკა და მწვანე შუქი ამინთო საქმის გასაგრძელებლად: „რა იცით, რა ხდება. დეტალებზე ტელჩიკს დაელაპარაკეთ“. მოსკოველ პარტნიორთან ერთად გადავეცით არხი ყველა ფორმალობის დაცვით. სანამ კოალიციის ახალი პარტნიორები, ერთი სართულით ქვევით, საგარეო პოლიტიკაზე საუბარს დაიწყებდნენ, კოლმა უკვე მიაჭედა ერთი ლურსმანი, როგორც ღიმილით აღნიშნა კანცლერის აპარატის ახალმა უფროსმა პორსტ ტელჩიკმა. ვილის გავაგებინე: ჩვენი აღმოსავლეთის პოლიტიკა საიმედო ხელში რომ აღმოჩნდა.

მაშ, იმოქმედე

მოსკოვის ხელშეკრულების ხელმოწერის შემდეგ საქმის გაგრძელებას ვესწრაფვოდით. უპირველესად, დღის წესრიგში იდგა ხელშეკრულება პოლონეთთან, ასევე, ბერლინის საკითხის მოგვარება ოთხი გამარჯვებული ძალის მიერ. ბონში რომ დავბრუნდით, CIA-ს ჩვენზე „პასუხისმგებელმა“ მოხელემ მომაკითხა (ყველა პარტიაზე იყო მიმაგრებული „მსგავსი“ მოხელე). „ვაშინგტონში ჩვენებს აინტერესებთ, რაზე უნდა ვიღაპარაკოთ ბერლინში. ჩვენი პოზიცია ხომ მტკიცე ვერ იქნება“, მითხრა მან. დავამშვიდე და დავარწმუნე, ზუსტად ვიცი, საქმის ვითარება და მალე შეგატყობინებ-მეთქი. სასწრაფოდ უნდა დავლაპარაკებოდი ბრანდტს. შინ დავპატიჟე. მის საყვარელ კერძს, კარტოფილის ნამცხვარს ვერ შევთავაზებდი, სუფრის ხშირად განახლება დაგვჭირდებოდა. ამიტომ ბარდის წენიანი მოვუმზადეთ. გლეხური საჭმელები უყვარდა, მაგრამ ამას ხელი არ შეუშლია, მოსკოვში კოვზებით ეგემნა ხიზილალა.

აქ ერთი საგულისხმო განმარტებაა აუცილებელი: 1991 წლამდე ყველა წარმოდგენა აღმოსავლეთის პოლიტიკის სფეროში, ყველა გეგმა და იდეა ემყარებოდა ვარაუდს, რომ საბჭოთა კავშირი და ვარშავის ხელშეკრულება მუდამ იარსებებდა. 1991 წლის მოვლენები, რომელმაც მსოფლიო შეძრა და ვარშავის ხელშეკრულების დასასრული გამოიწვია, დასავლეთს არ განუჭვრეტია. მოლოდინები და იმედები მიმართული იყო

გარკვეულწილად, სისტემის ლიბერალიზაციაზე, მშვიდობიან თანაარსებობაზე და კონსტრუქტიულ თანამშრომლობაზე; ამასთან, არსებული იდეოლოგიური განსხვავებები, მშვიდობის ერთობლივი მიზნის მისაღწევად, უნდა დამორჩილებოდა კამათის გარკვეულ კულტურას. არც ბრანდტს და არც მე არ შეგვეძლო განმუხტვის პოლიტიკის გავლენის წინასწარმეტყველება ან დაგეგმვა.

ჩვეულებრივად ვსაუბრობდით. „ვაშინგტონსა და მოსკოვში ჩვენს მეგობრებთან შედარებით“, როგორც ბრანდტმა აღნიშნა, ყველა მონაწილეს ვუსწრებდით, რადგან ვიცოდით ბერლინის საჭიროებები და მისი მოქალაქეების ფსიქოლოგია. ამიტომ არ გაგვჭირვებია მოლაპარაკებების ძირითად მიმართულებებზე შეთანხმება. ვფიქრობდით, რომ, პრაქტიკული თვალსაზრისით, ფრთხილად უნდა ჩაგვეჭიდა ხელი ოთხივე გამარჯვებული ძალისთვის და წინ გავძლოლოდით. ვილიმ მირჩია, გონივრულად და თავშეკავებულად მოიქეციო. ჩვენმა საუბარმა მანამდე არარსებული და არც არასდროს განცდილი სივრცე და სიღრმე შეიძინა.

ჩვენი გაყოფილი მსოფლიოს, მათ შორის, საკუთარი გახლებილი ქვეყნის ყურებისას, ძნელად თუ უარყოფდი, რომ მთელი ეს უბედურება გერმანიამ გამოიწვია. მარქსმა და ენგელსმა მსოფლიო გავლენა მოიპოვეს, იდეოლოგიურად და პოლიტიკურად, ომის ჩათვლით, რომელიც საოცარი პოლიტიკური სამართლიანობის წყლობით ისევ გერმანიას შემოუბრუნდა. ალბათ უცნაური არ უნდა იყოს, რომ ამ გაყოფილი სამყაროს შუაგულში უფრო მონადინებული ხდები, იპოვო გახლეჩის შემსუბუქების და დაძლევის გზები. განმუხტვის პოლიტიკა შეიძლებოდა გამხდარიყო აღმოსავლეთსა და დასავლეთს შორის სახიფათო დაპირისპირების გადალახვის საშუალება. თავისი მნიშვნელობით ეს გაუტოლდებოდა „კომუნიზმის ე. წ. სნეულების“ შემსუბუქებას. თითქმის გერმანელების ისტო-

რიულ პასუხისმგებლობად შეიძლებოდა მიჩნეულიყო ეს საქ-
მე. ბრანდტმა მოითხოვა, ამ საკითხზე არასდროს იღაპარა-
კოო. „ყალთაბანდებად მოგვნათლავენ“. სიტყვების კომბინაცია
„გერმანელი“ და „წინამძღოლობა“ ძალიან საშიშიაო.

მეორე მხრივ, დამამშვიდა, არც კი ვიცით, გამოგვივა თუ
არა ბერლინის საკითხის მოგვარებაო. ბრანდტი მაშინაც მყა-
რად იდგა მინაზე, როცა შორეულ ჰორიზონტს გასცექეროდა.
ალბათ, ერთადერთხელ ალმოჩნდება გერმანია ასეთ გადამწყ-
ვეტ მდგომარეობაში, ვერც კი წარმომიდგენია ქვეყნისთვის
ასეთი მნიშვნელობის პოზიცია კიდევ განმეორდესო. ხოლო
„ხელის ჩაჭიდების“ გამო გამაფრთხილა, ზედმეტი არ მოგივი-
დესო და მაშინვე მწვანე შუქი ამინთო: „მიდი, გააკეთე!“.

უპასუხოდ დარჩენილი მონდომება: პოლონეთი

სწორედ მოსკოვში მიღებული კარგი გამოცდილების გამო გამანდო ბრანდტმა: „მძიმე მოგზაურობა გველის“. პოლონეთს, ჰიტლერის პირველ მსხვერპლს, გახლეჩილს, დასავლეთისკენ ჩაჩოჩებულს, ამპუტირებულს, დამარცხებულს გამარჯვებულთა შორის, თავი ისევ შეურაცხყოფილად არ უნდა ეგრძნო. მან ფირმა „კრუპის“ შეფს, ბერტჰოლდ ბაიტცს სთხოვა პოლონეთის პრემიერ-მინისტრ იოზეფ ჩირანკიევიჩისთვის გადაეცა წერილი. ბაიტცს, რომელმაც ომის დროს პოლონელი ებრაელები გადაარჩინა, ვარშავაში დიდ პატივს სცემდნენ და ალბათ ერთა-დერთი „ფოსტალიონი“ იყო, ვისაც გზავნილი საკუთარი თვითმფრინავით შეეძლო ჩაეტანა. ბრანდტმა ეს წერილი ჯერ კიდევ 1969 წლის დეკემბერში დაწერა, მანამდე დიდი ხნით ადრე, სანამ ეცოდინებოდა, როდის მოუწევდა მოსკოვში ჩასვლა, წერილში მოთმინებით გაგებას ითხოვდა: ნუ დამაჩქარებთ, აუცილებელი არ არის, მოსკოვში უნდა დავინყოთ ჯერ და შემდეგ ერთობლივად განვიხილავთ ყველა პოლიტიკურ საკითხსო.

ბრანდტის კეთილგანნყობას პოლონეთის მიმართ წინაისტორია უძლოდა. 1968 წლის დასაწყისში ჰანსიაკობ შტელემ, რომელიც მაშინ „ცაიტის“ კორესპონდენტი იყო ვენაში, პოლონეთის საელჩოს მრჩეველთან შესახვედრად დამპატიუა. უერზი რაც-კოვსკის, რომელსაც ბერლინიდან ვიცნობდი, „მისი მთავრობის დავალების გარეშე“ სურდა შემხვედროდა. ბრანდტმა ნება

მომცა, ამ შეხვედრაზე განმუხტვის პოლიტიკის ჩვენი მთელი კონცეფცია განმემარტა. ამგვარად, პოლონეთი იყო პირველი ქვეყანა, რომელმაც ჩვენი გეგმების შესახებ გაიგო. ჩემი შეხვედრის ჩანაწერის გაცნობიდან ორ დღეში, ბრანდტმა, მაშინ ჯერ კიდევ საგარეო საქმეთა მინისტრის რანგში, რაინ-რურის კლუბში „საქმიანი საუბრის ახალ საწყისზე“ ილაპარაკა. ეს მინიშება მისი პოლონელი კოლეგის, ადამ რაპაჩის მისამართით იყო ნაგულისხმევი. ამ უკანასკნელმა წარადგინა ცენტრალურ ევროპაში ატომური იარაღისგან თავისუფალი ზონის შექმნის საინტერესო გეგმა. 1968 წლის მარტში ნიურნბერგის ყრილობაზე ბრანდტმა პირველად ახსენა „სამშვიდობო ხელშეკრულებით დარეგულირებამდე ოდერისა და ნაისეს ხაზის აღიარების ან პატივისცემის“ პერსპექტივა. იმ ფორმის, გარკვეულწილად, სახელმწიფოებრივი დადასტურება, რომელიც ვენაში ჩემი და რაცყოვსკის შეხვედრაზე გამოიკვეთა და გამოხმაურების გარეშე დარჩა. როდესაც ვარშავა გაისუსა და ქვეყნის შიგნით ბრანდტს პრობლემები შეექმნა, დაასკვნა: „ან არ უნდათ, ან არ შეუძლიათ, ან უფლება არ აქვთ“.

მხოლოდ ერთი წლის თავზე განაცხადა უცებ პარტიის თავმჯდომარემ, ვლადისლავ გომულკამ, ბრანდტის მიერ ნიურნბერგის ყრილობაზე ჩამოყალიბებული ფორმულა საუბრისკენ გადადგმული ნაბიჯიაო. რატომ დაიგვიანა ასე რეაქციამ? ეს გამოცანა შტელემ ამოხსნა. 1969 წლის დასაწყისში ბოლონიაში იტალიის კომუნისტური პარტიის ყრილობაზე გომულკას უშუალო თანამშრომელს, ზენონ კლიჩკოს შეხვედროდა. მას სინანულით აღუნიშნავს, გომულკას გამოხმაურებას ბრანდტის გამოსვლაზე ბონიდან რეაქცია არ მოჰყოლიაო. ვენაში პოლონელი დიპლომატის ჩანაწერი პირდაპირ საქმეში მოხვედრილა. კლიჩკოს მოუქებნია და გომულკასთვის გადაუცია. 1970 წლის 7 დეკემბერს შტელესთან ხელი-ხელ გაყრილი მივუახლოვდი გერმანელი უურნალისტების ჯგუფს და გავიგონე კლიჩკოს

სიტყვები: „შტელეს მაშინ, ბოლონიაში რომ არ ეხსენებინა თქვენი საუბარი – ვინ იცის, დღეს აქ, ვარშავაში ვისხდებო-დით თუ არა ერთად“. ცივი ომის დროს ხანდახან გროტესკუ-ლი შემთხვევითობები წყვეტდა, მიაღწევდა თუ არა მეორე მხა-რემდე საუბრის მზაობის ამბავი სწორ დროს.

1970 წლის 6 დეკემბერს ჩირანკივიჩი კანცლერს პროტოკო-ლის შესაბამისად დახვდა ვარშავის აეროპორტში. მოგვიანებით ბოდიში მოიხადა თავისი უხეირო გერმანულის გამო: ჰაბსბურ-გის იმპერიის ქვეშევრდომად დავიბადეო. ჩუმად ესაუბრებო-და ბრანდტს დიდ სოციალისტურ ოჯახზე. ამ პოლონელებს გრძნობების კორიანტელის დაყენება სჩვეოდათ. ხელშეკრულე-ბაზე მომლაპარაკებელი დელეგაციის ხელმძღვანელმა პოლო-ნელების მხრიდან, საგარეო საქმეთა მინისტრის მოადგილემ, უოზეფ ვინიევიჩმა თავისი უზადო გერმანული ასე ახსნა: – მე რომ დავიბადე, პოლონეთის სახელმწიფო არ არსებობდა; გერ-მანული ენა გერმანულ სკოლაში ვისწავლე და არც ლონდონში გადასახლებისას დამვიწყებია და არც ვაშინგტონში, საელჩი-ში მუშაობისასო. მე მას ჩემი შლეზიელი ნათესავების შესახებ ვუამბე, ჩემი ბებიის აღმოსავლეთ პრუსიულ მოგონებებზე, ვესტფალიისკენ პირუტყვების გადასაყვანი ვაგონით მგზავრო-ბას რომ გაუძლო; იგი ომში დაღუპულ თავისი ოჯახის წევრებ-ზე მომიყვა. როდესაც გდრ-ის მომლაპარაკებელ მიხაილ კოლ-თან რთულ საუბრებზე ვუამბობდი, მოკლედ მომიჭრა: გდრ-ს არასრულფასოვნების კომპლექსი ტანჯავსო. ბონი ფრანგე-ბისთვისაც კი უზომოდ დიდია, მითუმეტეს უშუალო აღმოსა-ვლელი მეზობლებისთვისო. მეტი დიდსულოვნება გვმართებს და ადენაუერს ძეგლი უნდა ავუგოთ, რომ გერმანიის გაყოფის გარანტია მოგვცაო. „გამოტყდით, ხომ ასე ჯობს ყველასთვი-სო“. მისი გაზვიადებული შეხედულების მიმართ, პროტესტის ნაცვლად, თანაგრნობით განვიმსჭვალე: მოსკოვის ხელმძღვა-

ნელობის ძალაუფლების რეალობა ჩვენ სასიკეთოდ გამოვიყენეთ, ვარშავა მას უნდა დამორჩილებოდა.

ბრანდტის სატელევიზიო გამოსვლა, რომელსაც ვარშავიდან გერმანიაში გადასცემდნენ, თითქმის იმავე წონის იყო, როგორც ხელშეკრულების ხელმოწერა, რომლითაც ოდერისა და ნაისეს საზღვარს ადგენდა და ტერიტორიაზე პრეტენზიას არ აცხადებდა. სიტყვის სრულყოფაში გდანსკელი გიუნტერ გრასი და აღმოსავლეთ პრუსიელი ზიგფრიდ ლენცი დაეხმარნენ. კანცლერმა იცოდა: არავინ დაანებებდა გერმანიას გაერთიანებას, თუკი ამ ტერიტორიებზე განაცხადებდა პრეტენზიას. ეს ოცი წლის შემდეგ, „ორი პლუს ოთხის“ მოლაპარაკებების დროსაც დადასტურდა. მაგრამ ლტოლვილებისთვის იმედის დაკარგვას ვერ შეამსუჯებდა ის ამბავი, რომ ეს დანაკარგი დიდი ხნის ნალოლიავებ ილუზიებს ეწირებოდა. ხოლო ბრანდტისთვის შიდა პოლიტიკური რისკი არ შეუმცირებია იმას, რომ პოლონეთმა რეალობის დადასტურება მოგვიანობით მაინც მიიღო.

ბრანდტი დაჩიქილი მე არ მინახავს. ბაიტცი და მე მანქანაში ვსაუბრობდით ჩვენს შთაბეჭდილებებზე და შემდეგ გეტოს მემორიალისკენ მივსეირნობდით, ჩვენ წინ ჟურნალისტებს აღემართათ ცოცხალი კედელი, უცებ სამარისებული სიჩუმე ჩამოვარდა. რა ხდება-თქმა, ვიკითხეთ, პასუხად ერთმა ჩაირუჩულა: „დაიჩიქა“. სალამოს, ჩემს მეგობართან მარტო რომ დავრჩი, გავპედე და ვთქვი: „მაგარი იყო“. ბრანდტმა მიპასუხა: „ვიგრძენი, რომ მარტო თავის დახრა არ კმაროდა“. კაცმა, რომელსაც პიროვნულად არანაირი ბრალი არ მიუძღვდა, თავისი ხალხის ისტორიული დანაშაული აღიარა. მეტი სათქმელი აღარაფერი იყო.

კლიჩკოს მიმამაგრეს, მან ძველი ქალაქი დამათვალიერებინა, თანამედროვე მხატვრობის გამოფენა, ასეთს ვერც მოსკოვში ნახავდი და ვერც ბერლინში, და შემდეგ რესტორანში დამპატიუა, სადაც თბილად გვიმასპინძლეს. არც არავინ გვახლდა

და არც არავინ გვითვალთვალებდა, სტუმრებს შევერიეთ. „წარმოგიდგენიათ ქალაქში ასე ხეტიალი სუსლოვთან ან აქსენ-თან ერთად?“ მართალია, მოსკოვის და აღმოსავლეთ ბერლინის მთავარ იდეოლოგებს არ ვიცნობდი, მაგრამ მაინც ვერ წარ-მომედგინა. ევროპის უსაფრთხოების ხედვის შესახებ მშვიდად უნდა გვესაუბრა. ამიტომ საშობაოდ მაზურიაში დამპატიუა.

მოლაპარაკებების მაგიდასთან ბრანდტმა განმარტა თავი-სი განზრახვა, პოლონეთთან ურთიერთობისთვის ისეთივე წონა მიენიჭებინა, როგორიც იყო საფრანგეთთან. მის ნათქვამს გა-მოხმაურება არ მოჰყოლია. არც მის წინადადებას მოჰყო-ლია პასუხი გერმანულ-პოლონური ახალგაზრდული ორგანი-ზაციის ჩამოყალიბებაზე. ოცდაოთხი წლის შემდეგ, რიხარდ ფონ ვაიცზეკერი ჩავიდა თავისი ბოლო სახელმწიფო ვიზიტით ვარშავაში. სანამ ის პრეზიდენტ ლეხ ვალეზას ესაუბრებოდა, პრემიერ-მინისტრმა თადეუშ მაზოვიცკიმ ფედერალური კან-ცლერი კოლი შეაქო ოდერისა და ნაისეს ხაზის სახელმწიფო ხელშეკრულების ისტორიული აქტისთვის. გამიკვირდა, რადგან კოლი აიძულეს ეს ხელშეკრულება დაედო და ერთი მილიმეტრი-თაც არ შეუცვლია საზღვარი. შემდეგ მაზოვიცკიმ კოლს ხოტბა შეასხა, პოლონეთთან ურთიერთობა საფრანგეთის დონეზე აიყ-ვანე და პოლონურ-გერმანული ახალგაზრდული ორგანიზაცია შექმნიო. ვილი ბრანდტის სახელი არც უსსენებიათ. თავი ვერ შევიკავე და საჯაროდ გამოვხატე განცვიფრება. მაზოვიცკიმ ბოდიში მოიხადა სიტყვებით, ბრანდტის დაჩოქება დაუვიწყა-რიაო. ამან იმედგაცრუება გამიორმაგა.

ოჯახის გამთლიანების თემა გროტესკად იქცა. „სავარაუ-დოდ 40000“ კაცის ქვეყნიდან გაშვებას შეგვპირდა პოლონეთი. სამი წლის შემდეგ კიდევ 120 ათასის ნეპართვას ვცდილობდი. პოლონეთი ერთ მილიარდ გერმანულ მარკას ითხოვდა, მაგრამ ეს თანხა ქვეყნიდან გასვლასთან კავშირში არ უნდა ყოფი-ლიყო. როდესაც ზანემ და მე მოლაპარაკებებისას 560 მილიო-

ნამდე შევამცირეთ, ბრანდტმა დამავალა, ფინანსთა მინისტრს დაელაპარაკეო. შმიდტმა უხეშად მომიშორა თავიდან. მერიდე-ბოდა პოლონეთისთვის ამის შეტყობინება. შეთავაზებას დუ-მილით უპასუხეს, თანხა ეცოტავათ. შმიდტს კანცლერობისას მათთვის ერთი მილიარდ გერმანულ მარკაზე მეტის გამოყოფა მოუწია – პირდაპირი კავშირის გარეშე – 100 ათასი ადამიანის მოსაპოვებლად. საბოლოოდ, პოლონეთის ელჩმა გაიკვირვა, მას მერე რაც ჰელმუტ კოლი გახდა კანცლერი: „ადრე ფულს იმაში გვიხდიდით, რომ ხალხი წასულიყო, ახლა იმაში გვაძლევთ, რომ პირიქით, დარჩენენ“. ეს გახლავთ ევროპაში თავისუფალი გა-დაადგილების გერმანიის მოთხოვნის ისტორიის მოკლე ვერსია.

შეხვედრებით დახუნძლული ორი დღის შემდეგ ჩირანკიე-ვიჩმა აეროპორტში ხელკავით გამიხმო და იმედიანად მითხრა: – ჩვენი ევროპული საუბარი უნდა გავაგრძელოთ! მანაც დამ-პატიუა საშობაოდ მაზურიაში. თუმცა, დღემდე არ ვარ იქ ნამყოფი, რადგან ორი კვირის თავზე გუმულკა და მისი გუნ-დი შეიცვალა. ფასების მკვეთრ ზრდას მეტი გავლენა ჰქონდა, ვიდრე ოდერისა და ნაისეს ხაზს. უკანა გზაზე ჩემი მეგობარი იმედგაცრუებული, მელანქოლიური, უკმაყოფილო ჩანდა: მეტს ველოდიო...

ბერლინის ხელშეკრულება – ხელოვნების ნიმუში

ის-ის იყო, ბონში დავბრუნდით, რომ ბრანდტმა ბრძანა: – ახლა ბერლინს უნდა მიხედო. გარდა ამისა, გდრ-თან მოლაპარაკებების წარსამართად მოემზადე! განსაკუთრებულად ხელსაყრელ მდგომარეობაში აღმოვჩნდი – კანცლერის აპარატის მანდატის გარდა ფედერალური რწმუნებულიც ვიყავი ბერლინში. ბრანდტმა გაამყარა ჩემი პოზიცია – ეგონ ფრანკე მოზომილად დაარწმუნა, რომ მისი სამინისტრო, რომელსაც საერთო გერმანული ერქვა და გერმანიის შიდა საქმეთა სამინისტრო ეწოდა, აღმოსავლეთ ბერლინში ისევ პროვოკაციად აღიქმებოდა. ფრანკეს უწყებას დელეგაციის ხელმძღვანელის მოადგილის თანამდებობა ერგო. შინაგან საქმეთა, იუსტიციისა და ტრანსპორტის, აგრეთვე საგარეო უწყების წარმომადგენლები აძლიერებდნენ დელეგაციას.

კანცლერმა დააზუსტა, „ღრმად პატივცემული კოლეგა ბარი“ ოფიციალური რწმუნებებით აღჭურვა: „თქვენ, როგორც საგანგებო დავალებათა ფედერალურ მინისტრს განდობთ გდრ-თან ურთიერთობების განვითარების საკითხების დამუშავებას და ფედერალური მთავრობის რწმუნებულის რანგში ბერლინში მოღვაწეობას. ამ სფეროში კაბინეტისათვის წინადადებების წარდგენას გთხოვთ შესაბამის უწყებებთან კოორდინაციაში... მეგობრული სალმით, თქვენი ვილი ბრანდტი“.

მოსკოვის მოლაპარაკებებზე გამარჯვებული ძალების გავლენის არეალი ბერლინის საკითხში გამოიკვეთა. ჩვენ დელიკატური ამოცანის წინაშე დავდექით, გაგვეფანტა შთაბეჭდილება, რომ წამყვან როლს ვესწრაფვოდით, თუმცა, ჩვენი მხრიდან, ფარული წინამდლოლობა აუცილებლობად მიგვაჩნდა, რადგან ამერიკელები, საბჭოელები, ბრიტანელები და ფრანგები არ ჩქარობდნენ ბერლინის შეთანხმებისთვის მიეღწიათ. 1970 წლის გაზაფხულიდან მოყოლებული იკრიბებოდნენ მათი ელჩიები თვეში ერთხელ ბერლინის კლაისტის პარკში მდებარე კონტროლის საბჭოს შენობაში და ერთმანეთს ოთხი ძალის სტაციუსის შესახებ თავიანთ განსხვავებულ პოზიციებს უზიარებდნენ. ეს შეიძლებოდა წლობით გაგრძელებულიყო. მაგრამ მდგომარეობა შეიცვალა.

მას შემდეგ, რაც მოსკოვის ხელშეკრულების რატიფიცირების წინაპირობად ბერლინის შესახებ დამაკმაყოფილებელი რეგულაცია გამოვაცხადეთ, ოთხი ძალაც დაინტერესდა ეს წინაპირობა შეესრულებინა. ვაშინგტონს სურდა ბრანდტისთვის შეპირებული დახმარება აღმოსავლეთის პოლიტიკის საკითხში საბჭოელების მხრიდან ბერლინის თემაზე დათმობის ზენოლის-თვის გადაება. ამ ვითარებაში ფედერალურმა კანცლერმა ამერიკის პრეზიდენტს შესთავაზა, ოთხი ელჩის არარეგულარული შეხვედრები „მუდმივი კონფერენციის“ რეჟიმში გადაეყვანა. ჰენრიმ შემატყობინა, პრეზიდენტი წინადადებას დასთანხმდაო; სასწრაფოდ უნდა შევხვედროდით. მოწვევა გამოგიგზავნე 1971 წლის 31 იანვარს კეიპ კენედიზე აპოლო 14-ის სტარტზე დასასწრებადო.

ვაშინგტონში ვიცე-პრეზიდენტ სპირო აგნეუსთან წარმადგინეს, რომელიც საკმაოდ უსიმპატიო მომეჩვენა, მერე მასთან ერთად გავთრინდი ზაფხულის ფლორიდაში, ჰენრის ხელი დავუქნიე და დავესწარი ხომალდის გამაყრუებელ სტარტს, მიწა ზანზარებდა. კვლავ შევხვდი ჰენრის პატარა თვითმფრინავის

ბორტზე კირკ დუგლასთან ერთად. იგი ზუსტად ისეთი იყო, როგორიც მახსოვდა „სპარტაკით“ აღფრთოვანებულს. ჰენრის შვილებს მიუჯდა და პირისპირ ლაპარაკი გვაცალა. შედეგი: ჰენრი ქვეითი საიდუმლო სამსახურის წარმომადგენელს მიაყლენდა ფრანკფურტში, რადგან CIA-ს ბოლომდე არ ენდობოდა და ასე დაამყარებდა პირდაპირ კონტაქტს სახელმწიფო დეპარტამენტის გვერდის ავლით ელჩითან, კენ რაშთან. საბჭო-ლებთან შესათანხმებლად ქალალდი მოგვთხოვა. ვილი ძალიან კმაყოფილი დარჩა.

ჩემს ორ საბჭოთა თანამეინახეს, სლავას და ლეოს ბერლინის რეგულაციის სტრუქტურაზე რომ მოვეთათბირე, მივხვდი, რომ ამ საქმისთვის საჭირო პროფესიული ცოდნა აკლდათ. ამიტომ ფალინი ჩამოვიყვანეთ ბერლინში. ჩვენი ერთობლივი საზრუნავი: გდრ-მა ამის შესახებ არაფერი უნდა გაიგოს. ორი დღის განმავლობაში 18 საათი ვიმუშავეთ. შემდეგ ფალინმა მითხრა, მოსკოვი ფარულ მოლაპარაკებებს დასთანხმდა და ვაშინგტონმა განაცხადა, აშშ-ს კონტროლის საბჭოში დელეგაციისთვის მიცემულ ოფიციალურ ინსტრუქციებს სერიოზულად ნუ შეხედავთო. კენ რაში პირდაპირ ვაშინგტონს ჩააბარებდა ანგარიშს, ფალინი – მოსკოვს, მე კი – კანცლერს. ეს უთქმელად ნიშნავდა შემდეგს: პარიზს და ლონდონს საქმის ვითარებას მხოლოდ მას შემდეგ შევატყობინებდით, როდესაც ჩვენს შედეგებს კონტროლის საბჭოს წარვუდგენდით, ოღონდ აღმოსავლეთ ბერლინისთვის ოთხი გამარჯვებული ძალის წარმატებული მოლაპარაკებების დასრულების შემდეგ. ეს დროის დამზიდვავი კონსტრუქცია პირდაპირი არხების მეშვეობით საზრდოობდა და მას წარმატების ერთობლივი სურვილი აკავშირებდა.

მანამდეც აუცილებელი იყო ბრანდტის, ნიქსონისა და ბრეზნევის მხარდაჭერა. ახლა კი ვილი და მე უკვე შინაარსზე ვმსჯელობდით. მონაწილეთაგან ვერცერთს ექნებოდა ზუსტი წარ-

მოდგენა მოლაპარაკებების შედეგზე. ხელშეერულების ბირთვი უნდა გამხდარიყო რუსების მიერ გარანტირებული რეგულაცია მოქალაქეთა გადაადგილების შესახებ. და გზიდან უნდა ჩამოგვეცილებინა გადამწყვეტი ბარიერი: ოთხი გამარჯვებული ძალის ამაო ძალისხმევა, შეთანხმებულიყვნენ მთელი ბერლინის ხალხთაშორის სამართლებრივ სტატუსზე. ნიმუშად გამოდგებოდა საზღვრის გადაკვეთის მოწმობის შესახებ ხელშეერულება, რომელიც შეიცავდა სალვატორულ დათქმას, რომ უწყებების, ადგილების და სამსახურების დასახელებების პუნქტში შეთანხმება ვერ მოხერხდა. ეს საქმარისი იყო ძირითადის – საზღვრის გადაკვეთის მოწმობების მოსაწესრიგებლად. მსგავსი კონსტრუქციის მისაღებად უპირველეს ყოვლისა, ამერიკელების თანხმობა გვჭირდებოდა.

ჰენრიმ ჩემთვის ბილდერბერგის კონფერენციაზე მოწვევა გამოავზავნინა, რომელიც ამჯერად ვუდსტოკში (ვერმონტის შტატში), პომპეზურ მამულში იმართებოდა. ნაკლებად მაინტერესებდა მონაწილეთა მყვირალა სახელები – პოლიტიკის, სამხედრო სფეროს და განსაკუთრებით ინდუსტრიის წარმომადგენლები, რომლებიც ათასობით მილიარდ დოლარს, ფუნტსა და გერმანულ მარკას განასახიერებდნენ. ჰენრის ჩემი წინადადება მოეწონა და მეორე დღეს, პრეზიდენტთან სავალდებულო შეთანხმების შემდეგ, „გენიალურიც“ კი უწოდა. ჩვენ ფოკუსში მოვაქცევდით სამ დასავლურ სექტორს, მათ დამოკიდებულებას ბონთან და დაუბრკოლებელ მიმოსვლას. არავის შეჰპარვია ეჭვი, რომ ოთხ გამარჯვებულ ძალას ჰქონდა ამ საკითხების მოგვარების კომპეტენცია, მაგრამ ორ გერმანულ მთავრობას რომ სატრანზიტო შეთანხმებისთვის უნდა მიეღწია, რომელიც ოთხ გამარჯვებულ ძალას ერთდროულად უნდა აემოქმედებინა, ესეც ცხადი გახლდათ.

საღამოს ჰენრიმ ვიეტნამზე წამოიწყო საუბარი. ბრანდტმა რომ საჯაროდ ვნებები ჩააცხრო, რაც სულაც არ იყო იოლი

კამბოჯის ხალხთაშორისი სამართლის დარღვევით დაბომბვის ფონზე, ვაშინგტონს არ გამოჰქონდა. – ნამდვილი სახელმწიფო მოღვაწეა! – თქვა. მე მხოლოდ თავი დაცუქნიე, თანხმობის ნიშნად.

ფრაზა „მთელი ბერლინი“ ოთხი გამარჯვებული ძალის ხელშეკრულებაში არ უნდა ხსენებულიყო და უნდა შეეცვალა ფორმულას „შესაბამის ნაწილში“. ჰენრიმ დაასკვნა: „ეს იქნება ყველაზე გიური მოლაპარაკებები, რაც საერთოდ მსმენია“. გულზე მომეშვა. მიუხედავად იმისა, რომ ტემპს და მიმართულებას ჩვენ ვკარნახობდით, ყველაზე ვიწრო წრეშიც კი კრინტი არ დაგვიძრავს გერმანიის წამყვანი როლის შესახებ. ამერიკის ელჩი კენ რაში უფრო იოლად უყურებდა ამ საკითხს: „უპირველეს ყოვლისა, თქვენს ინტერესებზეა საუბარი. ამიტომ უნდა გვიხელმძღვანელოს კანცლერმა“.

მართლაც დიდი შვება იყო, რომ 1971 წლის დასაწყისში ფალინი რაინის პირას ელჩად მოავლინეს. ჩვენი შეხვედრები მონაცვლეობით იმართებოდა ამერიკის და საბჭოთა კავშირის რეზიდენციებში. ელჩების კანცლერის აპარატში მოსვლა თვალში მოსახვედრი იქნებოდა. მხოლოდ ერთხელ შევძლი მათთვის საპასუხო პატივისცემა ფედერალური რწმუნებულის სახელმწიფო ვილაში, დალემში, პიუკლერშტრასეზე. CIA-ს არ გამოჰქონდა და მეორე დილას რაში ააფორიაქეს, ფედერალურ რწმუნებულს ფალინი სტუმრობდა. რაშმა უპასუხა – მეც იქ ვიყავიო, მაგრამ როგორც მეგობარმა, გამაფრთხილა: „ეგონ, ფრთხილად იყავი, გითვალთვალებენ“.

ჩვენ გაცნობიერებული გვქონდა პასუხისმგებლობა, რომ ის რთული ტექსტები, რომელთაც გერმანულად ვწერდი, ინგლისურ ენაზე უნდა შეგვეთანხმებინა, არც ფალინმა და არც მე ინგლისური კარგად არ ვიცოდით. რაშმაც ისევე არ იცოდა რუსული, როგორც მე, თუმცა გერმანულში იწაფებოდა კვირიდან კვირამდე, მაგრამ ფალინის დონისთვის არ მიუღწევია. ამერი-

კელები თითეულ გერმანულ სიტყვას უამრავ სინონიმს უძებნიდნენ, ეს გვეხმარებოდა, მაგრამ ფალინმა და მე ვიცოდით, რომ წარსულით დატვირთული ეს სიტყვები ბონისა და მოსკოვისთვის, უპირველეს ყოვლისა კი ვაშინგტონისთვის, მიუღებელი იქნებოდა. ერთმანეთს ვაფრთხილებდით, სად გველოდა უფსკრულში გადაჩეხა, ეს კი ჩვენ შორის ნდობას აღრმავებდა. მალე სახელებით მივმართავდით ერთმანეთს და შინაურულ მიმართვაზე გადავედით.

დასავლეთ ბერლინისა და ფედერაციული რესპუბლიკის ურთიერთობის განსაზღვრა ძნელი საქმე აღმოჩნდა. საბჭოელებმა „დასავლეთ ბერლინის დამოუკიდებელი ერთეულის“ მოთხოვნაზე კი თქვეს უარი, მაგრამ მათვის დისკუსიას არ ექვემდებარებოდა კონსტიტუციით გამაგრებული შეთავაზება, ბერლინს წოდებოდა ფედერაციული რესპუბლიკის ერთ-ერთი მიწა. არცერთ ჩვენს წინადადებას მოსკოვი არ დაეთანხმა. ზანემ ძველი საბუთები გადაქექა და მართლაც აღმოაჩინა, რომ სამ გამარჯვებულ ძალას (საფრანგეთის გამოკლებით) ჯერ კიდევ ომის დასრულებამდე გადაეწყვიტა, ბერლინი არ გამხდარიყო ახალი სახელმწიფოს „კონსტიტუციური ნაწილი“. კერძა მომავალი დოკუმენტი ამ სიტყვებით ჩამოაყალიბა: „რჩება ფედერაციული რესპუბლიკის არაკონსტიტუციურ ნაწილად“. ფალინს თავისი მინისტრი გაახსენდა და განავრცო: „... და არც მისგან იქნება მართული“. მე კი საკონსტიტუციო სასამართლო გამახსენდა: „... და არც მომავალში იქნება მისგან მართული“. ის, რაც ჩვენ შევათანხმეთ, ოთხ გამარჯვებულ ძალას თავიანთი საელჩოების მრჩევლების ხელით დაუდეს მაგიდაზე ამერიკელებმა და საბჭოელებმა.

ერთდროულად რამდენიმე დონისთვის უნდა გაგვერია ანგარიში: შიდა ბირთვი კენისა და ვალენტინის სახით, ფარული არხები ვაშინგტონთან და მოსკოვთან, კენჭისყრა ბერლინის სენატში და პარტიების შიგნით, ბონში, და არ უნდა დაგვიწყ-

ებოდა გდრ. ყველაგან ვაწყდებოდით განსხვავებულ ინტერესებს, ვნებებს, ბოლო წუთში თავიდან აცილებულ ჩავარდნებსა და მღელვარებას, რომელთაც ბრანდტი „წვრილმანებს“ უწოდებდა. ეს ყველაფერი ისტორიის ნაწილია. ჩემს მეხსიერებას შემორჩა, როგორ მაჩქარებდა ხოლმე. – არ მინდა, სულ ვიტყუებოდე, როცა შენზე მეკითხებიან, სად არისო. თან ბრაზობდა: „ამ წყეულმა გამარჯვებულებმა კეთილი ინებონ და ყველაფრისგან საიდუმლოს ნუ ქმნიანო“. ეს მახალისებდა, რადგან ჰენრის თხოვნით ნიქსონის ადმინისტრაციას დაეხმარა, როცა ერთ-ერთ ინტერვიუში ამერიკული ჯარის შემცირების წინააღმდეგ ილაპარაკა. ბრეუნევს მისწერა, ოპოზიციის შემოტევის მიუხედავად, უკან არ დავიხევო და შეახსენა, რაოდენ მნიშვნელოვანი იყო მისთვის, რომ დასავლეთ ბერლინელების-თვის ფედერაციის პასპორტების გაცემა შეგვძლებოდა.

ამასობაში ულბრიხტი ჰონეკერმა შეცვალა. ფალინმა შემატყობინა, – ახალი კაცი მოსკოვისთვის უფრო სასურველი პარტნიორიაო, შიდა გერმანული მოლაპარაკებები გართულდებაო... გარდა ამისა, კანცლერის მეორე შეხვედრა უნდა მოგვემზადებინა ბრეუნევთან. მათ სურდათ სექტემბერში ყირიმში შეხვედროდნენ ერთმანეთს სამი დღით, რათა კონვენციური შეიარაღების შემცირების საინტერესო თემაზე ესაუბრათ.

გვიან გამახსენდა, რომ ჩვენი ხელშეკრულება სამ ენაზე – ინგლისურად, ფრანგულად და რუსულად შევიდოდა ძალაში, მაგრამ გერმანული ვარიანტიც საჭირო იყო, რომ ორივე გერმანული სახელმწიფოსთვის ყოფილიყო სავალდებულო. გერმანულ-გერმანულმა პატარა სამუშაო ჯვეფმა თითქმის ასი განსხვავება აღმოაჩინა აღმოსავლეთისა და დასავლეთის მიერ შესრულებულ თარგმანებში. ოთხმა ძალამ უხალისოდ გადადო პარაფირება, მაგრამ მაინც ასე ერჩივნათ, მერე მუდმივად მათი მოსაგვარებელი გახდებოდა გაუგებრობები. გერმანელები ორი პუნქტის გარდა, ყველაფერზე შეთანხმდნენ: გდრ-მა დაიუნია,

მთელ ამ ამბავს „ოთხმხრივი შეთანხმება“ დავარქვათო, ჩვენი მხარე კი „ოთხი გამარჯვებული ძალის შეთანხმებაზე“ ლაპარაკობდა. გართულდა ინგლისური „ties“ და რუსული „связи“-ს თარგმანი. ორივე ცნება შეიძლებოდა გვეთარგმნა როგორც „ბმა“ ან „კავშირი“. აზრი გამოვთქვი, „უწყებრივი ბმა“ და „ქალთან კავშირი“ სხვადასხვაა-მეთქი, მაგრამ უშედეგოდ. პრაქტიკაში ორივე ვარიანტმა იმუშავა: დასავლეთ ბერლინი ისევ ფედერაციისთან „ბმაში“ ცხოვრობდა, ხოლო გდრ-ისთვის ეს იყო საბჭოთა კავშირის მიერ გარანტირებული „კავშირი“.

დასკვნითი ფაზის ალიაქტოში კენი ფასდაუდებელი აღმოჩნდა, იგი სახელმწიფო დეპარტამენტის მითითებებს არად დაგი-დევდათ: თეთრ სახლს და მე უკეთ გვესმის, რა იგულისხმება შეერთებული შტატების ინტერესებშიო. ანდა, როდესაც ქრისტიან-დემოკრატიულ ფრაქციას უხსნიდა, როგორი წარმატება ხვდებოდა წილად შეთანხმებას, ვინც მხარს არ დაუჭერს, ამერიკის პრეზიდენტის პოლიტიკას დაუპირისპირდებაო. მოსკოვმაც გამოიჩინა სისხარტე: გრომიკო ინკოგნიტოდ ჩამოვიდა ბერლინში, როგორც ჩემი არხიდან შევიტყვე, არ უნდოდა, მაგრამ მაინც დაეთანხმა დასავლეთ ბერლინელებისთვის ფედერალური პასპორტების გაცემას. გერმანელებმა, რაც წარმოგვედგინა, მთლიანობაში, გავიტანეთ. სამაგიეროდ, საბჭოთა სურვილი დავაკმაყოფილეთ დასავლეთ ბერლინში გენერალური საკონსულოს გახსნის თაობაზე.

კენმა ბრანდტს ნიქსონის, ამ არცთუ მარტივი კაცის სიტყვები გადასცა: „ამ კაცს შეგიძლია ენდო“. ანი თქვენს ჯგუფს „სამ მუშკეტერს“ ვუწოდებო, ჩვეული სტილით კონვენციური იარაღის შემცირებასაც მიაღწევთო. ამიტომაც ვუთხარი კანცლერს მოგვიანებით, 1974 წლის აპრილს, მომავალი წლის ბოლომდე უნდა შევათანხმოთ ჯარის დაშლის პირველი ხელშეკრულება-მეთქი, იმის რწმენით, რომ ისტორიას განსაზღვრავს საჭირო ადამიანის ყოფნა საჭირო დროს და საჭირო ადგილას.

როდესაც ოთხმა ძალამ სამუშაოს დასრულებისას ერთხმად შესძახა – „ბოლო კეთილია“ – ეს იყო საბჭოთა კოლეგის, პიოტრ აბრასიმოვის ერთადერთი წვლილი ამ საქმეში.

დაიწყო ზეიმი. წამოვიდა მილოცვები მთელი მსოფლიოდან. ექვს თვეში მეტს მივაღწიეთ, ვიდრე ვინმე წარმოიდგენდა. ყველა ისე იქცეოდა, თითქოს საქმე დასრულებული ყოფილიყო. არადა, ჯერ კიდევ ჩამოსაყალიბებელი გვქონდა გდრ-თან ტრანზიტული მიმოსვლის შეთანხმების დეტალები, რისთვისაც წამოვიწყეთ მთელი ეს ამბავი. გასაოცრად უჩვეულო იყო ნდობა, რომელიც უცებ ჩემს აღმოსავლეთ გერმანელ პარტნიორს მიხაელ კოლს და მე გამოგვიცხადეს. და ვილიმ მაშინ პირველად ისარგებლა შიდა გერმანული მრავლობითი ფორმით: „თქვენ ამას მოახერხებთ!“.

გერმანელების გარეშე არაფერი გამოვა (სატრანზიტო შეთანხმება)

ნდობა, რომელიც ორ დიდ სახელმწიფოს შორის ბერლინის მო-
ლაპარაკებათა დროს ჩამოყალიბდა, ბონისა და აღმოსავლეთ
ბერლინის ურთიერთობაზეც აისახა. საბჭოელები და ამერი-
კელები ზრუნავდნენ, გერმანელებს ტრანზიტის საკითხებზე
ესაუბრათ, სწორედ მაშინ, როცა ოთხი ძალის კონტროლის
საბჭო ანი უნდა შექრებილიყო. ჩემთვის ეს ხელსაყრელი აღ-
მოჩნდა, მიხაელ კოლი გავიცანი. ჰაინრიხ ჰაინრიქასეზე და-
სავლელებისთვის განკუთვნილი გადასასვლელით ვსარგებლობ-
დი, თუმცა მხოლოდ ჩემი დასავლეთ ბერლინული პირადობის
მოწმობა მქონდა. ოფიცერმა გადაწყვიტა, უკან გავებრუნებინე,
ვურჩიე, სახელმწიფო მდივან კოლს დაურეკე-მეთქი. კოლი
გაცოდდა, პროვოკაციააო, სანამ არ ვუთხარი, ფედერალურ
კანცლერსაც დასავლეთ ბერლინული პირადობის მოწმობა
აქვს-მეთქი. ნეტავ როგორ მიუდგებოდნენ დასავლეთ გერმა-
ნიის სახელმწიფო ვიზიტს აღმოსავლეთ ბერლინში? თანაც, მე
ფედერაციის რწმუნებული ვიყავი ბერლინში და მისი მთავრო-
ბის შეხედულებით, უკანონო უწყების ხელმძღვანელი. შემდეგ
შეხვედრაზე კოლმა პატარა პირადობის მოწმობა გადმომცა,
გდრ-ის მინისტრთა საბჭოს მიერ გაცემული, ნომრით 000001,
რომელიც ყველა სამსახურს უთითებდა, მისი მფლობელისთ-

ვის დახმარება გაეწიათ. თუმცა არასდროს დამჭირვებია, ჩემი მანქანა აღარც შეუმოწმებიათ.

მიხაელ კოლი და მე იმთავითვე კმაყოფილნი ვიყავით იმის გამო, რომ „ოთხთა ძალაუფლება“ ჩვენს წარმატებას უნდა და-ლოდებოდა. გარდა ამისა, ფალინმა თავისი შეხედულება გამი-ზიარა, შენი პარტნიორი „წესიერი კაციაო“. გდრ-ის საუკეთესო წარმომადგენელი გავიცანი: ჭკვიანი, თავისი საქმის ზედმინე-გნით მცოდნე. თუმცა თავდაპირველად შებოჭილი და დაეჭვე-ბული. არც იმან უშველა, ჩემი ნათქვამი რომ მიუტანეს, მასთან შედარებით გრომიკო პლეიბოია-მეთქი.

დელეგაციები კვირაში ორ-სამ დღეს მუშაობდნენ, ხანდახან შაბათ-კვირასაც და გვიან ღამემდე. თავიდან, საღამობით, დასავლეთ ბერლინში ვბრუნდებოდი, კოლს ეს არ სიამოვნებდა, მერე ვილიმ მითხრა, დამალობანას თამაშს შეეშვიო. ხშირად უნ-ტერ დენ ლინდენზე მემკვიდრე პრინცის სასახლის ფანჯრიდან არა მარტო ქალაქის შესანიშნავი ხედით ვტკბებოდით, არამედ ბრანდენბურგის კარიბჭესაც გავცემოდით ხოლმე დასავლე-თისკენ. ღამის ცისკენ მიწვდენილი რეკლამების ანარეკლი ალ-ბათ ასეთივე წარმოდგენას იწვევდა აქ, აღმოსავლეთში, როგო-რიც ომის შემდეგ შვეიცარიის მონახულებისას დაეუფლებოდა კაცს: გაჩახახახებული, მდიდრული სანახაობებით აღტაცება. როდესაც ულრის ზამი, ქალაქის დემოკრატიულად არჩეული უკანასკნელი მერის ვაჟი და მე უნტერ დენ ლინდენზე ვსეირ-ნობდით, ვიტყოდით ხოლმე, ბერლინი დედაქალაქად დაგვმშ-ვენდებაო. აქ თავს შინ ვგრძნობდი, კოლი კი ტიურინგიიდან ჩამოსული იყო.

მოლაპარაკებებში გდრ თანამშრომლობის სულისკვეთებას ავლენდა, სანამ იმ პუნქტამდე არ მივედით, რომელიც ტრან-ზიტის ბოროტად სარგებლობას განსაზღვრავდა. პქონდათ შპრინგერს და შტრაუსს ამ პუნქტით სარგებლობის უფლება? ან მათ, ვინც გდრ-ის შეხედულებით, აქაურობა არალეგალუ-

რად დატოვა? არცერთი ქვეყანა არ ამბობს უარს დეზერტირების დაჭერაზე, აღშფოთება გამოხატა კოლმა. დასავლეთის ძალების წარმომადგენელთა აზრით, ომის დამნაშავეების მიერ სატრანზიტო გზით გამოყენებას გდრ-ს ვერ შეჰქადრებდნენ. დიდი ხანი დაგვჭირდა, სანამ შედეგს მივაღწიეთ: ტრანზიტულ ზონაში ვინც აღმოჩნდებოდა, მისი დატოვების უფლებაც უნდა ჰქონიდა. ვისაც უკან არ გააბრუნებდნენ, დაუბრკოლებლად გააგრძელებდნენ გზას. დეზერტირს გდრ-ის უწყებები საერთოდ არ შეუშვებდნენ. ცოტა მოგვიანებით „რესპუბლიკიდან გაქცეულებსაც“ კი მისცეს ტრანზიტით სარგებლობის თავისუფლება. სანამ ჩვენი შეთანხმება მუშაობდა, მაშასადამე, გერმანიის გაერთიანებამდე, არცერთხელ არ გამხდარა ოთხი ძალის გამოძახება საჭირო, რათა ორ გერმანულ მთავრობას შორის დაპირისპირება მოეგვარებინათ.

მონაცემებით ვთათბირობდით სამინისტროების შენობაში და კანცლერის აპარატში და ყველის ვაჭრებივით ვდაობდით, რა უნდა ყოფილიყო სატრანზიტო გადასახადის ერთჯერადი საფასური, რომ მერე აღარავინ შეეჩერებინათ, შეემოწმებინათ და იქვე გადახდაც არ მოეთხოვათ. შევთანხმდით ყოველწლიურად 234,9 მილიონ გერმანულ მარკაზე. კოლი მართალი აღმოჩნდა, მიმოსვლა გაიზრდებათ: გიუნტერ გაუზს 400 მილიონის გადახდა მოუნია, ჰელმუტ კოლს კი 800 მილიონი გერმანული მარკის.

მიხეალ კოლთან და ზამთან ბონში ერთ-ერთი მოლაპარაკების დროს შემატყობინეს, რომ ბრანდტს ნობელის პრემია მიენიჭა მშვიდობის დარგში. უან მონქმ წარადგინაო. როგორც კი გავაცნობიერე, რამხელა ამბავი იყო, მომინდა მეგობრისთვის მიმელოცა. კაბინეტის წევრები კანცლერის აპარატში შეკრებილიყვნენ. შილერმა რამდენიმე საქებარი სიტყვა წარმოთქვა. ბრანდტი მის წინ იდგა. დამაგვიანდა, თან არასწორი კარიდან შევედი და ბრანდტის ზურგს უკან აღმოვჩნდი, განუწყვეტლივ ითვლიდა ცერათი დანარჩენ ოთხ თითს. კანცლერის კაბინეტში

გადამეხვია და მითხრა: „ამ პრემიაში წვლილი გაქვს და ოსლო-ში უნდა წამოხვიდე ჩემთან ერთადო“.

სატრანზიტო მოლაპარაკებების პარალელურად მიმდინარე რთული სპეციალური მოლაპარაკებები დასავლეთ ბერლინის სენატსა და გდრ-ს შორის, მათ შორის, დასავლეთ ბერლინების მიერ „მოსაზღვრე ადგილების“ მონახულების თემაზე, სულ ცოტა, კოორდინაციას მოითხოვდა. ნობელის პრემიის გადაცემის დღეს, 10 დეკემბერს, ოსლოდან ნორვეგიელმა მე-გობრებმა იკითხეს, მეორე დღეს ბერლინში პარაფირება თუ მოხერხდება. ვახშმისას მივიღეთ ცნობა და ამოვისუნთქეთ: სენატი დაინიშნა ათ საათზე. კოლს დავუკავშირდი და თერთმეტზე დავუთქვი შეხვედრა. ვილიმაც შვება იგრძნო და მომილოცა. მეორე დილას ლუფტვაფეს თვითმფრინავით ჩავედით შიონეფელდში. სამინისტროების შენობაში მოხდა პარაფირება. შემდეგ დასავლეთ ბერლინში პრესკონფერენცია მმართველ მერთან, შიუტცთან ერთად. დავბრუნდით აღმოსავლეთ ბერლინში. ლუფტვაფეს ეკიპაჟი აღფრთოვანებული დაგვხვდა: სამოქალაქო ტანსაცმელში ჩვენი უცხო დედაქალაქი დაეთვალიერებინათ. გაფირინდით ბონში, პრეს-კონფერენციაზე, ვერტ-მფრენით წავედით კიოლნ-ვანში, გადავფრინდით სტოკოლმში, გავემგზავრეთ სასტუმროში და რვას წუთიდა უკლდა, როცა სმოკინგებში გამოწყობილებმა, ჩვეული სიზუსტით, შევაბიჯეთ ფედერალური კანცლერისადმი მიძღვნილ გალა-ვახშამზე. 1971 წლის 11 დეკემბერი მართლაც საოცრად დატვირთული დღე აღმოჩნდა.

მიხაელ კოლმა და მე თვითონვე გამოვცადეთ პირადი „გარდაქმნა დაახლოების გზით“ და ძალიანაც გვსიამოვნებდა. პატარა ამბავი არ იყო, რომ ომის შემდეგ, პირველად შევძელით დასავლეთ გერმანიასა და დასავლეთ ბერლინს შორის სამოქალაქო მიმოსვლის სამართლებრივი საფუძვლის შექმნა. სკანდალურად მიმაჩნდა ფაქტი, რომ დასავლეთს ათწლეულების

განმავლობაში არცერთხელ არ მოუთხოვია ეს. შევათანხმეთ ჩვენ-ჩვენი მთავრობების წერილები, რომლითაც თითეულ მე-კავშირეს ეცნობებოდა მოლაპარაკების შედეგი, რათა იგი ძალაში შეეყვანათ. როცა ოთხი ძალის მისამართით წერილებს ვაყალიბებდით, რომლითაც ორივე გერმანული სახელმწიფო გაეროში მიღებას ითხოვდა, ორივეს გვეცინებოდა, რადგან, ყველა განსხვავების მიუხედავად, ვერცერთი ქვეყანა სუვერენული ვერ გახდა, არამედ აღიარებდნენ, რომ ოთხი გამარჯვებული ძალის ხელშეუვალი უფლებები ისევ მოქმედებდა. მაგრამ არ გამკვირვებია, რომ დამარცხებულებს, გამარჯვებულებთან ერთად, გადაწყვეტილების მიღება შეგვეძლო, როგორც ეს ეწერა ამერიკელების რწმუნებათა წერილში.

1971 წლის შობის დღეებში, როდესაც დასავლეთ და აღმოსავლეთ ბერლინს შორის მიმოსვლა შეფერხდა, კოლს ავუზსენი, გდრ-ის მთავრობა ამაზე პასუხისმგებელი არ არის-მეთქი. მან შემომითვალა, ჰონეკერი დარწმუნდა, რომ ხისტი, მაგრამ სამართლიანი ხარო. ლეომ მოსკოვს დაუდასტურა ჰონეკერის ეს ნათქვამი, რაც მომავალში სასარგებლო აღმოჩნდა. ბეჭინიერი ვიყავი, რომ დასავლეთ ბერლინის კუნძული „ხმელეთს“ მიუახლოვდა და მისი მოსახლეობა დაუბრკოლებლად იმოგზაურებდა. ბრანდტმა შეასრულა დანაპირები, ბონიდან ბერლინისთვის მეტის გაკეთებას შევძლებო.

უპირველეს ყოვლისა, ორივე ვაცნობიერებდით: ომის შემდგომ ისტორიაში გარდამტეხი ნიშნული დავსვით. გერმანიის მნიშვნელოვან საკითხებზე ოთხი გამარჯვებული ძალა ორი გერმანიის მთავრობების გარეშე ველარაფერს გადაწყვეტდა. მაშინ დაიბადა მოდელი „ოთხი პლუს ორი“, რომლიდანაც ოცი წლის შემდეგ იშვა „ორი პლუს ოთხი“. კოლი და მე ვთანხმდებოდით, რომ ოთხი ძალა ისევ აუცილებელი გახდებოდა, როდესაც საქმე სამშვიდობო ხელშეკრულებაზე მიდგებოდა. ჩვენ აღარ ვიყავით სხვათა ხელის შემყურენი, შეგვეძლო ჩვენი ინ-

ტერესებისთვის გვემუშავა. მოკლედ: საქმეში ჩავერთეთ. ასევე ვეთანხმებოდი კოლის თვალსაზრისს, რომ უნდა დაგვემთავრებინა ცივი ომი ბუნდევერსა და გდრ-ის ეროვნულ არმიას შორის: ჯარის რადიოსადგური, საზღვარზე განთავსებული რეპროდუქტორები თუ პროკლამაციებით დახუნდლული საჰაერო ბურთები 1972 წლის 1 ივლისის შემდეგ აღარ არსებობდა – ყოველგვარი წერილობითი შეთანხმების გარეშე. მოლაპარაკება არცერთ მხარეს არ დაურღვევია.

ერთობლივი ძალისხმევის შედეგად, რომლის მონაპოვარიც იყო შემდეგ სატრანზიტო შეთანხმების და რომლის პარაფირება 1971 წლის 17 დეკემბერს მოხდა, დავთქვით, რომ მუშაობას გავაგრძელებდით სატრანსპორტო ხელშეკრულებაზე და 1972 წლის 20 იანვარს ისევ შევხვდებოდით. ყოველივე ამის შესახებ ბრანდტის კომენტარი: „შეგვიძლია კმაყოფილები ვიყოთ, გაერთიანების საქმეში შეტანილი ჩვენი წვლილის გამო“. შორსმჭვრეტელ ბრანდტს ჩვენი საბოლოო მიზანი თვალწინ ედგა.

ყველაფერი ან არაფერი

ალბათ წყალობაა, რომ ადამიანებს არ ძალუბთ თავიანთი მომავლის განჭვრეტა. თავისუფლებას ვერ დაგევმავ, მაშინვე მიაწყდები გადაულახავ ზღვარს, როცა შემდეგი დღის განსაზღვრას შეეცდები. მომავალი თაობის გულუბრყვილო თავდაჯერებაა, უკან მიხედვისას შეცდომებს რომ აღმოაჩენს წარსულში, რომელსაც ვეღარ შეცვლი, არადა, ამ შეცდომებს თავადაც დღენიადაგ იმეორებს. ბუნებამ დაგვწყევლა, რომ არ შეგვიძლია გამოცდილება მემკვიდრეობად გადავცეთ.

ბრანდტმა 1962 წელს ჰარვარდის ლექციებში აღმოსავლეთისა და დასავლეთის გარდაუვალ თანაარსებობას „იძულებითი გაბედულება“ უწოდა. სწორედ ასეთად იქცა მისთვის 1972 წელი. კონსტრუქციული უნდობლობის ვოტუმის წინააღმდეგ კანცლერობის შენარჩუნებას უმრავლესობის დაკარგვა მოჰყვა, არჩევნებში გამარჯვების ტრიუმფს – პირადი მარცხი. ამ გამოწვევების ფონზე მხოლოდ მას შეეძლო გადარჩენა, ვისაც ბრძოლის კატაკლიზმებში ორიენტაცია არ დაუკარგავს და ეყო ძალა, უდრევად მიჰყოლოდა საკუთარ რწმენას. ეს იყო წელიწადი, რომლის განმავლობაშიც გერმანიის ფედერალური კანცლერი საერთაშორისო წუხილის ცენტრში იდგა, ვაშინგტონიდან მოსკოვამდე, ჰონეკერის ჩათვლით, შეინარჩუნებდა თუ არა პოსტს და როგორ შეიძლებოდა დახმარებოდნენ.

ამ საბედინერო წლის დასაწყისში მნიშვნელოვანი იყო ორ გერმანულ სახელმწიფოს შორის ხელშეკრულების პროექტი,

რომელიც პირველ რატიფიკაციას ელოდა. სატრანსპორტო ხელშეკრულებას ყველა გერმანელისთვის უნდა გაეიოლებინა მოგზაურობა, დასავლეთ ბერლინელების ჩათვლით. ჩვენ ამ ხელშეკრულებას ვუყურებდით როგორც მოდელს, რომლის მიხედვითაც გდრ აღიქმებოდა როგორც სახელმწიფო, თავისი განსაკუთრებული ურთიერთობებით ფედერაციულ რესპუბლიკასთან. ამავე დროს, გვაეჭვებდა, საერთოდ მოახერხებდა თუ არა ფედერალური მთავრობა მოსკოვისა და ვარშავის ხელშეკრულებების რატიფიცირებას, რადგან ბუნდესტაგში უმრავლესობას წყალი შესდგომოდა. რაც უფრო ახლოვდებოდა ბუნდესტაგში კენჭისყრა ოპოზიციის მიერ უნდობლობის გამოცხადების თაობაზე, მით უფრო იცვლიდა ჯერ კიდევ დაუსრულებელი სატრანსპორტო ხელშეკრულება პოლიტიკურ ელფერს: ხომ არ გადაიქცეოდა იგი მიმოსვლის მოსალოდნელი გამარტივების გამო ინსტრუმენტად, რომელიც აღმოსავლეთის ხელშეკრულებებს და ოთხი გამარჯვებული ძალის შეთანხმებებს საპარლამენტო ბარიერების გადალახვას გაუიოლებდა?

სლავა და ლეო ლელავდნენ. ბრეუნევის პრესტიჟი და ბონის მიმართ მისი ახალი პოლიტიკა იდგა გამოცდის წინ. მრავალი კვირის განმავლობაში ვაწვდიდი მათ მდგომარეობის რეალურ სურათს და რატიფიცირების შანსებს ორმოცდაათი-ორმოცდაათზე ვაფასებდი. ბრეუნევმა რუსეთის გერმანელების დიდ ჯგუფს მისცა ქვეყნიდან გასვლის უფლება, მაგრამ ქდე/ქსკ გაერთიანების არცერთი დეპუტატისთვის არ ქცეულა ეს ფაქტი პოზიციის შეცვლის საბაბად. კოლი უხეშად შეეწინააღმდეგა ჩემს წინადადებას, სატრანზიტო შეთანხმება საცდელი ვადით აგვემოქმედებინა: „არც კი მოვიაზრებთ, ახალ ფედერალურ კანცლერ ბარცელს ასეთი ძლვენი მივართვათ, მაგრამ თუ ყველაფერი ჩაიმლება, „გამყინვარება“ გველოდება. მერე კი ისევ შეგვიძლია გულით შევიგინოთ“. თუმცა, დამეთანხმა, რომ შეთანხმების „დროებითი გამოყენება“ შესაძლებელია მიუღწე-

ველი „ძალაში შეყვანის“ სანაცვლოდ. შემდეგ მკითხა, ჰონე-კერთან ხომ არ გინდა საუბარიო. ნიუ იორკისა და მოსკოვის შემდეგ, მესამედ გამოვცადე რიტორიკული კითხვის მეთოდი.

მოსამზადებლად იმ ერთადერთ კაცს მივადექი ბონში, ვინც ჰონეკერს ომის წინა პერიოდის ზაარლანდიდან იცნობდა. ჰერ-ბერტ ვენერმა მოკლედ მომიჭრა: „ხელზე სისხლი არ სცხია“. ამ შეფასებას დავეყრდენი და არც მინანია. აღმოსავლეთ ბერლინში შევხვდი ჩია კაცს, ჩემზე დაბალი იყო, ფერმურთალი, გა-დაჭიმული სახის კანით და ფხიზელი მზერით. ყავა რომ დამის-ხა, უხერხეულობა გაუქრა. ამოვისუნთქე, რადგან არ უკითხავს, ხვალ ბუნდესტაგში რა მოხდებაო. მაშინვე საქმეზე გადავიდა და დამეთანხმა, „როცა საჭირო იქნება“, ბერლინი სატრანს-პორტო ხელშეკრულებაში ჩაერთვებაო, რასაც კოლი ენინაალ-მდეგებოდა. ის კი არა, უკეთესი ფორმულაც კი შემომთავაზა, მაგრამ უარი განვუცხადე. კოლმა მოგვიანებით აღნიშნა: „ამას ყოველთვის დაგიფასებთო“.

ჰონეკერთან საუბარს მოჰყვა დიდი გარდატეხა. დასავლეთ გერმანელებს არა მხოლოდ ნათესავების, არამედ ნაცნობების მონახულებაც უნდა შესძლებოდათ. საჩუქრებისთვის დაწეს-ბული ზღვარიც გაიზარდა. ნებადართული გახდა ტურისტული მოგზაურობები, მათ შორის, საკუთარი ავტომობილითაც. გა-დაუდებელ შემთხვევებში იოლდებოდა, ასაკის ზღვარის მიუხე-დავად, ოჯახების გამთლიანების შესაძლებლობა. ჯერ ბე-დავდა, დასავლეთში წამსვლელთა ასაკობრივი ზღვარი დაეწია. ჩვენი საუბარი იყო წყარო, რომელიც ხან ფართოვდებოდა, ხან ვიწროვდებოდა, მაგრამ მილიონობით ადამიანის ნაკადად იქცა.

„ჩვენ მზად ვართ, ამ გზას დავადგეთ“, დამეთანხმა ჰონეკე-რი, „გვსურს, ისევე დავძრათ საქმე, როგორც პოლონეთის და ჩეხეთის შემთხვევაში, არ მივაბათ ვიზიტის უფლება გარკვეულ ოლქებს, გავზარდოთ სასტუმროების მოცულობა თქვენი მო-ქალაქეებისთვის“. მისი მხრიდან ასევე დასძინა – პროცესი

კონტროლს უნდა ექვემდებარებოდესო. ჩემთვის ცხადი იყო ყველაფერი, მაგრამ ვერც მიმოსვლის შეზღუდვა და ვერც საეჭვო კამპანიები გათიშვის შესახებ, ვერ შეაჩერებდა გდრ-ის მოქალაქეების ლტოლვას დასავლეთისაკენ.

თუ ყველაფერი კარგად იქნა, მზად ვარ, ორ სახელმწიფოს შორის პრინციპული ურთიერთობები მოვაგვაროთო, შემპირდა პონეკერი. ამიტომ გთხოვეთ გვწვეოდით, რომ ეს გვეცნობებინა თქვენთვისო. ეს ნათქვამი მთელი დარჩენილი წლისთვის მნიშვნელოვანი აღმოჩნდა. სომხურ კონიაქს ვსვამდით... ბრანდტან და ვერნერთან მოკითხვა დამაბარა.

არც სატრანსპორტო ხელშეკრულებას და არც პონეკერის დაპირებებს ბონში ძალაუფლებისთვის გაჩაღებული მხურვალე ბრძოლისთვის მნიშვნელობა არ შეუძენია. ბრანდტის თავდაჯერებული პოზიცია, დასავლეთიდან და აღმოსავლეთიდან კეთილგანწყობილთა დახმარებას მივიღებდით, გამართლდა. მოგებული კენჭისყრის დღეს ბევრმა მიუღლოცა. ვაშინგტონისა და მოსკოვის მხარდაჭერა კი სოლიდური და სანდო აღმოჩნდა. 1972 წლის გაზაფხულზევე გამოიკვეთა საერთაშორისო მზაობა, შენარჩუნებულიყო სოციალ-ლიბერალური კოალიცია და გრძელვადიან პერსპექტივაში ეთანამშრომლათ მასთან.

ახლა უმთავრესი აღმოსავლეთის ხელშეკრულებების რატიოცირება გახლდათ. ქვეყნისთვის უმნიშვნელოვანეს საკითხში ოპოზიციის ფრაქციის მიერ თავის შეკავებას ბრანდტმა ირონიულად „სინდისისგან თავის შეკავება“ უწოდა. ოპოზიციის ლიდერის, რაინერ ბარცელის ტრაგედიაა, რომ სწორედ მისი ფრაქციის თავშეკავებამ მოუტანა ხმათა უმრავლესობა ამ საკითხს და გზა გაუხსნა მოსკოვისა და ვარშავის ხელშეკრულებების, აგრეთვე, სატრანსპორტო ხელშეკრულებების რატიფიცირებას, რაც დაუბრკოლებლად განხორციელდა 17 და 26 მაისს. ოთხი გამარჯვებული ძალის ხელმოწერით სატრანზიტო შეთანხმება ძალაში შევიდა. მაგრამ კანცლერის აპარატში

მაინც არასასურველი განწყობა სუფევდა. მას შემდეგ, რაც თავისუფალი დემოკრატების სამი და სოციალ-დემოკრატების ერთი წევრი ქდვ/ქსკ გაერთიანების ბანაკში გადაბარგდნენ, კოალიციამ უმრავლესობა დაკარგა. ბრანდტი ნდობის ვოტუმის დაყენებას ფიქრობდა. ემკე ემხრობოდა, მე – არა. „კანცლერი, რომელსაც ბიუჯეტს არ დაუმტკიცებენ, სამსჯავროზე უნდა წარდგეს“, დაიუინა ბრანდტმა. მე სხვა არგუმენტებით დავუსაბუთე: „ბარცელი ეს-ესაა ძირს გაიშოტა. შენ რატომ უნდა მიჰყვე მას?“ პატის მდგომარეობის შემთხვევაში, მთავრობას ჭიდაობა არ უნდა დაეწყო. საღამოს, კაბინეტის სხდომაზე ბრანდტმა გაიცინა: „ყველა ქვეყანას სჭირდება მთავრობა. ამ ქვეყანას ჰყავს მთავრობა. მშვენიერია“. ასე გაიკვალა გზა ვადამდელი არჩევნებისკენ.

1972 წლის ივლისში გადმოგვცეს ბრეჟენევის ვრცელი წერილი ბრანდტისადმი, მინიშნებით, რომ გდრ ცდილობდა მოსკოვთან ჩვენი ურთიერთობები გაერთულებინა. წერილი ერთ საინტერესო ინფორმაციას შეიცავდა: „ბარცელი და შტრაუსი ითხოვენ კონტაქტს. შტრაუსს უარი ეთქვა, სანამ პოზიციას საჯაროდ არ შეიცვლის. ბარცელი კი, რომელიც ხაზგასმით ადასტურებდა, პატიოსნად ვეცადე ხელშეკრულება მიღებული ყოფილიყო, მაგრამ ჩემს ძალებს აღემატებოდაო, შვებულების დაწყებამდე ითხოვდა შეხვედრას. არ დავეთანხმეთ. ამ საკითხისადმი უარყოფითი დამოკიდებულების შემთხვევაში კონტაქტი ვერ შედგება. ჩემი აზრით, ამ არგუმენტს იგი ვერ მოედავება“. წამყვანი ოპოზიციური ლიდერების პოზიციის ასე მოულოდნელი ცვლილება, ჩავარდნილი ნდობის ვოტუმიდან მხოლოდ სამი თვის შემდეგ, ნამდვილად საკვირველი იყო.

ოპოზიციის საეჭვო პოზიციის მიუხედავად, არჩევნების შედეგი ლია იყო. რამდენიმე სოციალ-დემოკრატმა დაიუინა, აღმოსავლეთის პოლიტიკის რადიკალურობამ და სულსწრაფობამ მიგვიყვანა ამ მდგომარეობამდეო; ორივე უნდა შევანელოთო.

მაგრამ კოალიციას თითქმის მისიონერულად სჯეროდა, რომ ჩვენი ქვეყნისთვის სასარგებლო და საჭირო საქმეს აკეთებდა. ამ რწმენას ყველა იზიარებდა – შეელის, ვენერის და ემკეს ჩათვლით. ამ პოზიციას პატივს სცემდნენ ადამიანები, მაშინ, როცა საზოგადოება თანხმდებოდა, რომ ეს კოალიცია არჩევნებს ველარ მოიგებდა. ყველაფერ ამას ისიც დაემატა, რომ კარგი სახელის მქონე ეკონომიკის მინისტრი შილერიც „გადახტა“ და ქილიკის საბაბი მისცა მონინააღმდეგეს, ნეტავ რამდენი ამომრჩეველი წაჰყვება შილერსო.

კანცლერის კაბინეტში ბრანდტი, ვენერი და მე გდრ-თან მოლაპარაკებების გაგრძელებაზე ვმსჯელობდით. ვენერმა წინადადება წამოჭრა, სატრანსპორტო ხელშეკრულების მოდელის მიხედვით თვიდან თვემდე სხვა ხელშეკრულებებიც დავდოთ სხვადასხვა სფეროში და ოპოზიცია ყოველ ჯერზე დავაყენოთ არჩევანის წინაშეო. მე საბაზისო ხელშეკრულებას ვემხრობოდი, რომელიც ორ სახელმწიფოს შორის ურთიერთობას სრულყოფა. ვილიმ მისთვის ჩვეული მანერით თქვა: „გააგრძელეთ მსჯელობა“. მისი მანქანისკენ რომ გავემართეთ, „ბიძას“ ავუხსენი, რომ მიმდინარე მოლაპარაკებების შესახებ მუდმივი ინფორმაცია უფრო ეფექტურად გამოჩნდებოდა საზოგადოებაში. ამან გადაარწმუნა: „ეგრე ვქნათ. უთხარი ვიღლის“.

კოალიცია შეთანხმდა, რომ 19 ნოემბერს ჩატარდებოდა ბუნდესტაგის ვადამდელი არჩევნები. კოლი და მე მივხვდით, რომ ყოვლისმომცველი საბაზისო ხელშეკრულება, რომელიც ფოსტის საკითხიდან კულტურამდე ყველაფერს მოაწესრიგებდა, ორივე მხარისთვის სასურველ ვადებში შეუძლებელი იყო მოგვესწრო. ასე და ამგვარად იქცა საბაზისო ხელშეკრულება საბაზისო პრინციპების ხელშეკრულებად, რომელიც ორი სახელმწიფოს თანაარსებობის ჩარჩოს მოაწესრიგებდა, სანამ ეს სახელმწიფოები იარსებებდნენ.

მეგობრის განსაცდელი

მოწმენდილ ცაზე მეხის გავარდნას ჰგავდა, ატირებულმა რუთმა რომ დამირეკა და მითხრა: ვილი ისეა, ველარ დაელაპარაკებიო. ნოემბერში იცოდა ხოლმე, თავს ცოტა ხნით განმარტოების უფლებას მისცემდა, რომ დაწყნარებულიყო და ძალები მოეკრიბა. მუდმივი წნეხისგან უნდა გათავისუფლებულიყო. მერე მთელი წელი სრული დატვირთვით მუშაობდა შემდეგ ნოემბრამდე. ამ მოვლენას დეპრესიულ ფაზად აფასებდნენ და, ნაწილობრივ, ასეც იყო. მაგრამ ბრანდტი დეპრესიული ადამიანი არ ყოფილა, პირიქით. ვისაც განსაკუთრებით მაღალ თანამდებობაზე უმუშავია ინდუსტრიის, კულტურის და პოლიტიკის დარგში და სრულად არ გაუხეშებულა, მისთვის ნაცნობია ჩუმი, მღრღნელი თვითგამოკულევის ფაზა. ბრანდტისნაირ მგრძნობიარე ადამიანზე ეს განსაკუთრებით ითქმის. მის ძლიერ მხარეს წარმოადგენდა ძალების სწრაფი აღდგენის უნარი. მაგრამ ჯერ ზაფხული იდგა და ამიტომ იყო ეს ამბავი საგანგაშო.

ვილი ჩაბნელებულ ოთახში იწვა. „არაფრის ხალისი აღარ მაქვს“. ცუდი ნიშანია, როცა პასუხისმგებლობით მოქმედებ და და ტვირთს ხალისით ველარ ატარებ. მის ლაპარაკში ფარხმლის დაყრა სიბრაზეს ერწყმოდა. ვარაუდობდა, რომ ემკე იყო ამბის გატანის წყარო, რაზეც ვენერი და შმიდტი საყვედურობდნენ. ვენერთან არაფერი გამოდის, შმიდტმა კი ვითომ

მეგობრული და თან საზიზლარი წერილი მომწერაო. ფრაქ-ციაში უკმაყოფილება სუფევს, რადგან ლიდერის როლს ვერ ვასრულებო. ემკე, როგორც კანცლერის აპარატის უფროსი, ისე იქცევა, თითქოს თავადაა მთავარი და კანცლერის არსებობას ითმენსო. პარტიას ქვეყნის მართვის უნარი აღარ აქვსო. შეელი კი მისი სამინისტროს დაწვრილმანების გამო უკვე გავაფრთხილე, კრემლი საოლქო სასამართლო ხომ არ გვინია-მეთქი. თავს ვანებებ ყველაფერს: „არ გაამართლა ჩემ-მა მეთოდმა, რომ ბრძანებებს არ გავცემ და ადამიანებს ისე ვეპყრობი, როგორც ადამიანებს“. მისი სურვილი, „დავამთავრო და ყველაფერი მივყარო“, საბედნიეროდ, ვერ შესრულდებოდა, რადგან ფედერალური პრეზიდენტი საზღვარგარეთ იმყოფებოდა.

ვაკვირდებოდი რა ბრანდტის ცხოვრების გზას, ვხედავ-დი ადამიანს, რომელიც მუდმივი წესის ქვეშ იმყოფებოდა. ეს ვრცელდებოდა ახალგაზრდა ბრანდტზეც და ემიგრანტ ბრანდტზეც. და მითუმეტეს დეპუტატზე, მმართველ მერზე, პარტიის თავმჯდომარეზე და კანცლერობის მრავალგზის კან-დიდაწზე, საგარეო საქმეთა მინისტრზე და ბოლოს ფედერა-ლურ კანცლერზე. პასუხისმგებლობასთან ერთად ემატებოდა უნარი, გაეძლო წესისთვის. მაგრამ თითოეული უფრო დიდი და ყოვლისმომცველი პასუხისმგებლობა აიძულებდა შესაძლე-ბლობების სულ ახალ-ახალ ზღვარს მიახლოვებოდა და მთ-ლიანად გადაწვდომოდა კიდეც. როდის, როგორ და სად უნდა განტვირთულიყო მუდმივი დაძაბულობისგან?

ამ მწვავე კითხვას მივყავდი მარტივ პასუხამდე, რომ უნდა დაესვენა. ჩვენი თანამშრომლობის დაწყებიდან ძალიან მალე მთელი ერთი კვირა გავატარეთ ტუნისის კუნძულ ჯერბაზე, ნანგრევებში რომაულ მონეტებს ვეძებდით, დავათვალიერეთ ქვეყნის ყველაზე ძველი სინაგოგა და უზომოდ ბევრი ვჭამეთ გუბერნატორის სადილზე. სანაპიროზე სეირნობისას ვილიმ

უცებ გაიხადა და ვიკინგივით გადაეშვა წყალში. ჩემთვის წყალი ცივი იყო. ასეთი უდარდელი მომენტები სამოციანი წლების დასაწყისშიც განვიცადეთ მექსიკის ყურეში. ვიღის, ჩრდილოეთ გერმანიის და სკანდინავიის წყლებში რომ ესწავლა თევზაობა, იქაც მოუნდა. შუა ზღვაში ანკესის გადაგდება არ იცოდა. ჩვენმა თანმხლებმა პირებმა მაშინვე წამოიყვირეს, თოვს ხელი გაუშვი, თორემ თითებს წაგანწყვეტს, თევზი თუ წამოეგოო. როგორც ახალბედამ, ყველაზე დიდი თევზი მე დავიჭირე და ვიღის დავუთმე, მაშინვე ფოტო გადაიღო. პატარა ბიჭებივით გავლალდით. იცოდა, რომ პრობლემებით არ შევაწუხებდი. სხვათა შორის, არც ხანმოკლე შესვენებების დროს და არც სამუშაოს დამთავრების შემდეგ შემიწუხებია რაიმეთი, მაგალითად, როცა გერპარდ ცვერენცის წიგნზე „პატარა კაცი ომსა და მშვიდობაში“ ვლაპარაკობდით და ვხალისობდით.

შვებულებისას არ ვნახულობდი, თუმცა, კანცლერის შვებულება მხოლოდ და მხოლოდ სამუშაო ადგილის სხვაგან გადატანას ნიშნავდა. ჩემი მეგობრის ცხოვრების არსი პოლიტიკა გახლდათ. არ დავინტერესებულვარ, ოჯახთან გატარებული დრო მოკლე ინტერვალებისგან შედგებოდა თუ ხანგრძლივი პერიოდებისგან. არც ესიამოვნებოდა ასეთი კითხვები. გვქონდა და სალალობო წუთებიც, მაგალითად, როცა ბრანდტი კაბინეტის სხდომის შემდეგ შეგვეაითხებოდა ხოლმე განტვირთვის მიზნით: „ვინ იცის კარგი ანეკდოტი?“

1972 წელს რომ ეს კრიზისი დადგა, სხვათა შორის, ვერცერთმა გარეშე პირმა ვერ იგრძნო. ბრანდტს ძალა და პრინციპულობა იმ მშფოთვარე წლის ბოლომდე ეყო. მტკიცე ხასიათი ჰქონდა. იცოდა თავისი არაჩვეულებრივი უნარების შესახებ და უწყოდა საკუთარი მნიშვნელობა ჩვენი ერის წინაშე ამ ალბათ განსაკუთრებულ ისტორიულ სიტუაციაში. ამ ცნობიერების, მოკრძალებულობის და სიამაყის გამო ისურვა, რომ მისი საფლავის ქვაზე წაეწერათ: „იგი ეცადა“.

დასავლეთსა და აღმოსავლეთს შორის ნდობის ზრდა

სექტემბრის დასაწყისში ჰენრი კისინჯერი მიუნხენის ოლიმპიურ თამაშებზე ჩამოვიდა, რომ კანცლერს შეხვედროდა. ჩვენს ურთიერთობას თითქმის გულითადს უწოდებდით. ყველაფერზე ოპერატიულად და ზუსტად გვაყენებდნენ საქმის კურსში – იქნებოდა ეს მოსკოვში შეხვედრები, ნიქსონთან ერთად პეკინში ვიზიტი თუ ამერიკული ჯარის ვიეტნამიდან გაყვანის სტატუსი. მიუნხენში არ გვეგულებოდა ოთახი, სადაც მოსმენას ვერ შეძლებდნენ, ამიტომ ამერიკელებმა ჰენრის სასტუმრო ოთახი საგულდაგულოდ აღჭურვეს და სანდოდ მიიჩნიეს. შედეგად, გერმანიის კანცლერი, უსაფრთხოების საკითხებში ამერიკელ მრჩეველს იქით ეახლა. ჰენრიმ ბრანდტს გაუზიარა გეგმა, რომლის მიხედვითაც ნიქსონს და ბრეუნევს ვლადივოსტოკში ხელშეკრულება უნდა დაედოთ ერთმანეთის წინააღმდეგ ატომური იარაღის არგამოყენებაზე, შესაბამისად, საკუთარი ტერიტორიების დაცვაზე. ეს არ ეხებოდა ჩინეთს, ახლო აღმოსავლეთსა და ევროპას. ბრანდტი და მე უკვე დიდი ხანია ვვარაუდობდით, რომ ორივე სუპერ-სახელმწიფოს სასიცოცხლო ინტერესი, ხელშეუხებელი გაეხადათ მათთვის წმინდა ტერიტორიები და, შესაბამისად, გადარჩენილიყვნენ, საქმე საქმეზე თუ მიდგებოდა, ევროპას გადააქცევდა მცირე ატომური იარაღის საცდელ პოლიგონად. ახლა კი ეს სცენარი

ხელშეკრულებად უნდა ქცეულიყო, რათა უფრო მასშტაბური ატომური საფრთხე შეემცირებინათ, რაც ნამდვილად დადებითად აისახება ევროპაზეცო.

ჰენრის გერმანიის კანცლერის რეაქციის მოსინჯვა უნდოდა. ბრანდტი დაეთანხმა, თუკი ნატოს ვალდებულებები უცვლელი დარჩებაო. ხაზგასმით გამოკვეთა თავისი მოსაზრება, გადარჩენის ერთადერთი შანსი მშვიდობიანი თანაცხოვრებაა. ამ რეალობის პარაგრაფებში მოსაქცევად ფედერალური რესპუბლიკა აშშ-ს მხარს დაუჭერსო. ვაშინგტონსა და მოსკოვს შორის ურთიერთობების განმუხტვა გერმანიისთვისაც ხელსაყრელიაო. ნდობა შენარჩუნდა. „არხით კომუნიკაციისასაც“ კი არ ხსენებულა არასდროს კისინჯერსა და ბრანდტს შორის დამუშავებული საკითხი, არამედ ყოველთვის მივანიშნებდით „მხოლოდ კანცლერისთვის განკუთვნილ ინფორმაციაზე“.

ამ განზომილების პირისპირ გერმანულ-გერმანული საკითხები ერთი ციცქანა ჩანდა, მაგრამ ჩვენთვის, ბუნებრივია, ეს ასე არ იყო. ბრანდტი მიუნხენში დარჩა, როცა „შავმა სექტემბერმა“ ისრაელის გუნდზე თავდასხმით ბოლო მოუღო მხიარულ თამაშებს. მან ფედერალურ პრეზიდენტ ჰაინრიხთან ერთად მიიღო ოლიმპიური თამაშების გაგრძელების გადაწყვეტილება.

ბონში ჰონეკერის პირადი გზავნილი მივიღე. მთავაზობდა, მიუხედავად სიძნელეებისა, დავაჩეკაროთ მოლაპარაკებებიო და მამცნობდა მზაობას, კიდევ ერთხელ შევხვდეთ პირისპირო. ბრანდტთან შესათანხმებელი დრო აღარ მრჩებოდა. გავფრინდი ბერლინში და გზაში სტენოგრაფიულად ჩამოვნერე ხუთი პუნქტი, რომელსაც ჰონეკერს წარვუდგენდი, როგორც კანცლერის გზავნილს. როდესაც შემდეგ საღამოს ვილის მისი სახელით ნათქვამი ეს პუნქტები მიუნხენში წავუკითხე, გაიცინა: „მადლობა ღმერთს, ასე გითქვამს. ასე მძაფრად მე ვერ ვიტყოდიო“.

პირისპირ შეხვედრა შედგა არსებით საკითხებზე, რამაც, ორი თვის შემდეგ, საბაზისო პრინციპების ხელშეკრულების დამთავრება გააიოლა. თანამემამულეს საინტერესო ემანსი-პირებულ უესტად ჩავუთვალე შენიშვნა, რომ საპაერო კორი-დორებს დაიცავდა და მომავალში გერმანულ-გერმანულ საპაე-რო მიმოსვლაზე დავდებდით ხელშეკრულებას. ამაზე ადრე მეც მიფიქრია. თუმცა საქმე რომ არ გამოვიდა, არც გდრ-ის ბრა-ლი იყო და არც გრომიკოსი, არამედ დასავლეთის სამი ძალის საპაერო ატაშების, რომელთაც ჩვენს გეგმას მათი მონოპო-ლისტი კომპანიების ინტერესების გამო მხარი არ დაუჭირეს.

არცერთ სხვა თემაზე არ გამოუხატავს ჰონეკერს თავისი აზრი ასე დაწვრილებით და მრავალნახნაგოვნად, როგორც ერის საკითხზე. „ხელი არ მოეწერება არცერთ ხელშეკრულე-ბას, სადაც ეწერება „ერის ერთობა“ ან „ქვეყნის გაერთიანება“, აღნიშნა მან. არცერთი ჩვენი მოკავშირე არ ემხრობა გერმანიის გაერთიანებას. ორივე მხარეს „ანევენ ხელს, ეს სიტყვები თუ გაიგონესო“. ორივე სახელმწიფო ერთად ეკონომიკურად ზედ-მეტად გაძლიერდებათ. შემდეგ მამცნო, „ყველა მოწყობილობას დავშლი, რომლებიც აქამდე გფრ-ის შიდა საქმეებში ერეოდათ“. იმავეს ვერ მოითხოვდა ბონისგან – მან იცოდა კონსტიტუციით დადგენილი საზღვრები – მაგრამ მნიშვნელობას ანიჭებდა სიტყ-ვას „ჩაურევლობა“, რომელიც სახელმწიფოთა შორის ურთიერ-თობის ელემენტარულ პრინციპს გულისხმობდა“. „სამშვიდობო ხელშეკრულების“ თემა „დროებით“ დავივიწყოთ მოლაპარაკე-ბებისასო: „სამშვიდობო ხელშეკრულება არ გაფორმდება. ეს უკვე ვიცით, იქნებ ბოლოში ჩავწეროთ ეს ფრაზა. – არ ვიცი“.

ჰონეკერმა გამჭრიახობა, გადაწყვეტილების მიღების უნარი და მეტი კომპეტენცია გამოავლინა, ვიდრე ზოგიერთმა ჩვენმა მაღალჩინოსანმა ბონში. მის გარეშე შიდაგერმანული დაახლოე-ბა ვერ განხორციელდებოდა. გასაოცარია, როგორ შეცდა,

რომ ეგონა, საზღვრების გავლება და დაახლოება ერთდროულად აღსრულდებოდა. როგორც მას მოექცნენ გაერთიანების შემდეგ, ნამდვილად არ არის საამაყო.

გამომშვიდობებისას ბრანდტთან და ვენერთან დამაპარა მოკითხვა და დასძინა, ზაარლანდში ვენერის ქვეშევრდომი ვიყავიო; სიამოვებით შევხვდებოდი კიდევ ერთხელ „მის ველზე“. ბონში „ბიძამ“ ამოისუნთქა და ვილისავით გაიხარა, ანი მოლაპარაკებების ბოლომდე მიყვანას რომ შევძლებდით.

მინისტრთა კაბინეტში შმიდტი ერთ ამბავში იყო, გვეყოფა ბარის ამდენი ქებაო; მას, როგორც მოხელეს, ისედაც ზომაზე მეტად აქცევს ყურადღებას პრესა და ტელევიზიაო. არ ვიცი, ეს კრიტიკა იყო თუ არა ვილის მოულოდნელი შემოთავაზების მიზეზი, როდესაც მითხრა, ბუნდესტაგის მანდატისთვის უნდა იბრძოლოთ: „შენი მეგობარი ჰელმუტი ფიქრობს, რომ პარტიაში შენი დაწინაურებაა საჭირო“. გარდა ამისა, მანდატი არ გაწყენს, თუ არჩევნებს წავაგებთო. შმიდტის შენიშვნა ეხებოდა ჩემს მიზნად დასახულ შედეგს, რომლითაც ვენერს ვარწმუნებდი, პირდაპირ საბაზისო ხელშეკრულებაზე გადავიდეთ-მეთქი. კოლთან შეხვედრებმა სამოცს გადააჭარბა და საქმეს ბოლო ჯერ კიდევ არ უჩანდა.

კოალიციის სათავეში მოქცეულ ჯგუფში ურთიერთობა მე-გობრული გახლდათ. შეელმა ემკეს თანდასწრებით მოსწრებულად შენიშნა: „კოლეგა ემკე თითქმის ყველა პრობლემას ჭრის, რომელთაც თავად ქმნის“. კანცლერის აპარატის შეფი, ჭკვიანი და ეფექტური თანამშრომელი, თავგანწირვით უშვერდა მკერდს კანცლერისათვის განკუთვნილ ისრებს... გარდა ამისა, იგი მეთვალყურეობდა სამსახურებს. პორსტს რომ მაინცდამაინც ჩეხი ქალი შეუყვარდა, სასიხარულო და პიკანტური ამბავი იყო. მაგრამ ღამლამობითაც ხომ უნდა დაგვესვენა, ეს კი ჩემი ხელშეწყობით ხდებოდა. ერთმანეთს ვცვლიდით

ხოლმე და შეთანხმებულები ვიყავით, რომელიმეს თუ გაგვიტაცებდნენ (მაშინ მოსალოდნელი იყო), პირდაპირ მივაჭრიდით მეგობართან. აღტაცებული ვიყავი, როგორ თავდაუზოგავად შეეძლო მუშაობა ჰოტეს, როგორც მას ვეძახდით. გავეცანი იმ უზარმაზარ სამუშაოს, რომელიც ჩემი საგარეო პოლიტიკური საქმიანობის მიღმა არსებობდა. კოალიციის შიდა პოლიტიკური წარმატებები არ იყო ისე გახმაურებული, როგორადაც ეკუთვნოდა. კანცლერის აპარატისადმი გამოვლენილი შური გასაკვირი არ უნდა ყოფილიყო.

როდესაც ბუნდესტაგის მანდატისთვის ბრძოლაზე თანხმობა განვაცხადე, ვილიმ იოხენ შტეფენთან გამიშვა. შლეზვიგ-ჰოლშტაინის თავმჯდომარე სულით ხორცამდე მემარცხენე დემოკრატი გახლდათ, რომელიც ვერანაირ კომუნისტურად შეფერილ ტენდენციას ვერ გუობდა, როგორსაც, მაგალითად, ჰაბბურგში ვაწყდებოდით. მისი სიტყვები „ასეთი კვერცხისთავა გვჭირდება“ კმაროდა, რომ ფედერალურ მიწაზე სიის პირველ ნომრად ავერჩიე. უკვე მიმდინარე მოლაპარაკებებსა და შეხვედრებს ორშაბათობით ქვეყნის უკიდურეს ჩრდილოეთში საარჩევნო ოლქში ვიზიტებიც დაემატა. მადლობელი ვიყავი, რომ პარტიის ადგილობრივ ორგანიზაციას ჩემი და ჩემი ბონური საქმეების ესმოდა, მათი ნაწილი ხომ ნამდვილად არ გამოხატავდა მკაფიო მემარცხენე პოზიციას. „წითელმა იოხენმა“ ამისენა, რომ ბირთვული ენერგიის მშვიდობიანი გამოყენება ბოლოს და ბოლოს გზას გაუხსნის ენერგეტიკის პრობლემების სუფთად გადაჭრის პერსპექტივასო. ამგვარად აღმოვჩნდით პროგრესის სათავეში. მაშინ ვისწავლე ის, რაც მთელი ცხოვრება მემახსოვრება: პოლიტიკა კვალში უდგას მეცნიერებას, მაშინაც, როცა ის ახალ საფრთხეებს აღმოაჩენს, მაგალითად ჩერნობილის ან ფუკუშიმას შემდეგ გამოსხივებიანი ნარჩენების გატანისას. განახლებადი ენერგიის შემთხვევაშიც

ასე იქნება. პოლიტიკის კეთილი განზრახვა, თან პრევენციული და თან უწყვეტი გავლენა იქონიოს, გულუბრყვილოდ ჩანს. იგი მომავლშიც გაჰყვება ტექნიკის ნებისმიერ გარდამტეხ სიახლეს. ხოლო მეცნიერების გაფრთხილება გლობალური რესურსების ამონურვის შესახებ ეჯახება პოლიტიკას, რომელიც მხოლოდ თავისი საკანონმდებლო ვადის ფარგლებში აზროვნებს.

ფინიშის სწორს

მოლაპარაკებებისას მიხაელ კოლი და მე შევთანხმდით ბალტიის ზღვასა და ბიომერის ტყის რეგიონში მცირე სასაზღვრო მიმოსვლაზე. ეს რეგიონი, რომელიც 110 ოლქს მოიცავს, ოთხი ახალი სასაზღვრო პუნქტით აღიჭურვა. დამატებით ოთხზე კოლმა უარი მითხრა: „ახლა მეტი არ შემიძლია“.

ბერლინის საზღვრის გადაკვეთის პირველი დოკუმენტის შემოღება რომ მასესენდებოდა, დიდ ტალღას ველოდი. კოლი შემპირდა, თუ ასე მოხდა, დაუყენებლივ შევხვდეთ და ახალ პუნქტებზე მოვილაპარაკოთ. დიდი იმედგაცრუება მეღოდა: ხალხი პუნქტებს არ მოწყდომია. უფრო დიდი იმედგაცრუება – 1990 წლის 3 ოქტომბრის შემდეგ ძველ სამშობლოში დაბრუნების დიდი ტალღაც არ ყოფილა, დასავლეთში მიღებული მდიდარი გამოცდილების ხალხი უკან არ დაბრუნებულა. როგორც ერს, ბედმა გაგვიღიმა. კორეული ტრაგიზმი, რომ ხალხი მართლა შეიძლება გაყო, თუკი დიდი ხნით დააშორებ ერთმანეთს, ჩვენ აგვცდა.

მოლაპარაკების დასკვნით ეტაპზე ბრანდტმა გადაწყვიტა ბრეუნევისთვის ეთხოვა გდრ-ზე ზემოქმედება, შემხვედრი ნაბიჯები გადმოედგათ სამშვიდობო ხელშეკრულების და ერის პრინციპული საკითხების მოლაპარაკების გზაზე. ხელშეკრულება რომ ყველა მხარისთვის მისაღები ყოფილიყო, მასში უნდა შესულიყო დებულება, რომ „ორი გერმანული სახელმწიფოს შემთხვევაში საქმე ეხება ერთ ერს. შესაბამისი

ფორმულირების გარეშე ხელშეკრულების პოლიტიკურად გატანა ვერ მოხერხდებოდა, მას საკონსტიტუციო სასამართლო ბათილად ცნობდა“. ასე გულახდილი საუბარი არ გაძნელებულა, რადგან ბრანდტი და ბრეჟნევი 1971 წლის შემოდგომაზე, ყირიმში მეორე შეხვედრისას ერთმანეთს დაუახლოვდნენ, მათ შორის ნდობა დამყარდა და მერე ხშირი მიმოწერა ჰქონდათ. ასეთი არადიპლომატიური ქმედება არა მარტო გაბედული ნაბიჯი იყო, ცოტათი თავხედურიც, დიდ ძმას სთხოვდა გდრ-ზე გავლენა იქონიერ.

რამდენიმედღიანი დუმილის შემდეგ „ჩვენმა არხმა“ მირჩია, პირდაპირ ბრეჟნევთან მოსინჯეო. „მას უყვარხარ“, ჯერ კიდევ ყირიმში მითხრა ბრანდტმა. ვვარაუდობდით, რომ გდრჩემი ვიზიტის შესახებ შეიტყობდა, რადგან კოლთან შეხვედრის გაუქმება მომინევდა, ეს კი პარაფირებამდე დარჩენილ საბოლოო ეტაპზე უარყოფითად იმოქმედებდა. ვილიმ რისკზე წასვლა გადაწყვიტა.

მოსკოვში საათობით ველაპარაკებოდი გრომიკოს, მაგრამ ადგილიდან ვერ დავძარი. მეორე დილას, 1972 წლის 10 ოქტომბერს, ბრეჟნევი გულითადად მომესალმა. „თქვენ ისევე გელაპარაკებით, როგორც კანცლერს“. საუბარი თანამდებობისთვის შეუფერებელი ანეკდოტებით დაიწყო. მოგვიანებით ბრანდტი გავართე ამ ანეკდოტებით, ძირითადი პუნქტები ჩავიწერე – „ოთხი ქალი“, „ლოგიკის ამბავი“ და „ჩვიდმეტი წლის ბიჭი“. ამასობაში ეს ანეკდოტები დამავიწყდა. ჩვენი მოლაპარაკებების ძირითადი პუნქტების შესახებ კი აღნიშნა, ურთულესი საკითხია და საფუძვლიან აწონ-დაწონას მოითხოვსო. როცა ჩიბუხის შალითა გავხსენი და ჩიბუხის დატენვას შევუდექი, მხოლოდ მაშინ მოდუნდა, რადგან შეამჩნია, რომ ხმის ჩამწერი არ მქონდა. მანაც ამოიღო ჯიბიდან კოლოფი, სიგარეტს მოუკიდა და ექიმებზე დაიჩივლა, რაღაცა უქნეს ამ კოლოფს, მხოლოდ ნახევარ საათში ერთხელ იხსნებაო. მკითხა, საარ-

ჩევნო კამპანია როგორ მიღისო. ოთხი საათის შემდეგ ისე დავასრულეთ საუბარი, იმ ორი პუნქტის შესახებ არაფერი დაუდგენია, რისთვისაც ჩავედი. შაჰი ენდა მიეღო. რა გავლენა მოახდინა შემდეგ აღმოსავლეთ ბერლინელ ამხანაგებზე, კანც-ლერისთვის გაგზავნილ ცნობაშიც არ გამოვლენილა: „ძალიან კმაყოფილი ვარ ბატონ ბართან საუბრით. მას ვეღაპარაკებოდი და თქვენი ხმა მესმოდა. ხანდახან ორივე ჩვენგანი გამოხატავდით განსხვავებულ პოზიციებს, მაგრამ ეს არ გახდება იმედგაცრუების მიზეზი ... ჩვენ მზად ვართ, ყველაფერი გავაკეთოთ თქვენს დასახმარებლად“.

ჩემი მოხსენების შემდეგ ვილიმ და მე დავასკვენით ის, რომ პონეკერმა სამართლიანად მიგვანიშნა, არავინ იცის, შედგება თუ არა სამშვიდობო ხელშეკრულება და როდისო. წერილი გერმანიის გაერთიანების შესახებ, რომელიც მოსკოვის ხელშეკრულების ხელმოწერისას გადავეცით, გდრ-ის წინაშეც საკმარისი იქნებოდა. კაბინეტის ვიწრო წრეში განვიხილეთ ერის ჩართვის საკითხი. მხოლოდ ვენერი შემეპასუხა: „ამას არ უნდა შევწიროთ ხელშეკრულება“. მაგრამ ვენერი უფლებამოსილი არ იყო ჩემთვის მითითები მოეცა.

შემდეგ, შესაძლოა ბოლო სხდომაზე, კოლს ავუხსენი, რომ პრეამბულაში მაინც თუ არ იქნებოდა ნახსენები ერი, პარაფირებას ვერ შევპირდებოდი. სხდომა შეწყვიტა და ნახევარ საათში დაბრუნდა პონეკერისგან უფლებამოსილი, ჩემი ფორმულირებით გვემუშავა. ჩვენი ხელმოწერით დასრულდა მოლაპარაკებები. ახლა ორივე მთავრობას უნდა გადაეწყვიტა თანხმობა მოეცა ხელმოწერაზე.

პარაფირება განხორციელდა 8 ნოემბერს, ხელშეკრულების ტექსტის გამოქვეყნების პარალელურად. მოსახლეობას 19 ნოემბრის არჩევნებზე ამ საბაზისო პრინციპების ხელშეკრულების-თვისაც უნდა ეყარა კენჭი; ახალ მთავრობას ხელ-ფეხი უნდა

გახსნოდა ან თავიდან დაეწყო მოლაპარაკებები, ან საერთოდ არ გაემართა.

პარაფირების შემდეგ ფედერალურმა კანცლერმა მიხაელ კოლი მიიღო. თვითონაც არ გვჯეროდა ჩვენი ბედნიერებისა, ისეთი დაღლილები ვისხედით კანცლერის ბუნგალოში, სიხა-რულის თავიც აღარ გვქონდა, რომ ამხელა საქმე მართლა გავაკეთეთ. არჩევნებში გამარჯვებამ შესაძლებელი გახადა ხელშეკრულების ხელმოწერა 21 დეკემბერს. მანამდე კი შევ-თანხმდით, რომ მხარს დავუჭრდით გდრ-ის განცხადებას პა-რიზში იუნესკოს წევრობაზე, ორი კვირით ადრე ამაზე ლაპა-რაკიც კი შეუძლებელი იქნებოდა.

არჩევნებში სოციალ-დემოკრატიული პარტიის უდიდესმა წარმატებამ იგი ბუნდესტაგის ყველაზე ძლიერ პარტიად აქცია. „ვირჩევთ ვილის!“ აღმოჩნდა ყველაზე ძვირფასი არგუმენტი. როდის შევძლებთ პლაკატებზე ისევ დავწეროთ: „გერმანელე-ბო, შეგვიძლია ვიამაყოთ ჩვენი ქვეყნით“. ეს იყო მწვერვალი, რომელზეც ვერავინ მოკალათდება.

ვილიმ თითქმის საზეიმოდ გადამიხადა მადლობა საპაზისო პრინციპების ხელშეკრულებისთვის. „ეს შენი პირმშოა. დაიმ-სახურე, რომ თავად მოაწერო ხელი შენს ხელშეკრულებას“. ისევ შემომთავაზე კანცლერის აპარატში ემკეს მოვალეობა ჩამებარებინა. როცა ისევ ვიუარე, მითხრა: „მაშინ ბუნდესტაგის მანდატი მაინც უნდა აიღო“. შემდეგ სიერა ლეონეში ხანმოკლე შვებულებით გამგზავრების ნება დამრთო. რომ დავპრუნდი, გათამაშებული სიხარულით მამცნო, კოალიციამ შენ და ვერ-ნერ მაიჰოფერი განსაკუთრებულ დავალებათა ფედერალურ მინისტრებად წარგადგინათო. პორსტ გრაბერტი სახელმწიფო მდივნის რანგში გაუძლვებოდა კანცლერის აპარატს. მან, რო-გორც ფედერალურმა სენატორმა, კარგად იცოდა როგორც ბერლინის, ასევე ბონის პრობლემები. პიროვნულად სასიამოვ-

ნო, ჭკვიანი და, ემკესთან შედარებით, წყნარი კაცი იყო. ემკემ სამეცნიერო კვლევისა და ტექნოლოგიის სფერო ჩაიბარა.

შვებულებაში ყოფნის გამო სინდისი მქენჯნიდა, მთელი წლის ალიაქოთით დაღლილ მეგობარს რომ ვუყურებდი. ხრინნიანი ხმა ჰქონდა, სახმო სიმები უნდა გავათლევინოო და უხაროდა მთლიანი ნარკოზი რომ ელოდა და მერე ორი კვირა ვერ ილაპარაკებდა, თანაც კაბინეტის შექმნის დავიდარაბას თავიდან აიცილებდა. პრაქტიკულად მხოლოდ კანცლერის აპარატის ნაწილი ჰქონდა მოგვარებული. მაგრამ ვენერს მოსაზრებების გრძელი სია გადასცა კაბინეტის შემადგენლობის შესახებ; მოგვიანებით აღმოაჩინა, რომ ეს სია ამ უკანასკნელს პორტფელში „დავიწყნოდა“. ამგვარად, კოალიციამ ბრანდტის სურვილის გათვალისწინების გარეშე გადაწყვიტა ახალი კაბინეტის თარგი და შემადგენლობა, რასაც სახელმწიფო გადატრიალებას ვერ დაარქევდი, მაგრამ ფედერალური კანცლერის წინააღმდეგ ნამდვილად იყო მიმართული. მოგვიანებით მიყვებოდა, ოპერაციის შემდეგ ლაპარაკი და მოწევა აკრძალული რომ მქონდა, ყოველდღე ორ შეცდომას ვუშვებდი და ვერცერთი ავიცილე თავიდანო. შენ მაინც არ შეწყვიტო უცებ მოწევაო, გამაფრთხილა. საბედისწერო წელს ჩემი მეგობარი გამოფიტული და დასუსტებული დაემშვიდობა.

გაჭირებული სტარტი

ახალი წელი ვალტერ შეელმა საერთო განწყობის აღწერით დაახასიათა: „ბატონო ფედერალურო კანცლერო, 1973 წელმა მეტი სიმშვიდე უნდა მოგვიტანოს, ვიდრე სიახლე. უპირველეს ყოვლისა, მეტი დრო უნდა დავუთმოთ იმას, რომ მოსახლეობას განვუმარტოთ, რაც აქამდე გავაკეთეთ“. საგულისხო რჩევა იყო, რადგან საკუთარ პარტიაშიც იგრძნობოდა, რომ განმუხტვის პოლიტიკა და აღმოსავლეთის ხელშეკრულებების სულისკვეთება საზოგადოდ ცნობილი არ იყო, რაც უმნიშვნელო ნინააღმდეგობის დროსაც იჩენდა ხოლმე თავს.

საახალწლო უქმეები საკმარისი არ აღმოჩნდა მეგობარს ძალები აღედგინა. გაუქრა ის ენთუზიაზმი, რომლითაც 1969 წელს პირველ სამთავრობო პროგრამაზე მუშაობდა. მეორე მოხსენება სამინისტროების მიერ მონაცემული მონახაზების-გან შეკონინდა. გამოსვლის ტექსტებს პოპულარული მწერლის შემომატებამაც ვერ უშველა. კლაუს ჰარპერეხტის საოცარი ოსტატობით დაწერილი თომას მანის ბიოგრაფია მოგვიანებით ერთი ამოსუნთქვით წავიკითხე, თუმცა ლიტერატურაში უკეთ ერკვეოდა, ვიდრე პოლიტიკაში. მისი შემოთავაზება, სიტყვა „compassion“ გვექცია მთავარ ცნებად, ვილის მოენონა, მე კი სისუსტის გამოვლინებად მივიჩნიე და ხარვის გადახდად იმგვარი განათლებისთვის, რომლის მიღების საშუალებაც მას ცხოვრებაში არ მიეცა. რა საჭირო იყო გერმანიის კანცლერის

გამოსვლაში ისეთი ინგლისური სიტყვა, რომელსაც მშობლიურ ენაში ზუსტი შესატყვისი არ მოეძებნებოდა? მაგრამ ვიღიმ ასე დაიუინა და ვერ შეეკამათებოდი. ის იყო ძალაგამოცლილი სული, რომელმაც ჩაანაცვლა შექმნის წადილით ნასაზრდოები ეიფორია.

ცოტა დაგვიანებით მეც მომეძალა მოლაპარაკებებით გადატვირთული წინა სამი წლის დაღლილობა. 1973 წლის მარტის დასაწყისში თავს შეუძლოდ ვგრძნობდი და კლინიკაში წავედი. ექიმს უნდოდა, იქვე დავეტოვებინე. მაგრამ მეორე დღეს პარიზში უნდა გავმგზავრებულიყავი – თუ სიკვდილი გინდათ, მოკვდით, მე რა მენაღვლებაო. – დამადევნა მწყრალად. ადრენალინი სრულიად ამომენურა. ახალ გერმანულ ენაზე ამას „ბერნაუტი“ ჰქვია. ოთხი კვირა ვიწექი. მთელი არსებით ყველასა და ყველაფრის მიმართ აქამდე უცნობ გულგრილობის რეჟიმზე გადავერთე. აღარც გაზეთები მაინტერესებდა და აღარც რადიო და ტელევიზორი, ვიღის ზარიც კი. ოთხი კვირის შემდეგ ძლივს ავდექი, ტეგერნის ტბაზე გადამიყვანეს სანატორიუმში და შეშფოთებული ვცდილობდი არტიკულაციის უნარი დამბრუნებოდა. ვიღი მზრუნველად კითხულობდა ჩემი გამოჯაანმრთელების ამბებს. ჰანს-იოხენ ფოგელმა მოულოდნელად მომინახულა, მისი მუდამ მადლიერი დავრჩები.

მაისმა განწყობა გამომიკეთა. ბრეჟნევი ფედერალურ რესპუბლიკაში თავისი პირველი ვიზიტის დროს, კანცლერის რეზიდენციის წინ, ვეღარ შეელია რუთის ხელზე კოცნას. ურთიერთსიმპატია ნამდვილად იგრძნობოდა. საგარეო უწყებამ უარი თქვა სტუმრის საპატივცემლოდ ოცდაერთი ზალპის გასროლაზე, როგორც ეს პარიზში მოუწყვეს, სახელმწიფოს მეთაური არ არისო. მაგრამ ბოლოს პროტოკოლს საწინააღმდეგო არაფერი ჰქონდა, ბრეჟნევს ხელი მოეწერა დოკუმენტებზე, რისი უფლება „საბჭოთა კავშირის მთავრობის სახელით“ მას საერთოდ არ ჰქონდა.

გენერალურმა მდივანმა და კანცლერმა გრომიკოს და მე კომუნიკეს მომზადება დაგვავალეს. ერთმანეთს მართლა დავეჯახეთ. გრომიკო ამბობდა, ბერლინის შესახებ გადაწყვეტილება ოთხმა გამარჯვებულმა ძალამ მიიღო. ფედერაციული რესპუბლიკა არაფერ შუაშია და ამ ვიზიტის კომუნიკებიც არ უნდა შევიდესო. ჩემმა კატეგორიულმა პასუხმა: „ბერლინის გარეშე კომუნიკე საერთოდ არ იქნება!“. სამარისებული სიჩქმე გაახანგრძლივა, სანამ ფალინი შეეცდებოდა ვითარების გამოსწორებას. მან თქვა, ვეცდები ბართან დალაპარაკებასო. ბუზდუნით დაეთანხმნენ სასაცილო შედეგს, რომელიც გამოიხატებოდა ფრაზით – ოთხი გამარჯვებული ძალის ხელშეკრულების „განუხრელი დაცვა და სრული გამოყენება“. მეორე დილას ყველა თანახმა იყო, მე კი ვისწავლე, რას ნიშნავს „სოლომონური“ გადაწყვეტილება.

საღამოს ბრანდტმა ორივე დელეგაციის საპატივცემოდ თავის რეზიდენციაში ვახშამი გამართა. ბუზის გაფრენას გაიგონებდით, როდესაც გენერალური მდივანი – ომში წითელი არმიის პოლიტკომისარი და ვერმახტის უფროსი ლეიტენანტი ჰელმუტ შმიდტი ბრძოლების და რუსეთში ცეცხლის შეწყვეტის შესახებ ყვებოდნენ, მითუმეტეს როცა გაირკვა, რომ ფრონტის ერთსა და იმავე მონაკვეთზე იდგნენ ერთმანეთის პირისპირ. აღელვება ლეონიდ ილიჩსაც დაეტყო. სხვა არც ერთ ორ ხალხს არ მიუყენებია ერთმანეთისთვის ასეთი ლრმა ჭრილობა. შიში და პატივისცემა იგრძნობოდა.

აეროპორტში, გამომშვიდობებისას ბრეუნევმა მხარზე ხელი დამადო და მკითხა, უკიმაყოფილო სახე რატომ გაქვსო. ევროპის უსაფრთხოების შესახებ არასაკმარისად ვილაპარაკეთ-მეთქი, მივუგე. დამეთანხმა; მაგრამ დამაიმედა, პესიმისტურად ნუ განეწყობი, ყველაფერი კარგად იქნებაო.

ოთხი დღის თავზე ბავარიის მიწის მთავრობამ ფედერალურ საკონსტიტუციო სასამართლოში შეიტანა განცხადება – საბა-

ზისო პრინციპების ხელშეკრულების დაუყონებლივ შეჩერების თაობაზე, მისი აკრძალვის მიზნით. კარლსრუეში ზეპირ მოსმენაზე მხოლოდ მაშინ დავმშვიდდი, როდესაც ვიგრძენი, გონება და მეტყველება ჩვეულებისამებრ აღმიდგა. ბავარიის წინააღმდეგ ერთხმად მიღებული გადაწყვეტილების შემდეგ ყველა ხელშეკრულება, როგორც იქნა, ძალაში შევიდა.

ორმოცდაათიანი წლების ბოლოდან მოყოლებული, ადვოკატებისა და ევანგელისტური ეკლესიის დახმარებით დაწესდა ფედერაციულ რესპუბლიკაში გადმოსვლის მსურველთა მიღების სანაცვლოდ გდრ-ისთვის ფულის გადახდის პრაქტიკა. არცერთი მთავრობა ამით არ ამაყობდა. დასავლეთ გერმანიის მედიამ იცოდა, მაგრამ „გამოსყიდულთა“ ინტერესებს იცავდა და ამ შემთხვევებს ოცი წლის განმავლობაში არ ახმაურებდა. ამ საქმეების მოგვარება ვოლფგანგ ფოგელს, გდრ-ის ნდობით აღჭურვილ ადვოკატს ევალებოდა.

საბაზისო პრინციპების ხელშეკრულების ხელმოწერის დროს გამართულ საუბარში გდრ-ის საგარეო საქმეთა მინისტრმა ამიხსნა: „ადვოკატის არხი შეგვიძლია დავხუროთ. ანი ხომ გვექნება საკონსულო სამსახურები“. მეც იმავეს ვფიქრობდი. მაგრამ აღმოსავლეთ ბერლინმა მოულოდნელი საახალწლო საჩუქარი მოგვიმზადა და გამგზავრების უფლების გაცემა საერთოდ შეწყვიტა, ამით შექმნა ე. წ. „ჩემოდნის საქმეები“ – ადამიანები, რომლებიც ნებადართულ გამგზავრებას ელოდნენ. მართალია, ყველას ვაფრთხილებდი, გერმანულ-გერმანული თაფლობისთვის ეიფორიას ნუ აყვებით-მეთქი, მაგრამ ნამდვილად არ ველოდი, რომ ნაცრისფერი რეალობა ასე ჩქარა დადგებოდა.

ბრანდტის ნებართვით კოლს ველაპარაკე ამ ორივე მხარის-თვის ულირს ქმედებაზე. ადამიანებით ამგვარი ვაჭრობა უნდა დამთავრდეს და ორ სახელმწიფოს შორის ორმხრივი ინტერესების გათვალისწინებით სასურველ დონეზე უნდა ავიდეს-მეთქი.

კოლს შესაბამისი კომპეტენცია არ გააჩნდა და ბერლინთან კონსულტაციის შემდეგ პოლიტბიუროს წევრ პაულ ვერნერთან შეხვედრა შემომთავაზა. პაულ ვერნერს ჩემი მოსაზრებები რომ წარვუდგინე, მითხრა: თქვენ ჩემი დარწმუნება შეძელით და ფედერალურ კანცლერს ასე გადაეცითო. დეტალებზე კი კოლთან მოითათბირეთო.

გახარებულმა შეფინავი ბონში მომილოცა წარმატება. მოგვიანებით ვენერი შემოგვიერთდა და მასაც მიახარა კარგი ამბავი, ის კი აფეთქდა: ეს საშინელებაა, ანი ყველაფერი გაიყინებაო. ყველაფერს დაბლოკავენ და „ჩემოდნის საქმეები“ მოიმატებსო. ორ დღეში დამიდასტურა კოლმა, შეგვიძლია დეტალებზე „ამხანაგ ვერნერთან თქვენი საუბრის შესაბამისად“ მოვილაპარაკოთო. ვილი: „ხომ ხედავ, გამოდის!“ შეხვედრამდე ერთი დღით ადრე კოლმა მიზეზის დასახელების გარეშე გააუქმა შეხვედრა. ვენერს რამდენიმე დღე დასჭირდა, რომ მოსალოდნელი შეთანხმება აღეკვეთა.

რუტინა გრძელდებოდა. ჰანოვერშტრასეზე ჩვენი ახლად შექმნილი მუდმივი წარმომადგენლობისთვის შენობა შევარჩიე და გიუნტერ გაუსი დავითანხმე, სტილის დამამკვიდრებელ ყინულმჭრელად ემუშავა. მაგრამ მანამ ვერ დავიყოლიეთ, სანამ ვილიმ არ დაარწმუნა, რა მნიშვნელოვანი იქნებოდა მისი საქმიანობა და მისი რჩევა კანცლერის აპარატისთვის. აღმოსავლეთ ბერლინიდან ხმა მოგვივიდა, გრომიკო მუდმივი წარმომადგენლობის გახსნის მოლაპარაკებებზე ხელის შეშლას აპირებსო. მოსკოვის ჩარევა ერთწლიან გაჯანჯლებად დაგვიჯდა და თან დავინახეთ, რომ გდრ ამ უმნიშვნელო საკითხის გადაწყვეტაშიც არ იყო დამოუკიდებელი. ჩვენ კი ისე უნდა დაგვჭირა თავი, თითქოს მისი დამოუკიდებლობის გვჯეროდა.

ვენერი

ამ ამბის წინაპირობა ერთ-ერთი საუბარია, რომელიც ბრანდტს, ვენერსა და ჩემს შორის შედგა. „ჩემოდნის საქმეები“ ჩემი სამ-სახურში არყოფნის დროსაც ვერ გადაიჭრა. ვენერმა გვაცნობა, ჰონეკერმა მიმიწვია ქვეყნიდან გასვლის უფლებაზე სამსჯე-ლოდო. ვიფიქრე, ვოლფგანგ მიშნიკ წავიყოლებ (ისიც მასა-ვით დრეზდენელი იყო), თავისუფალი დემოკრატების ფრაქ-ციის თავმჯდომარეს, პოლიტიკური რისკის შესამცირებლადო. ვშიშობდი, არ გაუჭირდებათ ავარია მომიწყონო. მე ვუთხარი, პირველი კაცი თუ გპატიუებს, ისევე უსაფრთხოდ იქნები, რო-გორც აბრაამის კალთაში-მეთქი. შემაშინა მისმა კატეგორიულ-მა და ხისტმა პასუხმა: „თქვენ არ გესმით! არსებობს რაღაცე-ბი, რასაც არ პატიობენ და არ ივიწყებენ“. არ თამაშობდა, მართლა ძალიან ეშინოდა. შემდეგ ტექნიკური სამზადისის დე-ტალები გავიარეთ, ცუდი არაფერი გვიფიქრია და ყურადღე-ბა არ მიგვიქცევია, რომ მიშნიკის მოწვევა მისი აღმოსავლელ ბერლინელი ლიბერალ-დემოკრატიული მეგობრისგან დროუ-ლად მოსულიყო. ვილიმაც შენიშნა, რომ ვენერი მრავლობითში გველაპარაკებოდა. სოციალ-დემოკრატები იმთავითვე მიამიტე-ბი ვართ კომუნისტებთან შედარებით. „თქვენ“-ში შენც გიგუ-ლისხმა“, მითხრა ვილიმ, „და ჩვენთან ხაზგასმით დაიჭირა დის-ტანციაო“.

„ჩემოდნის საქმეები“ გადაიჭრა. ვენერმა 30 მაისს ჰონე-კერთან პირისპირ შეხვედრისას შეათანხმა ქვეყნიდან გასვლის აკრძალვის შეჩერება; ამ უკანასკნელმა კი მაშინვე მიუთითა შტაზის შეფს ერის მიღებეს. მიშნიკი ერთი დღით გვიან ჩაერთო მოლაპარაკებებში. საუბრის ჩანაწერი არ მიგვიღია, კიდევ რა ითქვა, არ ვიცით. კოლთან ოფიციალურ მოლაპარაკებებში არაფერი შეცვლილა. მაგრამ ზაფხულში მოსკოვის არხმა მრავალჯერ შეგვატყობინა, რომ ვენერმა გდრ-ის კონტაქტებთან კრიტიკული და უპატივცემლო კომენტარებით მოიხსენია ბრანდტი. ბრანდტმა ამ ინფორმაციის მოწოდებისთვის წყაროს მადლობა შეუთვალა. დღემდე უპატივბელია ჩვენი გულუბრყვილობა.

დიდი კოალიციის დროს ვენერი ფედერალური მინისტრის რანგში ხელმძღვანელობდა საერთო გერმანული საკითხების ფარგლებში „ადამიანების მდგომარეობის შემსუბუქების“ თემას, ანუ ადვოკატ ვოლფგანგ ფოგელის ძალისხმევით გამოსყიდული მოქალაქების საკითხს. ფედერალური მთავრობის წევრობა მისთვის ნიშნავდა, რომ ქდე/ქს გაერთიანებამ აშკარად აპატია წარსული. პატიების განწყობა მაშინ დასრულდა, როცა 1969 წელს სოციალ-ლიბერალურ კოალიციაში სოციალ-დემოკრატიული პარტიის ფრაქციის თავმჯდომარე გახდა. ქვეყნიდან გასვლის კომპეტენცია ისევ სამინისტროს დაწჩა, ამდენად, მთელ ამ კომპლექსში იგი არავითარ როლს აღარ თამაშობდა.

1973 წლის ბოლოს ვენერი ბუნდესტაგის დელეგაციასთან ერთად გაემგზავრა მოსკოვში – ეს იყო ბრანდტის განმუხტვის პოლიტიკის დაგვიანებული საჩუქარი. კანცლერის აპარატში ყველა ვთანხმდებოდით, რომ „ბიძას“ ეს მოგზაურობა წარსულთან შერიგებაში დაეხმარებოდა. ვიზიტის კულმინაციას წარმოადგენდა შეხვედრა მის ყოფილ უფროსთან, ბორის პონომარიოვთან. ამ შეხვედრაზე კიდევ უფრო აუგად მოუხსენებია ბრანდტი, ვიდრე უურნალისტების წინაშე, როგორც არხმა შეგვატყობინა,

უთქვამს: „ის მოღალატეაო“. სააგენტოები კი იუწყებოდნენ: „ბრანდტი საქმეებს ვერ უძღვება. უნიათოა. მთავრობაც უნია-თოაო“. ბრანდტმა ეს ამბავი მაინცდამაინც მაშინ გაიგო, როცა ფედერაციული რესპუბლიკის გაეროში გაწევრიანების გამო ნიუ იორკში სიტყვით გამოვიდა. ვიზიტი შეწყვიტა.

ვილი ბრაზისგან ბობოქრობდა. „უკვე კმარა. ან – ის, ან – მე“. ჰორსტ გრაბერმა მაშინვე იზრუნა თვითმფრინავზე. უნდოდა მოსკოვში ჩაეკითხა ვენერისთვის, რათა მასთან ერთად ჩამოფრენილიყო ბონში და ტრაპიდან ჩამოსვლისთანავე გაეკეთებინებინა გადადგომის განცხადება. ვილის ვურჩიე, ვენერს პირადად დაელაპარაკე-მეთქი. ამ დაპირისპირებას ნამდვილად მოიგებდა, მაგრამ მისი ენერგია სხვა საქმეებს უფრო სჭირდებოდა. ამიტომ თვითმფრინავის შეკვეთა გავაუქმეთ. მათი საუბარი ვენერის თხოვნით ასე დასრულდა: „მოდი, კიდევ ერთხელ ვცადოთ“. დღემდე დარდად მაწევს და თავს ვიდანაშაულებ, რომ მეგობარს არასწორი რჩევა მივეცი. ვილის ამის გამო არა-სოდეს უსაყვედურია.

*

ვილი ბრანდტი სანიმუშო მაგალითი იყო იმისა, რომ აუცილებელი არაა პოლიტიკამ ადამიანი გარყვნას. ჰერბერტ ვენერი ძალაუფლების მოტრფიალე კაცი გახლდათ, რომელსაც სინდისი არ ანუხებდა, და ადამიანებს ჭადრაკის ფიგურებივით ათამაშებდა. ბრანდტმა თავისი პიროვნული თვისებები შეურწყა საზოგადოების შეცვლის ფართო პოლიტიკურ ხედვას. ვენერი საოცრად გადამეტებული წარმოდგენის იყო საკუთარ თავზე, ხოლო თავისი პოზიციის გასამაგრებლად და იმის გასატანად, რაც საჭიროდ მიაჩნდა, ყველაფერს კადრულობდა. ბრანდტი თავს ძლიერად ხალხის სამსახურში გრძნობდა, ვენერს კი,

საკუთარი წარსულით დამძიმებულს, მხოლოდ უკანა რიგიდან, თანამდებობის გარეშე უნდა წარმოეჩინა თავისი უპირატესობა. ბრანდტს არავისი არ შურდა, მხოლოდ სხვისი აკადემიური განათლება შეიძლებოდა შეშურებოდა. ვენერს კი ბრანდტის შურდა, ბრანდტს შეეძლო სიცილით დაემტკიცებინა, რომ პოლიტიკა მხოლოდ სერიოზული და სასტიკი საქმე არ არის. ბრანდტისთვის ვენერი უსიამოვნო ადამიანი იყო, მაგრამ არა საშიში. ვენერს ბრანდტი სუსტ პიროვნებად მიაჩნდა.

ამ ორი ლიდერის პიროვნული და ბიოგრაფიული სხვა-დასხვაობანი იმდენად დიდი გახლდათ, რომ არ შეიძლებოდა შექსპირისეული დრამატიზმით არ დაჯახებოდნენ ერთმანეთს. დემოკრატიაში საწამლავითა და ხანჯლით არ კლავენ. მაგრამ არსებობენ გამარჯვებულები და დამარცხებულები. გამარჯვება ჯერ ვენერის მხარეს იყო, რადგან ბრანდტს ვერ წარმოედგინა მისი უსაზღვრო უსინდისობა. საბოლოოდ ვენერი განადგურდა, როცა ტვინმა, მისმა ყველაზე ძლიერმა იარაღმა უმტყუნა და აღარ ემორჩილებოდა.

1973 წლის ოქტომბერში ვილი ენდო ვენერის არაგულ-წრფელ ბოდიშს მოსკოვში გამოსვლის გამო და გაიზიარა მისი თხოვნა, კიდევ ერთხელ ვცადოთო. ექვსი კვირაც არ იყო გა-სული, რომ ვენერმა პირობა დაარღვია და დაწერა დოკუმენტი, რომელშიც გერმანიის პოლიტიკის შესახებ ჰონეკერისადმი მიმართულ რჩევებს აყალიბებდა. დოკუმენტი იყო მისი პირადი ხელშეკრულება გდრ-ის პირველ კაცთან და ამით პოლიტიკური ცენტრი კანცლერის აპარატიდან ვენერ/ჰონეკერის გადაწყვეტილებების დონეზე ინაცვლებდა. ჩემს მეგობარს არასოდეს შეუტყვია ის შეურაცხყოფა, რომელიც მას ამ ქა-ლალდით მიაყენეს. მას არც ის გაუგია, რომ ვენერი ჰონეკერს ბარდებოდა, რადგან თავის დაწერილ დოკუმენტს „პოლიტიკურ ანდერძს“ უწოდებდა, რადგან „ბედს კაცისა, რომელიც პოლიტიკის წინა ფლანგზე მოღვაწეობს, სხვები განსაზღვრავენ“, თუკი ამ დოკუმენტს შესაბამისად გამოიყენებენ.

„მოსაზრებებში“, როგორც უწოდებდა თავის ჩანაწერებს, ბრანდტი საერთოდ აღარ ფიგურირებდა. ხოლო მოკლე ვერსია, რომელიც ვენერმა 1974 წელს მოუმზადა ჰელმუტ შმიდტს, აღარ შეიცავდა სახელწოდებას „პოლიტიკური ანდერძი“. მთლიანობაში ეს იყო თითქმის აღტაცებაში მომყვანი შედევრი ინტრიგისა, რომლითაც ვენერი ახალ ფედერალურ კანცლერს თავს წარუდგენდა ისეთ კაცად, რომელიც ყველაფერს მართავს. თუმცა, შმიდტი იმასაც მიხვდა ამ დოკუმენტიდან, რომ ვენერი ბრანდტის ზურგს უკან მოქმედებდა და ჰონეკერთან კონტაქტების შესახებ ინფორმაციას არ აწვდიდა. ამგვარად, ვენერი შმიდტს ჩაბარდა და ახალ კანცლერთან მჭიდრო კავშირი დაამყარა. მთელი ეს ამბავი მაშინ გაცხადდა, როცა გრეტა ვენერმა – მისმა გერმა და შემდეგ კი ცოლმა, ოცი წლის თავზე ეს დოკუმენტები გამოაქვეყნა. ჩვენ არაფერი ვიცოდით, მაგრამ ბრანდტს და მე ხშირად გვილაპარაკია, როდის და როგორ დაიწყო ეს ყველაფერი, რაც მერე ლალატში გადაიზარდა. ჩვენთვის „ბიძა“ აღარ არსებობდა.

ჯერ კიდევ ბონში, უურნალისტობის დროს, გავიცანი ახლოს ვენერი. მაშინ გადმომცა თავისი „ალსარების“ ასლი მოსკოვში გადასახლებაში ყოფნის პერიოდზე; კურტ შუმახერისთვისაც პქონდა მიცემული. კომუნისტების მშთანთქავად ცნობილმა სოციალ-დემოკრატიული პარტიის თავმჯდომარემ კომუნიტური პარტიის და კომინტერნის ფუნქციონერი მაშინ გაათავისუფლა ეჭვისგან, ფარულად ისევ ძველ რწმენას ატარებსო. ორმოცდაათი წლის შემდეგაც ვერ ამიხსნია, რას ელოდა ვენერი, როცა თავისი ალსარება გადმომცა. შესაძლოა, ფიქრობდა, რომ ამერიკელების სამსახურში ვიდექი და მის ნაწერს მათ გადავცემდი, რომ ჩემს უფროსებს მასზე ეჭვი გაჰქითოდათ. მართლა ასე თუ ფიქრობდა, ადამიანები ვერ სცნობია.

ბრანდტი და მე არ გამოვრიცხავდით, რომ სიკვდილის მუქარის ქვეშ მყოფ ვენერს თავად გაეწირა ადამიანები მოსკოვში.

ერთ რამეში ვთანხმდებოდით: მხოლოდ იმას აქვს უფლება, გააკრიტიკოს ვენერისნაირი ადამიანი, ვინც მზადაა, თავად გაიაროს მონამებრივი გზა ასეთ სიტუაციაში. გარდა ამისა, ვენდობოდით შუმახერის შეფასებას, რომ ვენერის გარდაქმნა სოციალ-დემოკრატად დამაჯერებელი იყო.

ბერლინში ბრანდტმა ჯერ კიდევ 1960 წელს მიამბო ვენერის მიმართ შინაგანი გაუცხოების შესახებ. მას სოციალ-დემოკრატიული პარტიის უილბლო თავმჯდომარეზე ერიჳ ოლენჰაუერზე უთქვამს: „ეგ უნდა წავიდეს“. თუკი ვენერს ბრანდტისთვის კბილის მოსინჯვა უნდოდა, მაშინ დაასკვნიდა, სუსტიაო. ერთხელ როდესაც შევნიშნე, ვენერი ანგარიშიანია და „ასე უსწავლია“-მეთქი, დავიტუქსე, ზედმეტი მოგდისო.

1960 წლის 30 ივნისს ბუნდესტაგში გამოსვლისას ვენერმა სოციალ-დემოკრატიული პარტია ადენაუერის მიერ დადებული ხელშეკრულებების პოზიციაზე დააყენა. ბრანდტი აღშფოთდა, „ჩვენი პარტიის გადაწყვეტილებებს არ შეესაბამებაო“. ერთი წლის წინათ გამოქვეყნებული „გერმანიის გეგმა“ მაკულატურად გვიქცია. „უარესი: არც შეუთანხმებია ჩემთან“. სოციალ-დემოკრატიული პარტიის პრეზიდიუმს მართლაც არ უმსჯელია ამ შორსმიმავალ ნაბიჯზე. „ყველაზე ცუდი კი ის არის, რომ იგი მართალია“. ამ ეპოქალური გამოსვლით ვენერმა შექმნა დიდი კოალიციის წინაპირობები. მისმა გამოსვლამ დაამტკიცა, რომ სოციალ-დემოკრატიულ პარტიას მხოლოდ ფედერალური მიწის დონეზე როდი შეუძლია მართვა. მაგრამ ვენერს არასოდეს ჩამოუყალიბებია საკუთარი კონცეფციები, არც გერმანიის გაერთიანების და არც სხვა მნიშვნელოვანი საკითხის შესახებ.

ვენერი ხელმძღვანელობდა, ბრანდტი კი მიჰყვებოდა. ეს აღარ უნდა განმეორებულიყო. მოგვიანებით, როცა ბრანდტმა კანცლერობაზე განაცხადა პრეტენზია, ვენერი დაემორჩილა. ახალ კოალიციას ბრანდტი ვენერისგან გათავისუფლებად აღიქვამდა. ვენერი ალბათ მიხვდა, სახელი და გავლენა რომ

დაკარგა. არა მგონია, რომ ეს დამარცხება ვილის როდესმე დაუვიწყა. გარკვეულწილად ლეთარგიას ჰგავს, რომ ბრანდტმა უყურადღებოდ დატოვა, როცა მეორე კაპინეტის ჩამოყალიბების მითითებები ვენერს პორტფელში „დაავიწყდა“ და ჰელმუტ შმიდტისთვისაც არ გადაუცია, ეს მითითებები შმიდტისთვის იყო განკუთვნილი.

ბრანდტი და მე ერთნაირად ვფიქრობდით, საბაზისო პრინციპების ხელშეკრულების დამთავრებამდე არ შეიძლებოდა ვენერს ოპერატიული კონტაქტი ჰქონოდა ჰონეკერთან. მაშინ ეს უკანასკნელი მე აღარ ჩამოვლიდა უფლებამოსილად. პრეამბულაში ჰონეკერისთვის ასე მძიმედ გადასატანი „ერის“ გარეშეც დაიდებოდა ეს ხელშეკრულება. იგივე ითქმის ქვეყნიდან გასვლის ნებართვაზეც. ვენერის ჰონეკერთან პირველ შეხვედრამდე ოპერატიული გავლენა არ იგრძნობოდა. მხოლოდ ამის შემდეგ დაიწყო მეორე მხარესთან მუშაობა, ოღონდ, უფრო საკუთარი თავისთვის. მისი კონცეფციის მთავარი იდეა იყო, ჰონეკერთან ერთად, მიეღწია გერმანიის გაყოფის დაუბრკოლებლად შენარჩუნებისთვის. დასკვნის სახით შეიძლება ითქვას: ვენერის პირველი შეხვედრა ჰონეკერთან, 1973 წლის 30 მაისს, იყო დასაწყისი იმისა, რაც მათ შორის ბრანდტის გადადგომამდე გათამაშდა ამ უკანასკნელის ზურგს უკან.

დღემდე საკვირველია, როგორ არ გავითვალისწინეთ მოსკოვიდან განმეორებით მიღებული ცნობები, ვენერი ბრანდტის შესახებ უდიერად ლაპარაკობსო. ამ ყველაფერს, კომუნისტურად მოაზროვნები, ალბათ ბონის სათავეში მოსვლისთვის ბრძოლად აფასებდნენ. „ახლა ვერაფერს გავაწყობთ“, ამბობდა ბრანდტი. ჰანს-იურგენ ვიშნევსკიმ მიამბო, ბერლინში, ვენერის ბინაში შემთხვევით მოვისმინე ჰონეკერს ტელეფონზე რასაც ეუბნებოდაო და ამის გამო სულ წუხდა: „მას შემდეგ, როგორც ბიძამ ილაპარაკა, უკვე აღარ ვიცი, არის თუ არა იგი ერთგულიო“.

შემოდგომა მტანჯველი და ულიმლამო გამოდგა. ახლადშე-ქმილმა გარემოს ფედერალურმა სამსახურმა გაითვალისწინა მთელი რიგი ქალაქებისა, მაგრამ ბერლინი არ გახსენებია. ოთხი გამარჯვებული ძალის შეთანხმების „განუხრელი დაცვისა და სრულად გამოყენების“ გათვალისწინებით, უმჯობესად მიმაჩნდა, რომ ეს სამსახური ბერლინში განთავსებულიყო. წინასწარ, რასაკვირველია, მოსკოვისა და აღმოსავლეთ ბერლინის თანხმობა დაგვჭირდებოდა. არ მეგონა, გენშერი კაბინეტის შესაბამის გადაწყვეტილებას მაშინვე თუ გაასაჯაროებდა. როგორც მოსალოდნელი იყო, აღმოსავლეთ ბერლინშა საშინელი აღშფოთებით გვიპასუხა. მოსკოვმა უფრო შეიკავა თავი. ბრეუნევმა შემოგვითვალა: „ადრე მოგივიდათ გასროლაა“. ამას დროში დაემთხვა საჯარო სამსახურის პროფკავშირების მოთხოვნა ხელფასების ორნიშნა ციფრით მომატების შესახებ, რომელიც ანგარიშგაუნევლად დააყენეს და ბრანდტმა ჩაილაპარაკა: „მოსკოვი, აღმოსავლეთ ბერლინიც კი შეიძლება უფრო გამოგადგეს, ვიდრე შენი საკუთარი ხალხი“. მაგრამ უკულოდ იბრძოდა. ფედერალური სამსახური მაინც გადავიტანეთ ბერლინში. მაგრამ ხალისი უკვე დაგვკარგვოდა.

გული გაგვინათა კანცლერის გადაწყვეტილებამ, შეგვეფარებინა სოლუსიუნიცინი, მიუხედავად მოსკოვის მუქარისა, რომ მოქალაქეობას ჩამოართმევდა. გემო ჩავატანეთ, რუსებივით ფორმალობებისა და კონტროლის გარეშე რომ გამოვიყვანეთ აეროპორტიდან და პირდაპირ ჰაინრიხ ბიოლთან მივაბრძანეთ. საელჩომ უზრუნველყო მისი ნაწერების ტრანსპორტირება, რადგან მათ გარეშე ვერ იმუშავებდა.

ნავთობის ფასის პირველი აფეთქება მოულოდნელად დაგვატყდა თავს. კაბინეტში ვილიმ დაუფიქრებლად ჰკითხა ეკონომიკის მინისტრს, ჰანს ფრიდრიხს, როგორ რეგულირდება ნა-

ვთობის ფასიო. მანაც ნაჩქარევად უპასუხა, არ ვიცი, მაგრამ შემდეგი სხდომისთვის გავიგებო. მერე კი აღიარა, ეს ნავთობის დიდი მწარმოებლების საქმეა და აბსოლუტურად გაუმჯვირვალეო. მეც არ დავახანე და გამოვაცხადე, პრობლემა არ არის, კისინჯერს დავურეკავ-მეთქი. კისინჯერმა რამდენიმე დღეში მაცნობა პასუხი, რომელიც ჩვენი ეკონომიკის მინისტრის ცნობას ემთხვეოდა. ამერიკის მთავრობაც კი ვერ ჭვრეტდა გლობალური კონცერნების გლობალური ნედლეულის გლობალური მართვის პორცესს. გამაოგნებელი იყო, რომ გერმანიის მთავრობამ სამ კვირაში შეცვალა კანონები და მანქანებისგან თავისუფალი ოთხი კვირა დღე გამოაცხადა. მულტინაციონალური საზოგადოებების ძალაუფლება ბადებდა ეჭვს დაპირისპირებული ძალის არსებობის შესახებ, რაც ორმოცი წლის შემდეგაც უპასუხოდ დარჩა.

„შპიგელმა“ ჩვენი მდგომარეობა 1973 წლის დეკემბრის მოწინავე სტატიაში ძალიან დამთრგუნველად, მაგრამ სწორად შეაფასა: „მონუმენტი ირყევა“. მიხაროდა, რომ ეს უსიხარულო წელი იწურებოდა და ბრანდტს ვკითხე, რას განიცდი, სამოცი წელი რომ გისრულდება-მეთქი. თბილად გამილიმა და მიპასუხა: „მნიშვნელოვანს არაფერს!“.

დაცემა

ახალი სტარტის აღების გადაწყვეტილებით დაბრუნდა შეფი 1974 წლის 24 აპრილს ეგვიპტიდან, სადაც სახელმწიფოს პრეზიდენტს ანვერ ას-სადათს შეხვდა. ფრენის დროს კაბინეტის გადახალისებაზე ვისაუბრეთ. გამხნევდა და 1976 წლის მომავალ არჩევნებამდე სახავდა გეგმებს. კიოლნ-ბონის აეროპორტში დაშვებამდე ბრანდტმა თავი გადაიქნია, „რამდენი ხალხი გვეგება, არადა ასეთი წარმატებისთვისაც არ მიგვიღწევიაო“.

შინაგან საქმეთა მინისტრმა, გენშერმა მისალმებისას აცნობა: „ამ დილით გიიომი დავაპატიმრეთ. უკვე აღიარა“. ეს ახალი ამბავი კანცლერის აპარატის უფროსის, გრაბერტისგან გავიგე და მაშინვე გამახსენდა ბარათი, რომელიც მის წინამორბედს ემკეს დავუწერე, როცა დამეკითხა, გეორგ ლებერი და ჰერბერტ ერნენბერგი ვინმე გიუნტერ გიიომის დანიშვნას მთხოვენ, მიუხედავად იმისა, რომ გდრ-იდან არისო. რასაკვირველია, არ ვურჩიე: „შეიძლება უსამართლოდ ვექცევით ამ კაცს, მაგრამ კანცლერის აპარატისთვის შეუფერებელია“, ემკეს აღარაფერი უთქვამს. საპაზისო პრინციპების ხელშეკრულების მოლაპარაკებების დასრულებამდე რამდენიმე დღით ადრე გიიომი ჩემს კაბინეტში გამომეცხადა. საიდუმლოებებს ველარ გასცემდა. ჩემი ბარათი საქმეში იდო, როგორც საქმის კეთილსინდისიერ წარმოებას შეეფერება. როდესაც ემკეს ეს ამბავი შევახსენე, მიპასუხა, შენი გაფრთხილების მიხედვით გიიომი ჩვენს სამ-

სახურებს, როგორც ჯერ არავინ, ყველანაირად შევამოწმებინე, რადგან უარყოფითი ვერაფერი ვერ უპოვეს, მიზეზი აღარ მქონდა, რატომ არ უნდა დამენიშნაო.

ბრანდტი და მისი გარემოცვა, ეტყობოდათ, სერიოზულად არ აღიქვამდნენ ამ საქმეს. მომდევნო დღეებში, ჩვეულებისა-მებრ იმართებოდა შეხვედრები. ჩვენ ამ ამბავს სენსაციად უფრო აღვიქვამდით, შესაძლოა, სკანდალად, მაგრამ არც სა-შიშროებად და არც კრიზისად. დღეების განმავლობაში არ გამოთქმულა სიტყვა „გადადგომა“. როდესაც იუსტიციის მი-ნისტრმა გერჰარდ იანმა ბრანდტს ძიების შედეგები შეატყობინა და უთხრა, გიორგი ამბობს, მასთან ქალები მიმყავდაო, ბრანდტ-მა გაიხუმრა: „ნეტავ რა გონიათ, რამდენი შემიძლიაო“. თვით საკონსტიტუციო კომისიის თავმჯდომარის, გიუნტერ ნოლაუს, ვენერის ნდობით აღჭურვილი პირის და იმასავით დრეზდე-ნელის, ძიების შედეგებზეც, მხოლოდ აღშფოთდა და იკითხა, კიდევ რას შეიძლება მოველოდეთ ამ ქვეყანაშიო. ამასობაში ჯაშუშობაში კი აღარ იყო საქმე, რომლის წინააღმდეგაც ჯერ არაფერი ჰქონდათ, რაც სასამართლოში გამოდგებოდა, არა-მედ მთავრობის მეთაურის პირადი ცხოვრების კვლევაზე. მას კი ლეთარგია მოსძალებოდა და მოგვიანებით გაკეთებულ „ჩა-ნაწერებში“ ამ ამბის გამო თავს იმუნათებდა.

ბრანდტის კაპინეტში შეელთან ერთად განვიხილეთ ვი-თარება. „ბატონო ფედერალურო კანცლერო, ჯაშუშობის ამ-ბავს ცალი ხელით ავლაგმავთ“. თავისუფალი დემოკრატები თქვენ გვერდით არიან. ახლა მეორე ხელიც გვჭირდებოდა. ვილის ვურჩიე, ყველაფერი იმაზეა დამოკიდებული, ვენერის უღალატო მხარდაჭერაში დარწმუნებული ვიქებით თუ არა და ჯერ ეს გავარკვიოთ-მეთქი. საკუთარი ფრაქციის უპირო-ბო მხარდაჭერის გარეშე კანცლერობას ვერ შეინარჩუნებდა. ეს კი მაისის დასაწყისში მიუნისტერაიფელში გადაწყდებოდა, სოციალ-დემოკრატიული პარტიის უმაღლესი დონის შეხვე-

დრაზე პროფესიულის ხელმძღვანელებთან. წინა საღამოს გაუსი და მე შეფს კაბინეტის გადახალისებაზე და აღმოსავლეთ ბერლინში მუდმივი წარმომადგენლობის გახსნაზე ვესაუბრეთ. მოგვიანებით ქუჩაში გავისეირნეთ და ყოველგვარი ხელსაჭიდი მიზეზის გარეშე ვიგრძენით, რომ ვილი დანებებას აპირებდა.

მიუნსტერაიფელში დაპირისპირებულთა შეხვედრას მონმეები არ ჰყოლია. სარწმუნო მხარდაჭერის სიტყვები ბრანდტს ვენერისგან არ მოუსმენია. არასასურველმა შედეგმა იმ ღამესვე გადადგომა გადააწყვეტინა. ფედერალური პრეზიდენტის სახელზე გადადგომის წერილი შინ დაწერა და წაუკითხა რუთს, რომელმაც მოუწონა: „სწორია. ვინმემ უნდა აიღოს პასუხისმგებლობა“. პირველი, რაც 6 მაისს მითხრა თავის კაბინეტში: „ყველაფერი დამთავრდა!“.

ვენერთან საუბრის ბოლოს ვილიმ დასძინა, ჯერ თქვენ მიდით ფრაქციაში. გზაში ვფიქრობდი, ვენერი რომ არა, ჩემი მეგობარი ისევ იმ ადგილას იქნებოდა-მეთქი. მოულოდნელად მკლავზე ვენერი შემეხო: „ახლა მჭიდროდ უნდა ვითანამშრომლოთ, კარგად დაფიქრდი, ჩვენი საერთო საქმის გამო“. მომეჩვენა, რომ უძირო უფსკრულში ვიყურებოდი. „ნუთუ თავისი უსინდისობის თანამზრახველად უნდა რომ გამხადოს?“ როდესაც ვილი ფრაქციის დარბაზში შემოვიდა, ვენერი, როგორც ასეთ დროს იციან ხოლმე, ყვავილების თაიგულით მიესალმა და დაიყვირა: „ჩვენ ყველას გვიყვარს ის!“. ცრემლი ვეღარ შევიკავე ამ ნაძირლობის და ფარისევლობის შემყურებმ. მხოლოდ ოცი წლის შემდეგ გავიგე, როგორ მივრცელებდა ტყუილებსა და ცილისწამებას ვენერი ჰონეკერთან. ეს, ალბათ, მაშინაც მშვენივრად ახსოვდა, როცა „ჩვენს საერთო საქმეში“ მჭიდრო თანამშრომლობა შემომთავაზა.

გადაწყვეტილების მიღების შემდეგ აღმოჩნდა ზოგიერთი, რომელთაც ვითომ თუ მართლა უნდოდათ ვილისთვის აზრი შეეცვლევინებინათ. ვიცოდი, რომ ეპოქა მთავრდებოდა. მეგობ-

რისადმი სიყვარულმა გადაწონა სახელმწიფოს წინაშე მოვალეობა. ვურჩიე, გადადგომის გადაწყვეტილებას ნუ შეცვლი-მეთქი. ახლა მის ხელში იყო ყველაფერი. სხვა შემთხვევაში არ მოასვენებდნენ, კუთხეში მიმზუდევდნენ, გაანადგურებდნენ. არ მიეცემოდა ამოსუნთქვის საშუალება. იმისგან გათავისუფლება, რასაც ორი წლის შემდეგ, „თვითკასტრირება“ უწოდა, უპირისპირდებოდა ფიქრს, რომ ვენერმა აჯობა. გადადგომი-დან რამდენიმე დღის შემდეგ მოინადინა შეეტყო, სინამდვილე-ში რა როლი ითამაშა ვენერმა. ეს ჩანს მის „ჩანაწერებში გ.-ს საქმის შესახებ“.

ჯერ კიდევ მაისის ბოლოს დაიწყო ვილიმ ჩანაწერების მოწესრიგება, რომელიც შემდეგ განავრცო. ამ ჩანაწერების ორმოც გვერდზე მეტი ადასტურებს, როგორ დაჟინებით ცდი-ლობდა გაერკვია, რამ გამოიწვია კანცლერობის იძულებითი დასასრული. გიორგის დაპატიმრებას იგი უყურებდა როგორც უწინდელი შეცდომების გამოაშკარავების მიზეზს. თვითკრი-ტიკულად აღიარებდა, რომ გამოეპარა და არაფერი იღონა გენშერის გროტესკულ თავხედობაზე, რომელმაც გიორგის დაპატიმრებამდე თითქმის ერთი წლის განმავლობაში ფედერა-ლური კანცლერი სატყუარად გამოიყენა. ვერაფრით იეჭვებდა საფუძვლიანად იმ კაცზე, რომლის გვარი „გ“-თი იწყებოდა, თანაც, როცა მასზე თვეების განმავლობაში არაფერი სიახლე არ მოუხსენებიათ. უსაფრთხოების სამსახურების გაუგონარ შეცდომას, აღარ ეთვალთვალათ ეჭვმიტანილისთვის, დაემატა თვით გიორგის აღიარება, დაპატიმრებისას რომ გამოაცხადა, გდრ-ის ეროვნული არმიის ოფიცერი ვარო. მტკიცებულებები მის წინააღმდეგ საქმის აღძვრას არ ეყოფოდა.

ბრანდტის „ჩანაწერები“ უმთავრესად უტრიალებს ეჭვს, იცოდა თუ არა ვენერმა პონეკერთან ამაღლების დღესასწაულ-ზე შეხვედრისას გიორგის შესახებ, რაც სავარაუდოდ ვეღარ დამტკიცდებოდა. სრულიად წარმოუდგენელია, რომ ვენერს

და ჰონეკერს, 24 აპრილს გიორგის სტატუსის გამოაშვარავების შემდეგ და ბრანდტის გადადგომამდე, მთელი ორი კვირის განმავლობაში, გახშირებული საუბრებისას არ ეხსენებინოთ ჯაშუში. უპასუხოდ რჩება კითხვაც, როდიდან იცოდნენ და არ გაუმხილეს ბრანდტს გენშერმა, ნოლაუმ და ვენერმა სახელი „გიორგი“.

ვიღის გადადგომის მეორე დღეს ბრეუნევმა სლავას დაარეკინა ჩემთან. გენერალურ მდივანს ლამის პირად შეურაცხყოფად მიუჩინევია, რომ ჰონეკერმა კრემლსა და ბონს შორის ურთიერთობების გაუმჯობესების შემდეგ ჯაშუში არ მოიშორა. ამას არ აპატიებსო. ბრეუნევმა საკუთარი ბინიდან, ლია სატელეფონო ხაზზე აგინა ჰონეკერსო. ბრანდტის გადადგომა მისთვისაც მძიმე დარტყმააო. ეს ევროპულ პოლიტიკას გაართულებსო. მაგრამ ვერ წარმომიდგენია, რომ დაგროვილი ნდობის კაპიტალი დაუდევრად მოვისროლოთო. ვიღიმ ლაკონიურად უპასუხა, ამ უმძიმესი მდგომარეობის ყოველ წამს მჯეროდა „თქვენი კეთილგანწყობისო“ და ანიც ვიმეგობროთო.

ერთი კვირის შემდეგ ბრეუნევმა დაუდასტურა, „ახალმა სიტუაციამ არ უნდა შეცვალოს ჩვენ ორს შორის არსებული კეთილი ურთიერთობები“. მას შემდეგ, რაც ორმა ქვეყანამ ბევრი საერთაშორისო პრობლემის გადაჭრის საერთო გზა გამონახა, იმედი მაქვს, ახალი ფედერალური მთავრობა იმავე ლირებულებების ერთგული დარჩებაო. ბრანდტმა დროებით შეწყვიტა მასთან მიწერ-მოწერა და დაარწმუნა, ფარ-ხმალს არ დავყრი და თავს არ დავიშურებ, რომ ჩემმა მემკვიდრემ უკლებლივ მიიღოს ყველა საუკეთესო გამოცდილებაო. გადადგომა „სამწუხაროდ, აუცილებელი იყო“. ეს არის ბრანდტის პირველი წერილობითი თვითშეფასება მარცხის შემდეგ. მაგრამ 1974 წლის მაისსა და სექტემბერს შორის გაკეთებული მისი „ჩანაწერები გ.-საქმეზე“ საპირისპიროსაც ცხადყოფს: რომ გადადგომა აუცილებელი არ იყო და ობიექტურად, მისი თავიდან აცილება შეიძლებოდა.

ბრანდტს მთელი ცხოვრების განმავლობაში მიაჩნდა, რომ ისტორია არ იცნობდა იძულებით გამოწვეულ შედეგს, და რომ

ყველაფერი ადამიანების ქმედებაზე იყო დამოკიდებული. ის, რომ ნამდვილად არსებულ შეთავაზებებს შორის ყველაფერზე პასუხისმგებელი კანცლერის როლი აირჩია, იცოდა, რომ მხოლოდ გადადგომამდე მიიყვანდა. რეალურად ეს არასწორი იყო, ქვეყნის ინტერესებისთვის არანაირად აუცილებელი და ევროპის ისტორიისთვის უსარგებლო.

ვამჩნევდი, როგორ ხანგრძლივად აწვალებდა ეს პრობლემა ამ თვითურიტიკულ ადამიანს, როცა წლების შემდეგ, მარკუს ვოლფის, გდრ-ის ჯაშუშური ქსელის შეფის წერილი მივიღე. იგი აღწერდა, რომ მას არასდროს ჰქონია უფლება ჰონეკერის-თვის გიორმის პრობლემის შესახებ მოეხსენებინა. ეს მიღკეს პრივილეგია იყო. გიორმი მისთვის, ვოლფისთვის, წარმოადგენდა ყველაზე დიდ მარცხს, რომლის გამოც ძალიან წუხდა. მე მომანდო, მეთქვა ბრანდტთან მის აღსარებაზე. ვილის რეაქცია ასეთი იყო: „ახლა ეს აღარაფერში გამომადგება“.

კიდევ უფრო მოგვიანებით – უკვე ჰამბურგის მშვიდობის კვლევის ინსტიტუტის სამეცნიერო დირექტორად რომ ვმუშაობდი – ფალინმა მკითხა, რომელიც 1992 წელს, ჩემი მოწვევით, ორი სემესტრის განმავლობაში მუშაობდა ინსტიტუტში და აუგშტაინის ბინაში ცხოვრობდა, მარკუს ვოლფთან შეხვედრა ხომ არ გინდაო. მინდოდა; თუნდაც იმიტომ, რომ გამეგო, ჰონეკერმა იცოდა თუ არა გიორმის შესახებ. „ეს მეც მაინტერესებს“, იყო ბრანდტის რეაქცია. ფალინმა მითხრა, სტალინიდან გორბაჩოვამდე (!) ყველა გენერალური მდივანი პირადად ზრუნავდა მაღალი კატეგორიის ჯაშუშების ბეჭზე. რადგანაც მიღკეს აპარატი კგბ-ს შექმნილი და შვილობილი იყო, დავასკვენი, რომ ჰონეკერმა მოიტყუა, როცა მერე განაცხადა, გიორმის შესახებ არაფერი ვიცოდიო.

ვილიმ თავისი „ჩანაწერები“ მოულოდნელად ასეთი შენიშვნით დაასრულა: „შეხვედრა შორთჰაიდეში 1973 წლის მაისის ბოლოს: ვენერი, ჰონეკერი, მიშნიკი“. სწორ გზაზე იდგა.

რაც ვოლფმა მიამბო, ბრანდტს აღარ გაუგია. გიიომი, ნორვეგიიდან უკან რომ ბრუნდებოდა, სადაც ვილის გაჰყვა შვებულებაში პირადი რეფერენტის რანგში და სადაც მოიპოვა წვდომა საიდუმლო დოკუმენტებზე, ჯგუფს დაშორდა და დოკუმენტების ასლებით სავსე ჩემოდანი კურიერს გადასცა. კურიერი მიხვდა, რომ უთვალთვალებდნენ და ჩემოდანი მდინარე რაინში ჩააგდო. მასში არსებული საიდუმლოებები აღმოსავლეთ ბერლინმა და დანარჩენმა მსოფლიომ მხოლოდ დიუსელდორფის მიწის სასამართლო პროცესზე გაიგო, რომლის დროსაც ბრალდებული გიომი დუმდა. ანეკდოტია: სასამართლომ უნებურად გასცა საიდუმლოება.

*

ვილის 1978 წელს სისხლის მიმოქცევის კოლაფსი დაემართა და საავადმყოფოში მოათავსეს. როგორც რუთი მიყვებოდა, ექიმი ანალიზებზე დაყრდნობით ვარაუდობდა, რომ ნოემბრის დასაწყისში, ამერიკაში მოგზაურობისას, შესაძლებელია, ინფარქტი გადაეტანა ფეხზე. საავადმყოფო ძალიან თავშეკავებულად და ტაქტიანად აგვარებდა ლოჯისტიკურ პრობლემებს, რომელიც ვილისა და ბრიგიტე ზეებახის მჭიდრო მეგობრობას ახლდა თან. მოგვიანებით ბრიგიტესთან ერთად გაემგზავრა საფრანგეთის სამხრეთში დასასვენებლად. იქ შევხვდი, შეფერთხილს და გარუჯულს. სეირნობისას მომცა წერილი რუთისთვის და მთხოვა, გადაეციო. განქორნინება არ სურდა და რუთს სთხოვდა, უარი არ ეთქვა. რუთმა წერილი წაიკითხა და მკითხა, თუ იცი, რა მომწერაო და როგორც კი ვუპასუხე, ვიცი-მეთქი, მაშინვე მტკიცედ და გადაჭრით თქვა: „არა, მე მას გავეყრები“.

შმიდტი და ბრანდტი

1974 წლის შობაზე ვილიმ მომწერა: „საშინლად რთული წელინადი გვქონდა, შენ ერთ-ერთი უმცირესთაგანი ხარ, ვინც დაახლოებით იცი, ჩემთვის რას ნიშნავდა ეს წელი – სრულად მგონი ჯერ თვითონაც რომ ვერ აღმიქვამს“.

ახალი კანცლერი ბრანდტის, ვენერის და შმიდტის სამეულში ყველაზე უმცროსი გახლდათ. ვერცერთი ვერ იჭანდა და-სახელებას „ტროიკა“ და არა მხოლოდ იმიტომ, რომ სამკუთხედის ურთიერთობები ყოველთვის რთულია. თითეული მათგანი ძლიერი, განუმეორებელი პიროვნება იყო. მათ ერთმანეთთან პარტიისადმი ერთგულება აერთიანებდათ. ამ სამი ადამიანის გარეშე ქვეყანაში და ქვეყნისათვის ძალაუფლება ვერც გაიზრდებოდა და ვერც შენარჩუნდებოდა.

სამივე მათგანი სუფთა სინდისით იხედებოდა უკან, საკუთარი წარსულისკენ, თუმცა ვენერსა და ბრანდტს სამარცხვინო, შიდა პოლიტიკით მოტივირებული თავდასხმები არ დაჰკლებიათ, რის თავიდან აცილებასაც შმიდტი ცდილობდა. ებრაელი ბაბუა რომ ჰყოლია, პირველად მისი მეგობრის, უისკარ დ ესტენისგან გავიგეთ. იგი თავის მოგონებებში ყვებოდა იმ ხანმოკლე კოლაფსის შესახებ, შმიდტს პარიზში რომ დაემართა. შეეძინდა, ვკვდებიო და საფრანგეთის პრეზიდენტს გული გადაუშალა. შმიდტის თანხმობით უისკარის მიერ ამბის გახმაურებას ჩვენთან დიდი რეზონანსი არ გამოუწვევია. კან-

ცლერსაც არ ენდომებოდა თავისი ბიოგრაფიის დაკავშირება ანტისემიტიზმთან, ამ უსასრულო თემასთან.

1974 წელს ბრანდტის გადადგომით დასრულდა სტრუქტურა, რომელიც პარტიის თავმჯდომარეობას და მთავრობის მეთაურობას ერთ პიროვნებაში აერთიანებდა. გაყოფილი ფუნქციები განსხვავებულ პასუხისმგებლობას ქმნიდა. წონასწორობის შენარჩუნების ხელოვნების ათვისება ბრანდტსა და შმიდტს ჯერ წინ ჰქონდათ. თავმჯდომარე პარტიის საქმეებს უძლვნიდა მთელ თავის ძალისხმევას, უძველეს პარტიას ნებისმიერ მთავრობაზე დიდხანს უნდა ეარსება. ფედერალური კანცლერი კი ბუნდესტაგის მომავალ არჩევნებზე ზრუნავდა – არჩევნებში მთავარი კანცლერია. ორივე მართალი იყო და, აქედან გამომდინარე, დაძაბულობის დაბალანსება ყოველთვის არ გამოსდიოდათ.

საგარეო პოლიტიკის სფეროში ეს შედარებით იოლი აღმოჩნდა. შმიდტმა თავისებური, მისთვის დამახასიათებელი ურთიერთობა ჩამოაყალიბა მოსკოვთან. ბრეუნევს წერილებს თვითონვე სწერდა და ლეოსაც უშუალოდ ესაუბრებოდა. შედეგად, ლეო შმიდტს უფრო დიდხანს ელაპარაკებოდა ხოლმე, ვიდრე ბრანდტს. ძალიან მოულოდნელი აღმოჩნდა ჩემთვის, როდესაც, ერთ-ერთი შეხვედრისას, შმიდტმა უცებ იკითხა, თანახმაა თუ არა მოსკოვი, რომ ფედერაციულმა რესპუბლიკამ თავისი სავალუტო რეზერვების ნაწილი ნიუ იორკიდან მოსკოვში გადაიტანოს. მანამდე საბჭოთა კავშირის ხელმძღვანელობისთვის ასეთი მოუმზადებელი კითხვები არ დაგვისვამს. შმიდტი დასტურს მოელოდა, მაგრამ შემდეგ შეხვედრაზე უპასუხეს, ჯერ ადრეაო. მარტო რომ დავრჩით, ვკითხე, ასეთი ნაბიჯის გადადგმა ფედერალური ბანკის პრეზიდენტის, კარლ პიოლის უკითხავად თუ შეიძლებოდა-მეთქი. შმიდტმა დამამშვიდა, ამაზე არ იღელვოო. მხოლოდ ორი შეხვედრის შემდეგ გადმომცა ლეომ გენერალური მდივნის შეკითხვა, თუ დაგეთანხმებით,

რას უნდა ველოდეთ, მე არ დამიძალებია კანცლერისთვის ამ კითხვის დასმაო. ამის თაობაზე შემდგომში არცერთ მხარეს აღარ ულაპარაკია.

1978 წელს ბონში მეორე ვიზიტისას, ბრეუნევს უკვე აშკარად ეტყობოდა ფიზიკური და ენობრივი შეზღუდვები. იგი დაეთანხმა შმიდტის მეგობრულ მიპატიურებას ჰამბურგში, მის მყუდრო სახლში. საუბრისას შმიდტმა აღნიშნა, თქვენ არა-სოდეს მომიტყუებიხართო. კეთილი განზრახვა ჰქონდა და მოსკოვისთვის ეჭვის გაფანტვას ისახავდა მიზნად, მათ აინტერესებდათ, მართლა აპირებდა თუ არა კანცლერი აღეკვეთა ევროპაში ახალი ამერიკული რაკეტების განთავსება. მაგრამ სიტყვა „მოტყუებას“ ბრანდტის დროს არასდროს არ ვიხმარდით, გაფაციცებულ რუსებს ეს არ გამოჰქონიათ.

ბრანდტისა და ბრეუნევის კარგი ურთიერთობები „ხელს არავის უშლიდა“. ნდობის ატმოსფერო ისევ სუფევდა მათ შორის, ვილი კმაყოფილი იყო, კანცლერის „არხს“ ისევ მე რომ წარვმართავდი. შმიდტი დაარწმუნა, ჩემთვის გადმოებარებინა განვითარების დახმარების სამინისტრო. „საქმეს არ ავნებს, თუ ზრდასრული ადამიანი ჩაიბარებსო“. 1976 წელს, როდესაც ჰოლგერ ბოირნერი ვისპადენში გაამწესეს, პარტიის თავმჯდომარე და კანცლერი შეთანხმდენენ: მე უნდა გავმხდარიყვი ფედერაციის საქმეთა მნარმოებელი. უხალისოდ დავემორჩილე, თუმცა, მათ გამოცდილებაზე მეტყველებდა, რომ ჩემს ერთგულებას ენდობოდნენ. 1980 წლამდე საკანონმდებლო ვადის საარჩევნო კამპანიის მომზადება გადავიბარე. მერე კი, ის სამინისტრო აირჩიე, რომელიც გინდაო, შემპირდა შმიდტი. ასე აღმოვჩნდი მე, უბრალო კაცი, ორ წინასწარმეტყველს შორის. კანცლერის აპარატში სახელმწიფო მინისტრის თანამდებობაზე რეკომენდაცია ჰანს-იურგენ ვიშნევსკის გავუნიე, რათა თავიდან ამეცილებინა პარტიასა და მთავრობას შორის დაძაბულობა, თუმცა ყოველთვის არ ხერხდებოდა.

საგარეო პოლიტიკის სფეროში, ყველგან, სადაც საშინაო და საგარეო პოლიტიკა იკვეთებოდა და სხვადასხვა ინტერესები ეჯახებოდა ერთმანეთს, იშვიათი არ იყო გაღიზიანება და კონფლიქტები. შემთხვევით არ ხდებოდა, რომ პარტიის თავმჯდომარესა და კანცლერს განსხვავებული პრიორიტეტი ჰით ჰქონდათ. ამას ემატებოდა საკოალიციო პარტნიორის ფაქტორი. პანს-დიტრიხ გენშერს სურდა გამხდარიყო პირველი საგარეო საქმეთა მინისტრი, რომელსაც ოპოზიციაც დაუჭერდა მხარს. მოგვიანებით, როცა „ქდე/ქსკ გაერთიანებასთან იყო კოალიციაში, მაშინაც ამას ცდილობდა. ჩვენ კი „განმუხტვის რეალისტური პოლიტიკის“ აუცილებლობაზე გვესაუბრებოდა, „გაერთიანების“ პარტნიორი რომ გახდა, მერე „განმუხტვის პოლიტიკის განვრძობითობას“ უსვამდა ხაზს.

1981 წლის აპრილში, როდესაც კანცლერი საუდის არაბეთი-დან დაბრუნდა, კოალიციის ვიწრო წრეში ითქვა, რომ შმიდტი საუდის არაბეთისთვის, სხვა იარაღთან ერთად, ლეოპარდის ტიპის ტანკების მიყიდვის ვალდებულებას გრძნობდა. გენშერს არც კი უთქვამს და არც – არა. მე სოციალ-დემოკრატიული პარტიის გადაწყვეტილებები შევახსენე, რომელიც დაძაბულობის რეგიონებში იარაღის მიწოდებას კრძალავდა. გენშერმა აღნიშნა, ეს საქმე გადავდოთ, სანამ სოციალ-დემოკრატი მეგობრები შიგნით გარკვეულანო. ბენინგვალედ ვიმოქმედეთ: კანცლერისთვის არ გვიწყენინებია, ისე დავასრულეთ საუბარი და დავასამარეთ თემა. გენშერი შმიდტთან მიმართებაში არა მხოლოდ ტაქტიკურ უპირატესობას ავლენდა, არამედ დიდ დიპლომატიურ ნიჭსაც, რაც ქვეყანას გაერთიანების წინა პერიოდში ძალიან წაადგა. ადრევე მიხვდა, გორბაჩოვს უნდა ვენდოთ და მხარი უნდა დავუჭიროთო, მერე დასავლეთში ამ პოზიციას აგდებით „გენშერიზმი“ უწოდეს. გენშერის ფაქტორი მეტს იწონიდა, ვიდრე მისი პარტია.

უსაფრთხოების თემაშიც ძალთა მსგავსი გადანაწილება წარმოიშვა. ბრანდტი უშურველად აღიარებდა შმიდტის უპირატესობას სტრატეგიულ საკითხებში. როდესაც შმიდტი 1979 წლის დასაწყისში გვადალუპის არაფორმალური სამიტიდან დაბრუნდა და ვიწრო წრეში იქ განხილული ნატოს ორმაგი გადაწყვეტილება განმარტა, სკეპტიკურად განწყობილმა პარტიის თავმჯდომარებ ხაზი გაუსვა, წინაპირობად საბჭოთა კავშირთან გულახდილი მოლაპარაკებები არ დაგვავიწყდეს, სანამ კანცლერი გერმანიის მიწაზე ამერიკის საშუალო მანძილის რაკეტების განლაგების თანხმობას განაცხადებსო. ეს უკვე სულ სხვა ამბავია, რომ გენშერმა 1982 წლის შემოდგომაზე ისე იმოქმედა, თითქოს სოციალ-დემოკრატიულ პარტიას კანცლერისთვის შეიარაღების საქმეში მხარდაჭერა არ გამოეცხადებინოს, მაშინ, როცა სინამდვილეში თავის ახლო მებობარ ჰელმუტ კოლთან ერთად უკვე შეთანხმებული იყო ახალ კოალიციაზე. შმიდტი გენშერს ყოველთვის უყურებდა, როგორც ბრანდტის არცთუ სასიამოვნო დანატოვარს.

ბრანდტს შეეძლო პარტიის თავმჯდომარეობის პარალელურად კანცლერიც ყოფილიყო; შმიდტმა იცოდა, რომ პარტიის თავმჯდომარის რანგში ერთობას ვერ შეინარჩუნებდა. ჩემი თანდასწრებით დაადასტურა, როდესაც ვილი კანცლერის ახალ აპარატში ეწვია. ბრანდტის მკაცრი სტილის გამო ბევრი ჩიოდა, ამიტომ მასაც მოუწია დაფიქრება დისციპლინის შერბილებაზე. ბრანდტი უყვარდათ, შმიდტს პატივს სცემდნენ.

ფედერაციის საქმეთა მწარმოებლის რანგში პროგრამა სოციალ-დემოკრატიული პარტიის მთავარი მოთხოვნით განვამტკიცე. თითეულ ადამიანს უნდა შეეძლოს თავისი უნარების ღირსეული განვითარება. კმაყოფილი ვიყავი; ამ დროს წავიკითხე ტელეგრაფის ცნობა, ნატომ ნეიტრონის ბომბის შემოღება გადაწყვიტა. ეს ბომბი ადამიანებს დახოცავდა, მაგრამ ხიდებსა და შენობებს არ დააზიანებდა. ეს ადამიანურ

ღირსებას ეწინააღმდეგებოდა. უურნალ „ფორვერტსისთვის“ დავწერე და აღშფოთება გამოვხატე სტატიაში – „აზროვნების გარყვნილება“, რომელიც ბრანდტს ვაჩვენე. მითხრა, ხვალამდე მოიცადეო. როდესც სტატია გამოქვეყნდა, ფედერალურმა პრეზიდენტმა შეელმა დამირეკა და მირჩია, აზრს ნუ შეიცვლი, მიუხედავად იმისა, რომ ვერაფერს მიაღწევო. კანცლერისთვის ამას უსიამოვნება უნდა მოეტანა. მაგრამ შემდეგ პრეზიდენტმა კარტერმა დაგეგმილ ნეიტრონულ იარაღზე ხელი აიღო, რამაც მის მიმართ შმიდტის კრიტიკული განწყობა დამატებითი არგუმენტებით გაამყარა. ჩემი სტატიის გამო კანცლერს საყვედური არასოდეს გამოუთქვამს.

კაბინეტის წევრი რომ გავხდი, შმიდტსა და ბრანდტს შორის განსხვავებები აღმოვაჩინე ხელმძღვანელობის სტილში. შმიდტი ცალკეული თემების მიმართ თავის პოზიციას გამოხატავდა და მაინცდამაინც კმაყოფილი არ იყო, როცა გენშერის ელეგანტურობის წყალობით შეცვლა უწევდა – ასეთი იყო მისი მართვის სტილი. კაბინეტის სოციალ-დემოკრატი წევრები თავს გრძნობდნენ სახელმწიფო მდივნის როლში, მათ კოლეგებს თავისუფალი დემოკრატების პარტიიდან კი სრულფასოვანი მინისტრებივით ექცეოდნენ. სხდომები ნელ-ნელა შემოკლდა. შმიდტიც, ბრანდტივით, ბოლოში იკითხავდა ხოლმე, კარგი ანეკდოტი ვინ იცითო. ბრანდტი კოლეგებს ალაპარაკებდა და ბოლოს ავლენდა თავის განსაცვიფრებელ უნარს, ჩამოეყალიბებინა დასკვნა, რომელსაც მერე ყველა ეთანხმებოდა, როგორც გადაწყვეტილებას. ეს იყო მისი ხელოვნება – ინტეგრაცია ძალდაუტანებელი მართვის გზით.

პარტიის გამგეობის სხდომებზე შმიდტი სქელი საქალალდეებით ცხადდებოდა, დოკუმენტებს ამუშავებდა და „მოსაწყენლაქლაქში“ არ ერეოდა. როდესაც 1983 წელს, არჩევნებში დამარცხების შემდეგ, ბრანდტმა პარტიის ახალი პროგრამის მომზადების იდეა გაიტანა, შმიდტმა ეს ზედმეტად მიიჩნია. „გაერ-

თიანებისა“ და თავისუფალი დემოკრატებისგან განსხვავებით, რომელთაც პროგრამა საერთოდ არ სჭირდებოდათ, დისკუსიის პროცესი სოციალ-დემოკრატიულ პარტიას ინტეგრაციისა და საკუთარ თავში დასარწმუნებლად აუცილებლად ესაჭიროებოდა. შედეგი გაცხადდა 1989 წელს, ბერლინის კედლის დანგრევის შემდეგ, ქვეყნის სრულიად შეცვლილ ვითარებაში.

1979 წლის ბოლოს სლავამ დამირეკა, კანცლერისთვის მნიშვნელოვანი და სასწრაფო ამბავი მაქვსო; შმიდტს ბრა-მის ტბაზე, აგარაკზე მივაგენი. შობის წინა დღეები იყო და მწყრალად შემხვდა. ლეოს ფლენსბურგში დავხვდი და შმიდტ-თან მივიყვანე. იქ გვიამბო: „ავღანეთში შევედით. ერთი ერთეული დაეშვა აეროდრომზე და სასახლეზე მიიტანა იერიში. უკვე ყველაფერი მომთავრებულია. ხელისუფალი ამინი მკვდარია. მემკვიდრე უკვე დანიშნულია. ამერიკელებმა ალბათ უკვე დიდი ხანია იციან“. შმიდტმა უპასუხა, კარგა ხანი დასჭირდება, სანამ ვითარება ჩაცხრება და გამოჩნდება, რა მდგომარეობაშია მსოფლიო. ბრეჟენევს ჩვენი არხით მადლობა შეუთვალა დროული შეტყობინებისთვის. როდესაც მარტო დავრჩით, აშკარად დაძაბულმა მითხრა: „ჩვენი მეგობრებისგან არაფერი შემიტყვია. ვნახოთ, ერთი, როდის გამოჩნდებიან“. რამდენიმე კვირის შემდეგ, სახელმწიფო დეპარტამენტში სტუმრობისას, თავიანთი უცნაური ქცევა ამერიკელებს სულაც არ აუხსნიათ. ამაზე ვილის კომენტარი: „მიკვირს, რომ გიკვირს“.

წესით, საარჩევნო კამპანია პარტიის ცენტრალური ოფი-სიდან უნდა იმართებოდეს, მაგრამ მნიშვნელოვანი გადაწყვეტილებების მიღება კანცლერის აპარატში გარდაუვალი იყო. 1980 წელს არჩევანი შმიდტსა და შტრაუსს შორის მაინცდა-მაინც ძნელი არ უნდა ყოფილიყო. ჩვენი სტრატეგიის პირველი საყრდენი იყო ჰელმუტ შმიდტი. მეორე საყრდენად შეგვეძლო გვეღიარებინა ცოდნა, თუ როგორ ხორციელდება განმუხტ-ვის პოლიტიკა. მაგრამ შემდეგ, პოლონეთში დაძაბული მდ-

გომარეობის გამო, კანცლერმა პონეკერთან შეთანხმებული შეხვედრა გააუქმა. რადიოთი შევიტყვე ამის შესახებ. შტრაუს-მა ყიუინა დასცა და განმუხტვის ეიფორიის მარცხი გვამცნ. პირველი საყრდენი 0,3 პროცენტით მეტს თუ მოგვიტანდა წინა არჩევნებთან შედარებით.

არჩევნების დღემდე ორი კვირით ადრე ვილის სამგვერ-დიანი ხელნაწერი მივიღე, იგი თავს გარიყულად გრძნობდა: „თავმჯდომარისა და შენი მონაწილეობით დაგეგმილი პრეს-კონფერენცია რომ კანცლერისა და შენი გამოსვლით შეიცვალა, საარჩევნო კამპანიის შტაბის ჩანაწერიდან გავიგე“. კაცი, რომელსაც არჩევნები ერთხელ უკვე მოეგო, თავს დავიწყებულად გრძნობდა, პლაკატებსა და სატელევიზიო რეკლმებშიც. „5 ოქტომბრის შემდეგ პარტიამ უნდა გადაწყვიტოს, მოხელეს ან რეფერენტს მეტი უფლება აქვს თუ თავმჯდომარეს. თუ საჭირო გახდა, პარტია გაარკვევს ... ძვირფასო ეგონ, რომ არ მეთქვა, არ შემეძლო, შენი ვ.“. ჩემმა მეგობარმა მთელი უკამაყოფილება ჩემზე გადმოანთხია. აბა რა უნდა ექნა? ეს წერილი აღარასდროს უხსენებია. ასეთი იყო ვილი: ემოციური, კორექტული ბოლმას გულში რომ არ ჩაიხვევდა.

1981 წელს ჰელმუტს მსუბუქი კოლაფსი დაემართა. შეწყვეტილი საუბრის გაგრძელება მოვინდომე. დიდი და დამფრთხალი თვალებით მიყურებდა. რამდენიმე წუთი უგონოდ ვიყავი, მოკლე მეხსიერების აღსადგენად საბუთებს ვკითხულობ და თავიდან ვსწავლობო. მაშინვე ვილის შევატყობინე და დავძინე: „თუკი პასუხისმგებლობით აღსავსე ჰელმუტი ამას ვერ დადლევს, გადადგება“. ვილიმ მიპასუხა: „ვნახოთ, უქმეების მერე გამოჩნდება“.

ჩემმა მეგობარმა გიუნტერ ფერპოიგენმა, ამჟამად დასუსტებული თავისუფალ-დემოკრატიული პარტიის გენერალურმა მდივანმა, შეწუხებულმა მითხრა, ჩვენი პარტიის თავმჯდომარეებმა თავიანთი გართულებული ურთიერთობა

აუცილებლად უნდა მოაგვარონო. „თუ ვერ მოახერხებენ, კოალიცია დაიშლება“. დავამშვიდე, ახალი წლის დღეები უშფოთ-ველად გადაივლის და მერე ვილაპარაკოთ-მეთქი. თუმცა ამაზე ლაპარაკი საჭირო აღარ აღმოჩნდა. 1982 წლის სექტემბერში კოალიცია დაიშალა.

წლების მერე გაირკვა, რომ ბრანდტი თავის მოგონებებზე მუშაობდა. შმიდტისგან მიიღო წერილი, რომელიც წამაკითხა. „უნდა, რომ ჩემთან კინკლაობა მოამთავროსო“, იხუმრა. მართლაც უნდოდა. ვიღის სიკვდილის შემდეგ ფრიდრიხ ებერტის ფონდი დიდხანს ეხვეწებოდა უკვე ოთხმოცდაათს მიღწეულ შმიდტს ბრანდტთან მის ურთიერთობაზე ელაპარაკა. იგი პასუხობდა, საამისო ძალა აღარ შემწევსო, მაგრამ მზად ვარ ამ თემაზე გამოცდილების მქონე რომელიმე პიროვნებას ვე-საუბროო და ჩემი გვარი დაუსახელებია. ლიუბეკში ჩატარებული ღონისძიება ისტორიულზე მეტად სახალისო გაკვეთილად იქცა, არც ნატოს ორმაგ გადაწყვეტილებაზე დაგვიხუჭავს თვალი. „We agree to disagree“ – შეიძლება ითქვას დასკვნის სახით. ჩვენ ისევ შეგვეძლო თვალი გაგვესწორებინა ერთმანეთისთვის.

როდესაც ვიღიმ საბოლოოდ მიგვატოვა, ჰელმუტ კოლისადმი ჩემი პატივიცემის მიუხედავად, ჰელმუტ შმიდტი გახდა გერმანიაში „დიდად აღიარებული სახელმწიფო მოღვაწე“, რომელსაც არა მარტო პატივს სცემდენენ, არამედ შეიყვარეს კიდეც.

მეოთხე ნაწილი – ორგანიზაციები

ახალი დასაწყისი

ეკონომიკური თანამშრომლობის ფედერალურ მინისტრად რომ წარმადგინა, ახალმა კანცლერმა დიდსულოვნად მირჩია: „რაც გინდა, ის აკეთე, ოღონდ არ გამაპრაზო“. განვითარების მინისტრს, როგორც მას შემოკლებით უწოდებდნენ, თანამდებობით ეკუთვნის მსოფლიო ბანკის მმართველი საბჭოს წევრობა. მსოფლიო ბანკის შეფი რობერტ მაკნამარა ბოლოს სამოციან წლებში ვნახე, ვილისთან ერთად, პენტაგონში. მაშინდელმა თავდაცვის მინისტრმა ოპტიმისტურად დაგვიხატა ვიეტნამში ამერიკელების სტრატეგია. ახლა პოზიცია შეეცვალა და დამაჯერებლად ზრუნავდა ყველა ღარიბ განვითარებად ქვეყანაში მოსახლეობის ყოფა-ცხოვრების გაუმჯობესებაზე. მსოფლიო ბანკის ყრილობის ფარგლებში შევხვდი რობერტ მაკნამარას. ჯერ ჰიმალაიში დაუვიწყარი მოგზაურობის შესახებ მიამბო, მერე კი თავისი იდეა გამაცნო: გაეროს დამოუკიდებელი კომისიის შექმნას ვგეგმავ, რომელმაც სილარიბის დაძლევის კონცეფცია უნდა შეიმუშავოს, სულ ცოტა, მსოფლიოს ამ დაუძლეველი პრობლემის გადაჭრის საორიენტაციო გზაზე. ამ კომისიის საუკეთესო თავმჯდომარედ ვილი ბრანდტი მესახებაო. წეტა თუ დათანხმდებაო?

ბონში რომ დავბრუნდი და ვილის ვაცნობე, დიდად არ გახარებია, რადგან საქმეში საკმარისად გარკვეული არ იყო. ვუთხარი, მთელი ჩემი სამინისტროს კომპეტენცია შეგიძლია გამოიყენო-მეთქი და ასე გავუქარწყლე ეჭვები. მისი თანხმობა ერთმანეთის შემავსებელ ორ მოსაზრებას ეყრდობოდა. ერთი

მხრივ, სულაც არ იყო მიმზიდველი, მხოლოდ სოციალ-დე-მოკრატიული პარტიის თავმჯდომარის რანგში უკანა ხაზიდან გაეძლიერებინა კანცლერი და მეორე მხრივ, მომხიბვლელად ესახებოდა, ემოგზაურა მესამე სამყაროს ქვეყნებში და ახალ პრობლემებსა და ადამიანებს გასცნობოდა.

ჩრდილოეთ-სამხრეთის კომისიამ ბრანდტი მესამე სამყაროს მხურვალე ადვოკატად აქცია. წევრებს უნდა მოეგვარებინათ ჩრდილოეთსა და სამხრეთში მათი წარმომადგენლების ინტერესებს შორის დაპირისპირება. დასავლეთს, სხვათა გვერდით, ბრიტანეთის ყოფილი პრემიერი ედვარდ ჰეთი და შვედი ოლოფ პალმე წარმოადგენდნენ. კომისიაში ამერიკელებიც მონაწილეობდნენ, საბჭოთა კავშირი კი გაემიჯნა. ბრანდტმა ბრეჟნევთან თავისი კონტაქტების წყალობით მიაღწია, რომ მოსკოვის მსოფლიო ეკონომიკის და საერთაშორისო ურთიერთობების ცნობილ ინსტიტუტს კომისიის ექსპერტები მაინც მიეღო. საბჭოთა მეცნიერები საერთაშორისო დისკუსიებში მონაწილეობას იღებდნენ და ხშირად გამოხატავდნენ წუხილს, რომ მათი მთავრობა თანამედროვე მიღწევების უკან მიჩანჩალებდა. მხოლოდ 1980 წელს უსაფრთხოებისა და განიარაღების თემაზე შექმნილ პალმეს კომისიაში მიავლინა მოსკოვმა მონაწილეები.

ჩრდილოეთ-სამხრეთის კომისიის სხდომებში, რომელთაც მე სტუმრის სტატუსით ვესწრებოდი, შეიარაღებაზე გამოყოფილი უზარმაზარი თანხების შემხედვარე სამხრეთის წარმომადგენლები პრიორიტეტად სილარიბის წინააღმდეგ ბრძოლის გამოცხადებას ითხოვდნენ. დიდი ძალისხმევა დასჭირდა მათ დარწმუნებას, რომ მესამე მსოფლიო ომის თავიდან აცილება უფრო დიდი პრიორიტეტი იყო. მხოლოდ მაშინ შეძლებდა ჩრდილოეთი მთელი ძალა სილარიბის დასაძლევად მიემართა. დღესაც მრცხვენია, რომ ცივი ომის დასასრულის შემდეგ არც მდიდარ ინდუსტრიულ და არც განვითარებად ქვეყნებს თავიანთი დანაპირები არ გახსენებიათ.

ბრანდტის კომისიის ყველა წევრს, როგორც მას მაღვე ეწოდა, აერთიანებდათ თავმჯდომარის ავტორიტეტისა და შორს-მჭვრეტელობის პატივისცემა. ბრანდტის მიერ 1980 წელს წარდგენილ მოხსენებაში, „უზრუნველვყოთ გადარჩენა“ განიხილებოდა ისეთი გლობალური პრობლემები, როგორიცაა შიმშილი, მოსახლეობის ზრდა, ენერგია, ნედლეული, ვაჭრობა, ვალუტა, ინვესტიციები და ორგანიზაციები – რასაკვირველია, მშვიდობიან დროში, აგრეთვე ლარიბსა და მდიდარს შორის სოლიდარობის პირობებში. არავის მოხვედრია თვალში, რომ ნაკლებად მცირედ მოიხსენიებოდა დემოკრატია და საერთოდ არ იყო საუბარი ადამიანის უფლებებზე.

ფედერაციულ რესპუბლიკაში მოხსენება მემარცხენეობის გამოხატულებად აღიქვეს და გააკრიტიკეს კიდეც. უსაფრთხოებაზე ამერიკელები ზრუნავდნენ და მიიჩნევდნენ, რომ მოსახლეობის უმეტესობას მზარდი კეთილდღეობა უფრო აინტერესებს, ვიდრე ლატაკია მიმართ სოლიდარობის ზრდა. 1985 წელს ვიღი ბრანდტმა გაეროს შტაბ-ბინაში მესამე მსოფლიოს პრემია მიიღო. საპრემიო თანხით ბონში შექმნა განვითარებისა და მშვიდობის ფონდი, რომლის ავტორიტეტსაც დღესაც პატივს სცემენ და აფასებენ. კომისიაში მოღვაწეობის დამთავრების შემდეგ, ბრანდტი პოლიტიკურად და იდეურად უფრო მარცხნივ გადაიხარა, ვიდრე მანამდე.

უსაფრთხოება ვისთვის?

ბერლინის კედლის აღმართვით მიღებული დამთრგუნავი განცდა, რომ შენზე ძლევამოსილთა გავლენის ობიექტი ხარ, გაძლიებს საკუთარ ინტერესებს სუსტის პოზიციიდან შეხედო. ბრანდტისათვის და ცხადია, ჩემთვისაც ფრანგი გენერლის, შარლ დე გოლის დიდებული პიროვნება იყო საუკეთესო მაგალითი იმისა, თუ რას შეიძლება მიაღწიოს სამი კიდევ უფრო ძლიერის გაერთიანებამ – ვაშინგტონმა, ლონდონმა და მოსკოვმა. ამავე დროს, მისი როლი გაფრთხილებად უნდა მიგვეღო: მასშტაბური აღიარებისთვის, რომელსაც მისი პოლიტიკური ავტორიტეტი ნამდილად შეესაბამებოდა, საფრანგეთი მცირე ასპარეზი იყო. საკუთარი ძალების მართებულ გამოყენებაზე იყო დამოკიდებული, ამპარტავნობა ტრაგიკულ მარცხა-მდე მიყვანდა თუ რეალიზმი – მოულოდნელ ნარმატებამდე უფრო ძლიერს დასჭიდებოდა. ეს ნარმოადგენდა ბრანდტსა და ჩემ შორის მრავალჯერ გამართული საუბრის ამოსავალს, გერმანიისათვის და გერმანიისგან უსაფრთხოების კომპლექსის განხილვისას.

ბრანდტმა 1964 წელს Foreign Policy Association-ში სიტყვით გამოსვლისას პატივისცემით მოიხსენია დე გოლი და თანაცრიტორიკულად იკითხა: „მაინც რატომ სულ ის?“ აღელვებულს ამ კითხვისთვის პასუხი არ გაუცია, უსიამოვნებას მოერიდა. გენერალს ვუმადლოდით სამშობლოების ევროპულ იდეას და

აქედან გამომდინარეობდა, რომ ფედერალური რესპუბლიკაც შეიძლებოდა საკუთარი მოთხოვნილებისა და საკუთარი ინტერესების მიმდევრად დარჩენილიყო და ამავე დროს, ალიანსის ერთგულიც. კიდევ უფრო შორს თუ წავალთ: ერი ევროპა-ში რომ არ შთაინთქა და ამერიკის ქვეშევრდომებიც რომ არ ვიყავით.

გენერლის კომინტარი ატომურ იარაღზე დღემდე ძალაშია: არცერთი ქვეყანა არ უზიარებს სხვას ამ იარაღის თაობაზე გადაწყვეტილებას, არც თავის საუკეთესო მეგობარს, რადგან ამ იარაღის გამოყენება განსაზღვრავს საკუთარი ერის ბედს, ხოლო ასეთი გადაწყვეტილების სხვა ქვეყნისთან გაზიარება, გამორიცხულია. ეს ელემენტარული შეხედულება ელემენტარული იარაღის მიმართ, რაც არტილერიის განვითარებაზე უფრო მეტად მნიშვნელოვანია, ბრანდტმა პოლიტიკურად ასე გაშიფრა: „ოთხ გამარჯვებულ ძალას შეუძლია მომავალშიც იყამათოს 999 საკითხზე. მაგრამ ერთში თანხმდებიან: გერმანელები არასდროს არ უნდა ფლობდნენ ატომურ იარაღს“.

ამ შეხედულებას იზიარებდა ბრანდტი 1962 წელს კენედის-თან საუბარშიც. უაზრობაა დაგეგმილი მულტილატერალური ატომური ძალის გაშვება ზღვაში, ბირთვული მონაწილეობის შთაბეჭდილების შესაქმნელადო. ეს ალიანსსაც კი აზიანებს, რადგან კაპიტანი ამერიკელი უნდა იყოს და ატომური იარაღიც ამერიკელებმა უნდა გამოიყენონ. ალიანსის სხვა წევრები მზარეულების, ცეცხლფარეშების და მეზღვაურების როლს უნდა დასჯერდნენ. კენედიმ ამოისუნთქა. ორივემ, ასე რომ ვთქვათ, ფლოტი მანამ ჩაძირა, სანამ ზღვაში გავიდოდა და სხვებსაც და საკუთარ თავსაც სერიოზული უსიამოვნება აა-ცილა თავიდან.

ბრანდტმა ბერლინის კედლის აღმართვის მაგალითიდან გამოიტანა დასკვნები. არც ბერლინისთვის იომებდა ორი დიდი ძალა, როგორც კენედიმ მოსწერა. სიცოცხლის ბოლომდე არ

დასჭირვებია აზრი შეეცვალა: ორივე სუპერ-სახელმწიფოს თავისი ინტერკონტინენტური ატომური იარაღით ჰქონდა ძალაუფლება და პასუხისმგებლობა და ისინი ვერავინ ჩაითრია ატომურ კონფლიქტში, რადგან კლასიკური გაგებით „გამარჯვებას“ ვერცერთი მოიპოვებდა. რისკი ძალიან დიდი იქნებოდა. მათ ურთიერთ შორის აღმართეს ატომური ფარი, რომელმაც თავად ისინი, მათი მოკავშირენი და ყველა დანარჩენი დაიცვა. დღეს ვიცით, რომ მან გერმანიის გაერთიანებასაც კი გაუძლო. ეს ატომური ფარი აკავშირებდა დრომოქმულ წუხილს. ამასობაში, სამხედრო თვალსაზრისით არარელევანტურ გერმანიასა და გერმანიის უსაფრთხოებაზე საფრანგეთის ატომურ სუვერენულობასთან ერთად, მან მაშინაც განაპირობა, რომ ევროპაში ატომურ ძალას არ ეარსება. ევროპის თვითდამკვიდრება დღესაც კონვენციური ჯარის დონით იფარგლება.

ბრანდტს პრინციპულად სჯეროდა, რომ ევროპაში მშვიდობის შენარჩუნების საქმე ვაშინგტონისა და მოსკოვის გარეშე არ გამოვიდოდა. ეს გეოსტრატეგიული რწმენა ათწლეულობით გაჰყვა და ვერ შეარყია ვერანაირმა მწვავე მოვლენამ, ვერც ნატოს ორმაგი ხელშეკრულების გამო დაპირისპირებამ ოთხმოციანი წლების დასაწყისში. ბრანდტს არასოდეს შეშინებია, რომ ორი დიდი ძალა მოვლენების განივითარებაზე კონტროლს დაკარგავდა. მსოფლიო პოლიტიკურ რეალობაზე ორიენტაცია დამაჯერებლობას მატებდა მის ხედვას.

ერთი მაგალითი: ჯონ მაკელოიმ, აშშ-ს ყოფილმა მაღალი რანგის კომისარმა ფედერაციულ რესპუბლიკაში, სამოციანი წლების დასაწყისში ერთხელ ვიწრო წრეში ვახშამზე დაგვპატიჟა. ეს ის დრო იყო, როცა დე გოლმა ინგლისს უარი უთხრა ევროპის ეკონომიკურ გაერთიანებაში მიღებაზე და ალიანსის სამხედრო ორგანიზაციიდან გასვლას ფიქრობდა. მაკელოი გვარნმუნებდა, გერმანელებმა უნდა შეაჩეროთო და

დაგვემუქრა: „თუ ამას არ იზამთ, აქედან ჯარს გავიყვანთო“. ბრანდტმა მშვიდად მიუგო: „არ მჯერა“.

ბრანდტმა იცოდა, რომ უსაფრთხოების საკითხში აღმატებული, უპირატესი პოზიცია ეკავა. „რაკეტების დასათვლელად, მათი მოქმედების მანძილის განსასაზღვრად და მუქარის თეორიებისთვის არსებობენ თავდაცვის მინისტრები და ექსპერტები“. შმიდტსა და მეც გვგულისხმობდა. „მათზე თუ მიღდგა საქმე, ესე იგი, პოლიტიკამ ჩაისვარა. პოლიტიკამ უნდა შეძლოს, რომ მათი წუხილი და თეორიები არასოდეს გამოვცა-დოთ“. შეიძლება ქედმაღლური მოგზვენებოდათ მისი ნათევამი, მაგრამ მართალი აღმოჩნდა: ომი არ დაგვტეხია თავს. რაღა აზრი აქვს იმაზე მსჯელობას, რა დაუჯდათ სახელმწიფოებს სამხედრო-ტექნიკური აღჭურვა. ჩვენ, ევროპელები სწორად მოვიქეცით, რომ პოლიტიკური გონიერება დავაყენეთ სამხედრო საქმეზე ნინ.

ბრანდტს ყოველთვის აინტერესებდა პოლიტიკურ-სტრატეგიული საკითხები. ამის საუკეთესო მაგალითია ბრეშნევთან შეხვედრა ყირიმში 1971 წელს. მოსკოვის ხელშეკრულების გზით, პოლიტიკური ჩარჩოს დაგეგმვის შემდეგ, უნდა გვეპოვა ჭარბი ჩვეულებრივი იარაღის შემცირების გზა და ამგვარად მეტი უსაფრთხოებისთვის მიგველნია ორივე მხარესთვის, თანაც ისე, რომ არცერთი არ დაზარალებულიყო. საათობით ვუკირკიტებდით შესატყვის ფრაზებს ჩვენი მიზნის მისაღწევად. ჩვეულებრივი შეიარაღების შემცირების ხელშეკრულებას შემდეგ ენოდა MBFR – ურთიერთშეთანხმებული შემცირება. სამხედრო საქმეზე პასუხისმგებელთა ჩაკეტილ წრეშივე ჩაიხშობოდა, გორბაჩინს რომ არ გადაერჩინა. ვარშავის ხელშეკრულებას სახელმწიფოები მაშინაც იცავდნენ, როცა იგი აღარ არსებოდა. შეთანხმება ყველა მონაწილის ინტერესებს შეესაბამებოდა.

1981 წლის ზაფხულში ბრანდტმა მოსკოვური შთაბეჭდილებების კვალდაკვალ გაგვიზიარა მოსაზრება, რომ ორ მხარეს

შორის ნულოვანი გადაწყვეტილება გააქრობს შესაბამის ამერიკულ და საბჭოთა რაკეტებს ფრანგულისა და ბრიტანულის ხელშეუხებლადო. ბონში ამ იდეას „არარეალური“ უწოდეს და მხარი არ დაუჭირეს. როდესაც რონალდ რეიგანმა გორბაჩოვთან ზუსტად ეს მოილაპარაკა, გერმანიამ ერთხმად დაუჭირა მხარი. ბრანდტის პოლიტიკურ-სტრატეგიული ჭვრეტის უნარი, სამწუხაროდ, მისი გადადგომის შემდეგ, გამოუყენებელი დარჩა.

*

პენრი კისინჯერმა ბრანდტსა და შმიდტს გამორჩეული პიროვნებები უწოდა. მათ შორის მსგავსებაც ისეთივე საოცარია, როგორიც განსხვავებაო. როდესაც 1970 წელს ბრანდტს შევატყობინე, რომ შმიდტმა თავის ამერიკელ კოლეგასთან, მელვინ ლერდთან ერთად აღკვეთა ბალტის ზღვიდან ბიომის ტყემდე ასობით ამერიკული ატომური ნაღმის გადატანა, პასუხმაც არ დააყოვნა: „ერთი საზრუნავით ნაკლები გვექნებაო“. და შეგვაქო, რომ ეს სანიმუშო ქმედება არ გასაჯაროვდა, არ იყო საჭირო, ხალხი ზედმეტად შეგვეშინებინა ატომური საფრთხით. მოგვიანებით დაეთანხმა ჩვენს მცდელობას, რომელიც შმიდტმა და მე ერთმანეთისგან დამოუკიდებლად წამოვიწყეთ – აღგვევეთა ამერიკული რაკეტების მიწაზე განთავსება, ამერიკული წყალქვეშა ნავების და ფრთიანი რაკეტების აღჭურვის მოთხოვნით. ამერიკელები ამბობდნენ, ტექნიკურად შეუძლებელიაო. როდესაც ეს პროცესი ახალი საშუალო მანძილის რაკეტების მიწაზე განლაგებისას შესაძლებელი აღმოჩნდა, თავი მოტყუებულად ვიგრძენით.

კისინჯერის ერთ-ერთი ვიზიტისას, რომელიც ამასობაში საგარეო საქმეთა მინისტრი გამხდარიყო, სტრატეგიული იარა-

ღის შემცირების შესახებ უენევაში მიმდინარე მოლაპარაკებების მდგომარეობით დავინტერესდი. როდესაც ჰენრიმ დეტალურად დაინტერესდი, შევაწყვეტინე: „ამდენი წვრილმანი რა საჭიროა. მე ის მაინტერესებს, იქნება თუ არა შედეგი და როდის. აბსოლუტურად გვჯერა, რომ დასავლეთის ინტერესების გათვალისწინებით, შეცდომას არ დაუშვებთ“. შმიდტს რომ ვუყვებოდი ამ საუბრის შესახებ, ომაზიანად და ხმამაღლა შემაწყვეტინა: „არასწორად მოქცეულხარ! დეტალები უნდა გამოგეებითხა ჰენრისთვის. ძალიან გვაინტერესებს, სასიცოცხლოდაც კი“. ბრანდტმა თავი გაიქნია: ეჭვი მეპარება, რომ გერმანიას რამე გავლენა ექნება საკითხზე, რომელსაც მხოლოდ ამერიკელები და რუსები წყვეტინო. იგი ხედავდა ჩვენი შესაძლებლობების და ძალაუფლების საზღვრებს.

ამასთან, იგი ხედავდა და აღიარებდა, რომ 1980 წელს მოსკოვის სამხედრო ხელმძღვანელობასთან შმიდტის საუბრების შედეგად, ბონს, როგორც პარტნიორს სტრატეგიულ საკითხებში, ანგარიშს უწევდნენ. მაგრამ ბოლოს მაინც ვაშინგტონი და მოსკოვი გადაწყვეტდნენ ყველაფერს. ჩვენ მათი გადაწყვეტილების ობიექტი ვიქებოდით – იქნებოდა ეს ორივე გერმანულ სახელმწიფოში რაკეტების განლაგება თუ მათი შემდგომი გადაწყვეტილება რაკეტების ისევ გატანის თაობაზე. ბრანდტის განსხვავებული შეხედულების მიუხედავად, მას კარგად ესმოდა კანცლერის იმედგაცრუება, როცა იგი არც საქმის კურსში ჩააყენეს და არც არაფერი შეუთანხმეს, როცა ამერიკელმა და საპჭოთა მომლაპარაკებლებმა პოლ ნიტცემ და იული კვიჩინსკიმ უენევის მახლობლად ტყეში ცნობილი სეირნობის დროს მიაღწიეს მოლაპარაკებების შედეგს, რომელიც შმიდტისთვისაც სრულიად მისაღები აღმოჩნდა.

ბრანდტი შმიდტის იმ მიდგომასაც ეთანხმებოდა, რომ გადამწყვეტ მომენტში ბუნდესვერისთვის უკანასკნელი ბრძანების გაცემის უფლება მას ჰქონდა: არ დამორჩილებოდნენ ამე-

რიკელების მიერ ატომური იარაღის გამოყენების ბრძანებას, რომელთათვისაც გათვალისწინებული იყო ლანცის რაკეტებით გერმანული დანაყოფების აღჭურვა. ლიუბეკამდე და ჰამბურგამდე წვდომის უნარით ყველაფერს გაანადგურებდნენ, რაც დაუცავი იქნებოდა. ბრანდტი შმიდტს ეთანხმებოდა, რომ ზარალი გერმანელი ხალხისთვის უნდა აეცილებინათ, შესაბამისად, გერმანელი ხალხის კეთილდღეობა უფრო მაღლა უნდა დაგვეყენებინა, ვიდრე ნატოსი.

და მაინც, პარტიის თავმჯდომარე ასეთ სიტუაციაში აღმოჩნდა: ერთის მხრივ უნდა გაემაგრებინა კანცლერის პოზიცია, მეორე მხრივ – შეენარჩუნებინა პარტიის ერთობა და თან არ უნდა დაეკარგა გავლენა სამშვიდობი მოძრაობაზე. კონფლიქტი დაპროგრამირებული იყო მას შემდეგ, რაც შმიდტი კანცლერობით შემოიფარგლა და პარტიის მომავალი ბრანდტს გადაულოცა, ნებსით თუ უნებლიერ, სიამოვნებით თუ პირიქით.

რაკეტებმა საკუთარი დინამიკა განავითარეს. ორივე გერმანული სახელმწიფო მათი მფლობელების მძევლებად იქცა. პერშინგებს შვიდი წუთი სჭირდებოდათ მოსკოვამდე, გდრ-ში განლაგებულ საბჭოთა რაკეტებს მაქსიმუმ ორი წუთი, რომ ამერიკული რაკეტები გასროლამდე გაენადგურებინათ. არც ადამიანს და არც ტექნიკას არ ჰქონდათ შეცდომის დაშვების უფლება. შმიდტი ვერ აღუდგებოდა ფედერაციული რესპუბლიკის, როგორც მიზნის სინგულარიზაციას. კვიჩინსკიმ მოსკოვში დამიდასტურა: „რამდენიც გინდათ, იმდენი პერშინგი განალაგეთ. ჩვენ მათი მოგერიებისთვის მზად ვართ“. ვინც პირველი დააჭერს თითს ღილაკს, უპირატესობაც მას ექნება.

ფედერალურმა კანცლერმა პერშინგის რაკეტების განლაგებაზე თანხმობა წარმატებულ მოლაპარაკებებს დაუკავშირა და ამით შეინარჩუნა წნევი მოსკოვსა და ვაშინგტონზე. ჩემი ვარაუდი, რომ ამერიკელებს სულაც არ უნდოდათ დადებითი შედეგის მიღწევა, მოგვიანებით სტრობ ტალბოტმა დაადასტურა

თავის წიგნში „რაკეტები საჭადრაკო დაფაზე“, იგი ამ საკითხში კარგად ერკვეოდა, თანაც კლინტონის ადმინისტრაციაში საგარეო საქმეთა მინისტრის მოადგილე გახლდათ. მათ ჩვენი გაცურება სურდათ. კოლის წყალობით ეს აღარ დასჭირდათ, მან გერმანის მოთხოვნები მოხსნა. ბედმა გაგვილიმა.

რაკეტების საკითხში პარტიის და ფედერალური მთავრობის წინაშე, აგრეთვე, დასავლელი და აღმოსავლელი პარტნიორების წინაშე პასუხისმგებლობას ვგრძნობდი: ჩემს მიღომას რაკეტების განლაგება შეეძლო შეეფერხებინა. რაკეტები სინდისის საკითხად იქცა; მათი შეკავება უკვე შეუძლებელი იყო. მე, როგორც ფედერაციის საქმეთა მწარმოებელი ვერ განვაცხადებდი ჩემი რწმენის საპირისპიროს. 1981 წლის ბოლოს გადავდექი და ფედერალურ კანცლერს შევატყობინე, მომავალში „ჩემი მთავარი საზრუნავი იქნება შეიარაღების შემცირების პოლიტიკური მხარე, რადგან მიმაჩნია, რომ ეს იქნება მომავალი წლების ყველაზე მნიშვნელოვანი საკითხი, სხვათა შორის, პარტიისთვისაც“. ბრანდტს ჩემი გადარწმუნება არც უცდია. დაინტერესდა, ანი რას აპირებო. ვუპასუხე, განიარაღებისთვის ვიბრძოლებ-მეთქი. ჩაილაპარაკა: „მთელი დარჩენილი სიცოცხლე დასჭირდება მაგ საქმეს“. მართალი აღმოჩნდა.

პარტნიორი – ამერიკა

მიუხედავად პასუხისმგებლობის განსხვავებული სფეროებისა, ბრანდტი და შმიდტი ერთ საკითხში თანხმდებოდნენ: ამერიკის გარეშე არაფერი გამოვიდოდა. ორივემ იცოდა: 1953 წლის 17 ივნისის საპარო ხიდი, აღმოსავლეთის ხელშეკრულებები, ოთხი გამარჯვებული ძალის ხელშეკრულება ბერლინის შესახებ და საბაზისო პრინციპების ხელშეკრულება, ჰელსინკის 1975 წლის დასკვნითი აქტი და 1991 წლის სამშვიდობო ხელშეკრულება, რომელსაც, გასაგები მიზეზების გამო, ასე არ უწოდებდნენ – ამერიკის მხარდაჭერის გარეშე ისტორია სხვანაირად განვითარდებოდა. ღიად დარჩებოდა, როდის და როგორ დაიბრუნებდა გერმანია 1945 წლს რაინის მიერ დაკარგულ შეუზღუდავ სუვერენიტეტს, ან საერთოდ დაიბრუნებდა თუ არა შეერთებული სტატების თანადგომის გარეშე. ნატოს არსებობის აუცილებლობას ცივი ომის დასრულების შემდეგაც, ორივე აღიარებდა. ამერიკელების ინტერესები რომ არ შეიზღუდებოდა, მარშალის გეგმისას უკვე გამოჩნდა.

უაღრესად მჭიდრო ატლანტიკური კავშირების, მათი ისტორიული და ეკონომიკური ფესვების და საერთო ლირებულებების შეფასებაშიც ეთანხმებოდნენ ერთმანეთს. ალიანსი თავის წევრებს ჰპირდებოდა უსაფრთხოების ორგანიზაციას, მართვას და კოორდინაციას გარეთ და სტაბილურობას შიგნით, თუ გერ-

მანია უფლებებს გადააჭარბებდა, რაც იმ ქაოსში, რომელსაც ევროკავშირი ეწოდება, წარმოუდგენელი იყო და არის.

„ნატო ამერიკის საკუთრება არ არის“ – შმიდტის ეს საკმაოდ ხმამაღალი განსაზღვრება, რომელშიც თანასწორუფლებიანობის მოთხოვნა, ამერიკისგან ემანსიპაციაც გამოსჭვიოდა, ბრანდტს არასოდეს მოადგებოდა პირზე. არა მხოლოდ იმიტომ, რომ ხალხთაშორისი სამართლის მიხედვით სწორი, მაგრამ პოლიტიკურად არასწორი იყო, არამედ იმიტომ, რომ რეალობას მაინც ვერ შეცვლიდა. ამ დროს, კაცმა რომ თქვას, ისიც იმავეს ფიქრობდა; მაგალითად, როცა ამბობდა: „ევროპაში ფედერაციულ რესპუბლიკას წათესავები ჰყავს, ამერიკაში – პარტიიორები. ვისაც ევროპის თვითგამორკვევა სურს, ვაშინგტონს არ უნდა გადაულოცოს ეს საქმე. ამერიკას, ევროპის ძიძას, ათწლეულების მანძილზე, ეს უნდა შეეცნო. ეს შეესაბამებოდა „ევროპის ევროპეიზაციის“ ფორმულას, რომელიც ჩემმა უფროსმა მეგობარმა, პეტერ ბენდერმა დაამკვიდრა. მაგრამ ულტიმატუმის ენით ლაპარაკი, რომელიც დაპირისპირების საბაბს იძლევა და რეალობას მაინც ვერ შეცვლის, ბრანდტს არ ახასიათებდა. მის საგარეო პოლიტიკურ მსოფლმხედველობას უფრო შეესაბამებოდა ფორმულა – ისიც და ისიც. ამ მიდგომით თავს ისე მყარად გრძნობდა, რომ აქა-იქ თუ ვინმე დასცინებდა, არც აღელვებდა და არც აზრს შეაცვლევინებდა.

წარმოდგენა, რომ ბრანდტის მეგობრული გრძნობები ამერიკის მიმართ არაკრიტიკული იყო, მაამებლური ან უპრობლემო, აბსოლუტურად არასწორია. ნიუ იორკში ჯერ წამყოფიც არ ვიყავი, როცა ჩემი უსაზღვრო აღტაცება ამ ქალაქის მიმართ საფუძვლიანად შეირყა. სამოციანი წლების დასაწყისში „ვალდორფ-ასტორიას“ მიმდებარე ქუჩებში დავსეირნობდით, ამ სასტუმროში ვცხოვრობდით, როდესაც ბრანდტმა ამისსნა, რატომ ვერ გრძნობდა თავს აქ კარგად: „ეს არის ამპარტავნობის და აროგანტულობის ნიშანი, მთელი ეს ცათამბჯენები ადა-

მიანის გაზვიადებული წარმოდგენის გამოხატულებაა. აქ რომ რამე მოხდეს!“ ბრანდტი ყოველთვის ადამიანური განზომილების ერთგული იყო.

რობერტ მაკნამარამ სარწმუნოდ აგვიხსნა, რატომ მოიგებდა ამერიკა ომს ვიეტნამში. შემდეგ ბრანდტს გავენდე, ამერიკის თავდაცვის მინისტრი ვალტერ ჰალშტაინს მახსენებს, მისი გდრ-ის მიმართ ერთადერთი წარმომადგენლის დოქტრინის გამო-მეტქი: შენობა შთაბეჭდილებას ახდენს, სანამ არ მიხვდები, რომ შეუფერებელ ადგილას დგას. ვილიმ მიპასუხა, ამ წუთას ტიპიური ამერიკული ამპარტავნობის მაგალითი მოვისმინეთ, მატერიალური და ტექნიკური სწრაფვის გამო ადამიანებს არასათანადოდ აფასებენ, განსაკუთრებით, თუ საქმე ეხება ეგრეთ წოდებულ „ჩამორჩენილებს“ განვითარებადი ქვეყნებიდანო. ერთნაირად ვფიქრობდით, რომ ამერიკა ვიეტნამში ომს წააგებდა. მხოლოდ ის არ ვიცოდით, როდის და როგორ. ბრანდტმა ხაზი გაავლო კორეასა და კუბის წინააღმდეგ „ლორების ყურეში“ წარუმატებელ ოპერაციას შორის და ორმაგ ფსიქოლოგიურ ტვირთზე მიუთითა, რომელიც წარმატებით განებივრებულ ქვეყანას დააწვებოდა: როგორ გადაამუშავებდა წაგებასა და ტვირთს, თუკი დემოკრატიული სუპერ-სახელმწიფოც შეიძლებოდა აღმოჩენილიყო დამნაშავე? ამის გაცნობიერებამ მას თავისი ქვეყნის შიგნითაც ჩამოუყალიბა პოზიცია, ამერიკის მიმართ კრიტიკული აზრი, არასოდეს გამოეთქვა რაოდენ პოპულარული არ უნდა ყოფილიყო. „გაჭირვებაში ჩავარდნილ მეგობარს უნდა დაეხმარო“. პოლიტიკურ ვაშინგტონს ეს დამოკიდებულება შეუმჩნეველი არ დარჩენია.

ნიუ იორკში სეირნობისას ვილის არ გამოჰქმარვია ცივი, მტრული მზერა, რომლითაც ფერადკანიანები ხვდებოდნენ ქუჩაში. თვალებს ჭუტავდა, როცა მძლოლი ღილაკით გვიკეტავდა მანქანის კარებს ისეთ კვარტლებში, სადაც თითქოს არცერთი თეთრკანიანი არ ცხოვრობდა. ქვეყნის რეგენერაციის გასაოცა-

რი ძალის მიუხედავად, ფერადკანიან და თეთრ სახელმწიფოებს შორის დაძაბულობას არ გამორიცხავდა – შეფასება, რომელიც მოგვიანებით შეარბილა. ამ წინააღმდეგობებით აღსავსე კონტინენტის, სახელად აშშ-ს მიმართ დიდი კეთილგანწყობის მიუხედავად, სადაც თვალსაჩინოა ცივილიზაციის მიღწევები, უხვადაა არაჩვეულებრივი ფონდები და, მეორე მხრივ, ძნელად გასაგები კანონები იარაღის შესახებ და სიკვდილით დასჯა – ეპროპელი ბრანდტისთვის ეს ქვეყანა გაუცხოებულად დარჩა. იქ თავს შინ ვერ გრძნობდა. მაგრამ ამერიკის როლი უცვლელი რჩებოდა.

სატრაფო, რომელსაც სასოწარკვეთამდე მიჰყავხარ (ევროპა)

ახალი ფედერალური კანცლერის, ვილი ბრანდტის პირველი საგარეო პოლიტიკური ქმედება ევროპას ეძღვნებოდა. უფრო ზუსტად: ამაყობდა, რომ 1969 წლის დეკემბერში ჰააგაში საფრანგეთის პრეზიდენტ შორუ პომპილუსთან და ოთხი სხვა ქვეყნის მთავრობების მეთაურებთან ერთად მწვანე შუქი აუნთო ინგლისის გაერთიანებას ევროპულ თანამეგობრობაში, რასაც დიდხანს ეწინააღმდეგებოდა საფრანგეთი. დემოკრატის სამშობლოს და სკანდინავიური ელემენტის გარეშე – მას ევროპა ძნელად თუ წარმოედგინა. ის, რომ საფრანგეთი ინგლისის გვერდით თავს უკეთ იგრძნობდა, როდესაც გერმანელები აღმოსავლეთის მიმართულებით გაააქტიურებდნენ განმუხტვის პოლიტიკის გატარებას, არ აღელვებდა. წლების შემდეგ ამოვიკითხე ჯორჯ კენანის მოგონებებში: – როცა 1949 წელს ვიმოგზაურე ევროპაში, მივხვდი, რომ ევროპული გაერთიანების ყველა წარმოდგენა მარცხით დამთავრდებოდა, რომელიც კონტინენტზე ინგლისის საბოლოოდ მიბმას გადაწყვეტდა; ბრიტანეთის განსაკუთრებული ურთიერთობები აშშ-სთან ყოველთვის პრიორიტეტული დარჩებაო. – ოთხმოციანი წლების დასაწყისში გავუმახვილე ყურადღება ვილის კენანის პროგნოზზე, რომელიც ამასობაში ბევრჯერ გამართლდა. მისი ჩვეული ფრაზა მოვისმინე: „ეგ ადრე უნდა გეთქვა“.

ამას მაშინ უნდა მივმხვდარიყავით, როცა ბრანდტი 1962 წელს ლონდონში სიტყვით გამოვიდა და ლეიბორისტული პარტიის თავმჯდომარეთა შორის ევროპის მიმართ ყველაზე კეთილგანწყობილმა ჰიუ გეიტსკელმა წესიერად არც კი მოუსმინა. ბრანდტის მიერ გამოთქმული რწმენა, ინგლისი ევროპის ნაწილია, ხმამაღლი შეძახილებით მიიღეს. გაიტსკელი მიკროფონს მივარდა და სიჩუმე მოითხოვა „ჩვენი წყალგაღმა მეგობრებისთვის“. ეს ხუმრობა არ იყო. არა მარტო ლა მანშე ჩამონალილი სქელი ნისლის დროს აღიქმებოდა ბრიტანეთის კუნძულზე ევროპა უცხო კონტინენტად – ეს განწყობა ჰქონდა ყველა პარტიას და შეესაბამებოდა საზოგადოების საერთო განწყობასაც.

1970 წლის თებერვალში ერთხელ, სადილობის შემდეგ, უეცრად მკითხა გრომიკომ: „როდის იქნება, რომ ევროპა ერთი ხმით ილაპარაკებს?“ ამ წუხილის მიზეზი ევროპის ეკონომიკურ გაერთიანებას მოსკოვისთვის ერთხელ უკვე მიეცა. მევუპასუხე: „ოც წელიწადში თავიდან მკითხეთ“ ის კი დაეჭვებული ჩამეძია: „მართლა ასე ფიქრობთ?“

კანცლერს რომ ვუამბე და თან დავარწმუნე, რომ მართლა ასე ვფიქრობდი, მისმა რეაქციამაც არ დააყოვნა: „გამოუწყორებელი დეფეტისტი ხარ“. ვერ წარმოედგინა, რომ ეს პროცესი ამდენ ხანს გაჭიანურდებოდა. რასაკვირველია, წამით არ უფიქრია, რომ გერმანიის გაერთიანებას უფრო სწრაფად მივაღწევდით ვიდრე ევროპის ქმედითუნარიანობას საერთაშორისო სარბილზე. ორმოცი წლის შემდეგ დარწმუნებით ისევ ძნელი სათქმელია, როდის მივაღწევთ ერთი ხმით ლაპარაკის გაცხადებულ მიზანს.

ერთხელ ვილიმ მისაყვედურა, სათანადოდ არ გაინტერესებს ევროპაო, უუპასუხე, ექვსი დედაქალაქიდან თითეულში ზის სულ ცოტა ექვსი უაღრესად გონიერი ადამიანი, რომლებიც ამ თემაზე მუშაობენ. ჰოდა, არავის ავნებს, მე აღმოსავლეთ ევროპას თუ მივხედავ-მეთქი.

რასაკვირველია, ბრანდტმა დიდად გაიხარა, განმუხტვის პოლიტიკამ ისეთი შედეგი რომ გამოიღო, რომელმაც ევროპა შეცვალა. მაგრამ ამას ხელი არ შეუშლია მისთვის, ქვევიდან განხორციელებული წნების საშუალებით ეცადა, ევროპა მეტად დაეფრთიანებინა. კაბინეტის ერთ-ერთ სხდომაზე ისევ იმაზე ვმსჯელობდით, როგორ მოგვეხერხებინა, რომ ევროპული საბჭოს შემდეგი სხდომა ცოტა უფრო მნიშვნელოვანი და საინტერესო გაგვეხადა. აღარ მასხსოვს, ვის მოაფიქრდა პირველს ევროპული არჩევნების ჩატარების იდეა. ამ იდეამ მოგვნუსხა და აღგვაფრთოვანა. ბრანდტმა მაშინვე გააქარწყლა საწინააღმდეგო არგუმენტი, ევროპის პარლამენტს კონცეტენცია საერთოდ არ გააჩნია: „პარლამენტი თავად მოიპოვებს საჭირო უფლებებს“. ასე ჩატარდა 1979 წელს ევროპული პარლამენტის პირველი პირდაპირი არჩევნები. ბრანდტი იყო სიის პირველი ნომერი, თავის შეცდომაში დარწმუნებას მოესწრო. ევროპის გაერთიანება გამოფხიზლების ნელ გზას დაადგა, რომელიც დღესაც არ დასრულებულა.

ბრიტანეთის პოლიტიკამ დაამუხრუჭა და მატარებელს შეახტა, უფრო ეფექტური დამუხრუჭების საშუალება რომ მოეპოვებინა; უკეთესი კონტროლისთვის ბრიუსელშიც კი ჩავიდა და მეგი თეტჩერმა ბოლოს უკან მოითხოვა „თავისი ფული“. კისინჯერი ჩიოდა, ევროპას რომელ ტელეფონზე დაკურეკო, არ ვიციო, თუმცა დიდად ეს ამბავი არ აღელვებდა. ბრანდტი საკმაოდ ჭკვიანი იყო იმის მისახვედრად, რომ ევროპის გარეთ დიდ ქვეყნებს მხოლოდ საკუთარი ინტერესები ამოძრავებდათ, სხვანაირად ვერც იქნებოდა. საერთაშორისო თანამეგობრობა ევროპას კეთილ სურვილებს უგზავნიდა, მაგრამ აღარ სჯეროდა, რომ იგი ათწლეულების წინ დადებულ ფიცს შეასრულებდა.

ამ თემაზე ეჭვის გამოთქმა არ შეიძლებოდა: ვერავინ უარყოფდა, რომ ეკონომიკურმა თანამშრომლობამ ნატვრა აახდინა. ფაქტიურად, წარმოუდგენელი გახდა ევროპულ სახელმწიფოებს

შორის ომები, მათი მჭიდრო კავშირების გამო. მეორე მსოფლიო ომის შემდეგ მიღწეული ეს დიდი წარმატება ეროვნული სუვერენიტეტის ევროპაზე გადანაწილებას მოითხოვდა. ეს რთული არ აღმოჩნდა, რადგან აღმოსავლეთის საფრთხის წინააღმდეგ უსაფრთხოების გარანტისა ამერიკა იძლეოდა ნატოს საშუალებით. როდესაც 1969 წელს დე გოლმა თანამდებობა დატოვა ინგლისის, ნორვეგიის, დანიის და ირლანდიის გაერთიანებაში შესვლას წინ არაფერი ედგა (მხოლოდ ვილის ნორვეგიელებმა თქვეს უარი პლებისციტის გზით), ევროპულ გაერთიანებას 1973 წლის პირველ იანვარს სამი ახალი წევრი შეუერთდა. ბრანდტი იმედით აღივსო, როდესაც ჩრდილოეთ-სამხრეთის კომისიის წევრი და ინგლისის ისტორიაში ევროპისადმი ყველაზე კეთილგანწყობილი კონსერვატორი პოლიტიკოსი ედვარდ ჰეთი ბრიტანეთის მთავრობის სათავეში მოვიდა. მისი მარცხის შემდეგ ისეთი იმედგაცრუებულები აღარ ვყოფილვართ, როცა შემდგომმა ლეპორისტულმა მთავრობებმა აშშ-სთან განსაკუთრებული ურთიერთობების პრიორიტეტი შეინარჩუნეს.

საბჭოთა კავშირის მშვიდობიანი დასასრულის შემდეგ აღმოსავლეთიდან სამხედრო მუქარა აღარ ისმოდა. ახლა უპრიანი იქნებოდა, ევროკავშირზე ნაციონალური სუვერენიტეტის გადატანა გაგრძელებულიყო, მითუმეტეს, რომ მაასტრიხტის ხელშეკრულებამ ერთობლივი საგარეო და უსაფრთხოების პოლიტიკის გზა გაკვალა. მაგრამ აღმოსავლეთიდან მოსალოდნელი მუქარის გარეშე და კონტინენტზე ამერიკის შემდგომი დარჩენის იმედით, ევროპის სახელმწიფოთა ნაწილს ეგონა, რომ პატარ-პატარა ომების წარმოების ფუფუნება ექნებოდათ, თანაც, რისკის გარეშე. მაასტრიხტს 1992 წელს, ვილი ბრანდტის გარდაცვალების წელს, თორმეტმა წევრმა სახელმწიფომ მოაწერა ხელი. ასე აღსრულდა მისი ზრუნვა ევროპაზე, რომელიც მას ასე უყვარდა.

ათი წლის შემდეგ შემოვიდეთ საერთო ვალუტა, ინგლისის გარეშე. ბრიტანული ინტერესების შესაბამისად, გაერთიანება გაფართოვდა, მაგრამ არ გაღრმავებულა. ამასობაში ევროკავშირს ოცდაშვილი წევრი ჰყავს, კიდევ სამი „კარზე აკაკუნებს“. ყოველი ახალი წევრის შემომატებით უფრო ძნელდება მისი მართვა.

ამერიკას შეუძლია წყნარად იყოს: ინგლისი ვაშინგტონს აძლევს გარანტიას, რომ ევროპული სახელმწიფოების მძლავრი გაერთიანების მაგივრად, შეუძლია ბევრ ქვეყანას ელაპარაკოს. ამასობაში მწიფდება აზრი, რომ ევროპის თვითგამორკვევა მხოლოდ ევროს ვალუტის მქონე ქვეყნების ჯგუფში არის შესაძლებელი, მაშასადამე, დიდი ბრიტანეთის და ევროკავშირის სხვა ქვეყნების გამოკლებით. აუცილებლად უნდა გადაილახოს ევროპის აღმოსავლეთად და დასავლეთად დაყოფის ძველი სქემა და პოლონეთი მაინც, ალბათ ჩეხეთიც, უნდა შეუერთდნენ ევროს ზონას. ბრანდტი იმედგაცრუებით შეაფასებდა დღევანდელ პროცესს თუ პრაგმატულად, ვერ გეტყვით. მგონია, რომ ევროზონასა და ევროკავშირს შორის გადაუჭრელ დაძაბულობას ვერ წარმოიდგენდა.

მაპათმა განდის ძალადობაზე უარის თქმის პოლიტიკამ ინდოეთის კონტინენტს დიდი ბრიტანეთისგან პოლიტიკური დამოუკიდებლობა მოუტანა. ევროპის თვითგამორკვევა, ამერიკის უსაფრთხოების პროტექტორატის რანგში, უცვლელად გრძელდება. თუკი ვაშინგტონი და მოსკოვი ვერ მოახერხებენ ერთობლივად მოიგერიონ რაკეტები, შეიძლება შედეგად ევროპა ხელახლა გადაიარაღდეს, მათ შორის, გერმანიაც. შესაძლებელია განმუხტვის პოლიტიკის დასასრული დადგეს, რასაც ბრანდტი ვერც კი წარმოიდგენდა.

შეიცან თავი შენი

ბევრჯერ უთქვამთ, ბრანდტის გამონათქვამები წინასწარმეტყველებას ჰგავსო. „შეიცან თავი შენი“ – კუნძულ დელფიზე აპოლონის ტაძრის წარწერა, ვიღი ბრანდტის, როგორც ადამიანის შესაცნობადაც გამოდგება.

თუკი ცხოვრებამ რაიმე გაკვეთილი ჩაუტარა, უპირველეს ყოვლისა, ის, რომ მბრძანებლობის უნარი არ გააჩნდა. თავს თავისუფალ ადამიანად გრძნობდა, უფრო თავისუფლად, ვიდრე ქვეყანა, რომელშიც იგი დაბრუნდა. და მაინც უწევდა შეგუებოდა დაუძლეველ გარემოებებს. სახეობათა შესახებ მოძღვრებაში შეგუება წარმატების რეცეპტია გადარჩენისთვის ბრძოლაში. ბრანდტმა ეს მეთოდი მანამ გაითავისა, სანამ ბერლინის მმართველი მერი გახდებოდა. უნდოდა დამაჯერებელი ყოფილიყო და არაფერს დაგიდევდათ, რომ ბერლინის კონსტიტუცია მიმართულების განსაზღვრის კომპეტენციას არ ანიჭებდა. კონსენსუსის გზით გამარჯვების მიღწევა იქცა მის ძლიერ მხარედ; ეს თვისება ფედერალური კანცლერობის დროსაც გამოავლინა. პორსტ ემკემ მოსწრებულად შენიშნა: „უფროსის როლში ყოფნა არ უყვარს“. დიდხანს გრძნობდა თავს სხვათა და გარემოებათა „გავლენის ქვეშ“. ხანდახან მინატრია, ვიღის მეტი სიმტკიცე გამოეჩინა პარტიის შიგნით მასთან დაპირისპირებულთა წინაშე. როცა სათანადო რჩევას შევთავაზებდი, მოქრით მპასუხობდა: „ეს მე არ ვარ. ეს არ მინდა“.

როცა ერთხელ დანანებით ვუთხარი, მიმართულების განსაზღვრის კომპეტენციის ძალაუფლებრივ ინსტრუმენტებს არ იყენებ-მეთქი, თავი აარიდა პირდაპირ პასუხს: ეს მხოლოდ ერთხელ შეიძლება გამოიყენო, კერძოდ, კოალიციის დასასრულებლადო. „მიმართულების განსაზღვრის კომპეტენცია ამონურულია, როცა პარტნიორი მას არ ემორჩილება“. ერთი პირობა, გადადგომამდე ცოტა ხნით ადრე, ფიქრობდა, შინაგან საქმეთა მინისტრი გენშერი ხომ არ გავათავისუფლოო, მაგრამ გადაიფიქრა, რადგან ამით კოალიციაც დაიშლებოდა. მახსენდება, ანგელა მერკელმა როგორ გადაყლაპა ზეკოფერის მუქარები და რიოსლერის შანტაჟი – დარწმუნებული ვარ, არ დავიწყებია. ვერცერთს ვერ მოხსნიდა, თუ კანცლერად დარჩენა უნდოდა. ნორბერტ რიოტგენი კი მარტივად ჩაანაცვლა პეტერ ალტმაიერით.

ჩრდილოეთ-სამხრეთის კომისიაში შემავალი ოცდაერთი პიროვნება – ინდუსტრიული, განვითარებული და განვითარებადი ქვეყნების წარმომადგენლები, მითითებების გაცემას მიჩვეულები იყვნენ, მითითებების მიღებას კი – არა. განსხვავებული ინტერესების და შეუთავსებელი პოზიციების მქონე ადამიანების გაერთიანება მხოლოდ ერთი საერთო საქმის ირგვლივ შეიძლებოდა. გლობალური კომისიის კრას გამოიწვევდა საკითხების კენჭისყრაზე დაყენების მცდელობა. ვილი ბრანდტს ჰქონდა ავტორიტეტი და დამაჯერებლობა, გრძელი და მომქანცველი დებატების ბოლოს მაინც ახერხებდა საერთო მიზნის ჩამოყალიბებას. რაც სამართლიანია, ყველასთვის მისაღებია.

ეს თვისებები, რომელთაც ბრანდტი განასახიერებდა, ქმნის იმის ნაწილს, რასაც ქარიზმას უწოდებენ. ქარიზმას ფულით ვერ იყიდო. ვერც პარლამენტი ან სახელმწიფოს მეთაური მოგანიჭებს მას ორდენივით. არც სილარიბე ან სიმდიდრე განაპირობებს მას; თუმცა, გარკვეული სახის სიმტკიცეს აუცილებლად მოითხოვს. არავინ იცის, რამდენმა ადამიანმა ჩაიტანა

საფლავში გამოუვლინებელი ქარიზმა, რადგან ახალგაზრდობის სიძნელეებმა გატეხა. შესაბამისად, ბედმაც უნდა გაგიღი-მოს. და ბრანდტს ბედის გაღიმება ხშირად სჭირდებოდა, რათა დაბრკოლებებს არ გაეტეხა, ანდა „რაიხში“ არალეგალური ვიზიტებისას არ „ჩავლოთ“. ქარიზმას გამბედაობაც სჭირდება, რაც ასვე ხშირად გამოუვლენია, და კიდევ ძალა, დამარცხები-სას ფეხზე წამოდგომის ძალა. და მაინც, რომ შეიძლებოდეს ამ თვისებების ერთმანეთში ისე აღრევა, რომ ან მეფისტოფელი მივიღოთ და ან ფაუსტი, ქარიზმა ექნება თუ არა, კაცმა არ იცის.

ინტუიციაც საჭიროა – როცა გონება უეცრად გაგიბრნყინდება და მიხვდები, რომ მარტო გვირგვინის დადება არ კმარა, უნდა დაიჩოქო და ამას აკეთებ კიდეც. ვარშავამ პირ-დაპირ მიიყვანა მშვიდობის ნობელის პრემიამდე. ეს პრემია ბრანდტისთვის, ბევრ სხვა რამესთან ერთად, მთავარს – მის „მესთან“ ჩვეულებრივი დამოკიდებულების ჩამოყალიბებას ნიშნავდა. ჯერ კიდევ ბერლინში ვაკვირდებოდით ალბერტ-ცი და მე, როგორ უჭირდა ბრანდტს „მე“-ს თქმა. ან „ჩვენ“-ს ამბობდა, ან ცდილობდა უპირო და სხვა გრამატიკული ფორ-მებით ესარგებლა იმის სათქმელად, რაც „აუცილებელი“ ან „სასურველი“ იყო. ახალგაზრდობაში და ემიგრაციაში ესწავლა აზრების ფრთხილი და მშრალი ჩამოყალიბება. „მე“ ჯობდა არ ეხსენებინა. ეს მმართველი მერის და შემდეგ საგარეო საქმე-თა მინისტრის სტილს ბუნდოვანს, არამკაფიოს ხდიდა. გვინ-დოდა მკაფიოდ დაგვენახა მართვის სადაცეები. რაც არ უნდა ვთქვათ, „სასურველიას“ ყოველთვის სჯობს „მე ვისურვებდი“ ან სულაც „მე მინდა“.

სიტყვა, რომელიც ნობელის პრემიის გადაცემაზე წარმო-თქვა, მისი მეტყველების სტილის საოცარ გარდაქმნას მოას-წავებდა. ბედნიერი ვიყავი, უცებ როგორ თავდაჯერებულად ამბობდა „მე“-ს. „და თუკი უფლებას მომცემთ დავამატო: ჩემ-

თვის რამდენს ნიშნავს გერმანელი ხალხის სახელით ჩემი საქ-
მიანობის დაფასება. რომ წილად მხვდა წარსულის წარუშლელი
ძრნოლვის და მშვიდობის ნების ერთმანეთთან შეთავსება“. ნო-
ბელის პრემიით დააჯილდოვეს ადამიანი, რომლის ბიოგრაფია-
საც წუნს ვერ დაუდებდი და მისი სამშობლო. ამით შეეძლო ეა-
მაყა და ამაყობდა კიდეც ყოველგვარი ამპარტავნობის გარეშე.
ნობელის პრემიამ ჩემს მეგობარს საკუთარი ღირსების რწმენა
შემატა, თუმცა მას ეს ჰქონდა, მაგრამ არ ამჟღავნებდა.

„უკანალში მეტი ინტუიცია აქვს, ვიდრე ზოგიერთს – თავ-
ში“ – ამ ცოტა უხამს გამოთქმას დღესაც უცვლელად ვი-
ზიარებ. მაგრამ ინტუიციის აუცილებელი ნიჭი საკმარისად
ვერ ხსნის მისი სრულყოფილი ქარიზმის ფენომენს. კაცმა რომ
თქვას, ბრანდტს თავისუფლად შეეძლო თავისი წარსულით ეა-
მაყა. თვითნაბადი იყო ამ სიტყვის საკუთესო გაგებით, საკუ-
თარი ძალით მიაღწია ყველაფერს, დამოუკიდებელი, არავის
ვალი არ ჰქონდა არც ფინანსების მხრივ და არც პროფესიულ
კარიერაში ემართა ვისმესი. თავად იყო საკუთარი თავის პა-
ტრონი და ისწავლა გრძნობების მართვა, იმედების მოთოკვა,
განცდების დამალვა. ინტროვერტულ პიროვნებად იქცა და
არავის იკარებდა ახლოს. ვინც რუთის და მისი ვაჟების მო-
გონებებს წაიკითხავს, ვერ აღმოაჩენს უდარდელ, თბილ, მხია-
რულ ოჯახურ ატმოსფეროს. ვიღი თავის სამყაროში ცხოვრობ-
და – ემოციებით აღსავსე და თავად მგრძნობიარე.

სამყარო მას სულ უფრო დიდი გამოწვევების წინაშე აყენებ-
და და აეჭვებდა, ვაითუ ვერ დავძლიოო. არ არსებობს პროფე-
სიული განათლება, რომელიც გასწავლის მმართველ მერობას,
საგარეო საქმეთა მინისტრობას ან ფედერალურ კანცლერობას.
მხოლოდ მაშინ, როცა ყოველივე ამას მიაღწევდა ხოლმე, გა-
მოიკვეთებოდა დროდადრო, შეძლებდა თუ არა თანამდებობის
და ამოცანების თავისგართმევას და კვალის დატოვებას. თავად
უნდა ეპოვა საკუთარი გზა სამყაროში. არ მახსენდება, რო-

დესმე გვესაუბროს ჩვენ მაქსიმაზე „შეიცან თავი შენი“. მაგრამ სწორედ ეს იყო მისი ამოცანა – საკუთარი თავის რწმენა ჰქონდა და არ შემდრკალიყო უმთავრეს დაბრკოლებათა წინაშე, მიჰყოლოდა თავის პრინციპულ მრწამსს, ალბათ ხედვასაც და თან მყარად მდგარიყო მიწაზე. ვიღი იყო მიწიერი მეოცნებე. თავის შინაგან კომპასს ენდობოდა. საკუთარი თავის ასეთი რწმენა კი იშვიათია, ამას ჰქვია „მე“-ს სუვერენიტეტი. მრავალი განსხვავების მიუხედავად, ასეთი თავდაჯერება მხოლოდ ადენაუერისა და კოლისთვის შემიმჩნევია.

ბოროტი და მდაბიური განზრახვით 1961 წელს ადენაუერმა რომ ბრანდტის უკანონო შვილობა, გვარის შეცვლა და ემიგრაცია აიგდო მასხრად და თან ამტკიცებდა, საბჭოთა კავშირმა კედელი ბრანდტის დასახმარებლად აღმართაო, ლაპარაკის უნარი დააკარგვინა ბრანდტს. სიძულვილსა და სიმართლეში გაზავებულმა შხამმა დაუცველი გახადა. შეურაცხყვეს მისი ბიოგრაფია, რომლითაც ამაყობდა. ეს ჭრილობა არ მოშუშებია, არც ათი წლის შემდეგ, ოსლოში „მე“-ს გათავისუფლების შემდეგ.

აუცილებელია ძალაუფლების წყურვილი, თუ გინდა რომ მართო. ეს არც ეკონომიკაში, მეცნიერებასა თუ კულტურის სფეროშია პრინციპულად განსხვავებული, ვიდრე პოლიტიკაში. ბრანდტს ყველა თანამდებობაზე ჰქონდა მართვის სურვილი, სადაც კი მინახავს: ბერლინში, პარტიაში, საგარეო უწყებაში, სოციალისტურ ინტერნაციონალში, რომელიც ევროპული ორგანიზაციიდან გლობალურ ორგანიზაციად აქცია, ფედერალური კანცლერის თანამდებობაზე და ჩრდილოეთ-სამხრეთის საერთაშორისო კომისიის თავმჯდომარეობისას. თითეული ეს პოსტი მართვის მეთოდების განსხვავებულ მოთხოვნას საჭიროებდა. დიქტატორის ტიპს არაფერი გამოუვიდოდა, გინდაც დემოკრატიის საბურველში გახვეულიყო.

ჰერმან ჰიონერლმა, რომელმაც შემოგვინახა შინაგან საქმეთა ფედერალური მინისტრისთვის ნიშანდობლივი გამონათქვა-მი, მთელი დღე ვერ ვირბენ იღლიაში კოსტიტუციაამოჩრილი, ერთხელ დანანებით და მონიწებით თქვა, ბრანდტი ამ ხის-ტი საქმისთვის ძალიან რბილიაო. მარტო იგი არ შემცდარა. სწორედ იმიტომ შეძლო ბრანდტმა სხვადასხვა ამოცანისთვის მართვის სხვადასხვა მოდელი მოერგო, რომ ჯერ კიდევ ემი-გრაციაში ისწავლა მოქნილობა. მისი ანტენები ბევრ სიგნალს ისე ამუშავებდა, რომ ამ მგრძნობიარე კაცს თავისი მიზანისთვის არასოდეს უღალატია. ბევრი ვერ აფასებდა სათანადოდ და ეგონათ, იოლად ვმართავთო. ვინც მას „ღრუბელ ვილის“ ეძახდა, ბოლოს სულელი აღმოჩნდა. ბრანდტი ვერავინ გადაიყვანა იმ გზიდან, რომელსაც თავისი შინაგანი კომპასი უჩვენებდა.

ვინც თითქმის ოცდახუთი წელი – უფრო დიდხანს, ვიდრე ვინმე ბებელის შემდეგ – სათავეში ედგა სოციალ-დემოკრა-ტიულ პარტიას, კარგად იცნობდა მის ორგანიზაციას და მექა-ნიზმებს, მან იცოდა, როდის და ვისთვის უნდა დაერეკა. ეჭვი არაა: ბრანდტს უყვარდა ძალაუფლება. იქ ვიყავი, როდესაც შმიდტი პირველად მოინახულა კანცლერის ახალ აპარატში. შმიდტმა უთხრა: „ვილი, პატიება უნდა გთხოვო. თავს ძლივს ვართმევ მხოლოდ ამ საქმეს და სიმართლე გითხრა, აზრზე არა ვარ, როგორ ახერხებდი თან პარტიის მართვასაც. მე ამას ვერ შევძლებდი“. ვილის ასეთი სიტყვები სიამოვნებდა. საწყენად კი დაურჩა, როცა მოგვიანებით ენა მიუტანეს, შმიდტი ნანობს და შეცდომად მიაჩნია, რომ პარტიის თავმჯდომარეობაც არ მოინ-დომაო. ბრანდტს აბრაზებდა, მეტიც, გულს სტკენდა შმიდტის კრიტიკული და უპატივცემლო გამონათქვამები, თუმცა ძალაუ-ფლების სიყვარულს არ უნელებდა. მან ასე იცოდა თქმა, „რომ მოვინდომო, ჰელმუტი ორ კვირაში კანცლერი აღარ იქნება“.

ბრანდტის მიერ ძალაუფლების სიყვარული იმ გამოცდილე-ბიდან საზრდოობდა, რომ ის იყო სოციალ-დემოკრატიული

პარტიის ბოლო თავმჯდომარე, რომელიც მუშათა მოძრაობიდან მოდიოდა. ალბათ მომავალი მრავალი წლის განმავლობაშიც ერთადერთია, ვინც პარტია არჩევნებში დიდ წარმატებამდე მიიყვანა. იგი პასუხისმგებლობას გრძნობდა თავისი სოციალ-დემოკრატიული პარტიის და მისი მომავლის წინაშე და ეს პასუხისმგებლობა მის მიერ შექმნილი კოალიციის შემდგომ პერიოდსაც სწვდებოდა. თავმჯდომარეს უფრო წინ უნდა გაეხედა, ვიდრე ფედერალურ კანცლერს, რომლის მთავარ ამოცანას კოალიციის შენარჩუნება და გაძლიერება წარმოადგენდა. შმიდტს შეეძლო თავისთვის უფლება მიეცა და მწვანეებზე ექილიკა. ბრანდტს კი უნდოდა მწვანეები შესაძლო პარტიორებად შეენარჩუნებინა. ვერ დაეთანხმებოდა კანცლერის განზრახვას, შეეკავებინა ერთარდ ეპლერი, რომელიც ბონში დიდ სამშვიდობო დემონსტრაციაზე სიტყვით გამოსვლას აპირებდა. მას არ უნდოდა და არც ჰქონდა უფლება, დაეფრთხო ახალგაზრდა თაობა და თანაც მთავრობის მეთაურს უნდა დადგომოდა გვერდში.

პარტიის თავმჯდომარისა და კანცლერის ერთ პიროვნებაში გაერთიანებას უეჭველად აქვს უპირატესობა, რადგან ფუნქციების გადანაწილება რთულია და ორ მმართველ ფიგურას შორის პიროვნულად უპრობლემო ურთიერთობის დროსაც კი წამოიჭრება გადაწყვეტილებების მიღების საჭიროება, რომელიც ამ ფუნქციების განსხვავებული ინტერესებიდან გამომდინარეობს. ბრანდტის შემთხვევაში ბედნიერება იყო, რომ მისი „ისიც და ისიც“ მის ბუნებას შეესაბამებოდა. მართალია, ამ მიდგომისთვის მას აკრიტიკებდნენ, მაგრამ რწმენაგანმტკიცებული ვილი არასდროს იბნეოდა. მისი ცხოვრების გზამ და შინაგანმა კომპასმა ერთი მარადიული რამ ასწავლა: „ან-ან“, „მეგობარი და მტერი“ უფრო ეფექტურია და დიქტატორული, მაგრამ უპირობო კაპიტულაციის პირობებშიც არ ამართლებს.

და მითუმეტეს, თუ სოლიდური დემოკრატიული წარმატების მიღწევას ელტვი.

თავს უფლებას მივცემ, უბრალოდ ვთქვა: ბრანდტის პოლიტიკა ითვალისწინებდა „ისიც და ისიც“ მიდგომის მრავალმხრივ გამოყენებას. ბრანდტს არასდროს სჯეროდა, რომ ისტორიაში რაღაცების თავიდან აცილება შეუძლებელი იყო. იმის თქმა, რომ ესა თუ ის გადაწყვეტილება უალტერნატივოა, პოლიტიკურ კრახად მიაჩნდა. გონითა და ფანტაზით დაჯილდოვებული ადამიანები ყოველთვის იპოვიან გამოსავალს, თუკი წარმატება სწყურიათ. კომპრომისი დემოკრატიის წესია, თუკი საქმე სინდისს არ ეხება.

ამ მიდგომითაა დაღდასმული სოციალ-დემოკრატიული პარტიის და გერმანიის ერთიანი სოციალისტური პარტიის 1987 წლის ერთობლივი დოკუმენტი, რომლის უმთავრესი ინტერესი მშვიდობის შენარჩუნებაა. განმუხტვის მთელი პოლიტიკა ეყრდნობოდა პრინციპს, შეგვენარჩუნებინა სტაბილურობა ევროპაში და არ გვეცადა ერთმანეთის იდეოლოგიურად გადაბირება. არავის უცდია მოსკოვში კომუნისტად ვექციე და არც მე მიცდია ვინმეს შემოტრიალება დემოკრატიისკენ. და ბრანდტიც წყნარად, მშვიდად ინარჩუნებდა პოზიციას, რომ იდეოლოგიური განსხვავებები მეორეხარისხოვანია. ისტორია მიიღებდა საზღვრების შესახებ გადაწყვეტილებას, თუკი ძალადობისგან თავისუფალი ქმედება უმაღლესი პრინციპი იქნებოდა.

არსებობს სასხვათაშორისო „ისიც და ისიც“, რომელსაც ბრანდტი იზიარებდა. სოციალ-ლიბერალური კოალიცია არა-სოდეს შეწინააღმდეგებია ბონის პოზიციას, რომელიც მიიჩნევდა, რომ ჯერ გერმანია უნდა გაერთიანებულიყო და შემდეგ შეიძლებოდა განმუხტვის პოლიტიკაზე საუბარი, მაგრამ სრულიად საწინააღმდეგოდ იმოქმედა. მას ფორმალურად არა-სოდეს უარუყვია გერმანიის გაერთიანების შესახებ ბონის ძველი მოთხოვნა, რომელიც 1937 წლამდე არსებულ საზღვრე-

ბში გაერთიანებას გულისხმობდა, მაგრამ პრაქტიკულად, გამორიცხა ოდერისა და ნაისეს ხაზის აღმოსავლეთით ტერიტორიული მოთხოვნების დაყენება. და არც საბჭოთა კავშირი არ შენინააღმდეგებია ოდესმე ვარშავის ხელშეკრულების გადაწყვეტილებას, რომლის თანახმადაც დაუშვებელი იყო ბონთან ხელშეკრულების დადება, სანამ ფედერაციული რესპუბლიკა ხალხთაშორისი სამართლის სუბიექტად არ აღიარებდა გდრ-ს, თუმცა პრაქტიკულად საბჭოთა კავშირიც გვერდს უვლიდა მას.

ჩვენი განმუხტვის პოლიტიკა ესწრაფვოდა ელიარებინა რეალობა და, ამავე დროს, შეეცვალა იგი. რამდენად წარმატებულად შეცვლიდა რეალობას ბერლინში, გერმანიასა და ევროპაში, ვერავინ განჭვრებდა, როდესაც კედლის აღმართვის შემდეგ პატარ-პატარა ნაბიჯების გადადგმა დაიწყო. ბევრი ადამიანი და ფაქტორი, უკვე ნახსენები ბედიც უნდა დამთხვეოდა ერთმანეთს ამ შედეგისთვის. ერთ-ერთი ფაქტორი ბრანდტის პიროვნებაც გახლდათ. ძალაუფლების სურვილი არ აკლდა; მაგრამ მის მაცდურ ძალას არასოდეს დამორჩილებია, არასოდეს ამცირებდა და არ ანადგურებდა ადამიანებს. მას დიდად არაფრად მიაჩნდა გადაწყვეტილებები მსოფლიოს შეცვლის შესახებ. პარტიის, მთავრობისა თუ შემდეგი საკანონმდებლო პერიოდის ამოცანების მისაღწევად იგი ამჯობინებდა „ისიც და ისიც“ – პოზიციის სანდო გზას, მაგრამ არასოდეს დაუკარგავს ორიენტაცია. მისი შინაგანი კომპასი ფართო პორიზონტსაც ისევე აჩვენებდა, როგორც უახლოეს მიზნებს, რომელთა მიღწევასაც იგი ესწრაფვოდა.

რა იყო მისი შინაგანი კომპასი? რასაკვირველია, უფრო სამართლიანი საზოგადოება. ერთნი მას სოციალიზმს უწოდებდნენ, მეორენი სოციალ-დემოკრატიზმს. შემთხვევითი არ არის, რომ ასეთ ზუსტ სახელდებას გაურბოდა, რადგან თავად ზუსტი სახელი არ ეგულებოდა. არანაკლებ გასაკვირია, რომ არ არსებობდა ერთიანი კონცეფცია, რომელსაც „ბრანდტის გეგმას“

დაარქმევდი. არც არავის მოუსაკლისებია და უკითხავს, გეგმა სად არისო. ბრანდტის საყრდენს წარმოადგენდა ადამიანების ნდობა მის მიმართ, ის, რომ მას ჰქონდა ორიენტაცია, რომელ-საც შეიძლებოდა გაჰყოლოდი. ესეც ქარიზმაა.

ნაციისტების რაიხის მიმართ უზადო წინააღმდეგობა, დასავლეთ ბერლინის ინტერესების დასაცავად მკაფიო სიმტკიცე და მისი განმუხტვის პოლიტიკის დამაჯერებლობა: ამ თვისებების ერთობლიობით მოიპოვა ბრანდტმა ნდობა აღმოსავლეთსა და დასავლეთში. მისი სიმტკიცე გადალახულ დაეჭვებას ეფუძნებოდა. გამოცდილება კარნახობდა – მხოლოდ სინამდვილით გამოწვეული აღშფოთება წარმოქმნის ენერგიას, რომელმაც ახალი სინამდვილე უნდა შექმნას. მისი ცხოვრების გზა ნათელი იყო: არ დავრჩეთ პასიურნი, არამედ შევძლოთ „მე“-ს თვითგამორკვევა; შემდეგ საკუთარი ქვეყნის თვითგამორკვევა და ბოლოს ევროპის თვითგამორკვევა.

მოცემულ სიტუაციაში მისი კალიბრის გერმანელი მეორე არ არსებობდა. ამიტომ იყო იგი ბედნიერი მონაპოვარი ქვეყნისთვის, ევროპისთვისაც, მის გარეშე ისტორია სხვანაირად წარიმართებოდა. ვალენტინ ფალინმა – იგი დიდხანს გახლდათ ბონში საბჭოთა კავშირის ელჩი და ხელშეკრულებების მოლაპარაკებების მონაწილე, ერთხელ ასეთი რამ თქვა: – ბრანდტის განმუხტვის პოლიტიკა რომ არა, გორბაჩოვი კრემლში პირველი კაცი ვერ გახდებოდა. გორბაჩოვის გარეშე კი გერმანია ვერ გაერთიანდებოდა.

ვილის ერთი გამონათქვამი ჩამრჩა მეხსიერებაში, ოლონდ აღარ მახსოვს, როდინდელია და ვის უთხრა: „შეიძლება ეგონს გული წყდება, რომ დიდხანს სრულფასოვნად არ აღიქვამდნენ“. იგივე შეეძლო დიდი ხნის აუხდენელ თავის მოლოდინზეც ეთქვა – როდის მიიღებდა მას საკუთარი ქვეყანა. ჩემს შემთხვევაში ეს ეხებოდა ვერმახტის პერიოდს – მაოცებდა, რომ მაშინ ვერავინ შეამჩნია ჩემი ებრაელი ბებიის არსებობა.

ჩვენი ბიოგრაფიიდან ბევრი მსგავსება მოგხვდებოდათ თვალში. დედამისთან სახლში არასდროს ახსენებდნენ მამას. ჩემი მშობლების სახლში არასოდეს ახსენებდნენ ებრაელ ბებიას, თუმცა, ვიცოდი, რომ მამაჩემი თავის საყვარელ პროფესიას – მასწავლებლობას ჩამოაშორეს, რადგან მეუღლესთან გაყრაზე უარი თქვა. სიტყვა „ებრაელი“ ან „ებრაული“ არა-სოდეს გამოთქმულა. შობას ყოველთვის ბერლინში, ბებიას-თან აღვნიშნავდით, მისი შვიდივე შვილი და მათი მეუღლები იკრიბებოდნენ. ბიძაჩემი ფრიტცი ბრაზილიაში გაიქცა, მეორე ბიძას – კურტს კი მამაჩემთან ერთად შევხვდი ანჰალტერის სადგურზე 1934 წლის ერთ საღამოს – თავი გადაპარსული ჰქონდა და ორივე ოქროს კბილი ამოეგლიჯათ ორანიენბურგის საკონცენტრაციო ბანაკში. „არათერი მკითხოთ!“ იყო ერთადერთი, რაც მატარებელში ასვლამდე გვითხრა და იტალიის გავლით გაემგზავრა შანხაიში.

ბრანდტსა და ჩემ შორის ასაკობრივ განსხვავებას წარმომავლობის ტაბუსთვის მნიშვნელობა არ ჰქონია: მან ემიგრაციაში გვარი შეიცვალა; მე ვერმახტის ტაბუ შევინარჩუნე. ჩვენი ნაცნობობისა და დაახლოების ათწლეულების განმავლობაში არასდროს გვისაუბრია ამ მემკვიდრეობაზე. სანამ ერთ-ერთი ჩვენგანი გულახდილ საუბარს არ წამოიწყებდა, მეორე კითხვებს არასოდეს სვამდა. ამ ურთიერთპატივისცემაში იფურჩქნე-

ბოდა მეგობრობა, რომელიც აკავშირებდა დიდ პოლიტიკურ ერთსულოვნობას და სხვადასხვა პიროვნულ თვისებებს.

შმიდტის ებრაელი ბაბუის შესახებ, რაც ჟისკარ დ'ესტენის-გან გავიგეთ, ვილის და მე არასოდეს გვისაუბრია. არც ჰელ-მუტს და მე. მესმოდა, რომ არაფრით არ უნდოდა, მისი სახელი ამ კუთხით გახმაურებულიყო. გულში კი მიფიქრია, რომ იყო იყო მესამე, ვის ოჯახშიც სხვანაირი სახის, მაგრამ მაინც არსებობდა ტაბუ.

*

მუსიკოსობაზე თორგაუში გატარებული ბავშვობის წლებიდან ვოცნებობდი. მუსიკალური ალზრდა მიგიღე იოჰან ვალეტის გუნდში, ორატორიებს ვასრულებდი, რაც აბსოლუტურ სმენას და ფორტეპიანოზე დახვეწილად დაკვრას მოითხოვდა, ვიოლინოზე კი სკოლის ორკესტრის მეორე ვიოლინოს იქით ვერ წავედი.

სხვანაირად გამოვიდა: 1974 წელს ვცადე ლევ კოპელევი ფედერაციულ რესპუბლიკაში ჩამომეყვანა. მას სურდა აღწერა გერმანელი ექიმის, ფრიდრიხ იოზეფ ჰაასის ისტორია; ეს უკანასკნელი წარმოშობით მიუნსტერის აიფელიდან იყო და 1825 წელს დეკაბრისტების აჯანყების შემდეგ „გადასახლებულთა ანგელოზად“ მონათლეს. მიუნსტერის აიფელზე პასუხისმგებელი ქრისტიან-დემოკრატიული პარტიის დეპუტატი ალოის მერტესი გახლდათ, განმუხტვის პოლიტიკის დაუფარავი მონინააღმდეგე, რომელსაც ვერ დაევინებინა „გაერთიანების“ სასტიკი დამარცხება, ორი წლის წინათ, ნდობის ვოტუმის კენჭისყრაში. მას ვთხოვე კოპელევს დახმარებოდა და ცოტა ქარაფშუტულად ვუთხარი: „კაცმა რომ თქვას, მუსიკა მინდოდა მესწავლა, მაგრამ ფიურერმა არ დამანება“. მშრალად მომიგო: „აფსუს! აი, ჰიტლერის კიდევ ერთი შეცდომა“.

მუსიკის გარეშე ცხოვრება ვერ წარმომედგინა. საშინლად განვიცადე, როცა ვერმახტში გატარებული ორი წლის შემდეგ ფორტეპიანოს სწავლას იქ ვეღარ გავაგრძელებდი, სადაც შევწყვიტე. ამიტომაც აღმაფრთოვანებდა ხოლმე ჰელმუტ შმიდტის საკონცერტო ნიჭი. ბრანდტი მუსიკის სფეროში დილეტანტი იყო. როდესაც მოგზაურობისას მასპინძლებს ეგონათ ხოლმე, რომ ხალხური მუსიკით სიამოვნებას მიანიჭებდნენ, ზრდილობიანად კი უსმენდა, მაგრამ ინტერესს არ ავლენდა. სავალდებულო ვაიბერფასტნახტის დროსაც კი არ ჩნდებოდა ხოლმე, როცა „შერეკილები“ ბონში პარტიის ცენტრალურ ოფისში გვაცხრებოდნენ თავს. მხოლოდ ერთხელ ვნახე გასაოცარი აკუსტიკის მქონე ბერლინის ფილარმონიაში – დარბაზის გახსნაზე. ოპერის, თეატრის ან გამოფენების მიმართ ინტერესი არ შემიტყვია. იმ ღონისძიებებზე, სადაც მიდიოდა, როგორც წესი, სიტყვით გამოსვლა უნევდა. იშვიათად ეძლეოდა შესაძლებლობა, შინ წყნარად ეკითხა; ამიტომ, გასაგებია, რომ ნაკლებად ხიბლავდა სხვების მოსმენა.

შმიდტთან ჭადრაკის თამაში შემეძლო, საბედნიეროდ, თითქმის ერთ დონეზე ვთამაშობდით. წარმოუდგენელი იყო, მასთან ერთად ცოტა გაბედულ ანეკდოტზე გაგცინებოდა. ვილი და მე ერთმანეთს სულ ახალ-ახალ ანეკდოტებს ვუყვებოდით. როცა ვიწრო წრეში ვილი ყვებოდა, ყველაზე მეტად თავად ხალისობდა.

ბრანდტს სერიოზული საუბრები მწერლებთან, მაგალითად ჯგუფი 47-ის წევრებთან, ძალიან სიამოვნებდა. ამ საუბრები-დან ისრუტავდა არგუმენტებს, მოსაზრებებს, გაფრთხილებებს და იდეებს, რომელთაც თავის პოლიტიკურ ყოველდღიურობაში ვერსად გაიგონებდა და ამდიდრებდა საკუთარ სამყაროს და საკუთარ ორიენტაციას, სადაც თავს მყარად გრძნობდა. გამორიცხულია, როდესმე თავში მოსვლოდა ფრაზა, რომელსაც შმიდტი ხშირად ხმარობდა: ისტორიის სქოლიო ვარო. გინდაც

მოსალოდნელი წინააღმდეგობის გამომწვევ თავმდაბლობად მიგვეღო ეს გამონათქვამი, საკუთარ თავში მსგავსი დაეჭვებისგან ბრანდტი ემანსიპირებული იყო. სამაგიეროდ, შმიდტი შესაშური აქტიურობით მონაწილეობდა კულტურულ ცხოვრებაში და ფილოსოფიურ დებატებში და ისეთი ფართო სულიერი დიაპაზონი გამოიმუშავა, ბრანდტს რომ არასოდეს მოუნდომებია.

მიუხედავად ასეთი განსხვავებისა, ამ ორ კაცს ერთი რამ აკავშირებდა – ორივეს დამოუკიდებლად მიეღწია თავ-თავიანთი აღმავლობისთვის. არც ემიგრაციიდან დაბრუნებულისთვის და არც ვერმახტის ყოფილი ოფიცრისთვის არ წაუკრავს ვინმეს ისე ხელი, რომ ვალში ყოფილიყვნენ. ორივე ალფა-ცხოველმა საკუთარ გზაზე იარა. მათ განსხვავებულ ხასიათს, ინტერესებსა და ნიჭს, – პარტიისა და სახელმწიფოს წინაშე საერთო საქმეში გამოვლენილი დისციპლინა რომ არა, – შეიძლებოდა შეუქცევად კონფლიქტებამდე მივეყვანეთ.

სახელი, რომელიც მე მომანიჭეს – „განმუხტვის პოლიტიკის არქიტექტორი“ – შესაფერად მიმაჩნია: მშენებლობის დამკვეთი ბრანდტი გახლდათ. იგი მაძლევდა მითითებებს და იცოდა, სად და როდის უნდა დავკითხოდი მას. მშენებლობის დამკვეთის გარეშე არქიტექტორი ვერ გავხდებოდი. სამართლიანად უკავშირდება გერმანიასა და ევროპაში ბევრი შენობა ბრანდტის სახელს, მათი არქიტექტორების სახელი კი გაფერმურთალდა და მხოლოდ ექსპერტებმა და დამფასებლებმა თუ იციან. ჩვენს ნაწერებსაც იგივე ბედი ეწევა. მე ბევრი რამ გამოვაქვეყნე ბრანდტის სახელით და არასდროს მომიწონებია ამით თავი. რასაც ის ცვლიდა, ასწორებდა ან მიიღებდა შეთანხმებულად თუ შეთანხმების გარეშე, უკვე მისი საკუთრება ხდებოდა. უბრალოდ, უჩვეულო იყო, როგორ გამოგვდიოდა ეს ამბავი!

მომეცა შესაძლებლობა, მესწავლა ბერძნული, ამ პრივილეგიას დღემდე უაღრესად ვაფასებ. არც ბრანდტს და არც შმიდტს არ დასჭირვებიათ ამ ენის სწავლა, რომ ჩაწვდომოდნენ ანტიკურ სიბრძნეს: „შეიცან თავი შენი“ და მის მიხედვით ეცხოვრათ. ერთობლივი საქმისთვის საჭირო დისციპლინამ მათთის თვითშეცნობა ხასიათის ნაწილად აქცია.

„როდესაც ვილი ბრანდტი 1961 და 1965 წლებში კანცლერობის კანდიდატად წარვადგინეთ, საჯაროდ არავის უთქვამს, მე უკეთესი კანდიდატი ვარო“. შმიდტის ეს მოგვიანებით ნათქვამი სამი წლით ადრე გარდაცვლილ ბრანდტს აღარ წაუკითხავს. გაახალისებდა, რადგან თავადაც ასე ფიქრობდა. მათ ერთა-მენთისთვის არასოდეს გაუმნელიათ, რას ფიქრობდნენ ერთ-მანეთზე. პატივისცემა და აღიარება სუბიექტურ, ერთის მიერ მეორის სისუსტეების შესახებ საკმაოდ გამყარებულ შეფასებას ამარცხებდა. „საკუთარი ტყავიდან ვერავინ გამოძვრება“, მისწერა ერთხელ ბრანდტმა შმიდტს. შმიდტსაც თავისუფლად შეეძლო იგივე მიეწერა ბრანდტისთვის.

„რაც უფრო ვბერდები, მით უფრო მემარცხენე ვხდები“

ბონში, პარტიის თავმჯდომარის კაბინეტში როზა ლუქსემბურგის პორტრეტი ეკიდა. მთავარ ოფისს ბონის პერიოდის დასაწყისიდანვე „ბარაკებს“ ეძახდნენ, თუმცა, ამასობაში, საკმაოდ წარმომადგენლობით და სოლიდურ შენობად იქცა, რადგან არ ვიცოდით, რამდენ ხანს შენარჩუნდებოდა გერმანიის გაყოფა. რეფორმატორი კომუნისტის პორტრეტი, რომელიც ნებისმიერ მომსვლელს თვალში ხვდებოდა იმ „დუნე“ სოციალ-დემოკრატის კაბინეტში ეკიდა, ვინც ჯერ აერჩიათ და მერე გადაერჩიათ. ამის თაობაზე ერთხელ ბრანდტმა თქვა, მაოცებს ამ ქალის სიმტკიცე: „სოციალიზმი არ არსებობს დემოკრატიის გარეშე, მაგრამ არც დემოკრატია არსებობს სოციალიზმის გარეშე“.

როდესაც 1981 წელს ფრანსუა მიტერანი საფრანგეთის პრეზიდენტად აირჩიეს, ვილი აღფრთოვანებას გამოხატავდა და მიესალმა მის განზრახვას, კომუნისტები შეეყვანა მთავრობაში. მე კი, ომგამოვლილსა და ცივი ომის მომსწრეს, ეს, ცოტა არ იყოს, მაფიქრიანებდა. ვილიმ ვაიმარის რესპუბლიკის პერიოდში დაიწყო პოლიტიკური აზროვნება და ისეთი რამ გადაეტანა, რაც მე არ გამომიცდია. „მოიცავდე“, დამარიგა ჭურა, „ამით შეიძლება კომუნისტების მარგინალიზაცია მივიღოთ“. რამდენიმე წლის შემდეგ მივხვდი, რომ ბრანდტმა და მიტერანმა ზუსტად გათვალეს და სწორად იმოქმედეს.

როდესაც ვილი ემიგრაციის პერიოდზე ჰყვებოდა, სიამოვნებით იხსენებდა ხოლმე პარიზში ჰაინრიხ მანთან შეხვედრას. ეს ის დრო იყო, როცა კომუნისტები ერთნაირად ებრძოდნენ სოციალ-დემოკრატებსა და ნაცისტებს. ფრანგი სოციალ-დემოკრატები კი სახალხო ფრონტზე მემარცხენე ძალების თანამშრომლობას უწყობდნენ ხელს, რაც ბრანდტს მოსწონდა. მაშინ გაიცნო კომუნისტი პერმან აქსენი, მოგვიანებით იგი გერმანიის ერთანი სოციალისტური პარტიის პოლიტბიუროს წევრი გახდა; მასთან შევათანხმე ოთხმოციანი წლების შუა პერიოდში პარტიულ დონეზე ცენტრალურ ევროპაში ატომური და ქიმიური იარაღისგან თავისუფალი ზონის საკითხი. ბონში ერთ-ერთი ვიზიტისას აქსენმა სურვილი გამოთქვა ვილი ბრანდტისთვის ხელი ჩამოერთმია. ვილი უკვე დიდი კაცი იყო. ბრანდტი სიამოვნებით შეხვდა, შინაურულად მიმართა პარიზის მერე თითქმის ორმოცდაათი წლის უნახავ მორიდებულ პერმანს, რომელიც ისეთი აღელვებული იყო ამ შეხვედრით, რომ მისდაუნებურად თქვენობით ელაპარაკა ბრანდტს და მერე საკუთარ თავს იმუნათებდა, ვაითუ ვილიმ არასწორად გაიგოო.

აქსენი პონეკერის შეხებულებიდან დაბრუნებას დაელოდა, რათა ეგონ კრანცისგან ჩემი და ჩემი ცოლის დარსზე დაპატიჟების ნებართვა მიეღო. პოლიტბიურომ მას იქ დასაბინავებლად მშვენიერი, მაგრამ არცთუ დიდი სახლი გამოუყო. პერლინში რომ ვბრუნდებოდით, გზაში უფრო თამამად ლაპარაკობდა, იცოდა, რომ არ უსმენდნენ და ბონში ვილისთან შეხვედრა გაიხსენა გულაჩუყებულმა. მხოლოდ სამი წლით უმცროსი იყო ბრანდტზე და თავს მუშათა მოძრაობის პირმშოს უწოდებდა. პარიზის შემდეგ თან სდევდა აზრი, რომ მემარცხენე მოძრაობის გახლეჩამ საშინელი ზარალი გამოიწვია და ნაწილობრივ მაინც ეკისრებოდა პასუხისმგებლობა ყველა იმ კატასტროფაზე, რაც შემდეგ მოხდა. ლირდა ოფლისლვრად ამ გახლეჩის გადალახვა. მას, როგორც პატრიოტს, სურდა, რომ ეს მიზანი დაესახა ჩვე-

ნი ქვეყანისთვის და საერთოდაც, არაფერია საწინააღმდეგო, როდესაც პარტიული ჯარისკაცი ასეთ ხედვაზე დაუფარავად ყველგან ვერ ლაპარაკობსო. როდესაც ატომური, ბიოლოგიური და ქიმიური იარაღის შესახებ ვაწარმოებდით მოლაპარაკებებს, თავის თანამშრომლებს აფრთხილებდა, არ დაგავიწყდეთ, რომ ეს დასავლეთგერმანელები კლასობრივი მტრები არიანო. მე მას გაგებით ვეკიდებოდი და შევძელი დამერნმუნებინა, მეც შენსავით ვაფრთხილებდი ჩემს თანამშრომლებს, კოლეგებისა-გან დაახლოების ყალბ მცდელობას ნუ წამოეგებით-მეთქი.

ოთხმოციანი წლების შუა პერიოდში სოციალ-დემოკრატიულმა პარტიამ და გერმანიის ერთიანმა სოციალისტურმა პარტიამ ერთობლივი სამუშაო ჯგუფის ფარგლებში, იდეოლოგიური განსხვავების მიუხედავად, მშვიდობის შენარჩუნებას პრიორიტეტული მნიშვნელობა მიანიჭეს. „კამათის კულტურა გულისხმობს ღია დისკუსიას სისტემების შეჯიბრის შესახებ“ – ამ თეზისს გდრ-ის პარტიის ზედა ეშელონებში მეტი წინააღმდეგობა მოჰყვა, ვიდრე სოციალ-დემოკრატიულ პარტიაში.

*

ვილიმ საგარეო საქმეთა მინისტრობის დროს მთხოვა შევხვედროდი მის მეგობარს, ლეო ბაუერს, რომელსაც ახლო ურთიერთობები ჰქონდა იტალიასთან და სერვიო სეგრეს – იტალიის კომუნისტური პარტიის ცენტრალური კომიტეტის მდივანს, რათა მათთვის განმემარტა ჩვენი საგარეო და უსაფრთხოების პოლიტიკა. მიზანი ეს იყო: მოსკოვს ამ გზით უნდა მიეღო ჩვენი მოსაზრებები პირველი ხელიდან და მარტო ულბრიხტის შემოკლებულ და არასწორ ინფორმაციას არ უნდა დაყრდნობოდა. სეგრესთან ხანგრძლივი საუბარი იმ დღის წინა საღამოს შედგა, როდესაც მე რაინპარდ გელენთან უნდა მივსულიყვავი

ფედერალურ საინფორმაციო სამსახურში. გელენმა ამიხსნა ფედერალური საინფორმაციო სამსახურის სტრუქტურა და სიტყვა არ დაუძრავს იმის შესახებ, რომ მიუნხენის ერთ-ერთ სასტუმროში სეგრეს, ბაუერისა და ჩემი საუბარი მოისმინეს და ფედერალურ კანცლერს მოახსენეს. კიზინგერი ჩემი ზეპირი განმარტებით დაკმაყოფილდა.

ლეო ბაუერი გავიცანი, როგორც მემარცხენე სოციალისტი. იყო იყო ერთადერთი ადამიანი, რომელსაც ვილი ბრანდტიც და ჰერბერტ ვენერიც მეგობრად მიიჩნევდნენ. მაშინ წარმოდგენა არ მქონდა მის თავგადასავლებით აღსავსე ცხოვრებაზე. „ყოველთვის სოციალისტი ვიყავი, ოღონდ არასწორ ძალას მივენდე“. – ამ ლოზუნგით შევიდა 1932 წელს ახალგაზრდა იმედგაცრუებული სოციალ-დემოკრატი გერმანიის კომუნისტურ პარტიაში. ნაცისტების „დაცვის მიზნით პატიმრობისგან“ რომ გაათავისუფლეს, 1933 წელს პრაღის გავლით გაიქცა პარიზში, იქ დაჰყო 1939 წლამდე, გადასახლებაში მყოფი კომუნისტური პარტიის მმართველობაში, 1940 წელს საფრანგეთში პატიმრობას თავი დააღწია და შვეიცარიაში გაიქცა, იქ 1942 წელს ისევ დააპატიმრეს და ციხეში ჩასვეს, 1945 წელს გაათავისუფლეს და გერმანიაში გაუშვეს, შემდეგ გახდა ჰესენის კომუნისტური პარტიის ფრაქციის თავმჯდომარე, იყო აღმოსავლეთ ბერლინში გერმანიის რადიოს მთავარი რედაქტორი, 1950 წელს ისევ დააპატიმრეს და საბჭოთა(!) სამხედრო ტრიბუნალმა ჯაშუშობის ბრალდებით სიკვდილით დასჯა მიუსავა, 1953 წელს, სტალინის სიკვდილის შემდეგ, ოცდახუთი წლით გააციმბირეს და 1955 წელს იყო ერთ-ერთი იმ 10 000 გერმანელ ტყვეთაგან, რომლებიც ადენაუერმა მოსკოვში ვიზიტისას გამოიხსნა და საბედნიეროდ, ფედერაციულ რესპუბლიკაში გამოუშვეს და არა გდრ-ში. შემდეგ შევიდა სოციალ-დემოკრატიულ პარტიაში და როდესაც ნანენს უარი ვუთხარი უურნალ „შტერნში“ მუშაობაზე, მან ჩაიბარა „შტერნის“ პოლიტიკურ

გამოცემად ჩამოყალიბების საქმე. ბოლოს გახდა „ნოიე გე-ზელშაფტის“ მთავარი რედაქტორი და თანმდებობისა და ტი-ტულის გარეშეც ითავსებდა სოციალ-დემოკრატიულ პარტიისა და იტალიის კომუნისტური პარტიის ურთიერთობების წარმო-მადგენლისა და მოტორის ფუნქციას. 1972 წელს, ვილის ისტო-რიულ არჩევნებამდე ზუსტად ორი თვით ადრე, გარდაიცვალა განსაკუთრებით აგრძესიული კიბოთი.

ამ მემარცხენე სოციალისტზე ნაკლებად მზაკვრულ ეჭვე-ბს როდი ავრცელებდნენ, ვიდრე ბრანდტზე და ვენერზე. მე მისდამი მეგობრულად ვიყავი განწყობილი და ვაფასებდი რო-გორც მგრძნობიარე, ინტელიგენტ და სიმპატიურ ადამიანს, რომლის ცხოვრების გზამაც განსაზღვრა მისი ცნობიერება და ბრანდტისა და ვენერის წინაშე საკუთარი პოზიციის ჩამოყალი-ბება შეაძლებინა.

„განზე მდგომის კარიერა – ლეო ბაუერი კომუნიზმსა და სოციალ-დემოკრატიას შორის“ ჰქვია ამასობაში თითქმის და-ვიწყებული ადამიანის ბიოგრაფიას, რომელიც 1983 წელს გა-მოიცა. წიგნის ბოლოს სათაურით – „სოციალ-დემოკრატიული პარტიის ტრადიციისა და იდენტობის შესახებ“ დაბეჭდილია ინ-ტერვიუ ვილი ბრანდტთან, რომელშიც მას კითხვებს უსვამენ „დღევანდელი პერსპექტივიდან“, მაგრამ ვაიმარის რესპუბლიკის პერიოდიდან დაგროვილი გამოცდილების გათვალისწინებით. „ჩემთვის ვაიმარიდან გამომდინარე ყველაზე მნიშვნელოვანი დასკვნა გახლავთ ის, რომ უაზროდ კამათობდნენ იმის თაო-ბაზე, დემოკრატიას უნდა მიენიჭოს უპირატესობა თუ სო-ციალიზმს“, იწყებს ბრანდტი. „ორივე მათგანის ისტორიული მარცხი – ანდა სამივე მათგანის – მუშათა ძველი მოძრაობის ძირითადი მიმართულებები იმაში მდგომარეობს, რომ ომის შემდეგ დემოკრატია საკმარისად არ განმტკიცდა. მე კვლავაც მწამს, რომ ჰიტლერის შეკავება შესაძლებელი იქნებოდა, რომ არა განხეთქილება მუშათა მოძრაობაში. ამისათვის ისტორიუ-

ლი პასუხისმგებლობა განსაკუთრებით მძიმედ ეკისრება გერმანიის კომუნისტურ პარტიას და მოსკოვის ჰეგემონიას. მუშათა მოძრაობას მთლიანობაში არ გააჩნდა საკმარისად განვითარებული ურთიერთობა დემოკრატიულ ხელისუფლებასთან“.

როდესაც ბრანდტს „გამოცდილების საერთო ჰორიზონტი“ უხსენეს, განაგრძო: „თაობისთვის დამახასიათებელ ფონს მთლიანობაში სერიოზულად უნდა შევხედოთ. არა მხოლოდ ლეო და ჩემსავით მემარცხენე სოციალისტები და ყოფილი კომუნისტები, არამედ ჩვენი თანატოლების უმრავლესობაც, რომლებიც სოციალ-დემოკრატებად დარჩნენ, ჩვენს დროში თავს გრძნობდნენ მუშათა იმ მოძრაობის მემკვიდრეებად, რომელიც მსოფლიო ომის დროს გაიხლიჩა და ყველა იმედოვნებდა ისევ გამთლიანებას“.

მრავლისმეტყველია, რომ ყოფილი კომუნისტი ვენერი ამ განსჯისას არ უხსენებია. ვენერი ბაუერზე ექვსი წლით უფროსი გახლდათ, ეს უკანასკნელი კი ზუსტად ერთი წლით უფროსი იყო ბრანდტზე. ასეა თუ ისე, ბრანდტმა 1983 წელს ამ ინტერვიუთი დაამტკიცა, რომ მკაფიოდ ახსოვდა ომისა და მისი შემდგომი პერიოდი. და გამოამჟღვნა აზროვნების საოცარი თანმიმდევრობა – 1946 წელს, როდესაც სოციალ-დემოკრატიული პარტიის შვედეთის ჯგუფის წამყვანი წევრი იყო, თავის შვედ მეგობრებს შეუთვალა: „ფაქტია, რომ ერთიანი მუშათა მოძრაობის შექმნის შანსი გერმანიაში უშუალოდ ჰიტლერის რეჟიმის დაცემის შემდეგ არსებობდა და ეს შანსი არ გამოყენებულა“. ასე წერდა, როცა ბერლინში ადმინისტრაციულად მზადდებოდა გერმანიის კომუნისტური პარტიის და სოციალ-დემოკრატიული პარტიის შერწყმა. 1983 წელს მიცემულ ინტერვიუში სინანული გამოხატა, რომ მათი რიცხვი მცირდება, ვინც ჯერ კიდევ „ბაბელის დროინდელი პარტიის“ წევრებს იცნობდა. მაშინ რომ ვინმეს ეთქვა, მხოლოდ რამდენიმე წელი გავა და კომუნისტების პაპი მოსკოვში მხარს დაგიჭერს მუშათა მოძრაობის გახლეჩვის დაძლევაშიო, ალბათ გიჟად შერაცხავდა.

*

1985 წელს მიხეილ გორბაჩივი შევიდა კრემლში როგორც სკპ-ს გენერალური მდივანი. მას და ბრანდტს შორის სამი შეხვედრა 1985, 1988 და 1989 წლებში შედგა. ეს შეხვედრები სოციალ-დე-მოკრატებსა და კომუნისტებს შორის ურთიერთობების ამა-ლელვებელ და დაუმთავრებელ მონაკვეთს წარმოადგენს. პირ-ველი შეხვედრა მარტივად წარიმართა, ბრანდტის და პალმეს კომისიების მუშაობის შესახებ ინფორმაციის მიწოდებას დაეთ-მო. ორივე დოკუმენტი ერთნაირად აფასებდა ახლად წარმო-ქმნილ გლობალურ სოციალურ საკითხებს, ორივე მათგანი სოციალ-დემოკრატების შედგენილი იყო. ამიტომ, ბრანდტმა შეხვედრისას სიფრთხილე გამოიჩინა. მას არ გამოჰქონდა, რომ გორბაჩივს თავისი პარტიისთვის ახალი მიზიდველობის მინიჭება და სტალინის მიერ ჩადენილი დანაშაულების შემდეგ ლენინის იდეების გაცოცხლება სურდა. ბრანდტს მისი ხედვა სულაც არ მოსჩვენებია მიმზიდველად.

ამ ამბიდან ცოტა ხნის შემდეგ აღელვებულმა მივირბინე ვილისთან და გორბაჩივის ბოლო განცხადების ნაწყვეტი წა-ვუკითხე: „დემოკრატია ისევე გვჭირდება, როგორც ჰაერი სუნთქვისთვის“. ამით გადაწყდება ისტორიული ბრძოლა ევო-ლუციასა და პროლეტარიატის დიქტატურას შორის-მეთქი. ბრანდტმა გამაფრთხილა, საჯაროდ არაფერი თქვაო: „ნუ გა-ვურთულებთ გორბაჩივს ისედაც რთულ საქმეს“.

მეორე შეხვედრისას გორბაჩივმა ხაზი გაუსვა, არაფერი მა-ქს სოციალ-დემოკრატებთან თანამშრომლობის საწინააღმდე-გოო, გინდაც პარტიებს განსხვავებული პოზიციები ჰქონდეთ და თვით საზღვრავდნენ თავიანთ გზასო. წინადადებით გა-მოვიდა, ორივე პარტიიდან რამდენიმე ახალგაზრდამ სცადოს და მუშათა მოძრაობის განხეთქილების საკითხი დაამუშაოსო. ეს წინადადება მომხიბვლელიც გახლდათ და თან უაღრესად

საშიშიც. ერთის მხრივ ვგრძნობდი, როცა ვილის ვუყურებდი, როგორ წონიდა პასუხს – მისი გაუმხელელი ოცნებები გადამდები ხდებოდა. მეორე მხრივ კი, ქვეყნის შიგნით, ჰაერ-შივე გაგვძრდლვნიდნენ. უკვე წარმოვიდგინე, როგორ დაბეჭდავდნენ თავიდან ადენაუერის სიძულვილით აღსავსე პლაკატს: „სოციალიზმის ყველა გზას მოსკოვში მივყავართ“. როგორც ყოველთვის, უსიტყვილ გავუგეთ ერთმანეთს. ვილიმ ჩაილაპარაკა: „ეგონი ძალიან ნერვიულად წრიალებს სკამზე, მგონი რაღაცის თქმა უნდა“. ჩემი წინადადება, ჯერ შეიარაღების კონკრეტულ შემცირებაზე და ევროპული სახლის მოწყობაზე გვეყარა კენჭი, ორივეს მოეწონა.

გორბაჩოვმა მაინც გადაწყვიტა, დისკუსიაზე მარქსისტულ-ლენინისტური ელიტა გამოეყვანა, რომელსაც სოციალისტური ინტერნაციონალის „რევიზიონისტი“ თავმჯდომარე უხელმძღვანელებდა. ბრანდტმა აღიარა, „კაპიტალი“ ბოლომდე არ წამიკითხავსო. მარქსმა ვერც ელექტროძრავი იწინასწამეტყველა და ვერც ატომის ბირთვის გახლეჩაო. დიდი მოაზროვნე იყო და იქნებაო, მაგრამ სოციალ-დემოკრატიული პარტიების წარმატება სწორედ იმაში მდგომარეობს, რომ დახურული სისტემა არ აქვთ, ყოველთვის ცდილობენ აუცილებელი შესაძლებლად აქციონო. ფეხი არ მოიცვალა ევოლუციის პრინციპიდან. გამოხმაურება ვერ მიიღო. იდეოლოგიური ელიტის წევრები მოუმზადებლები აღმოჩნდნენ.

მესამე შეხვედრისთვის ბრანდტმა სოციალ-დემოკრატიული პარტიის პროგრამის სათაურები ათარგმნინა. გორბაჩოვმა წაიკითხა და აღფრთოვანებულმა უპასუხა: „ეს ჩემი თემებია“. ბრანდტმა ამჯერად უფრო ცხადად გაუმხილა თავისი იმედი და ხედვა: სოციალიზმის დასასრულის შესახებ ლაპარაკის მაგივრად, ერთხელ უნდა ითქვას, რომ დედამიწის ერთ დიდ ნაწილში ახლა იგი თავიდან იწყებაო. გორბაჩოვმა შემდეგი დასკვნა გამოიტანა: „დაახლოების პროცესი უნდა განვი-

თარდეს. 1914 წელს მომხდარი გახლეჩვის დაძლევა შესაძლებელია“.

მოსკოვიდან რომ ვბრუნდებოდით, ბრანდტი გზაში ჩაფიქრებული იყო. მიხეილ სერგეევიჩ გორბაჩოვის სახით იგი შეხვდა კაცს, რომელიც, მის მსგავსად, გაპედულად ცდილობდა „ახალი აზროვნების“ გარისკვას, და თან ჰქონდა ძალაუფლება, რომელიც თვითონ არასოდეს ექნებოდა. მასში სოციალისტ-მა გაიღვიძა: „იდეა ვერ მოკვდება, სანამ ბავშვები შიმშილით იხოცებიან“.

არა მხოლოდ კომისიის შედეგებმა გადასწია მისი პოზიცია მარცხნივ, არამედ მის შესახებ დისკუსიამაც, მათ შორის კონსერვატორული მთავრობების და ინდუსტრიის წარმომადგენლების მხრიდან, რასაც ბრანდტი დაცინვად აღიქვამდა. „ერთობლივი უსაფრთხოების“ იდეა და საშინელ უსამართლობაზე მინიშნება, რომ შეიარაღებაზე გიუური თანხები იხარჯებოდა და ამავე დროს თითქმის არაფერი სიღარიბის დასაძლევად, მას მეოცენებეობად ჩამოართვეს. აწყენინეს, მაგრამ ვერ შეადრკეს. ქარიზმატულ გორბაჩოვთან ერთად მას ახალი იმედი ჩაესახა: „ეს შორს წაგვიყვანს“. ორგანიზებული სიგიურე ორგანიზებულ გონიერებაში გადაიზრდებოდა, მის საკუთარ ქვეყანაშიც კი. მან მკითხა: „რას იტყვიან შენი ძმები აღმოსავლეთ ბერლინში?“ ვუპასუხე: „მათთვის სასიამოვნო არ იქნება, მაგრამ ეს გზა სოციალ-დემოკრატიული და ერთიანი სოციალისტური პარტიების ერთობლივ დოკუმენტში მონიშნულია“. ბრანდტის მოლოდინმა ისტორიული განზომილება შეიძინა: „თუკი კომუნისტები მარჯვნივ გაიწევიან, სოციალ-დემოკრატებს შეხვდებიან. ეს კი სოციალ-დემოკრატიას ევროპაში დიდ შანსს გაუჩენს“. პირველად არ იყო, მისგან რომ გავიგონე: „რაც უფრო ვბერდები, მით უფრო მემარცხენე ვხდები“.

კედლის დანგრევის მეორე დღეს, 1989 წლის 10 ნოემბერს ვილი და მე ბერლინში „ჩვენი“ შიონებერგის რატუშის წინ გამართულ დიდ მიტინგზე წავედით. ბარათზე რამდენიმე ფრაზა ჩაინიშნა, მათ შორის: „ახლა ერწყმის ერთმანეთს, რაც განუყოფელია“. ოც წელიწადზე მეტი ხნის შემდეგ წავიკითხე შლეზვიგ-ჰოლშტაინის სოციალ-დემოკრატიული პარტიის პოლიტიკოსის, გერტ ბიორზენის სტატიაში, რომ ბრანდტს 1961 წელს, კედლის აშენებიდან მალევე უთქვამს ბერლინის პარლამენტში, რომ „რაც განუყოფელია, ის აუცილებლად შეირნყმება“. ეს არის ჩემ მიერ ხშირად აღმოჩენილი უნარი ბრანდტისა – მას შეეძლო მოგონებები მიებარებინა გონისთვის და მაშინ გამოეძახა, როცა დასჭირდებოდა. კიდევ ერთი, უკვე ნახსენები მაგალითია, როცა 1960 წელს ჰანოვერში ყრილობაზე გამოსვლის მომზადებისას გაახსენდა 1957 წელს ჩემი ნათქვამი გერმანიის ატომური შეიარაღების შესახებ, რომელზეც აღარ გვისაუბრია. და მესამე მაგალითი: 1969 წელს მისი პირველი მთავრობის პროგრამიდან: „მეტი დემოკრატია გავბედოთ!“, რომელმაც ფურორი მოახდინა და დასაბამი დაუდო დებატებს, ვის შეეძლო თავი მოეწონებინა, რომ წვლილი შეიტანა გერმანიაში დემოკრატიის განსამტკიცებლად. ნორვეგის კუნძულ უტოზიზე ანდერს ბრეივიკის შემზარავი დანაშაულის შემდეგ, ნორვეგის პრემიერ-მინისტრმა თქვა: „მეტი დემოკრატია უნდა გავბედოთ!“. ამის შემდეგ ეჭვი აღარ მეპარება, რა არის ამ ფუნდამენტური გამონათქვამის წყარო.

1990 წლის 3 ოქტომბრის გაერთიანების შემდეგ ფედერალურმა კანცლერმა ჰელმუტ კოლმა სამომავლო დიდ მიზნად შიდა გაერთიანება გამოაცხადა. ყველა მრავალრიცხოვანი პარტია უჭერდა მას მხარს. ბუნდესტაგის საგამოძიებო კომისიაზე კი აღნიშნა: „ჩემთვის რომ ეკითხათ, ვიცი, რასაც ვუზამდი

შტაზის ოქმებსო“. სამწუხაროდ, მისთვის არ უკითხავთ, მაგამ მისი შეფასება ძალიან ჰქავდა ბრანდტისას: ესპანეთში სამოქალაქო ომი დაიწყებოდა, გერმანული მეთოდით რომ ეხელმძღვანელათ. და : „აღმოსავლეთ გერმანელები არ შეიძლებოდა იმავე საზომით გაგვეზომა, როგორც მესამე რაიხისგან დარჩენილები“. ჰელმუტ შმიდტმაც მსგავსი აზრი ჩამოაყალიბა: „საზიანოა, რომ 1990 წლის შემდეგ კომუნისტებს უარესად მოვექეცით, ვიდრე ნაცისტებს 1945 წლის შემდეგ“. გენშერი და ლაფონტენიც ამ ძალიან დიდ კოალიციას ეკუთვნოდნენ. მაგრამ ამ კოალიციამ თავისი ვერ გაიტანა აღმოსავლეთ გერმანიის მოქალაქეთა უფლებადამცველების სურვილის წინააღმდეგ, რამაც დასავლეთ გერმანიაში შექმნა შთაბეჭდილება, რომ შტაზი და გდრ ერთი და იგივე იყო. ასე დაიყვნენ ძმები და დები აღმოსავლელებად და დასავლელებად და ოცი წლის შემდეგაც იმაზე ვფიქრობთ, როდის მივაღწევთ თანასწორუფლებიანობას.

ის, რაც რჩება

ბრანდტის თემები დღესაც აქტუალურია: 2013 წელს მსოფლიო ამოცანის წინაშე დგას, მიაღწიოს სტაბილურობას აზის უზარ-მაზარ კონტინენტზე, ეს თითქმის ისეთივე კონფლიქტია, რო-გორიც აღმოსავლეთსა და დასავლეთს შორის დაპირისპირები-სას წარმოშვა ევროპაში ორმა სუპერ-სახელმწიფომ. ბრანდტის მთავარი გზავნილი დღესაც ძალაშია: – მშვიდობა ყველაფერი არ არის, მაგრამ მშვიდობის გარეშე ყველაფერი არაფერია. როდესაც მან ეს წინადადება ჩამოაყალიბა, მსოფლიო ვერ წარ-მოიდგენდა, რომ ვაშინგტონსა და მოსკოვში სახელმწიფო მოლ-ვანეებს ეყოფოდათ სიბრძნე, პასუხისმგებლობა და გონიერება, ცივი ომის საზღვრებს მიღმა ემოციებს არ აჰყოლოდნენ.

აზის საკითხი კიდევ უფრო რთულია. მართალია, მხოლოდ ორ დიდ სახელმწიფოს ხელენიფება ინტერკონტინენტალური ატომური რაკეტებით რეაგირება, მაგრამ ისინი ბრძანებებს ვე-ლარ გასცემენ და ვერც თვითონ გადაწყვეტენ, როგორ უნდა მოიქცნენ მათი დაცვის ქვეშ მყოფნი, მეგობრები თუ მექავ-შირები. გინდაც ჩინეთის ატომურ იარაღს არ შეეძლოს საპა-სუხო დარტყმის განხორციელება, ეს ახალი სუპერ-სახელმწიფო საკმარისად ძლიერია, რომ არ დაემორჩილოს ვაშინგტონისა და მოსკოვის მითითებებს. იგივე ითქმის ინდოეთსა და პაკისტანზე და ატომური იარაღის არმქონე ინდონეზიასა და იაპონიაზე და, თუ გნებავთ, ავსტრალიასა და ახალ ზელანდიაზეც კი.

ალბათ ბარაკ ობამას მიერ მოსკოვის მიმართ ამერიკის საგარეო და უსაფრთხოების პოლიტიკის გარდაქმნა კონფრონტაციის რეჟიმიდან კოოპერაციის რეჟიმზე უფრო ძლიერ გლობალურ განზომილებას შეიძენს. რაც სამოცდაათიანი წლების დასაწყისში წარმატებული აღმოჩნდა, ახლა თავიდან უნდა ისწავლოს ბევრმა: დემოკრატია და ადამიანის უფლებები კი არა, არც თავისუფლება, არამედ მშვიდობა უნდა გახდეს გლობალური მოვლენა და უმაღლესი ღირებულება. იმ პარტნიორების მიმართაც, რომლებიც არ იზიარებენ დასავლური დემოკრატიის სტრუქტურას, დიალოგი რჩება ერთადერთ საშუალებად, რათა გონივრულად მოგვარდეს კონფლიქტები და დაბალანსდეს ინტერესები. ვერცერთი დიდი გლობალური თუ რეგიონალური პრობლემა ვერ გადაიჭრება სამხედრო გზით. ძალის არგამოყენება ისევ აქტუალური თემაა, არა მხოლოდ როგორც სუსტის ძლიერი მხარე, არამედ როგორც საფუძველი იმისა, რომ გავუმელავდეთ დიდ, გლობალურ პასუხისმგებლობას.

უცნაური სულაც არ ყოფილა – როგორც მეგობარმა ვკითხე ვილის უფროს ვაჟს, პეტერს, რას ფიქრობ, რომ შეიქმნას სადისკუსიო წრე, რომელიც განიხილავს, თუ რა დარჩება მამაშენის პოლიტიკური შეხედულებებისგან-მეთქი. გარდა ამისა, ვკითხე გიუნტერ გრასს, კრიტიკულ მეგობარს, რომელიც იმ მომენტში სოციალ-დემოკრატიულ პარტიასთან ურთიერთობის კიდევ ერთ მძიმე ფაზას გადიოდა. მან მაშინვე განაცხადა თანხმობა მონაწილეობაზე. ასე შეიკრიბა გაერთიანებული ქვეყნის ორივე ნაწილის წარმომადგენლებისგან ჯგუფი, ინტელექტუალურად დამოუკიდებელი ადამიანები, ზოგს ჰქონდა ბმა პარტიასთან და ზოგს არა, მაგრამ ყველა იზიარებდა ვილი ბრანდტის პოზიციას, რომ ცენტრიდან მარცხნივ უნდა გვეცადა ძალაუფლებასა და სულიერებას შორის ნაპრალის ამოვსება. ვილი ბრანდტის საზოგადოების დამაარსებლებს შორის იყვნენ გიუნტერ გაუზი და კრისტა ვოლფი, დღეს არცერთი ცოცხა-

ლი აღარაა, ქრისტინე ჰომან-დენპარდტი, იენს რაიხი, კლაუს სტეკი და ფრიდრიხ შორლმერი, რომელიც კარგა ხანია წარმართავს ჩვენს შეხვედრებს. თემები არ გველევა.

ვილიმ 1971 წელს დაბადების დღეზე ჰაინრიხ ბრიუნინგის მოგონებები მაჩუქა მინაწერით: „ასე არა!“ მაშინ, 1930 წელს, ეკონომიკური კრიზისის ყველაზე მწვავე წერტილზე, გადაჭარბებულმა დაზოგვის პოლიტიკამ რესპუბლიკის მოწინააღმდეგები გააძლიერა, დემოკრატია დაასუსტა და მისი დასასრული გამოიწვია. როცა ძალიან ბევრი ადამიანი გაჭირვებულია და იმედს კარგავს, დემოკრატია საფრთხეშია. ამას ვხედავთ საბერძნეთში, მას გარედან საგარეო-პოლიტიკური წესიც ემატება, რაც ქვეყნის ღირსებას ლახავს.

მისი „ასე არა!“ დღევანდელობაზე რომ გადმოვიტანოთ, მიანიშნებს: დემოკრატიას საფრთხე მხოლოდ ევროპულ დონეზე არ ემუქრება. ადამიანებს ესმით, რომ ეკონომიკის, ვალუტისა და ვაჭრობის საკითხები ეროვნულმა სახელმწიფოებმა, რომელთა არსებობაც აუცილებელია, ევროპას გადააბარეს. მაგრამ რიგითი მოქალაქე ექსპერტი არ არის, რომ ფინანსური კონსტრუქციების, სახელმწიფოების დაფინანსების ან ბანკების გადასარჩენი კონცეფციების რიცხვებისა და სიტყვების დომხალი გაშიფროს. თუკი არ დაეზარა და წაიკითხა, შეიტყობს, რომ დაპირისპირებაა ევროკავშირის საბჭოს, ევროკავშირის კომისიას და ევროპის პარლამენტს შორის, რომელიც ხალხის წარმომადგენლობის სრული უფლებამოსილებისთვის იბრძვის. მოკლედ რომ ვთქვათ: სულ უფრო მეტი ადამიანი გრძნობს, რომ ევროპის დიდი იდეა იქცა ბიუროკრატიული აპარატების გაუგებარ ბრძოლად კომპეტენციისთვის. თუკი ეს ადამიანები ზურგს შეაქცევენ ევროპის იდეას, მისი სულიც ჩაქრება.

დემოკრატია ევროპული გამოგონებაა. პოლიტიკური ძალაუფლება უმაღლესი ხელისუფლის, ხალხის მიერ თავისუფალი არჩევნების საშუალებით გადაეცემა მთავრობას, და არა

ბაზარს. პოლიტიკამ საზოგადოების ინტერესები უნდა წარმოადგინოს. ამას კი მხოლოდ მაშინ შეძლებს, როდესაც ეკონომიკას კანონების საშუალებით დაუწესებს ჩარჩოებსა და წესებს, რომელთა შიგნითაც მათ შეუძლიათ თავიანთ მოგებაზე ორიენტირებული ინტერესების გატარება. სხვა სიტყვებით რომ ვთქვათ: დემოკრატია ბაზარზე უფრო მაღლა უნდა იდგეს.

ხისტ რეალობაში ფინანსების ეკონომიკამ ათწლეულების გასაყარამდე აღმოაჩინა შესაძლებლობა, განეცალეავებინა ფული პროდუქციისგან. მსოფლიო მასშტაბის სიხარბემ ვირტუალური ფულის მოსაპოვებლად საპნის ბუშტი შექმნა. როდესაც იგი გასკდა, ბანკების გადასარჩენად სახელმწიფოს მეტი არავინ აღმოჩნდა. მისმა გადასარჩენმა პაკეტებმა მანამდე წარმოუდგენელი თანხები შეადგინა და სახელმწიფოებმა თავიც და საკუთარი მოქალაქეებიც ვალებში გადააგდეს. ასე უსასრულოდ ვერ გაგრძელდება. ვინ ან რამ უნდა გადაარჩინოს ბოლოს თავად სახელმწიფოები?

ვილი ბრანდტის ლოზუნგს „მეტი დემოკრატია გავბედოთ!“ ანგელა მერკელმა დაუპირისპირა „მეტი თავისუფლება გავბედოთ!“. ამ პაროლმა მიგვიყვანა მისი „ძალაუფლების მიმართ კონფორმისტულ პოლიტიკამდე“. ბაზარმა სახელმწიფოები აქეთ-იქით აბურთავა ან სარეიტინგო აგენტურების საშუალებით ჩამოაქვეთა. ამოცანა შემდეგია: შევქმნათ „პოლიტიკურად კონფორმისტული ბაზარი“. გერმანიას, როგორც ეკონომიკურად ყველაზე ძლიერ სახელმწიფოს ევროპის ცენტრში, განსაკუთრებული პასუხისმგებლობა ეკისრება. მან უნდა მოიპოვოს ჩვენი ევროპელი მეზობლების მხარდაჭერა ამ მიზნის მისაღწევად. მეზობელ ქვეყნებში სულ უფრო და უფრო უკეთ ესმით, რომ ჩვენი კონტინენტი თავის რაობას დაკარგავს, დემოკრატია თუ დაიკარგა. ასეთი ორიენტაციით ევროპას ჯერ კიდევ საკმაო წონა აქვს ამ მულტიპოლარულ სამყაროში. არცერთმა სახელმწიფომ არ უნდა გადაიღოს დასავლური დე-

მოკრატიის მოდელი იმისთვის, რომ ბაზარი დაუქვემდებაროს პოლიტიკას. ამ ორიენტაციისთვის გლობალური კონსენსუსი აღბარ შედგება.

უორუ სოროსი, წარმოშობით უნგრელი, ამერიკის მოქალაქე, საბჭოთა სისტემის ჩამოშლის შემდეგ გვაფრთხილებდა, რომ კაპიტალიზმიც შეიძლება ჩამოიშალოს, თუკი რეფორმირების უნარს დაკარგავს. ფინანსური ეკონომიკის მექანიზმებში ჩახედულობის წყალობით, მან კიდევ ბევრი მილიარდი დოლარი იშოვა: გაუმარჯოს კაპიტალიზმს, სანამ იგი ცოცხალია! ისე ჩანს, თითქოს სოროსი მართალია, თითქოს მართლაც სისტემის კრიზისთან გვქონდა საქმე და არა მხოლოდ სისტემის შეცდომასთან. დასავლეთში არსებობს კაპიტალიზმის რეფორმირების დემოკრატიული საწყისები. მისგან დამოუკიდებლად მსოფლიოს დიდი ნაწილი „თავის“ კაპიტალიზმს განავითარებს.

ჩვენი ათასწლეულის ერთ-ერთ ყველაზე დიდ გამოწვევას წარმოადგენს ინტერნეტი. იგი უკვე იმაზე მეტად ცვლის ჩვენს ცხოვრებას, ვიდრე თავის დროზე წიგნის ბეჭდვის გამოგონებამ შეცვალა. დიდი ხანი დასჭირდა, სანამ ადამიანების უმრავლესობა წერა-კითხვას ისწავლიდა. ინტერნეტი ცხოვრებას აიოლებს, მაგრამ ახალ კრიმინალურ პოტენციალს ქმნის და როგორც ისტორიის ყველა ტექნიკური ხასიათის გარდატეხა, სამხედრო გამოყენების ახალ შესაძლებლობებსაც ავლენს. ერთ-ერთ მათგანს კიბერ-ომი ეწოდება, უკვე რამდენჯერმე გამოიცადა და მას უაღრესად გასაიდუმლობულად ინახავენ. ხომ ვიცით, რომელი ქვეყანა რომელ ახალ უნარებს ავითარებს. ქსელის გაკონტროლების ნებისმიერი მცდელობა აქამდე უშედეგო აღმოჩნდა, იქნება ეს ამერიკა, ნატო, გერმანია, რუსეთი თუ ჩინეთი.

ყველა, ვინც უსაზღვრო დიგიტალური ტექნოლოგიით უკავშირდება ერთმანეთს, მსოფლიო მასშტაბით და ერთდროულად იმყოფება ერთსა და იმავე საინფორმაციო დონეზე და

შეუძლია აქტიური კომუნიკაცია. არაბული გაზაფხული ამ ქსელის არსებობის შედეგია, ისევე, როგორც – ეროვნული ნიშნით განსხვავებული – ემანსიპირებული მოქალაქის აჯანყება მთელ მსოფლიოში – ამერიკიდან ჩინეთამდე. მაგრამ ქსელის მომწოდებლის მიერ მომხმარებლის და საჯარო სივრცის მანიპულირების შესაძლებლობაც გაიზარდა.

ახალ ტექნოლოგიებს იარაღის ახალი სისტემები მოაქვს. ისინი მიზანს უფრო აზუსტებენ, გლობალური წვდომაც აქვთ და ატომური იარაღის სტრატეგიული გავლენაც. დრონების ფართო არსენალის საშუალებით და კომუნიკაციის უსაზღვრო ტექნოლოგიების გამოყენებით მკვლელობის მასშტაბიც უსაზღვროა. შეგვიძლია ვირწმუნოთ, რომ ეს ტექნიკა ამერიკის მონოპოლიად არ დარჩება.

ჩვენი საუკუნის ახალი გამოწვევები მხოლოდ ტექნოლოგიური ან სამხედრო ხასიათის არ გახლავთ, იგი ეხება გარემოსაც, რაზედაც ასევე გაამახვილა ყურადღება ბრანდტის კომისიამ. მსოფლიო მასშტაბით სავალალოდ მცირდება წყლის მარაგი და თუკი გლობალური დათბობის პროცესი საუკუნის ბოლომდე ოთხ გრადუსს მიაღწევს, ყველა სახელმწიფო იძულებული გახდება გაერთიანდეს გადარჩენის საერთო ინტერესის გარშემო.

„მარცხნივ და თავისუფალი“, ასე აღწერა ვილი ბრანდტმა თავისი ცხოვრების გზა 1930-დან 1950 წლამდე – ლიუბეკიდან ბერლინამდე, მემარცხენე სოციალისტიდან სოციალ-დემოკრატიამდე. წიგნი ეხება ბრძოლას ცალკეული ადამიანის თავისუფლებისთვის და ისეთი საზოგადოებისთვის, სადაც არ იქნება სიდუხჭირე. და იგი მოგვითხრობს იმედზე, რომ უფრო სამართლიანი და მშვიდობიანი იქნება მსოფლიო, რომელსაც ერთხელ უკვე გაუცრუა იმედები რეაქციულმა სიბნელემ, ისტორიის-გან დაცლილმა სიბეცემ და სახიფათო ამბიციებმა. შედეგად ევროპის დიდი ნაწილი განადგურდა, რასაც დღემდე ვიმკით.

„სამომავლოდ კიდევ უფრო საშინელი რამ მოხდება, თუ არ ვიზრუნებთ, თავიდან ავიცილოთ მესამე მსოფლიო ომი“. ასე მთავრდება წინასიტყვა, რომელიც პრანდტმა ამ წიგნს 1982 წლის გაზაფხულზე წარუმძღვარა. ოცდაათი წლის შემდეგაც აქტუალურია მისი სიტყვები: „მშვიდობა ყველაფერი არ არის, მაგრამ მშვიდობის გარეშე ყველაფერი არაფერია“.

**წიგნში გამოყენებული ფოტოები წარმოადგენს შემდეგი
პირებისა და ორგანიზაციების საკუთრებას:**

ბარბარა კლემი 14

ხელოვნების, კულტურისა და ისტორიის ფოტოსააგენტო (bpk)/ვანს
ჰუბმანი 9

ფედერალური ფოტოარქივი 12

გერმანის საინფორმაციო სააგენტო (dpa) 3, 5, 11, 13, 19

ი.ჰ. დარბინგერი / ფრიდრიხ ებერტის ფონდი 7

ბერლინის მინის არქივი 1 (შიუტცი 69347), 4 (შუბერტი, 77510)

გამომცემლობა „შპიგელი“ 8

ულშტაინის ფოტოები 2, 6, 10, 15-18

წიგნი დაკაბადონდა გამომცემლობა „ინტელექტში“

ISBN 978-9941-482-19-9



თბილისი, პ. ჩანჩიბაძის ქუჩა 6

☎ 214 34 01, 577 33 38 57

stamba.damani@gmail.com

 [სტამბა დამანი / Print House Damani](#)

1. მათ ერთმანეთი მოსწონთ.
მეორე მსოფლიო ომის შემდეგ
მშობლიურ ქალაქში პირველად
ჩამოსულ მარლენე დიტრიხს
ბერლინის მმართველი მერი
ვილი ბრანდტი რატუშაში
ესალმება.



2. გერმანელი კენედი? მმართველი მერი სტუმრად ჯონ კენედისთან
თეთრ სახლში, 1962 წელი.



3. ბრანდენბურგის
კარიბჭესთან სენატის
ენცელარის შეფთან
პაინრის ალბერტცეთან
(მარჯვნივ) ერთად.



4. აშშ-ში მოგზაურობიდან
დაბრუნებისას ტემპელპოლის
აეროპორტში.



5. დიდი კოალიციის კანცლერთან კურტ გეორგ კიზინგერთან ბრანდტს თავშეეავებული დამოკიდებულება ჰქონდა. ერჩივნა, ყოველდღიური ურთიერთობა ფრაქციის თავმჯდომარისთვის, ჰელმუტ შმიდტისთვის მიენდო.



6. პარტიის ყრილობა 1969 წლის აპრილში ბად გოდესბერგში. ხუთი თვის თავზე ბრანდტმა თავისუფალ დემოკრატებთან კოალიციის შექმნა გადაწყვიტა და იგი კანცლერად აირჩიეს.



7. ხუმრობისთვის კანცლერის აპარატში დრო იშვიათად გვაქვს,
მაგრამ თუკი სტუმარი იგვიანებს...

DER SPIEGEL

9. FEBRUAR 1970 - NR. 7
24. JAHRGANG - DM 1,50
INCL. MEHRWERTSTEUER
— C 6380 C —

Mission in Moskau



Kanzler-
Berater
Bahr

8. უურნალ „შპიგელის“ ყდა 1970 წლის 9 თებერვალს. უკანა პლანზე ტინტორეტოს ნახატი – დოფისა და ბრწყინვალე დიპლომატის პაოლო ტიეპოლოს პორტრეტი, რომელიც კიზინგერმა შეარჩია კანცლერის კაბინეტისთვის. ბრანდტმა შეგნებულად გააგრძელა ადენაუერის შემდეგ დამკვიდრებული ტრადიცია და არაფერი შეუცვლია თავის სამუშაო ოთახში.



9. მოსკოვის ხელშეკრულების ხელმოწერის წინ კრემლში 1970 წლის 12 აგვისტოს. სანამ ბრანდტი და კოსიგინი რაღაცას არკვევენ, უკანა რიგებში უკვე მჩიარულობენ.



10. მოსკოვის აეროპორტში ვალენტინ ფალინთან ერთად.

11. უსაფრთხოების
მრჩეველთან ჰენრი
კისინჯერთან
თანამშრომლობა მაღე
იქცა ნდობით აღსავსე
ურთიერთობად.



12. გერმანულ-გერმანული მოლაპარაკებები მიხაელ კოლთან მდორედ
მიედინებოდა და ხშირად გვიწევდა პირისპირ შეხვედრა.




13. სიმპათია პირველი
ნახვისათანავე და
რუთ ბრანდტის ხელის
უსასრულოდ ხანგრძლივი
ამბორი – ბრეჟნევი
1971 წელს ბონში.



14. მარჯვნივ შეფები სხედან, მარცხნივ მომლაპარაკებლები, რომელთაც
თარჯიმანი არ სჭირდებათ. ბრეჟნევი და გრომიკო 1973 წლის მაისში
ბონში, პეტერბერგზე.

15. „ჩვენ ყველას
გვიყვარხარ!“ დაიძახა
ვენერმა ფრაქციის
თანდასწრებით ბრანდტის
გადადგომის შემდეგ.
მისი სახე ყველაფერზე
მეტყველებს.



16. გაუცხოება აშკარაა – 1975 წელს პარტიის ყრილობაზე მანჰაიმში.



17. ცალ-ცალკე და მაინც ერთად სახელმწიფოსა და პარტიის მიმართ
პასუხისმგებლობის გამო. ბრანდტი და შმიდტი 1982 წელს.



18. მეგობარი მილოცავს
70 წლის იუბილეს 1992
წელს.



19. ახალი იმედების მოლოდინში: ბრანდტი და გორბაჩივი ბონში 1989 წელს.

მეორნ ბარი 1922 წელს დაიბატა
იურინგიაშვილი. ომის შემდეგ უკრანალისტად
მუშაობდა, მათ შორის, ხელმძღვანელობდა
RIAS-ს რედის პონში. 1960-1966 წლებში
იყო ბერლინის სენატის სპიციალისტი. ვიდი
ბრანდტის შინისტრობის ფროს
ხელმძღვანელობდა საგარეო უნიტის
ფარეგმის შტაბს, 1969-1974 წლებში
ფედერალური კანკულერის პარატში იყო
სახელმწიფო მუზეუმი, ბრანდტის
გადაფრომის შემდეგ იკავებდა
ეკონომიკური თანამშრომლობის
ფედერალური მინისტრის პოსტს, იყო
სოციალ-ფინანსურის პარტიის საქმეთა
ფედერალური მნარმანებელი და
პარტიაშვილის შეფინობის კვლევითი
ინსტიტუტის დირექტორი.

კილი ბრანდტი და ეგონ ბარი – ეს გახლდათ
თანამშრომლობის თითქმის უნიკალური შემთხვევა.
თითოეულმა მათგანმა მხოლოდ მეორეს სამუალებით შეძლო
საკუთარი ნიჭის სრულყოფილად გამოვლინება.“ რიხარდ
ფონ ვაიცხეკერი სასიცეფილო სარეცელებე ბრანდტისთვის
მის ვაჟს ლარსს უკითხადს, ვინ იყენენ შენი მეგობრებით.
ბრანდტს უპასუხია: „ეგონი“. ეგონ ბარი ათწლეულების
განმავლობაში მართლაც იყო ბრანდტის უახლოესი
პოლიტიკური თანამგზავრი და მეგობარი. დიდი
სოციალ-ფინანსური მოლიტიკოსის 100 წლის იუბილეს
უძღვნის იგი ერთობლივად გატარებული ნლების ძალიან
პირადულ მოგონებებს – გეთავაზობს ბრანდტის, როგორც
ადამიანის პორტრეტს და მთელი ემოქის ბრნყინვალე
დახასიათებას.